In31646 ADABIYOT 6

Jonatan Svitt.

Shayxxoda), Odil Yogubov. Azim Suyun. S. AHMEDOV, R. QO'CHQOROV, SH. RIZAYEV

ADABIYOT

UMUMIY OʻRTA TA'LIM MAKTABLARINING 6-SINFI UCHUN DARSLIK-MAJMUA

OʻZBEKISTON RESPUBLIKASI XALQ TA'LIMI VAZIRLIGI NASHRGA TAVSIYA ETGAN

TOSHKENT «MA'NAVIYAT» 2005

83.3(59) 438eK 242848TH 9711Aziz o'quvchi!

Siz 5-sinfda oʻzbek va jahon adabiyotining ajoyib namunalari bilan tanishgan, buyuk siymolarning, iste'dodli ijodkorlarning tarjimayi hollaridan xabardor boʻlgan edingiz. Shubha yoʻqki, Siz egallagan bu bilimlar dunyoqarashingizni yanada boyitdi, ezgulikka, goʻzallikka boʻlgan mehringizni oshirdi.

Bu yil, 6-sinfda yanada koʻproq ijodkorlar bilan tanishasiz, rang-barang asarlarni teranroq oʻrganasiz. Endi Sizning koʻngil uyingizga oʻzbek mumtoz adabiyoti-yu jahon adabiyotidan ham, hozirgi zamon adabiyotidan ham koʻproq adib-u shoirlar kirib kelishadi. Ularga qalbingizdan keng oʻrin bering, asarlarini qunt bilan, sinchiklab oʻrganing. Darslikda badiiy asarlarning turlari va janrlari haqida nazariy ma'lumotlar ham keltirilgan. Bu esa Sizning adabiyot ilmi haqidagi bilimlaringizning yanada boyishiga, badiiy asar mohiyatini chuqurroq anglashingizga yordam beradi. Sizga yana bir narsani tavsiya qilamiz: ushbu darslikda koʻpgina asarlar toʻliq holida emas, balki qisqartirib keltirilgan; Siz ana shu asarlarning toʻliq nusxasini topib oʻqisangiz, adabiyot fanini yanada chuqurroq oʻzlashtirgan, ayni paytda juda katta estetik zavq, ma'naviy oziq olgan boʻlasiz.


Bu ishda Sizga muvaffaqiyatlar tilaymiz!

6031646

Osiyo Rivojlanish Banki krediti mablagʻlari hisobidan DARS-LIKLAR AYLANMA JAMGʻARMASI (DAJ) uchun chop etildi.

Ushbu nashrga doir barcha huquqlar muhofaza qilinadi va nashriyotga tegishlidir. Undagi matn va rasmlarni nashriyot roziligisiz toʻliq yoki qisman koʻchirib bosish taqiqlanadi.

A 4702620204-22 M25(04)-05



O'ZBEKISTON RESPUBLIKASINING DAVLAT MADHIYASI

Mutal BURHONOV musigasi

Abdulla ORIPOV soʻzi

Serquyosh, hur o'lkam elga baxt, najot, Sen o'zing do'stlarga yo'ldosh mehribon! Yashnagay to abad ilm-u fan, ijod, Shuhrating porlasin toki bor jahon!


NAQAROT:

Oltin bu vodiylar – jon Oʻzbekiston, Ajdodlar mardona ruhi senga yor! Ulugʻ xalq qudrati joʻsh urgan zamon Olamni mahliyo aylagan diyor!

Bagʻri keng oʻzbekning oʻchmas iymoni, Erkin, yosh avlodlar senga zoʻr qanot! Istiqlol mash'ali, tinchlik posboni, Haqsevar ona yurt, mangu boʻl obod!

NAQAROT:

Oltin bu vodiylar – jon Oʻzbekiston, Ajdodlar mardona ruhi senga yor! Ulugʻ xalq qudrati joʻsh urgan zamon Olamni mahliyo aylagan diyor!



MA'NAVIYAT XAZINASI

Aziz oʻquvchi!

Oʻtgan yili adabiyot darsidan anchagina saboq oldingiz. Adabiyot nima ekani, odamlar badiiy asar oʻqishga nega qiziqishlari, adabiy asarlar qanday turlarga ajralishi-yu uning ayrim mumtoz namunalaridan xabardor boʻldingiz. Dars davomida oʻrganilgan koʻplab asarlar hamon yodingizdan chiqmay, Sizni oʻylantirayotgan boʻlsa ham ajab emas. Masalan:

Shiroqni bu qadar jasoratga undagan qanday kuch edi?

Bir qarashda bezori koʻrinadigan koʻcha bolasi Yanguli nega otasiga ergashib Gretsiyaga ketishni xohlamadi? (Nodar Dumbadzening «Hellados» hikoyasi) yoki Kichkina shahzoda (fransuz adibi Antuan de Sent-Ekzyuperining shu nomli qissasi qahramoni) nima uchun asar oxirida Yer yuzini tark etib ketdi? degan oʻnlab savollar oʻy-fikringizga oʻrnashib qolgan boʻlsa, hayron boʻlmang.

Bu holat – yaxshilik alomati. Ya'ni, Siz bu asarlarni faqat baho olish uchungina, shunchaki oʻqimabsiz. Diqqat bilan, koʻnglingizni berib mutolaa qilibsiz. Ularning qahramonlari Sizning yuragingizdan joy olibdi. Bir soʻz bilan aytganda, ma'naviy olamingiz kengayib, yanada goʻzallashibdi!

Hozirgi kunda televideniya va radioda, gazeta va jurnallarda «ma'naviyat», «insonning ma'naviy dunyosi» degan iboralar tez-tez ishlatilayotganini bilasiz. Ayrimlar ogʻzidan esa: «Kitob oʻqimay, adabiyot bilan qiziqmay ham yashasa boʻladi-ku, qancha odam yashayapti-ku, hamma olim boʻlishi shartmi?» degan gaplarni eshitayotgan boʻlsangiz ham, ajab emas.

Xo'sh, inson ma'naviyatining, ruhiyatining yuksalishida adabiyot, kitob mutolaasi qanday o'rin tutadi? Boyagiday gaplarni aytayotgan odamlarga nima deb javob berish mumkin?



Gap shundaki, inson hayvondan farq qilaroq, nafaqat moddiy ozuqaga, balki ma'naviy-ruhiy oziqqa ham muhtojlik sezadi. Bu nima degani?

Agar Siz iste'mol qiladigan oziq-ovqatlar jismingiz ehtiyojlarini qondirib, uni holsizlanishdan asrab, doimiy quvvatlantirib tursa, ma'naviy oziqlanish Sizni ruhiy boyitib, tetiklashtirib, ma'naviy qashshoqlashishdan asraydi. Odamning moddiy boyliklarining ko'payishi uni o'z-o'zidan ma'naviy boy qilib qo'ymaydi. Inson och-yupun qolmaslik to'g'risida qanchalik o'ylasa, o'zini ma'naviy yuksaltirish to'g'risida ham undan-da ko'proq jon kuydirishi kerak bo'ladi. Ma'naviy yuksalishning eng samarali yo'llaridan biri esa kitobga oshno tutinish, jumladan, adabiy asarlar mutolaasiga ixlos qo'yishdir.

Adabiyotni bekorga «ma'naviyat xazinasi» deya nomlamaydilar. Chunki birinchidan, adabiyot deb atalgan noyob sohada faqat va faqat tugʻma iste'dodli kishilargina faoliyat koʻrsata oladilar. Ular oʻz dunyoqarashi va tafakkuri jihatidan boshqalarga ibrat boʻladigan shaxslardir. Demak, ularning ijodiy asarlarida katta bir xalq, hatto insoniyat badiiy tafakkuri izlanishlarining eng noyob durdonalari jamuljam boʻladi. Siz «yozuvchishoirman» deb yurgan hamma kishilar ham shunday imkoniyatga egami, unda bemaza she'rlar, birov oʻqimaydigan kitoblar qayerdan paydo boʻladi?» deb soʻrashingiz mumkin.

Ziyrakligingizga balli!

Aytganingizdek, oʻzini «yozuvchi-shoirman» deb tanishtiradigan hammani ham chinakam ijodkor deb bilmaslik kerak. Haqiqiy iste'dodlar kamdan-kam tugʻiladilar. Shu tufayli ham butun xalq, jamiyat bunday ijodkorlarning qadriga yetmogʻi, ular qoldirgan durdonalarni koʻz qorachigʻidek asrab, oʻqib-oʻrganmogʻi nihoyatda muhimdir. Navoiy davrida ham, Bobur zamonida ham, Choʻlpon-u Oybeklar yashab ijod etgan vaqtlarda ham adabiyot maydonida ot surishga harakat qilgan, biroq changi chiqsa ham dongʻi chiqmagan qalamkashlar juda koʻp uchraganlar. Biroq, «vaqt – eng odil hakam» deyilganidek, xalq yodida chinakam iste'dodlar va ular tomonidan yaratilgan yuksak san'at namunalarigina saqlanib qoldi.

Adabiyotning aynan ma'naviyat xazinasi ekanligining yana bir sababi shundaki, uning bagʻrida hozirga qadar insoniyat ardoqlab kelayotgan eng tansiq hislar – insonparvarlik (gumanizm), adolat, shafqat, oʻzaro hamjihatlik,



doʻstlik, mehr va muruvvat, sevgi-muhabbat, goʻzallikka tashnalik singari oʻlmas insoniy tuygʻular jamuljamdir. Adabiyotga oshno tutingan odam qalbiga bu hislar koʻchib oʻtishi, uni hazrati insonga aylantirishi, hayotiga nur olib kirib, turmushini turfa mazmun bilan boyitishi aniqdir.

Sizni badiiy adabiyotni ixlos bilan oʻqishga da'vat etayotganimizning sabablari koʻp, albatta. Bu masalada, keling, uzoqqa bormay, oʻzingizdan kelib chiqaylik. Oʻtgan oʻquv yilida oʻnlab shoir-yozuvchilarning qator asarlarini oʻqib-oʻrgandingiz. Jumladan, Imom Buxoriy bobomizning zahmatli mehnati orqali yetib kelgan hadislardan odob-axloqqa, ilmning zaruratiga oid oʻgitlarni oʻzlashtirgan boʻlsangiz, E.Vohidovning «Oʻzbegim» qasidasini oʻqib, shu millat vakili boʻlganingizdan koʻnglingiz togʻdek koʻtarildi. Minglab yillar ilgari sodir boʻlgan voqealar sharhi — «Toʻmaris» afsonasi yoki Xurshid Davronning Vatan haqidagi rivoyatlaridan ona yurtimiz ozodligi qanchalar muhim masala ekanligini angladingiz.

Endi ayting-chi, shu asarlarni oʻqigan va uqqan tengdoshingiz bilan ularni oʻqimagan yoki oʻqisa-da uqmagan sinfdoshingiz orasida qandaydir farq bormi-yoʻqmi? Abdulla Oripovning «Oʻzbekiston» qasidasini yurak-yuragingizdan chiqarib yoddan oʻqiyotganingizda oʻzingizni qandaydir boshqacha his qilishingizni-chi, sezdingizmi?

Toʻgʻri, adabiyot va boshqa san'at turlarining insonga ta'siri darrov sezilib-bilinib qolmaydi. Xuddi yoshingiz ulgʻayayotganini oʻzingiz sezishingiz qiyin boʻlganidek, adabiyotning Sizga oʻtkazayotgan ta'sirini ham qoʻl bilan ushlab, koʻz bilan koʻrish mumkin emasdek. Lekin koʻp kitob oʻqiydigan, adabiyotga chin dildan qiziqadigan doʻstlaringiz yurishturishiga, odob-axloqiga razm solib qarasangiz, ular boshqalardan ancha ajralib turishini sezmaslik-koʻrmaslik ham mumkin emas. Ularning gapsoʻzlari salmoqli, mazmunli boʻlib borayotgani, bu bolalar koʻcha changitib yurishdan koʻra biror foydali mehnat qilishga harakat qilishlari, uyatsiz soʻzlar bilan lafzini bulgʻashdan tiyilishlarini ham sezsangiz kerak. Ular uyda yozib kelgan inshosi yoki referatini oʻqib berayotganida eng toʻpolonchi sinfdoshlaringiz ham jimgina eshita boshlagani ham bor gap.

Xoʻsh, bu kitobsevar bolalarning boshqalardan bir-ikki qadam oldinroqqa oʻtib olishlariga ham ota-onalar, ham ustozlarning nazariga tushishlariga koʻproq nima sabab boʻldi? Nega koʻplab fan olimpiadalarida



aksariyat oʻshalar gʻolib chiqyapti? Nega maktabingizda oʻtkazilayotgan «Davlat tili bayrami»ga sinfingizdan aynan shu bolalar tanlab olindi? Nima uchun bu doʻstlaringiz ortidan turli xunuk gaplar eshitmaysiz? Ularni boshqalardan ildamroq yurishiga kuch berayotgan narsa nima ekan?

Barakalla, toʻgʻri topdingiz! Buning nomi – MA'RIFAT. Kitob orqali, adabiy asarlarni oʻqib-oʻrganish tufayli orttirilgan bebaho boylik – ma'naviyat va ma'rifat!

Bolalar, eshitgan boʻlsangiz kerak: xalqimizda «Olim boʻlish oson, odam boʻlish qiyin» degan maqol bor. Demak, inson olim boʻlib ham odam boʻlmasligi mumkin ekan-da. Demak, oʻqishda ham oʻqish, uqish va his qilish bor ekan-da. Koʻp kitob oʻqishning, olim degan nomga sazovor boʻlishning oʻzi ham yetarli emas ekan-da.

Gap shundaki, kitob mutolaasi odam bolasidan bu ishga jiddiy berilishni, yuqorida ta'kidlaganimizdek, ixlos bilan yondashishni talab qiladi. Falon asarni o'qidingmi-o'qidim qabilida ish tutish mutlaqo yaramaydi. O'sha asarni, uni yozgan yozuvchi yoxud shoirning orzu-o'ylari, asarga singdirgan tuyg'ularini his qilish kishidan alohida e'tiborni talab qiladi. His qilib o'qilmagan asar chinakam gul bilan plastmassadan yasalgan gulning farqiga bormagandek gap.

Xo'sh, asarni his qilib o'qish nima degani?

Bilasizki, har qanday badiiy asarda insonga xos boʻlgan fazilat va illatlar ifoda etiladi. Goʻyo hayvonlar toʻgʻrisida bitilgan ertaklarning ham tag-zaminida insoniy tuygʻular yotadi. Tuygʻular esa faqat aql orqali emas, balki koʻngil, yurak orqali seziladi. Deylik, bir asar qahramoni ogʻir ahvolda qoldi. Yomon odamlar qilmishidan uning taqdirida qorongʻi kunlar boshlandi. Uning bu holatini yaqindan his qilish, bu voqealar xuddi Siz bilan boʻlayotgandek qarash ruhiyatingizni toblaydi, Sizni chiniqtiradi, yomonliklardan qutulish yoʻllarini oʻrgatadi. Siz oʻzingiz sezib-sezmagan holda dunyoda yomonlik degan yovuz kuch bor ekanini bilasiz. Uni olamga yoyayotgan ham Siz-u bizdek insonlar ekanini koʻrasiz. Va, eng muhimi, bu yomonlikka qarshi kurashish ham odamlarning zimmasidagi muhim vazifa ekanini anglab yetasiz. Mana shu anglash Sizni olimgina emas, yaxshi odam ham boʻlishingiz yoʻlidagi dastlabki qadam boʻlsa, ne ajab.

Ona-Vatanimiz o'z mustaqilligini qo'lga kiritganiga unchalik ko'p



boʻlgani yoʻq. Uning ertangi kun taqdiri qanday boʻlishi, dunyo xalqlari orasida orttiradigan obroʻ-e'tibori koʻp jihatdan Sizning qanday odam boʻlishingizga bogʻliqdir desak, hecham hayron boʻlmang. Chunki mamlakatni mamlakat, millatni millat qiladigan uning oʻgʻil-qizlari, bagʻrida oʻstirayotgan farzandlaridir. Agar bu farzandlar faqat bugungi kunini, qorin gʻaminigina oʻylab yashaydigan, yurtdoshlari taqdiriga befarq, oʻz manfaati yoʻlida insof, adolat, iymon tuygʻularini toptab oʻtadigan kimsalar boʻlib yetishsa, bunday yurtning holiga voy. Bunday yurtga chetdan bosib keladigan dushmanning ham keragi boʻlmaydi. Boyagi ma'naviyatsiz, ma'rifatsiz kimsalarning qilmishlari yurtning nafaqat bugunini, balki kelajagini ham xavf ostida qoldirishi turgan gap. Bunday farzandlar qoʻliga oʻtadigan yurtning boyliklari talon-toroj boʻladi, iqtisodiy tanazzul tuganmas dardga aylanadi. Uning madaniyati va san'ati milliy qiyofasizlikka duchor boʻladi. Jamiyat hayotida adolatsizlik, insofsizlik va madaniyatsizlik oddiy holga aylanib, kishilarning kelajakka boʻlgan ishonchi mutlaqo soʻnadi.

Farzandlari ma'rifatli, ma'naviyatli xalqning esa, albatta, iqboli kuladi. Komil farzandlar oʻzini tugʻib katta qilgan ona Vatanining qadrini har narsadan yuksakka qoʻyadi. Ular uchun yurt tinchligi, Vatan ravnaqi, el farovonligi yoʻlida oʻqib-oʻrganish, mehnat va ijod qilish hayotning tub mazmuniga aylanadi. Oʻzini buyuk millatning, qadimiy xalqning chinakam vorisi deb bilgan farzandlar bugun dunyoda hech kimdan kam emasligini anglab, kelajakda ham hech kimdan kam boʻlmaslikni koʻzlab harakat qiladilar.

Shu ma'noda, xalqimiz boshidan o'tgan barcha yaxshi va yomon kunlarni doimiy yodda tutish uchun adabiyotga murojaat qilamiz. Qolaversa, otabobolarimizning ushalmagan orzularini ro'yobga chiqarish bizning zimmamizdagi muqaddas burch ekanini anglashga yordam beradigan ham adabiyot – so'z san'ati hisoblanadi. Zero, adabiyot tarixi – millat va mamlakat tarixining jonli ifodasidir. Adabiyotini anglagan millat o'zligini anglaydi. Va aksincha, adabiyotiga befarq bo'lgan xalq o'ziga, taqdiriga befarq hisoblanadi.

Demak, adabiyot darsi Siz uchun shunchaki vaqt oʻtkazib, oʻqituvchi savollariga bir amallab javob berib, qoniqarli baho qoʻyganiga xursand boʻlib chiqib ketadigan dars boʻlmasligi kerak ekan-da. Adabiyot Sizni nafaqat olim, balki ODAM boʻlishingizga yaqindan koʻmaklashadigan eng yaqin doʻstingizga aylanishi qanchalar muhim. Bilingki, bu doʻst Sizga hech qachon

xiyonat qilmaydi, hech vaqt Sizni yolgʻiz qoldirmaydi, biror payt joningizga tegmaydi, zeriktirmaydi. Adabiyotga qoʻlingiznigina emas, qalbingiz – yuragingizni bering – u bilan yorugʻ kunlami koʻzlab safarga chiqing.

Safaringiz mazmunli bo'lsin, aziz o'quvchi!

Savol va topshiriqlar

- 1. «Adabiyot» soʻzining lugʻaviy ma'nosini izohlab bering.
- 2. Adabiyotni nega «ma'naviyat xazinasi» deb nomlanishini tushuntirib bering.
- 3. Qaysi adabiy asarni oʻqiganingizdan keyin oʻzingizda jiddiy oʻzgarish his qilgansiz? Shu oʻzgarishni izohlab bera olasizmi?
- 4. Oʻzingizni yetarli darajada kitob oʻqiyapman, deb hisoblaysizmi?
- 5. Yoshlari koʻp kitob oʻqigani, xalq miqyosida ilm-fanga katta e'tibor berilgani tufayli dunyoning eng ilgʻor mamlakatlariga aylangan qaysi davlatlarni eshitgansiz?
- 6. «Kitobdan kitobning farqi bor» degan gapni qanday tushunasiz?
- 7. Xalqimiz tarixidan jaholatga berilish tufayli sodir boʻlgan falokatlar, noxush hodisalardan misol keltira olasizmi? Oʻqigan adabiy asarlaringizdan-chi?
- 8. Sizni va tengdoshlaringizni koʻproq nimalar qiziqtiradi? Ular orasida adabiy asarlar oʻqishga chanqoqlik ham bormi?
- 9. Agar bir aylanib yozuvchi boʻlib qolsangiz, eng avvalo nimalar toʻgʻrisida yozgan boʻlardingiz?
- 10. Sizningcha, ilmiy asarlar bilan badiiy asarlar orasida qanday farqlar boʻladi?
- 11. «Ma'rifatli kishi» deganda yaqinlaringizdan kimni ko'z oldingizga keltirasiz? Bunday odamdan nimalarni o'rgangan bo'lardingiz?
- 12. Ota-onangizning vaqti boʻlmaganda ukalaringizni atrofingizga yigʻib, biror kitob oʻqib berishni odat qilganmisiz?
- Yozuvchi Abdulla Qahhor «Adabiyot atomdan kuchli, lekin uning kuchini oʻtin yorishga sarflamaslik kerak» degan edi. Shu gapni izohlab berishga urinib koʻring-chi.



BOLA – UCHQUR XAYOL EGASI

TO STORE STORE SOUTH STORE SOUTH



Xudoyberdi TOʻXTABOYEV (1933-yilda tugʻilgan)

Xudoyberdi To'xtaboyev bugungi o'zbek adabiyotining yetakchi vakillaridan biridir. Adib 1932-yil 17-dekabrda Farg'ona vilovatining Katta tagob qishlogʻida tugʻilgan. Otadan juda erta yetim qolgan adib bobosi Erkaboy va buvisi Robiyabibilarning tarbiyasida qoladi. 1949-yili Qoʻqon pedagogika bilim yurtini, 1955-yili Toshkent davlat universitetini (hozirgi Milliy universitet) bitirgan. So'ng bir necha yil Farg'ona viloyatining Bagʻdod, Oʻzbekiston tumanlaridagi maktablarda oʻqituvchi, ilmiy boʻlim mudiri, maktab direktorlari lavozimida ishlagan. Adib 1958-yili Toshkentga keladi. 14 yil davomida «Toshkent haqiqati», «Sovet Oʻzbekistoni» gazetalarida ishlaydi. Shu vaqt mobaynida hozirjavob, qalami o'tkir jurnalist sifatida elga taniladi, jamiyatdagi illatlarni fosh etuvchi 300 dan ortiq felyeton yozadi. 70-yillar boshida o'z faoliyatini bolalar hayotiga yo'naltiradi. Yozuvchi oʻzining tarjimai holida bu qarorini shunday ta'kidlaydi: «Ruhi dunyosi pok boʻlgan, tarbiyaga quloq soladigan, savob va gunohni bilishga intilayotgan, ruhi goʻzallikka talpinayotgan bolalar dunyosida ishlasam qanday bo'lar ekan», - deb o'ylay boshladim va qaror ham qabul qildim, bolalar, o'smirlar dunyosiga paqqos o'tib ketdim».

Darhaqiqat, adib o'z mehnati yozuvchilik iste'dodini bolalar va o'smirlar dunyosiga, ularning ma'naviy tarbiyasiga bag'ishlab kelyapti. U ana shu maqsadda «Yosh gvardiya» nashriyoti, «Gulxan», «Yosh kuch» jurnallarida faoliyat ko'rsatib, o'zi e'tirof etganidek, «...Bola va o'smir ruhidagi goʻzallikni himoyalashga e'tibor» berib kelyapti. Yozuvchi tinimsiz mehnati, izlanishlari, bolalarga cheksiz mehr-muhabbati tufayli, oʻzbek bolalar adabiyotining zabardast namoyandasiga aylandi. Adib qalamiga mansub «Omonboy va Davronboy sarguzashti» qissasi (1974-yil), «Sariq devni minib» (1968-yil), «Sariq devning o'limi» (1973-yil), «Besh bolalik yigitcha» (1976-yil), «Qasoskorning oltin boshi» (1981-yil), «Shirin govunlar mamlakati» (1986-vil), «Jannati odamlar» (1996-vil) kabi romanlari ana shu xavrli bolajonlik harakatining misolidir. Yuqoridagi asarlar orasida adibning «Sariq devni minib» va uning mantiqiy davomi «Sariq devning o'limi» romanlari nafaqat o'zbek adabiyoti, balki jahon adabiyotida ham bolalar uchun yaratilgan sarguzasht asarlarning eng yaxshi namunasiga aylandi. Bu romanlarda 6-sinf o'quvchisi Hoshimjonning ajoyib sarguzashtlari, uning sehrli qalpoqcha yordamida erishgan, qahramonliklari qiziqarli tarzda hikoya qilinadi. Hoshimjon tashlandiq bir uydan bir vaqtlar buvisidan eshitgan oq jundan yasalgan sehrli qalpoqchani topib oladi. Uni sehrliligini avval uyidagilar misolida sinab koʻradi. Qalpoqchaning sehriga to'la amin bo'lgach, uning sehrli kuchini dastlab qishlog'idagi folbin xolaning yolgʻonchiligini fosh qilishga qaratadi. Oyisiga qoʻshilib firibgarlik qilayotgan sinfdoshi Mirobiddinxo'jani tavbasiga tayantiradi, folbin xolaning xaltachalaridagi dorilarni almashtirib qo'yib mijozlarni unga qarshi qoʻyadi. Sehrli qalpoqcha ishlaridan ruhlangan Hoshimjon uni oʻzi oʻqiydigan maktabida ham sinay boshlaydi: «Qalpoqchani kiyib olib, oʻqituvchilar konspektlaridan yozma ishlarni to'g'ri ko'chiradi, natijada baholari, oʻzlashtirishi yaxshilana boshlaydi, biroq shoshqaloqligi tufayli oʻzi ham pand yeydi. Oʻqituvchilar uni koyib, tartibga chaqiradilar. Bilimsiz, yaxshi baholarga o'qimay turib biror-bir kasb egasi bo'lish mumkin emas deb uqtiradilar. Lekin sehrli qalpoqchaning kuchiga juda ishongan Hoshimjon ustozlarining «ilmsiz boʻlsang, zootexnik tugul, molboqar ham boʻla olmaysan» degan gapiga o'jarlik bilan, «bo'laman, bo'laman, bo'laman», -



deydi-da, eshikni tarsillatib yopib maktabdan ketadi. Maktabini, jonajon qishlogʻini tark etadi. Dastlab ishlari yurishgan boʻladi, u sehrli qalpoqcha yordamida ishyoqmas, dangasalar, loʻttiboz kimsalarni rosa dodini beradi. Ularni qilmishiga yarasha jazolaydi. U jinday quv, ayyor, bir qadar lofchi boʻlsa-da, aslida sofdil, koʻngli begʻaraz bola. U doimo yaxshilikka, ezgulikka intiladi. Tezroq katta boʻlgisi keladi, sehrli qalpoqcha yordamida turli kasblarni egallashga intiladi. Ularni bir qadar egallaydi ham, biroq bilimsizligi, tajribasizligi tufayli pand yeydi. Biror-bir maqsadga erishish uchun sehrli qalpoqchadan tashqari, bilim ham kerakligini unutib qoʻyadi. Shuning uchun ham qaysi kasbga qoʻl urmasin ishi chappasiga ketadi.

Agar siz «Sariq devni minib», «Sariq devning oʻlimi» romanlarini toʻliq oʻqib chiqsangiz sehrli qalpoqcha tufayli turli mutaxassisliklarni egallagan Hoshimjon har safar chuv tushishi sabablarini bilib olasiz.

Xudoyberdi Toʻxtaboyevning «Sariq devni minib» asari koʻpgina jahon xalqlari tillariga – jami 24 tilga tarjima qilingan, buyuk bolalar yozuvchisi Janni Rodarining tahsiniga sazovor boʻlgan.

Sevikli bolalar yozuvchisi X. Toʻxtaboyev 1982-yilda «Oʻzbekistonda xizmat koʻrsatgan madaniyat xodimi», 1991-yilda esa «Oʻzbekiston xalq yozuvchisi» kabi yuksak unvonlar bilan taqdirlangan.

SARIQ DEVNI MINIB

II BOB

SHAYTONNING YELKASIGA IGNA SANCHDIM

Bir jihatdan olib qaraganda, oyim uyga kiritmay toʻgʻri ish qilgan ekan. Nega desangiz, oʻsha paytlarda men sehrli qalpoq axtarib egasi koʻchib ketgan hovlilarni, goʻng tepalarni, eski-tuski kiyim-boshlar tashlanadigan burchak-surchaklarni tintuv qilib yurgan edim. Bir oy avval Qashqir qishloqda turadigan buvim biznikiga mehmonga kelib, sehrli qalpoq haqida ertak aytib beruvdi. Qalpoqni kiyib olgan azamat yigit biram ishlar qiladiki, biram qahramonliklar koʻrsatadiki, agar eshitsangiz, ogʻzingiz ochilib qoladi. U hammani koʻrib turadi. Uni esa hech kim, eng koʻzi oʻtkir odamlar ham koʻrolmaydi.

- Buvi, buvijon, oʻsha qalpoqning rangi qanaqa? deb soʻradim hovliqib.
 - Oq jundan toʻqilgan.
 - Uni qayerdan topsa bo'larkin?
- Oʻsha qahramon qarib-chirib oʻlayotganda qalpoqni shu atrofdagi hovlilardan biriga yashirib ketgan, bolam.
 - Topsa boʻlarmikan?
 - Nega bo'lmas ekan. Izlasang, albatta topasan, o'g'lim.

Xullas, oʻsha kechadan buyon oromimni yoʻqotganman. Kechasi-yu kunduzi tinim bilmay sehrli qalpoq axtaraman. Ishonsangiz, izlamagan joyim qolmadi. Faqat eski qishloqning chekkasidagi tashlandiq bir uy qolgan, xolos. Bu hovli kimniki – hech kim bilmaydi. Hatto, oyim ham aniq bir narsa ayta olmadi.

Kechqurun uyga kirishdan mahrum boʻlgach, oyim aytyapti deb, qoʻshnimizdan ikkita nonni qarzga oldim-da, qorongʻi tushishi bilan oʻsha hovli tomon yoʻl oldim. Tashlandiq uydan xunugi boʻlmas ekan. Qaysi burchakka qaramang, ajinami, alvastimi koʻzini loʻq qilib menga baqrayib turganga oʻxshaydi. Hatto nazarimda ikki marta boʻri ham koʻringandek boʻldi. Keyin bundoq sinchiklab qarasam, ikkovi ham mushuk ekan. Men titkilamagan burchak qolmadi. Teshikki bor, hammasiga qoʻl suqib koʻrdim...

Bir mahal charchab, suvsab, holdan toyib oʻtirib qolibman. Mudray boshladim. Yoʻq, men uxlamasligim kerak, dedim oʻzimga-oʻzim. Keyin shartta oʻrnimdan turib sal ichkariroq kirdim. Molxona boʻlsa kerak, oxurda bir toʻp latta yotibdi. Orasini titkilagan edim... topdim, ishonasizmi, topdim, xuddi oʻshaning oʻzi! Oq mayin jundan, chekkasiga ipakdan chiroyli hoshiya tikilgan!

- Salom, qalpoqcham! qichqirib yubordim.
- Salom, Hoshimjon! degan ovoz eshitildi.
- Men seni axtarib yuruvdim.
- Men seni kutib yotuvdim...

Boshimga ildim-u, uy tomon qush boʻlib uchdim. Axir men uning chinakam sehrli qalpoq ekanligini sinab koʻrishim kerak edi-da... Sinab



koʻrdim ham. Koʻcha eshikning ustidan oshib toʻppa-toʻgʻri uyga kirib bordim. Oyim tepki mashinada Donoga koʻylak tikib oʻtirgan ekan. Yonginasiga borib:

- Oyi, dedim ingichka ovozda. Oyim boshini koʻtarib, u yoq-bu yoqqa qaradi-yu, «tavba» deb koʻkragiga tuflab qoʻydi. Sekin borib lagandagi sovuq oshni yeya boshladim.
 - Oysha, akangdan darak bo'lmadi-ku? deb so'radi oyim.
 - Bilmasam, deb qoʻydi bir chekkada dars tayyorlab oʻtirgan singlim.
 - Bechora qayerlarda qolib ketdi ekan?
 - O'zingiz-da, bo'lar-bo'lmasga urishaverasiz.

Shu payt sovuq osh tomogʻimga tiqilib hiqichoq tutib qolsa boʻladimi, bunaqasiga ilgari hech uchramagan edim. Oʻziyam naq oʻn besh minut nagʻma qildim-da.

- Tavba! dedi oyim u yoq-bu yoqqa qarab.
- Tavba! dedi singlim ham yoqasini ushlab.

Demak, qalpoqcham chindan ham sehrli ekan, deb oʻyladim-da, termosdan choy quyib ichgan edim, hiqichoq bosildi. Oʻshangacha ham hech birlari meni koʻrishmadi. Sekin xolodilnikning yoniga bordim-u, eshigini ochib boshimdan qalpoqchani oldim. Oyim bilan singlim baravariga oʻrnilaridan turib ketishdi.

- Qayoqdan paydo boʻlib qolding? ikkovlarining ham savoli shu boʻldi.
- Xolodilnikning ichida yotuvdim, deb yuboribman bilmasdan. Oyim bechora qoʻrqqanidan andak boʻlmasa yigʻlab yuborayozdi. Darrov meni issiq bagʻriga olib yuz-u koʻzlarimdan oʻpa ketdi.
- Bolaginam, muzlab qolay debsan-ku! dedi u tinmay. Issiq koʻrpaga oʻrab qaynoq-qaynoq choy ichirishdi. Har choy hoʻplaganimda joʻrttaga bir inqillab qoʻyaman. Ichimga issiq kirishi bilan huzur qilib uxlab qolibman.

Ertasiga birinchi qilgan ishim qishlogʻimizda yashaydigan Soraxon folbinning ishlarini tekshirib koʻrish boʻldi. Meni biron kishi komissiya qilib tayinlagani yoʻq-ku, lekin shunchaki oʻzim qiziqib qoldim-da. Oʻqituv-chimiz unga ishonmanglar, hammasi yolgʻon deydi. Yolgʻon boʻlsa, nega xolamning shuhrati shunchalik yoyilib ketadi. Rom ochirib, dardiga davo soʻrash uchun odam shunaqangi koʻp keladiki, shunaqangi koʻp keladiki,



qishlogʻimizdagi medpunkt uning oldida ip esholmaydi. Undan keyin, kelganlar quruq kelishmaydi. Birovi shoxdor qoʻy, birovi sariq echki, birovi qogʻozga oʻralgan pul, bir xillari katta togʻorada toʻrt quloqli somsa tashlab ketishadi. Men bilan oʻqiydigan oʻgʻli Mirobiddinxoʻjaning kerilganini aytmaysizmi, bir oʻzining ikkita velosipedi bor. Tunov kun, bittasini minib biroz sayohat qilgan edim, qosqonini egib qoʻygan ekanman, aka-uka meni tutib olib rosa doʻpposlashdi.

Odamlar:

- Soraxon folbin toʻppa-toʻgʻri xudo bilan gaplashadi! deyishadi. Mirobiddinxoʻja boʻlsa maqtanib:
 - Bizning uydan xudoning ovozi eshitilib turadi! deydi.

Ishqilib, ana shu narsalarni tekshirib koʻrmoqchi boʻldim-u, ertalab nonushtadan soʻng toʻppa-toʻgʻri folbin xolamning uyiga qarab yoʻl oldim. Hovlisida yettita xotin, beshta chol, uchta bola oʻtirishibdi. Hammasi ham kasal boʻlsa kerak, rangi oftob urgan xamakdek sap-sariq. Qalpoqni kiyib sekin ichkari kirdim. Folbin xolam qorongʻi uyda oʻtirib olib rom ochyapti, qarshisida bola qoʻltiqlagan mening oyimga oʻxshagan choʻziq yuzli bir ayol oʻtiribdi.

- O'g'lingni sariq jin uribdi, qizim, - dedi folbin xolam.

Shu payt uyning pollari ostidanmi, qalin devorlari orasidanmi, shiftidanmi — qayoqdanligini aniq anglay olmadim-ku, — lekin sariq jinlarning jarang-jurung qilib oʻyinga tushayotgani, childirma chalayotgani eshitilib, qoʻrqqanimdan dodlab yuborayozdim. Xayriyatki, oldimda folbin xolam, bolali ayol oʻtirishibdi. Boʻlmasa, kim biladi, nimalar qilib qoʻygan boʻlardim. Vahimali ovozlar tinishi bilan gʻoyibdan:

- Ovm-i-i-in! degan surnaynikiga oʻxshash ingichka ovoz eshitildi.
 Folbin xolam davom etdilar:
- Sariq echki soʻyib, terisiga bolangni oʻraysan.
- Ovm-i-i-in! degan ovoz eshitildi yana gʻoyibdan. Ketidan haligi vahimali jarang-jurunglar joʻr boʻldi. Folbin xolam bolali ayolning qoʻrq-qanidan oʻynab turgan koʻzlariga tikilib:
- Xudo oʻzi shifo beradi, ana, arshi-a'lodan uning tabarruk ovozi eshitilyapti, eshit! – deb qoʻydi.

Bu gal jarang-jurung eshitilmadi-yu, lekin qisqa-qisqa qilib aytilgan





«ovmin» eshitildi. Boshimda qalpoqcham bor. Jinlar bari bir meni koʻrolmaydi, deb oʻzimga-oʻzim dalda berdim-da, ular bilan uchrashish niyatida ovoz qaysi tomondan kelayotganligini aniqlash uchun shoshilib tomga chiqdim. Qalin devor orasiga narvon tushirilgan ekan. Sekin pastga tushdim. Uyning osti podval, oʻrtada soʻppayib bir xum turibdi. Shu choq folbin xolamning uyiga yana bir kishi kirgandek bo'ldi. Uning: «Oh, otaginam, otaginam, sizga qora dev hamla qilibdi, suf, suf, suf», degani eshitildi. Bu ovoz tinib ulgurmasdan xumning ichidan jarang-jurung bilan childirma sadolari yangradi, ketidan «ovmin» ham eshitilib qoldi. Avvaliga qoʻrqganimdan bezgak tutgandek dag'-dag' galtiradim. Keyin o'zimni bosib, sekin borib moʻralasam, xumning ichida oʻzimizning Mirobiddinxoʻja oʻtiribdi. Bilaklariga har xil shiqildoqlar taqib olgan, qoʻlida doʻppidan sal kattaroq o'yinchoq childirma! «Iy-e, ha, shaytonning o'zlari shu yerda ekanlar-da, yashavorsinlar-e! - dedim kulgim qistab, - sariq jin ham o'zlari bo'lsa kerak?» Shu paytda shunaqangi achchig'im chiqdiki, shunaqangi achchig'im chiqdiki, cho'ntagimdan to'g'nag'ichni olib bor bo'yicha yelkasiga sanchib yuborganimni oʻzim ham sezmay qolibman.

- Voy-dod! deb qichqirdi Mirobiddinxoʻja. Folbin xolam: «Otaginam, kasalingiz gʻoyat ogʻir, ana, quloq soling, parilarim faryod chekyapti», deb javray boshladi. Kap-katta xotinning yolgʻon soʻzlaganini koʻrib, yana jahlim chiqib ketdi. Koʻzimga Mirobiddinxoʻja alvastidan ham xunuk koʻrinib ketdi nazarimda. Toʻgʻnagʻichni yana sanchib yuboribman.
 - Oyijon! deb qichqirdi Mirobiddinxo'ja.
 - Ovozingni oʻchir! boshidan xumning ichiga bosdim.
- A! Mirobiddinxoʻjaning koʻzi xuddi jon berayotgandek ola-kula boʻlib ketdi. — Sen kimsan oʻzi, ayt, kimsan?
 - Men Azroilman.
 - Azroil?
 - Ha, Azroilman, joningni olgani keldim.
 - Oyijon! Men o'lyapman...
- Dodlama, deb boshiga bir shapaloq urdim, menga qara, Hoshim degan bolani taniysanmi?
 - Taniyman, Azroilbobo, taniyman.





- Tanisang, nega unga velosipedingni berib turmading?
- Berdim-ku?
- Nega uni akang bilan ikkovlashib urdilaring?
- Tavba qildim, endi urmaymiz.
- -Bari bir, hozir joningni olaman, shunday deb joʻrttaga boʻgʻmoqchi boʻlgandek ikki qoʻlimni tomogʻiga olib bordim.
 - Jon Azroilbobo, bu gal jonimni olmang, kechiring.
 - Nega odamlarni aldaysan?
 - Oyim aytdilar-da...
 - Oying nima dedi?
- Ovmin deysan, dedi. Undan keyin mana bu shiqildoqlarni chalib, childirmani doʻpillatasan, dedi.
- Yolg'on, o'zing ham maktabga borib uyimizdan xudoning ovozi eshitiladi degansan.
 - Aytdim-ku, oyim oʻrgatdi deb.
 - Oying nima deb oʻrgatdi?
- Koʻcha-koʻyda yurganingda, maktabga borganingda shunday deb aytasan, dedi.
 - Demak, hammasi yolg'onmi?
 - Yolg'on, Azroilbobo, yolg'on.
- Yolgʻonligini maktabga borib aytasanmi yoki joningni olib qoʻya qolaymi?
 - Aytaman, bugunoq aytaman.
- Bo'lmasa seni sinab ko'raman. Hozircha joning o'zingda tursin. Uy vazifalarini yaxshilab tayyorlagin, Hoshim degan bola so'rasa yo'q demagin...

Tashqariga chiqib endi nima qiliq koʻrsatsam ekan, deb oʻylanib qoldim. Hali folbin xolam bolali ayolga dori berayotganida xaltasiga koʻzim tushib qoluvdi. Ana oʻsha xaltachalarni ham bir tekshirib koʻrmoqchi boʻldim. Har xil chitdan tikilgan katta-kichik beshta xaltacha bor, hammasida ham oʻzimizning aptekalarda sotiladigan oddiy dorilar: birida penitsillin, birida biomitsin, boshqasida yurak oʻynoqni bosadigan poroshok. Xudoi taolo ato qilgan noyob dorilar deb, xolajonim ana shularni pullayotgan ekan. Yasha-

vorsinlar-e, dedim oʻzimga-oʻzim, hali shoshmay tursinlar, oʻzlarini ham bir uyaltirib qoʻymasammi...

Folbin xolamning choʻntagiga qoʻl solib besh-oʻn soʻm oldim-da, darhol tugʻruqxona oldidagi aptekaga yugurdim. Oʻsha yerdan ichni suradigan har xil dorilar olib keldim. Xaltachalardagi dorilarni olib, oʻrniga oʻshalarni ehtiyotlik bilan joylab qoʻydim. Oradan oʻn-oʻn besh kun oʻtar-oʻtmas, xolamning obroʻlari ham bir pul boʻldi. Sen hali bizni ataylabdan zaharlamoqchi boʻldingmi deb, ichi surib darmondan ketgan bemorlar xolamni tutib olib rosa doʻpposlashibdi...

Ishlarim yurishgandan-yurishib ketdi. Oʻzim xursand, kayfim chogʻ, ashula aytganim-aytgan. Baholarim ham joyida — nuqul besh! Ilgarigidek uy vazifangni bajargan boʻlsang menga berib tur, deb birovlarga yolvorib ham oʻtirmayman. Oʻqituvchilarimizning uyiga shartta kiraman-da, konspekt daftarini olib oʻsha yerda koʻchiraman-qoʻyaman. Obroʻyim ham shunaqangi oshib ketdiki, oʻqituvchilar menga kulib boqadigan boʻlib qolishdi. Faqat ogʻzaki soʻraladigan fanlardan hamon mazam yoʻqroq. Lekin unga ham bir vaj topib qoʻyganman.

- Mening ogʻzaki nutqim rivojlanmagan, yozma ravishda talab qilaveringlar, - deyman-da, oʻqituvchilarimning oʻzlaridan koʻchirib olgan konspektlarni sal boshqacharoq qilib oʻqib beraveraman.

Xullas, ishlarim har jihatdan yurishib ketgan edi. Sinfkomimizni amaldan tushirib oʻrniga meni saylamoqchi boʻlib turishgan edi-yu bir xatoga yoʻl qoʻyib, butun maktabda sharmanda-yu sharmisor boʻldim, rostini aytsam, bir pulcha obroʻyim qolmadi.

Darsdan qaytayotganda hech kim sezmasa kerak deb oʻzimga va eng yaqin doʻstim boʻlmish Qosimjonga yettita fandan a'lo baholar qoʻyib, chorak tugamagan boʻlsa ham, choʻzib oʻtiramanmi deb, chorak baholarini ham chiqarib qoʻya qolgan edim. Bu ishni avval ona tili oʻqituvchimiz, soʻngra fizika oʻqituvchimiz payqab qolibdi. Oʻsha soatdayoq hammaga oshkor boʻlibdi. Ertasiga maktabga borishim bilan direktorning kabinetiga chaqirishdi. Kirsam, yettita oʻqituvchi qator oʻtiribdi. Qosimni ham chaqirtirib kelishdi.

– Hoshim, beriroq kel-chi, – dedi Otajon Azizovich barmogʻi bilan jurnaldagi bahoni koʻrsatib, – bu baholarni kim qoʻydi?



- Bilmasam.... dedim yelkamni qisib.
- Sen qoʻydingmi? soʻradi Qosimdan direktor.
- Nimani? mendan battarroq hayron bo'lib dedi Qosim.
- Ikkoving maslahatlashib qilgansan bu ishni. Ochiqchasiga iqror boʻlinglar, – dedi oʻqituvchilardan biri.
- Yoʻq, bu ish Qosimdan chiqqan, dedi boshqasi, nega desanglar,
 Hoshim soʻnggi paytlarda ancha tuzalib qoldi. Baholari ham nuqul besh...

Oʻtirganlar hammasiga bu fikr ma'qul tushdi shekilli, har tomondan bechora Qosimga savol yogʻdira boshlashdi. Qarasam, doʻstimning ahvoli chatoq – koʻzida miltillab yosh tomchilari koʻrinyapti. Yoʻq, qilgʻilikni men qilib, jabrini birov tortmasligi kerak! Shartta oʻrtaga chiqdim:

- Kechirasizlar, bu ishni men qilganman.
- Nimaga?! sakkiz kishi birdaniga shu savolni berdi.
- Ha, men qilganman. Qosimning bu ishdan mutlaqo xabari yoʻq.
 Undan keyin, xullas, bu ishni men qilganman...

Tamom, hali aytganimdek, obroʻ ikki pul boʻldi. Aytilmagan gap-u, qilinmagan nasihat qolmadi. Mendan shu ketishda ketaversam, tuzukroq odam chiqmas emish, agronom ham, injener ham, zootexnik ham boʻla olmas emishman.

- Yo'q, dedim qaysarligim tutib, mendan agronom chiqadi, albatta.
- Chiqmaydi! sakkiztalovlari bir ovozdan takrorlashdi.
- Bo'lmasa zootexnik bo'laman.
- Ilmsiz bo'lsang, zootexnik tugul molboqar ham bo'lolmaysan!
- Bo'la olaman.
- Gapni ko'paytirma, bo'lolmaysan! achchig'i chiqib dedi direktor.
- Bo'laman, bo'laman, bo'laman! dedim-da, eshikni tarsillatib yopib chiqib ketdim. Men o'qimay turib ham boshimda shu qadrdon qalpoqcham bor ekan, albatta, agronom ham, injener ham, shoir-u artist ham bo'la olaman deb qattiq ishonar edim. «Ha, albatta, bo'laman, deb takrorladim o'zimga-o'zim, bularga, menga ishonchsizlik bilan qarayotgan mana shu qadrdon o'qituvchilarimga o'zimning kimligimni ko'rsatib qo'yaman...»

Oʻsha kuni kechasiyoq qahramonliklar koʻrsatib, shon-u shuhrat taratib, oʻqituvchilarimni, Otajon Azizovichni hayratda qoldirish niyatida safarga otlandim.



Xayr, jonajon qishlogʻim, hayqirib, toshdan-toshga urilib oqayotgan zilol suvli anhorlar, poyonsiz mevazor bogʻlar, hammangizga xayr. Yoʻl yoqasidagi azim yongʻoqlar, sizlar ham yaxshi qoling. Endi sizlarga hech kim tosh otib shoxingizni sindirmaydi, tanangizga mix qoqib ozor bermaydi!

Mehribon oyijonim, shoʻxliklar qilib koʻnglingizni ogʻritgan boʻlsam, qaysarligim tufayli oʻksitgan boʻlsam, kechiring meni! Qoʻngʻir sochli singillarim, sizlar ham yaxshi qoling. Har xil qiziqchiliklar qilib sizlarni qiqirlatib kuldiradigan, maktabdan qaytayotganingizda shoʻx bolalar urganda tarafingizni oladigan akangiz yoningizda yoʻq endi. Sogʻinganda, koʻnglingiz oʻksiganda rasmga boqing. Lekin yigʻlamang. U albatta keladi, qahramonliklar koʻrsatib qaytadi. Oʻz oʻqituvchilariga oʻqimasdan turib ham agronom boʻla olishi mumkinligini, artist boʻlib hammani oʻziga mahliyo qila olishi mumkinligini koʻrsatib qoʻyadi. Ha, albatta, koʻrsatadi. Koʻksi toʻla orden bilan qaytadi.

Xayr!

Ey, chala qolgan uy vazifalari, sizlarga ham xayr!

Yarim tunda qishloqdan chiqib borar ekanman, koʻzim jiqqa yosh, ammo qalbim shodliklarga toʻla edi.

IIIBOB

BAXTIM KULIB BOQQAN EDI

Qayoqqa borishni, nima qilishni bilmas edim. Boshim qotgan, oʻylab oʻyimga yetolmayman. Ammo bir jihatdan koʻnglim shod – ovqat tekin, poyezd-u avtobuslar tekin, qadrdon qalpoqcham boshimda. Zeriksam, u bilan suhbat quraman.

- Qalpoqcham, qayerlarga kelib qoldik? deb soʻrayman.
- O'zim ham bilmayman, Hoshimjon, deydi qalpoqcham.
- Rostini ayt, mendan agronom chiqarmikin-a?
- Chiqadi. Albatta, chiqadi.
- Axir mening diplomim yoʻq-ku? deyman koʻnglim oʻksib.
- O'kinma, deydi qalpoqcham, qo'lingni cho'ntagingga sol diplom tayyor.



Qoʻlimni choʻntagimga solgan edim, chindan ham koʻk jildli, ichkarisiga har xil yozuvlar yozilib, dumaloq muhr bosilgan diplom chiqib qoldi.

- Qalpoqcham, axir mening boʻyim juda past-ku, deyman yana ikkilanib, hech kim meni katta odam deb oʻylamaydi-ku?
 - Xafa bo'lma, kerak bo'lganda bo'y ham qo'shib beraman.

Yoʻl yurdim, yoʻl yursam ham moʻl yurdim, bir mahal mundoq qarasam sahro-yu biyobonga kelib qolibman. Bir tomoni poyoni yoʻq choʻl. Qarasang, koʻzing jimirlab ketadi. Yantogʻ-u shoʻradan boshqa hech narsa koʻrinmaydi. Ahyon-ahyonda menga oʻxshab qayoqqa borishini bilmay garang boʻlib uchib yurgan qushlar toʻdasigami, dumi uzun yumronqoziq yoki koʻzini loʻq qilib turgan kaltakesakkami duch kelib qolasan.

Ikki marta ilonlar galasiga ham uchrab qoldim. Yegani ovqat topolmay bir-birining dumini soʻrib yotgan ekan, meni koʻrishi bilan sevinib shunaqangi quvlashga tushib ketishdiki, agar boshimga qalpoqchamni kiyib olmaganimda, kim biladi, holim ne kechar edi...

Biroz yurgach, bogʻ-rogʻlar yashnab yotgan joyga kelib qolibman. Tavakkal qilib daraxtzorlar orasidan yurib boraverdim. Goh olmazor, goh shaftolizor, goh tokzorlar orasidan oʻtib borardim. Bir tomonda gʻoʻzalar ham yashnab yotibdi. Dadamga oʻxshagan odamlar tepasiga brezentdan soyabon oʻrnatilgan universallarga minib olib ishlov berishmoqda. Katta sement ariqdan shundoqqina oʻtishim bilan gʻalati bir manzaraga koʻzim tushib, rostini aytsam, hang-u mang boʻlib qoldim. Yuz gektarcha keladigan katta maydon mayda-mayda boʻlaklarga boʻlib tashlangan, har bir boʻlakchada uchtadan-toʻrttadan boʻlib oʻzim tengi, oʻzimdan sal kattaroq bolalar, Oyshaxon singlimga oʻxshash qoʻngʻir sochli qizchalar terlab-pishib ishlashib yotibdi.

- Hoy bola, horma! dedim gʻoʻzaning ichidan oʻt yulib yurgan bir bolaning yoniga borib.
 - Ishingni qil, dedi u boshini koʻtarmay.
 - Horma, deyapman.
- Ishingni qil deyapman, shunday deb notanish bola sekin boshini koʻtardi. Koʻtardi-yu, uyalganidan boʻlsa kerak sholgʻomdek qizarib ketdi.

- Kechirasiz, dedi peshanasidagi terini artib,– men sizni oʻzimizning Shavkat deb oʻylabman.
- Kechirasiz, dedim men ham hurmatini joyiga qoʻyib, bu qaysi mamlakat?
 - Nima?
 - Qaysi mamlakat deyapman?
 - Mamlakat emas, Mirzacho'l.
 - E, anavi gazetadagi Mirzacho'l shu yerlarmi?
- Gazetadagi emas, Mirzachoʻldagi Mirzachoʻl, tushuntirdi notanish bola.
 - Bu yerda nima qilyapsizlar?
 - O't yulyapmiz.
 - Bu gʻoʻzalar kimniki oʻzi?
 - Bizniki.
 - Nega endi sizniki bo'larkan?
- Ana shu, koʻrib turganingiz oʻn gektar yerdagi gʻoʻzani oltovimiz ekkanmiz, oʻzimiz parvarishlayapmiz, hosilini ham mashinada oʻzimiz yigʻishtirib olmoqchimiz.
 - Sizlarga agronom kerak emasmi?
- Yoʻq, dedi bola boshini chayqab, biz oʻzi boʻlajak agronomlarmiz...

Gapni choʻzib oʻtirmasdan narigi kartalarga oʻtib ketdim. Mendan koʻra sal novcharoq boʻlgan ikkita bola qovun chopiq qilish bilan ovora.

- Nima qilyapsizlar? soʻradim joʻrttaga nima qilayotganlarini koʻrib turgan boʻlsam ham.
- Ikkinchi chopiq qilyapmiz, degan mujmalroq javob oldim. Bolalar juda shoshib ishlashardi. Yo bir-birlari bilan kim koʻp ishlashga musobaqa oʻynashgan yoki oʻzlari shunaqangi chaqqon ishlashga oʻrganib qolishgan boʻlsa kerak, deb oʻyladim. Rostini aytsam, shu paytda mening ham ana shu bolalar bilan egatlarga yonma-yon tushib olib, musobaqalashib, ketmon chopgim kelib ketdi. Lekin oʻzimni bosib, jiddiy bir ohangda:
 - Sizlarga agronom kerak emasmi? deb soʻradim.
 - Yo'q, kerak emas.
 - Nega endi kerak bo'lmas ekan? Ehtimol, kerakdir?



- Bizning o'zimiz agronommiz.

Shundan keyin kun botguncha ishlayotganlarni gapga solib, suhbatlashib, mayda kartalarni aylanib, tomosha qilib yuraverdim. Oʻziyam tomosha qilsang arzigulik joylar ekan, choʻlni yashnatib yuborishibdi. Bir kartada hali aytganimdek paxta, boshqasida hali aytganimdek qovun-tarvuz, nariroqda piyoz, beriroqda karam! Ayniqsa, bu atrofdagi mevalarni aytmaysizmi. Luchchak shaftolilarga maza kiray deb qolibdi, olma daraxtlari hosilni koʻp qilganidan biron ayb ish qilib qoʻygandek boshlarini egib turibdi. Uzumning oʻzidan, xoh ishoning, xoh ishonmang, roppa-rosa yigirma ikki xilini sanasam-a.

Tovuqlarga don berib yurgan, hadeb tuxum yeyaverganidan bo'lsa kerak, oshqovoqdek semirib ketgan sariq sochli bir qizdan:

- Bu tovuqlar kimniki? deb soʻradim.
- Bizniki, dedi qiz hozirgina archilgan kattagina tuxumni ogʻziga solib.
 - Tuxumni kimga berasan?
 - O'quvchilarga.
 - Uy vazifalarini bajarmaganlarga ham beriladimi?
 - Unaqalar bizda yoʻq.
 - Bordi-yu, bitta-yarimta topilib qolsa-chi?
- Bor, ishingni qil, dedi sariq sochli qiz yana bitta tuxumni ogʻziga solib, – tovuqlarimni hurkitib yuboryapsan.
- Menga qara, dedim biroz yumshab, sizlarga zootexnik kerak emasmi?
 - Zootexnikni nima qilamiz?
 - Ish oʻrgatadi-da.
 - Unaqasidan oʻzimizda ham toʻlib yotibdi...

Sal nari borgan edim, atrofi yogʻoch taxta bilan oʻralgan katta qoʻrgʻonga koʻzim tushib qoldi. Darvoza tepasiga «Krupskaya nomli maktab-internat fermasi» deb yozib qoʻyishibdi. Ha-ha, bu maktabning hali fermasi ham bor ekan-da, deb oʻyladim-u, sekin ichkari kirib bordim. Rostini aytsam, ferma uncha katta ham, uncha kichik ham emas ekan: sakkizta sigir, oʻn toʻrtta choʻchqa, uchta qoʻtir echki – bor-yoʻgʻi shu.

- Qoʻylaring ham bormi? soʻradim mollarning tagini tozalab yurgan past boʻyli, peshonasi doʻng bir boladan.
 - Qoʻylar choʻlda... dedi bola menga qarab angrayib.
 - Quyonlar-chi?
 - Quyon fermamiz katta bogʻning ichida turadi.
 - Echkilaring bor-yo'g'i uchtami?
- Muncha ezma ekansan, aytdim-ku, echkilar ham qoʻylarning yonida deb
- Shunaqa demaysanmi, dedim sal past kelib. Men bo'lsam boshqalari kasal tegib o'lib ketganmi deb o'ylabman. Buzoqlaring ko'rinmaydi?

Peshonasi doʻng bola toza jonimga tegding-ku, degandek qoʻlini siltab, paqir bilan supurgini koʻtargancha, xiyol oqsoqlanib choʻchqaxonaga oʻtib ketdi. Oʻsha yerdan turib, negadir tilini uzun chiqarib meni masxara ham qilib qoʻydi.

- Tort tilingni, hozir borib sugʻurib olaman! dedim mushtimni koʻrsatib.
 - Meni-ya!
 - Ha, seni.
- Urishgandan koʻra kelib ishga qarashsang boʻlmaydimi! dedi bola iljayib, ishga tushsam tushay deb ustimdagi yangi koʻylagimni shartta yechdim-da:
 - Qani, ishingni koʻrsataver, deb qoʻydim.
 - Menga qara, tagʻin sen mehmon boʻlmagin? qiziqib qoldi u.
 - Mehmonman-da.
- Iye, shunday demaysanmi? Qani, tanishib qoʻyaylik: mening otim Hayitvoy, yettinchi sinfda oʻqiyman.
- Mening otim Hoshimboy, deb qoʻlimni choʻzdim, oltinchi sinfning a'lochi oʻquvchilaridan boʻlaman. Sizlar oʻzi kimsizlar, oʻquvchimi, kolxozchimi, hech tushunolmay qoldim-ku?
- Bizmi, biz hu anavi ikki qavatli bino bor-ku, oʻsha yerda oʻqiymiz, darsdan boʻsh vaqtimizda koʻrib turganingdek ishlaymiz, kasb oʻrganamiz.
 Biz-chi, Hoshimboy, oʻzimizni oʻzimiz boqamiz, oʻzimizni oʻzimiz kiyintiramiz...



- Rostdan-a?! dedim hech ishongim kelmay.
- Rost, Hayitvoy ishonchsizlik bildirganim uchun biroz xafa bo'ldi,
 hali sen ko'rganing yo'q, o'ttiz gektar yerda mevazor bog'imiz bor,
 shig'il hosilga kirgan. Yarmini yeymiz, yarmini bozorga chiqarib sotamiz.
 Go'sht ham, sut ham o'zimizda yetarli.
 - Sigirlarni kim sogʻib beradi?
 - Kim sogʻardi, oʻninchi sinfning qizlari-da.
 - Meya-chevalarni ham o'shalar sotib beradimi?
- Bo'lmasam-chi? dedi Hayitvoy maqtanib, direktorimiz Xursanali Sharafiddinovich bu qizlardan ajoyib sotuvchilar yetishib chiqadi, deydi. Mayli, rastrata qilsalar ham ishlashaversin, bora-bora o'rganib ketishadi, deydi. Tunov kuni, bilasanmi, nima bo'ldi? Tekshiruvchilar borganda, haligi budkada sut-qatiq sotib o'tiradigan Sanobar opam bor-ku?
 - Qaysi? so'rab qo'ydim.
- Hali oʻninchi «b» da oʻqiydigan bor-ku, oʻsha oq xalat kiymasdan savdo qilayotgan ekan, qoʻlga tushib qolibdi. Tartibni buzgani uchun rosa muhokama qilib vigovor berishdi. Undan keyin desang, oʻn besh soʻm shtraf qilishdi.
 - Shtraf pulini qayerdan oladi?
- Qayerdan olardi, brigadaning fondidan oladi-da, hali aytdim-ku, mahsulotlarimizdan kelgan foydani kassaga qoʻyamiz deb. Kassadagi pul yigʻilaveradi, yigʻilaveradi, keyin oʻninchini bitirib butunlay ketayotganimizda har kim oʻziga tegishli pulni olib ketadi.
 - Rost aytyapsanmi? dedim yana ishongim kelmay.
- Rost. O'tgan yil maktabimizni ellik kishi bitiruvdi, bitirish kechasi Xursanali Sharafiddinovich har biriga ming so'mdan pul ulashdi, biz rosa qarsak chaldik... Sizlarning maktablaringizda ham shunaqami?

Rostini aytsam, nima deyishimni bilmay, joʻrttaga nariroqdagi sigirlarni tomosha qilayotgandek angrayib turaverdim. Bizning maktabimizda, yashirib nima qilaman, bu yerda koʻrganlarimning mingdan biri ham yoʻq. Rost, tirik burchakda ikkita oriq quyon bor edi, lekin uning ham bittasi ochidan oʻlib qolgan. Undan keyin maktabimizning orqasida kattagina mevazor bogʻ ham bor, lekin bu daraxtlar meva qiladimi-yoʻqmi, hozir oʻylay-oʻylay hech xotirlay olmadim. Shunday boʻlsa ham maktabimizning sha'nini hecham yerga urgim kelmasdi.

- Nima deding? dedim maqtanishga chogʻlanib.
- Sizlarda ham shunaqalar bormi deyapman?
- Sizlarnikidan yuz marta yaxshisi bor.
- Quyon fermalaringiz ham bormi?
- Bor, Hatto bizda sher, arslonlargacha bor...
- O'h-ho', dedi Hayitvoy qo'rqqanidan ko'zlari ola-kula bo'lib, yeb qo'ymaydimi??
- Biz ularni temir qafaslarga solib, ustidan kattaligi sening kallangdek keladigan qulflar solib qoʻyganmiz...
 - Sizlarda haligi eshik, rom yasaydigan ustaxonalar ham bormi?
- Oh-ho, bizning ustaxonani bir koʻrsang, deb qoʻydim. Shunday deyman-u, lekin maktabimizning ustaxonasi qayerda ekanligini oʻzim ham bilmayman.
- Haligi kiyim-bosh tikadigan artel-chi? deb soʻrashda davom etdi Hayitvoy.
- Bor. Hammasi bor. Mana shu ustimdagi koʻylak ham oʻsha yerda tikilgan. Oyogʻimdagi tuflini Shokir degan bitta ogʻaynim tikib bergan.
- Bizda ham ustaxonaning har xilidan bor, dedi Hayitvoy biroz shashtidan tushib, – hozir olib borib koʻrsatardim-u, lekin ishlarim qolib ketadi-da.

Men uning ishlariga koʻmaklashadigan boʻldim. Koʻz yumib-ochguncha avval molxonani, soʻngra choʻchqaxonani yogʻ tomsa yalagudek qilib tozalab tashladik. Goʻng bilan chiqindilarni men katta chelakka solib turdim. Hayitvoy tashqariga boʻzchining mokisidek qatnab turdi. Bir nafasda hammayoq, hali aytganimdek, yogʻ tomsa yalagudek boʻldi-qoldi.

- Do'stim Hayitvoy, dedim ishlar tugagach, sizlarga mol doktori kerak emasmi?
- Do'stim Hoshimboy, javob qaytardi sherigim, mana shu fermadagi sakkiz bola hammamiz mol doktori bo'lamiz...

Hayitvoy bilan oʻrtoq boʻlib qoldik. Oʻziyam koʻngli ochiq, xushchaqchaq, menga oʻxshab qiziqchiroq bola ekan. Avvaliga rosa maqtanchoq boʻlsa kerak, deb oʻylagan edim. Yoʻq, unchalik maqtanchoq ham emas ekan. Aytganidek, maktabning ustaxonasi koʻrsang koʻrgudek, tomosha qilsang tomosha qilgudek joy ekan. Qizlar mening oyimnikiga oʻxshash tepki mashinada chok tikishayotgan xonaga kirib oʻn minut chamasi angrayib turdim. Qasam ich desangiz, qasam ichib aytamanki, bunaqangi ustaxona dunyoda hech bir maktabda boʻlmasa kerak. Quyonlarning terisidan jajji qizlar uchun popukli qalpoqchalar, oq batistdan oʻquvchi qizlar kiyadigan fartuk deysizmi, paxta teriladigan kanop etaklar deysizmi, xullas, dunyodagi yoʻq kiyimlar mana shu yerda tikilar ekan. Biram bejirim, biram chiroyli tikishyaptiki! Hay-hay, nozik qoʻlchalarning chiroyli harakatlarini ayt-maysizmi, oyoqchalarning bir me'yorda ishlashini qarang-a! Oʻzlari kichkina-kichkina qizlar, oyoqlari tepkiga zoʻrgʻa yetyapti-yu, katta xotinlardek kerilib oʻtirishadi-ya, obbo jin sochlar-ey! Zavqim oshganidan yoniga borib bittasining biqinidan sekin chimdigan edim, qoʻlimga bir tushirdi.

- Bular ham sotiladimi? deb soʻradim Hayitvoydan.
- Sotiladi, hammasi sotiladi, tushuntirishda davom etdi u.
- Menga qara, ana u qalpoqchalardan esdalik uchun menga ikkita berolmaysanmi?
 - Nima qilasan bularni?
 - Ikkita singlim bor, oʻshalarga sovgʻa qilib olib bormoqchiman.
 - Yoʻq, berolmayman.
 - Berasan, keyin qoʻlimga pul tushganda kelib toʻlab ketaman.
 - Berolmayman! dedi Hayitvoy biroz jahli chiqib.
- Berasan, shunday dedim-da, stol ustida turgan chiroyli qalpoq-chalardan ikkitasini olib qoʻltiqqa urdim. Hayitvoy qoʻlimga yopishgan edi, bilmasdan qattiqroq itarib yuborgan ekanman, bechora ikki-uch dumalab ketsa boʻladimi. Chok tikayotgan qizlar bizni kuzatib turishgan ekan, ularni sut-qatiqlar bilan ta'minlab, nonushtalariga qaymoqlar yet-kazib berayotgan ukajonlarini ranjitganim uchun mendan oʻch olmoqchi boʻlib 28 qiz baravariga oʻrnidan turdi: birining qoʻlida pichoq, birining qoʻlida qaychi, birisi qizib turgan dazmolni ushlab olgan, hammalari menga tashlanib qolishdi. Qarasam, ishning keti xunuk boʻladigan. Qochmagan nomard, dedim-da, oʻzimni eshikka urdim... Yoʻq, Mullahoshimboy kechikkan ekanlar, eshikni allaqachon berkitishga ulgurishibdi, qalpoq-



chamni boshimga kiyishga arang ulgurib qoldim. Koʻzdan yoʻq boʻlishim bilan:

- Stolning tagini qaranglar, stolning tagida! deb qichqirdi biri.
- Shkafning ichiga kirgandek boʻldi!– dedi boshqasi shovqin solib. Oʻzimni sekingina derazadan hovliga otdim. Qizlar: «Oʻgʻri qochdi, ushlanglar!» deb orqamdan yugurib chiqishdi. Butun internatda trevoga koʻtarildi. Direktor Xursanali Sharafiddinovich radiouzel orqali e'lon qilib, meni qidirishga 550 oʻquvchining hammasini safarbar qildi.
 - Afti angori esingda qolganmi? soʻradi u Hayitvoydan.
 - Bo'lmasam-chi?..
 - Unda mana bu radiouzel orqali hammasini gapirib ber, tezroq bo'l!
- -Diqqat, diqqat! hovliqib, xirillab gapira boshladi Hayitvoy, oʻgʻrini qidirayotganlar diqqatiga. Hozirgina qochgan bola 12–13 yoshlarda edi. Oʻzi qorachadan kelgan, oriq, boʻyi mendan koʻra novcharoq. Koʻzlari yirik-yirik, doim chaqnab turadi. Burni angishvonaga oʻxshaydi. Gapirganda tutilib-tutilib qoladi. Ustida oq shoyidan sorochkasi bor, shimi yoʻl-yoʻl sherstdan, dazmollanmagan. Afti boshiga bir haftadan buyon suv tegmagan boʻlsa kerak, hammayogʻi kir...

Hayitvoy radiodan e'lon berayotgan mahalda men direktorning kabinetida xuddi o'sha direktorning o'zi bilan yonma-yon o'tirib choyxo'rlik qilmoqda edim. Divanga yonboshlab olib o'ylanib ketdim.

-Nimalar qilib qoʻydim oʻzi? Ularning mehnatiga yordamlashish oʻrniga hammasini ishdan qoʻydim-ku! Mana Xursanali Sharafiddinovich bilan yonma-yon oʻtiribmiz, oʻzi yomon odamga oʻxshamaydi, ancha mehribon, gapga tushunadigan koʻrinadi... Ehtimol, yaxshilikchasiga iltimos qilganimda meni biron uchastkaga agronom qilib olgan boʻlarmidi. Ishlarim yurishib ketganda, kim biladi, rasmim gazetalarda bosilib ham chiqarmidi. Ana unda mehribon direktorimiz Otajon Azizovich ham, algebra muallimimiz Qobilov ham kishi oʻqimasdan turib agronom boʻla olishi, oʻrtoqlariga hisobsiz foydalar keltirishi mumkinligini oʻz koʻzlari bilan koʻrardilar... ha, baxtim kulib boqay deb turgan edi. Lekin afsuski, ishni oʻzim buzib qoʻydim...

Sekin o'rnimdan turdim-da, Xursanali Sharafiddinovichning sovib



qolgan choyidan och qoringa xoʻrillatib bir xoʻpladim-u, radiouzel oʻrnatilgan xonaga kirdim. Hayitvoy oʻsha yerda hamon kekirdagini choʻzib gapirar edi.

Ma, qalpogʻingni ol, bunaqasi bizning maktabda ham toʻlib yotibdi!
dedim-da, oyogʻining tagiga tap etib tashladim.

Arzimagan bir narsa uchun yuzim shuvut boʻlib qoldi, endi bu yerda qolishim mumkin emas edi. Bolalarning oshxonasiga kirib, qozonning boshiga oʻtirib oldim-da, lazzatli taomlardan toʻyib-toʻyib yedim. Kompot pishirishgan ekan, undan ham ikki stakanni pok-pokiza urib oldim. Keyin, oʻzingiz ham sezib turgan boʻlsangiz kerak, yana yoʻlga ravona boʻldim...

IV BOB

HASHAROTNI KALTAKLASHGA BUYURDIM

Ketyapman-ketyapman, na yoʻlning oxiri koʻrinadi, na atrofda biron qoʻqqaygan kulba. Oʻngga qarasang ham gʻoʻza, chapga qarasang ham gʻoʻza. Bir mahal burilib orqamga boqqan edim, nazarimda, hozirgina men bosib oʻtgan yoʻllarda ham gʻoʻzalar oʻsayotganga oʻxshab koʻrindi. Siz qanaqaligingizni bilmayman-ku, lekin men mana shunaqangi poyonsiz dalalarga chiqqanimda yayrab, jonim tanimga sigʻmay ketadi. Undan keyin qornim toʻydi deguncha, ashula aytib yuboradigan odatim ham bor. Shu paytda qorin masalasida shikoyatim yoʻq hisobi. Undan keyin atrofda: «Hoy, Mullahoshim, quloq oʻzimizga ham kerak»,—deb tanbeh beradigan biron kimsa ham koʻrinmaydi. Shartta ashulani boshlab yubordim:

Xoh gʻoʻzam, xoh-xoh gʻoʻzam, Hosili oppoq gʻoʻzam, —

deyman-u, buralib-buralib oʻyinga tushib yuboraman. Keyin ikki qoʻlimni biqinimga qoʻyib, egilib, gʻoʻzalarga salom beraman-da:

Xoh gʻoʻzam, xoh-xoh gʻoʻzam, Hosili oppoq gʻoʻzam, —



deb kuylab yoʻlda davom etaman. Qorongʻi tushib osmonda charaqlab yulduzlar ham koʻrinib qoldi. Ammo hali aytganimdek, yoʻlning oxiridan darak yoʻq.

Bir mahal koʻchaning chap tomonidan miltillab chiroq yorugʻi koʻrinib qoldi. Borib qarasam, yetmish yoshlarga kirgan, oppoq soqoli koʻksiga tushib turgan bir otaxon yonboshlab olib xoʻrillatib koʻk choy ichyapti. Oyoq tomonda – toshfonus, oʻshaning yorugʻini koʻrgan ekanman.

- Assalomu alaykum, otaxon! dedim choʻzib, suv quyayapsizmi?
- Vaalaykum, otaxon chordana qurib o'tirib oldi, kel, o'g'lim, kel. Qani, beriroq kel-chi, tanimayroq turibman. Kimning o'g'lisan o'zi?
- Dadamning oʻgʻliman, deb yuboribman shoshilib. Hash-pash deguncha ikkovimiz ota-boladek boʻldik-qoldik. Otaxonning ismlari Polvontogʻa ekan. Ishimning oʻngidan kelganini qarangki, Polvontogʻa yolgʻiz oʻzi zerikib oʻtirgan ekan. Menga oʻxshash esli-hushli, gapga tushunadigan bir yigitga juda-juda ham zoriqib oʻtirgan ekan. Xursand boʻlib ketganidan otaxon meni obdan mehmon qildi, keyin termosdan choy quyib berayotib:
 - Obbo o'g'lim-ey, obbo taylog'im-ey, deb qo'ydi.
 - Otaxon, bu gʻoʻzalar qaysi kolxozniki? sekin maqsadga oʻtdim.
- Kolxozniki emas, sovxozniki. Oltinchi sovxozniki. Oʻgʻlim, qani qanddan ol, choy rasmi qand bilan ichiladi.
 - Otaxon, sovxozlaringga agronom kerak emasmi?
- Sovxozga kerak-kerakmasligini bilmayman-u, ammo-lekin bizning boʻlimga agronom kerak. Oʻzimizning agronom oblastga koʻtarilib ketdi. Umringdan baraka topkur koʻp azamat yigit edi. Nima, dadang agronommi deyman?
 - Dadam emas, mening o'zim agronomman.
- Nima?! Mushtumdek bola-ya! shunday deb otaxon menga bosh-dan-oyoq razm solib chiqdi. Men qoʻltigʻimda turgan qalpoqchamga «qalpoqcham, sehringni koʻrsat», deb asta shivirladim-da, ovozimni chiqarib:
- Otaxon, meni chogʻimda yosh bola deb oʻylayapsiz shekilli?- deb shartta oʻrnimdan turgan edim, Polvontogʻam mirzaterakdek boʻyimni koʻrib:



- Yopirim-ey, yopirim-ey! deb soqolini changallab, hang-u mang bo'lgancha menga tikilib qoldi. Hozirgina yosh bola eding-ku yo tush ko'rayotibmanmikin-a! Astag'firullo...
- Otaxon, men oʻzi shunaqaman, dedim shoshib-pishib, bir qarasangiz yosh boladek, yana bir qarasangiz katta odamdek koʻrinaman.
- Yopir-ey, yopir-ey! derdi otaxon tinmasdan. U bir nafasdan soʻng oʻziga kelib, «shunday qilib, agronomman deng, oʻgʻlim» deb soʻradi.
 - Ha, otaxon, agronomman.
- Bizning sovxozga ishga kirmoqchi boʻlib yaxshi qilibsiz, oʻgʻlim. Sovxozimiz keng, hammaga ham ish yetib ortadi. Fargʻona tomondan boʻlaman, dedingizmi?
 - Ha, Farg'ona tomondan bo'laman.
 - Ota-onalar hayotmi?
 - Hayot, otaxon, hayot.
- Barakalla. Ularning davrida u yoq-bu yoqni koʻrib olganingiz ma'qul. Musofir boʻlmasang, musulmon boʻlmaysan, deydilar keksalar. Ertalab sovxoz direktorining oldiga oʻzim boshlab boraman. Fargʻonadan meni qora tortib kepti, hamshaharim boʻladi, ishga olsang ham olasan, olmasang ham olasan, deb turib olaman...

Oʻsha kechasi Polvontogʻa bilan dalaning oʻzida yotib qoldik. Oʻziyam anchadan buyon bunaqangi huzuri jon boʻlmagan edi. Sement ariqlarda hayqirib oqayotgan suvlardan egatlarga tarab qoʻydik-da, yerning oʻrtasiga qilingan baland supada choʻzilib yotdik. Olis-olislarda miltillab chiroqlar yonadi, koʻkdagi yulduzlarni aytmaysizmi, charaqlab koʻzni olay deydi. Oy boʻlsa tepamizga kelib allaqanday sargʻish, allaqanday koʻkimtir nurlar sochadi. Qalbimizda hech tushunib boʻlmaydigan, shodlikka ham, gʻussaga ham oʻxshamaydigan gʻalati-gʻalati hislar uygʻotgandek boʻladi. Suv oʻz tilida bir nimalar deb chulduraydi, chigirtkalarning basma-basga kuylashi, qurbaqalarning pashsha tuta olmaganidan kimgadir shikoyat qilayotgandek choʻzib-choʻzib qurillashi — mana shularning hammasi menga, negadir, qishlogʻimizni eslatib yubordi. Chalqancha tushib, ikki qoʻlimni boshim ostiga qoʻygancha yulduzlar chamaniga mahliyo boʻlib yotarkanman, shu paytda oyijonim, jondan yaxshi koʻrgan singillarimni eslab ketdim. Ehtimol,

bechora oyijonim sochlarini yulib faryod chekayotgandir, dalama-dala, qishloqma-qishloq boʻzlab meni axtarib yurgandir. Oyijon, oyijonim, meni axtarmang, meni deb koʻzyoshlaringizni oqizmang. Hoshimboyning ishlari besh, katta sovxozga katta agronom boʻlay deb turibdi...

Oʻylay-oʻylay uxlab qolibman.

Sovxoz direktori baland boʻyli, yelkalari keng, polvonnamo bir kishi ekan. Gapirganda ovozi xuddi xumning ichidan chiqqandek guldirab, jaranglab eshitiladi. Kulganda tomni koʻtarib yuborgudek qattiq kuladi, yurganda uyning pollari lapanglab ketadi. Polvontogʻa meni tanishtirgach:

- Hoshimboy hali yosh, uni oʻzing tarbiyangga olasan, deb tayinladi sovxoz direktoriga.
- Otaxon, Sizning gapingizni hech qaytarolmayman, dedi direktor menga zimdan razm solib, keyin mening oʻzimdan ham soʻrab qoʻydi: – Qaysi institutni bitirgansiz?
 - Agronomlik institutini.
 - Qaysi fakultetini?
 - Agronomlik fakultetini.
 - Yaxshi. Ilgari ishlaganmisiz? Yoʻq.

Akbar aka Nosirov unaqangi ezma direktorlardan emas ekan, gapni choʻzib meni ham, oʻzini ham qiynab oʻtirmadi-yu, shartta agronom qilib tayinladi-qoʻydi.

Oʻsha kuni ikkovimiz uning «villis»iga oʻtirib, dala aylandik. Toʻrtinchi boʻlimga tayinlangan ekanman, ixtiyorimda 1200 gektar paxta maydoni-yu, 12 brigada. Akbar aka meni jamiki brigada boshliqlari, men rahbarlik qilishim kerak boʻlgan odamlar bilan birma-bir tanishtirib chiqdi. Minib yuring deb, «IJ» markali mototsikl berib, oylik maosh ham tayinladi.

- Eng muhimi, oʻrtoq Roʻziyev, dedi u ta'kidlab,- odamlar bilan ishlash. Agar kishilar bilan yaxshi muomala qilsangiz, ularning qalbiga yoʻl topa olsangiz ish oʻz-oʻzidan yurishib ketaveradi. Tushunarlimi?
- Tushunarli, oʻrtoq Nosirov! dedim. Mototsiklni olishga olib qoʻydim-u, lekin yashirib nima qilaman, haydashni bilmas edim. Toʻgʻri, dadamning mototsikliga uch-toʻrt bor minganim bor. Oʻt oldirishni, gaz berishni, tezligini oshirib, pasaytirishni oʻshanda uncha-muncha oʻrgangan edim.

Uch kun mototsikl minishni mashq qilib, toʻrtinchi kundan boshlab dala aylanishga tushdim. Bu yerning odamlari ajoyib kishilar ekan. Qayerga bormay, hurmatimni joyiga qoʻyib, kutib olishadi. Choy, ba'zan qozon osib ovqat ham tayyorlashadi. Ikki marta tovuq shoʻrva ham qilib berishdi. «Aroq-paroq ham ichasizmi?» deb soʻrashgan edi, «tagʻin mast boʻlib qolib aljib oʻtirmay» deb, «yoʻq, men ichkilikni yomon koʻraman», deb qoʻya qoldim. Gohida:

- Oʻrtoq agronom, sizningcha, mahalliy oʻgʻitga superfosfatni aralashtirib solgan yaxshimi yoki superfosfatni selitra bilan tashlayveraylikmi? - deb soʻrab qolishadi.

Superfosfat nimasi-yu, selitra nimasi, rostini aytsam, oʻzim ham bil-mayman. Ilgari bunaqangi gaplarni hech eshitmagan ekanman. Lekin shunday boʻlsa ham sir boy bermayman:

- Shuni ham soʻrab oʻtiribsizlarmi, - deb joʻrttaga balanddan kelaman, - kim aytadi sizlarni Mirzachoʻlning mashhur paxtakorlari deb, uyat emasmi!

Aylanib yurib toʻrtinchi brigada dalasida janjal ustidan chiqib qolibman. Boʻlim boshligʻi Oʻrmon aka bilan brigadir Rahimjon aka nima toʻgʻrisidadir qoʻllarini paxsa qilib bahslashmoqda edi. Meni koʻrishi bilan boʻlim boshligʻi:

- O'rtog agronom, Sizdan bir iltimosim bor, deb qoldi.
- Marhamat, mototsikldan asta tushdim.
- Agar malol kelmasa mana bu Rahimjonga, uning a'zolariga kompost to'g'risida bir gapirib bersangiz. Bular haligacha hech narsa tushunishmas ekan.
- Marhamat, dedim-da, u yoq-bu yoqqa qarab olgach, leksiya oʻqish-ga tushib ketdim, oʻrtoqlar, kompost juda foydali ichimlik, uni asosan mevadan tayyorlashadi. Mevalarning xili qancha koʻp boʻlsa, u shuncha shirin boʻladi. Bizning Fargʻona tomonlarda kompostni oʻrik, shaftoli qoqi va olchaning qurugʻidan tayyorlashadi. Xullas, kompost ichmabsiz, dunyoga kelmabsiz...

Gapimni tugatmasimdan oʻtirgan odamlar sharaqlab kulib yuborishdi. Qiziqroq gap aytgan boʻlsam kerak deb, mening oʻzim ham kulaverdim,



rosa kulishdik. Keyin bilsam, oʻsha kuni obdan sharmanda boʻlgan ekanman. Goʻngni achitib tayyorlanadigan kompost bilan mevalardan tayyorlanadigan kompotning farqiga bormasdan, rosa aljibman, oʻsha kundan boshlab toʻrtinchi brigada dalalariga qadam bosmaydigan boʻlib ketdim.

Qisqasi, mana shunga oʻxshash ikir-chikirlarni hisobga olmaganda ishlarim koʻngildagidek, kayfim chogʻ edi. Qani endi direktorimiz Otajon Azizovichmi yoki menga ikki baholar qoʻyishdan hech charchamaydigan Qobilovmi mana shu yurishlarimni bir koʻrishsa-yu, oʻqimasdan katta odam boʻlib olganimni, mas'ul ishda ishlayotganimni koʻrib oʻz aytganlariga pushaymon boʻlishsa, deb oʻylayman.

Kunlarning birida mehribon oyijonimga, direktorimizga alohida-alohida qilib xat yozdim. Oyijonimga nima deb yozganimni oʻzingiz ham sezib turgan boʻlsangiz kerak. Otajon Azizovichga esa taxminan mana bunday deb yozgan edim:

«Qadrli Otajon Azizovich!

Mirzachoʻlning azamat paxtakorlaridan Sizga otashin salom. Shuni ham aytib qoʻyayki, Siz yolgʻonchi boʻlib chiqdingiz, kishi oʻqimasa, yoshlikda ilm olmasa, algebra, geometriya, ona tilini puxta egallamasa, agronom ham, injener ham boʻla olmaydi devdingiz, yolgʻon ekan. Mana men agronomman. Ishonmasangiz, shu xat bilan yuborgan rasmimga qarang. Endi ordenli boʻlganimda uchrashamiz.

Xayr. Salom bilan agronom, Hoshimjon Ro'ziyev».

Xatni yuborgan kunim ertasiga ikkinchi brigada yerlarini aylanib nima qilishni, kimga qanaqa buyruq berishni bilmay xunobim oshib yurgan edim. Rahbar boʻlsang-u, hech kimga hech qanaqa buyruq bera olmasang, bundan ham xunugi boʻlmas ekan. Demak, deyman, oʻzimga-oʻzim, qishlo-gʻimizdagi savodsiz agronom Anorboy togʻa shuning uchun ham boʻlarboʻlmasga baqiraverarkan-da. Koʻp baqirsang, yomon ishlayotganing ham sezilmas ekan. Baqiroqlarning hammasi ham menga oʻxshab ilmsiz, sehrgarlik bilan rahbar boʻlgan ekan-da, deb oʻylayman-u, ishlab turgan kishilarning yoniga borib boʻlar-boʻlmasga baqiraman, shovqin solaman.

Lekin bugun kimga, nima deb baqirishni bilmay garang edim. Bir mahal brigada boshligʻi Murodjon aka halloslagancha kelib qoldi.



- O'rtoq agronom, o'rtoq agronom! dedi u o'pkasi og'ziga tiqilib.
- Xo'sh? dedim qovog'imni solib, qoshlarimni past-baland qilib.
- Men sizni ertalabdan buyon axtarib yuruvdim.
- Xo'sh? deb pishqirdim yana.
- Gap bunday, oʻrtoq agronom, gʻoʻzalarimizga yoppasiga shira tushib ketibdi.
- Shira? Qanaqa shira? deb baqirdim, yopishqogʻidan tushibdimi?
 Shunday deyman-u, lekin oʻzim shira qanaqa boʻlishini hech koʻz oldimga keltirolmayman. Toʻgʻri, ilgari shira-pira deb eshitganim bor, lekin hech koʻrgan emasman.
- Maslahat bersangiz: qanday tugatsak ekan? deb soʻradi yana Murodjon aka.
- Qani, menga koʻrsating-chi, dedim oʻzimni bosib. Brigadir kelgan tomonga qarab ketdik. Boryapman-u, yoʻl-yoʻlakay qoʻltigʻimga qisib olganim, sehrli qalpoqchamga «qalpoqcham, yordam bergin, aql oʻrgatgin» deb shivirlayman.

«Aql sehrga boʻysunmaydi, aqlingga aql qoʻshib berolmayman, oʻzimda ham shu qurgʻurdan sal kamroq», — deydi qalpoqcham.

- Bo'lmagan gap, qo'shasan!
- «Qoʻsholmayman. Ilm, aql degan narsalar qalin jildli kitoblarda boʻladi, dono kishilarning kallasida boʻladi. Umrim bino boʻlib bitta ham kitob oʻqigan emasman. Xat-savodim yoʻq...»
- Mana koʻring, mana shu gʻoʻzalarga shira tushgan, deb qoldi Murodjon aka shu payt katta paykalni koʻrsatib. Imillashning payti emas edi. Biron donoroq maslahat bermasam, bu yerda ham toʻrtinchi brigadadagiga oʻxshab obroʻyim bir pul boʻlib qolishi mumkin. Lekin nima desam ekan?
 - Bargiga tushibdimi? deb soʻradim gap orasida.
 - Bargiga tushmay, poyasiga tusharmidi? kesatib qoʻydi brigadir.
- Menga qarang, gʻoʻzalarning tubidan ushlab qattiqroq silkitsak shirasi toʻkilib ketmasmikan-a?
 - Hazilingizni qoʻysangiz-chi, oʻrtoq agronom.
- Gʻoʻzaning ustidan chelaklab suv quysak, shirasini yuvib ketadi-ku.
 Ha, albatta shunday qilamiz. Shunday! dedim hovliqib.

Murodjon aka dalani boshiga koʻtarib xaxolab kulib yubordi. Demak,



u meni hazil qilyapti deb oʻylamoqda. Hazil boʻlsa boʻla qolsin dedimda, oʻzim ham qiqirlab kulaverdim. Jagʻlarimiz qiyshayib qolguncha kulishdik. Keyin oʻzimni bosib, jiddiy bir ohangda:

- Necha ishchingiz bor? deb soʻradim.
- Ellik beshta, o'rtoq agronom.
- Har bittasiga yigirma donadan tol navdasi kestiring va bir soat ichida jamiki ishchingizni mana shu yerga toʻplang! – deb buyurdim. Aytganimdek, bir soat oʻtar-oʻtmas 55 ishchi qoʻltigʻida bir dastadan novdasi bilan huzurimga «qani, ishingiz boʻlsa buyuring», deb yetib kelishdi. Egat oralab paykalga tushinglar, dedim.
- Endi hurmatli oʻrtoqlar, shira tushgan barglarni kaltaklaysizlar, –
 deb qoʻydim gapimning oxirida.
 - Nima? koʻzlari joyidan chiqib ketgudek boʻlib soʻradi brigadir.
 - Gapni koʻpaytirmang, buyruqni bajaring!
- Hushingiz joyidami oʻzi, oʻrtoq agronom? Axir bunda gʻoʻzalar nobud boʻladi-ku!
- Gʻoʻza nobud boʻlsa, men javob beraman, agronom javob beradi, deb baqirib yubordim toʻsatdan. Shiraga qarshi kurashishning yangi metodi boʻladi bu. Tushundingmi? Zamondan orqada qopsan, kallavaram...

Xullas, buyrugʻimni oʻtkazmaguncha qoʻymadim. Toʻgʻri-da, gapimni gap qilolmasam bu yerda men nima deb yuribman. Odamlar avvaliga yelka qisishib, bir-birlariga qarab, hayron boʻlib turishdi-da, yangi metod deganimni eshitib, «chindan ham biron hikmati boʻlsa kerak», deb oʻylashdi shekilli, koʻzlarini chirt yumib, gʻoʻzalarni savalashga tushib ketishdi.

Bir mahal, bunday qarasam, bir xil gʻoʻzalarda bitta ham barg qolmagan, tandir kosovdek soʻppayib turibdi, bir xillarining boshi singan.

- Esizgina mehnat, Eshvoy! dedi ishchilardan biri bosh chayqab.
- Nimasini aytasiz, Qobilvoy, dedi boshqasi uh tortib, yangi metod shunaqa boʻlsa... tavba.
- Aslida, agronomning oʻzini tutib olib kaltaklash kerak edi! dedi uchinchisi.

Shu payt orqa tomondan mashinaning ketma-ket chalingan signali eshitilib qoldi. Qarasam, sovxozimizning direktori Nosir aka tushib kelyapti.

- Hormang, agronom, - deb qo'l uzatdi u.



- Salomat boʻling, dedim yangi metod oʻylab chiqarganim uchun gerdayib. Ehtimol, mukofotga ham taqdim qilib yuborar, deb ich-ichimdan sevinib ham turibman
 - Nimalar qildiryapsiz?
 - Shiraga qarshi kurashyapmiz.

Direktor odamlar ishlayotgan joyga borib, avvaliga nimalar boʻlayotganiga tushunmadi shekilli, birpas angrayib turdi. Keyin toʻsatdan har bir koʻzi shokosadek boʻlib:

- Bular tentak bo'lganmi o'zi! deb baqirdi.
- O'rtoq agronom buyurdilar,- tushuntirdi brigadir.
- Agronom? Nima?! Nosirov shunaqangi qattiq baqirdiki, nazarimda olis-olislardagi togʻlar ham larzaga kelib silkingandek boʻldi.
- Aqlingiz joyidami oʻzi, oʻrtoq Roʻziyev, oʻsha vajohat bilan soʻradi direktor.
 - Joyida, o'rtoq Nosirov.
 - Agronomimiz jinni bo'lib qolganga o'xshaydi, dedi kimdir.
 - Rost, ana, qaranglar koʻzi ham bejo, dedi boshqasi.
 - Ushlanglar uni! deb yuborsa bo'ladimi Nosirov.

Ellik besh kishi tengdan gʻazabga kelib turgan ekan, hammalari mujib tashlagudek boʻlib menga tashlanib qolishdi. Qani, hurmatli doʻstim, oʻzingiz insof bilan ayting-chi, shundan keyin men, nima qilishim kerak edi. Albatta, boshimga qalpoqchamni kiyib xayr-ma'zurni nasiya qilib boʻlsa ham juftakni rostlab qolishdan oʻzga chora qolmagandi.

O'sha atrofda aylanib yurgan edim, qo'limga, nima bo'ldi-yu, bitta gazeta tushib qoldi. Unda ushbu e'loncha bosilgan ekan:

«Rayon militsiya boʻlimi mehnatkashlarga shuni yozib bildiradiki, bundan uch kun avval toʻrtinchi sovxozdan Hoshimjon Roʻziyev nomli bir yigit qochdi. Oʻzini agronom qilib koʻrsatib yurgan bu shaxs, aslida, shahar jinnixonalarining biridan qochib kelgan kimsadir. Boʻyi terakdek novcha, oʻzi igna yutgandek ozgʻin, yurganda biroz oqsab yuradi. Gapida ma'no yoʻq, yosh bolalardek aljib gapiradi. Koʻrgan-bilganlar boʻlsa militsiya boʻlimiga xabar qilishini soʻraymiz...»

Bu dargohdan ham tezroq chiqib ketish payiga tushib qoldim.



Savol va topshiriqlar

- 1. Adibning hayoti va ijodi haqida nimalar bilasiz?
- 2. Adibning umrining katta qismini aynan bolalar uchun ijod qilishga sarflaganining sababi nimada?
- 3. X. To'xtaboyevning qaysi asarlari bilan tanishsiz?
- 4. «Sariq devni minib» romanini toʻliq oʻqib chiqing.
- 5. Romanning bosh qahramoni qanaqa bola? Unga toʻliq xarakteristika berishga harakat qiling.
- 6. Hoshimjon xatti-harakatidagi ijobiy sifatlar nimada?
- 7. Hoshimjonning qaysi sifatlarini ma'qul qila olmaysiz?
- 8. Hoshimjonning sehrli qalpoqchani izlashi bilan bogʻliq tasvirlarga diqqat qiling. Uning «oyim aytyapti» deb ikkita nonni qarzga olganini qanday baholaysiz? Sizningcha Hoshimjonning bu harakati yolgʻonchilikmi, shumlikmi?
- 9. Hoshimjon qalpoqni dastlab qayerda va qanday sinadi?
- 10. Romanning «Sariq devni minib» deb nomlanishiga asos boʻlgan Soraxon folbin va uning oʻgʻli Mirobiddinxoʻja nayranglarini fosh etishga bagʻishlangan joylarini sinchiklab oʻqib chiqing. Undan Hoshimjon Mirobiddinxoʻjaga tanbeh berayotib sal boʻlmasa oʻzini kimligini bildirib qoʻyishi mumkin boʻlgan joyni uning nutqidan toping.
- 11. Romanning «Baxtim kulib boqqan edi» bobida Hoshimjonning tashqi koʻrinishi qanday tasvirlangan?
- 12. Ushbu bobda Hoshimjon va Hayitvoy gap-soʻzlaridan ular xulqi, tarbiyasidagi qanday farq koʻrasiz?
- 13. Hoshimjonning agronomlik «faoliyati»ni qanday baholaysiz?
- 14. Hoshimjonning agronomlik «kashfiyoti» nimada?
- 15. E'tibor bersangiz, Hoshimjon sehrli qalpoqqa ishonib qaysi kasbda ishlamoqchi bo'lsa, darrov qovun tushirib, fosh bo'layotganining sababi nimada?
- 16. Daftaringizga Hoshimjon tilidan keltirilgan tabiat tasviri, hazil-mutoyiba soʻzlarini yozib oling.
- 17. «Bilimsizlik pand beradi» mavzuida insho yozing.
- 18. Qanday asarlarni sarguzasht asar deb ataymiz?
- 19. Oʻzbek adabiyotida yaratilgan sarguzasht asarlarni sanang.



SARGUZASHT ASAR HAQIDA

Aziz oʻquvchilar! Siz turli-tuman qiziqarli hodisalarga boy sarguzasht asarlarni koʻp oʻqigansiz. Sarguzasht deb boshdan kechirgan voqealarga aytiladi. Adabiy asardagi har qanday voqeani ham sarguzasht deyish mumkin emas. Sarguzasht asarda favqulodda qiziq va gʻaroyib voqealar, oʻquvchini hayajonga soladigan tasvirlar, kechinmalar koʻp boʻladi. Bunday asar kishini doim hayajonda ushlab turadi, uni oʻqiganingizda buyogʻi nima boʻlarkin deya qiziqishingiz ortib boradi. Jonatan Sviftning «Gulliverning sayohatlari», Daniel Defoning «Robinzon Kruzo», Jyul Vernning «Oʻn besh yoshli kapitan» kabi asarlari ana shunday asarlardandir. Bu asarlarda qahramonlar koʻz koʻrib, quloq eshitmagan voqealarni boshdan kechiradilar, dahshatli toʻsiqlarga duch keladilar. Toʻgʻri, bunday asarlarda biroz mubolagʻa, biroz fantastik tasvir ustunlik qilsada, oʻquvchi uni boshdan oxir hayajon bilan oʻqiydi.

Oʻzbek adabiyotida ham qahramonlar hayoti sarguzashtli kechadigan asarlar anchagina. Jumladan, Alisher Navoiyning «Farhod va Shirin» dostoni sarguzasht asarning mukammal namunasi desa boʻladi. Unda Farhodning Axraman devni yengishi bilan bogʻliq voqealar, Yosuman kampir kirdikorlari haqiqiy sarguzasht asarga xos tarzda tasvirlangan.

Keyingi davr adabiyotimizda yaratilgan asarlar, jumladan, Siz yuqorida tanishgan Xudoyberdi Toʻxtaboyevning «Sariq devni minib» romani ham sarguzasht usulida bitilgan asar hisoblanadi. Unda 6-sinf oʻquvchisi Hoshimjon Roʻziyevning qilmishlari juda qiziqarli voqealar asosida hikoya qilinadi. Bu asarda fantastik, detektiv holatlar uygʻunlashgan. Garchi asarda real voqealar tasvirlanayotgan boʻlsa-da, undagi fantastik, detektiv unsurlar romanni hayajon bilan oʻqilishini ta'minlagan.

Sarguzasht asarlar qiziqarli boʻlishi, ajoyib-gʻaroyib voqealarga boy boʻlishidan tashqari, uni oʻqigan kitobxonning dunyoqarashini oʻstirishga, fantaziyasini oʻstirishga xizmat qiladi. Shuning uchun ham aziz bolajonlar, Sizlarga vaqt-vaqti bilan sarguzasht asarlarni oʻqib turishni maslahat beramiz.



G'afur G'ULOM (1903 – 1966)



Taniqli oʻzbek adibi Gʻafur Gʻulomning tarjimai holi, «Mening oʻgʻrigina bolam» nomli hikoyasi bilan oʻtgan oʻquv yilida tanishgan edingiz. Yodingizda bo'lsa, bo'lg'usi adib 1903-yilda Toshkent shahrida tavallud topgan. Uning ayni o'ynab-kuladigan, baxtli va betashvish kunlarni kechirishi lozim bo'lgan bolalik onlari Birinchi jahon urushi davri (1914-1918-yillar) ga to 'g'ri keldi. Ota-onasidan yosh yetim qolgan G'afurjonning boshiga juda koʻp koʻrgiliklar tushadi. Garchi urush bizning yurtimizdan juda uzoqda – olis Yevropada kechayotgan boʻlsa-da, uning sovuq nafasi butun o'lkamizni qamrab olgan edi. Shahar va qishloqlar och-nahor odamlarga, tilanchi va devonalarga toʻlib ketgandi. Urush tufayli turmush tobora ogʻirlashar, qimmatchilik va qahatchilik (oziq-ovqat va boshqa mahsulotlarning yetishmasligi) xalqning tinkasini quritar darajaga yetgandi. Bunga qo'shimcha, yurtimizni bosib olgan Rusiya mustamlakachilari urush ortidagi og'ir qora ishlarni bajartirish uchun bizning o'lkamizdan ham erkaklarni – qoʻlidan ish keladigan kishilarni majburan mardikorlikka olib ketardi. Boquvchisidan ajragan xonadonlar, ayollar va bolalar nihoyatda ayanchli ahvolda qolgan, shu sharoitda, ogʻir mehnat bilan yetishtiraladigan aksariyat noz-ne'matlarni chor hukumati turli bahonalar, aldovlar bilan yurtdan tashib ketardi. Koʻchalarda daydib yurgan toʻp-toʻp tilanchilar va gadoylar safiga urush bo'layotgan joylardan jon saqlash uchun qochib kelgan yuz minglab och odamlar ham qo'shilgandi.

Boʻlgʻusi adib mana shu musibatga toʻla kunlarni oʻz boshidan oʻtkazar ekan, bolalik tasavvurida bu koʻrgiliklar uzoq muddatga muhrlanib qolmasligi, qalbini larzaga solmasligi mumkin emas edi, albatta. Keyinchalik — 1936-yilda yozuvchi bu oʻtmish hodisalarini xayolida qayta jonlantiradi va oʻzining mashhur «Shum bola» nomli qissasini yaratadi. Bu qissa uning umrining oxiriga qadar yanada sayqallanib, boyib boradi, oʻtgan asrning 60-yillarida hozirgi mukammal holiga keltiriladi.

Quyida ana shu qissadan bir parchani e'tiboringizga havola qilar ekanmiz, avvalo bu parchani sinchiklab mutolaa qilishingizni, qolaversa, maktabingiz kutubxonasidan Gʻafur Gʻulom kitobini topib, asarni toʻliq holda oʻqib chiqishingizni istar edik. Shuni bilingki, mazkur qissani bugungi kunda nafaqat oʻzbek kitobxonlari, balki dunyoning juda koʻp joylaridagi tengdoshlaringiz ham miriqib oʻqimoqdalar. Gʻafur Gʻulomning «Shum bola» qissasi dunyodagi koʻplab xorijiy tillarga tarjima qilinib, qayta-qayta nashr etilayotgani bejiz emas, albatta.

Qissa toʻgʻrisidagi suhbatni esa undan bir shingil bahramand boʻlganingizdan keyin boshlaymiz.

SHUM BOLA

(qissadan parcha)

...Bu qishloqda Sariboy boʻlis degan katta yer egasi bor ekan. Uning ming tanoblab hisoblangan olmazoriga epchil qoʻlli xizmatkor doim zarur boʻlib turar ekan. Ayniqsa, hozir olmalar pishgan vaqti boʻlgani uchun menga oʻxshash oshtomogʻiga yuradigan arzonqoʻl kishilarni eshigidan quvlamas ekan. Bu kecha uning xizmatkorlari yotadigan qoʻshxonada yotishga qaror berdim. Uzumchi menga yoʻlboshlovchi boʻlib koʻrsatib qoʻydi. Boyning qari-qartang aralash yigirma choq xizmatkorlari kechki juvari goʻja ustida edilar.

- Assalomu alaykum, deb kirib bordim. Juda mehribonlik bilan oʻz oʻrtalariga qabul qildilar. Arz-dodimni ularga aytdim. Ulardan bitta keksarogʻi:
 - Asil umring Sariboyda bekorga oʻtib ketadi, uka, yosh ekansan.



Bironta boshqa kasbning payidan boʻlganingda yaxshi boʻlar edi. Ha, mayli, sal oʻzingni tutib olguningcha oʻn-oʻn besh kun ishlab tur. Keyin yoʻlingni topib olarsan... – degan dudmal maslahat berdi. Bitta boʻsh sopol tovoqqa bir choʻmich goʻja quyib berdilar. Ikki burda jaydari non bilan shu oshni maza qilib ichib oldim.

Yotishda ham shular oʻrtasida qoldim. Yaxshi olmalarni joylab, uzoq shaharlarga yuboradigan yashiklardan ikkitasini yonma-yon karavot qildim. Boshimga olma oʻraydigan yogʻoch qirindisidan yostiq qilib rohatrohat uyquga ketdim.

Bu uyqu eshon xonaqosiga qaraganda juda shohona edi. Hech boʻlmasa, bu yerda, tong azonda avrodchi soʻfilarning qichqirib gʻoʻldiraydigan har xil duolari kishini uyqudan bezovta qilmas edi. Erta bilan boʻlisning oldiga bordim. Bir qancha silkillashishlardan keyin boy menga xizmat haqi uchun oyiga xom-pishiq aralash, ona sutidan halol ikki pud oʻn yetti qadoqdan olma beradigan boʻldi. Shu paytda boyning avzoyini koʻrib, mening ham haromzoda tomirim urib qoldi. «Mendan nima ketdi, bir shart qoʻyib qoʻyay, bir kun boshimga biror ish tushib qolsa, shu bahona qutulib ketarman», degan xayol bilan: «Boy buva, – dedim, – endi-ku, savdoimiz pishdi. Shariat yuzasidan mol sotganda hamma aybini aytib sotsa halol boʻlar ekan. Mening ham bir aybim bor, shuni boshdan aytib qoʻyganim yaxshi».

- Xo'sh, nima aybing bor? Siyg'oqmisan, tutqanoqmisan?
- Yoʻq aybim bu emas, aybim shuki, yoshligimdan odat boʻlib qolgan har zamon-har zamonda beixtiyor yolgʻon gapirib qoʻyaman, shunda koyimasangiz bas. Xizmat haqqi mayli, siz aytgancha boʻlsin.
- Obbo bachchagʻar-ey, quv koʻrinasan-a, ha, mayli-mayli. Lekin koʻp yolgʻonlamagin!

Qiladigan ishlarim uncha ham qiyin emas. Olmalarga tirgovich qoʻyaman, toʻkilgan olmalarni terib, qoqi qilaman. Bogʻ qoʻriyman. Ba'zida xoʻjayinga pul zarur boʻlib qolsa xom-xatala olmalarni aravaga ortib, Darvoza, Sariogʻoch atroflardagi bugʻdoykor qishloqlarga olib borib sotib kelaman. Molga toʻgʻrab bersa mol yemaydigan olmalarni choʻlda, bugʻdoy oʻrib turgan dehqonlarga bir qadogʻini ikki qadoqdan bugʻdoyga alishaman.

Sariboy bo'lis haligacha xo'jayinlarimning ichida eng xudo urgan badbaxti, ziqnasi edi.

Uning oldiga bir ish bilan borsangiz, boʻlar-boʻlmas yerda «innay-keyin» deb soʻraydigan odati bor edi. Ana shu «innaykeyin» ga javob topib bera olmasangiz, onangizni Uchqoʻrgʻonda koʻrasiz. Qamchi bilan yelkaga tushirib qolguvchi edi. Chunonchi, borsangiz-da, «qandil olma pishibdi» deb aytsangiz, u sizga «innaykeyin» deb savol beradi. Siz albatta: « Shu pishgan olmani terish kerak» deysiz. Yana xudo qargʻagan «innaykeyin» deydi. Xayr, «Sotish kerak», deysiz. Yana «innaykeyin» deb soʻrab qoladi. Vaholanki, shu yerda gapning oʻzi tamom. «Innaykeyin» degan savolga hech hojat yoʻq. Ana shunaqa oʻrinda javob topib bera olmaysiz-da, boydan kaltak yeysiz.

Sariboy Chuvalachidagi Yusuf kontor bilan qimor oʻynab, uning mevazorlari, ichki-tashqi qoʻrgʻonchasi, butun dov-dastgohining hammasini yutib olibdi. Yusuf kontorning bogʻi, ayniqsa, uning bahavo shiyponi bizning xoʻjayinga ma'qul tushib qolib, darrov oʻsha yerdan bitta doʻndiqqina qirgʻiz xotinni olib, bir borgancha oʻn-oʻn besh kunlab Kalasga qaytmaydigan boʻlib qoldi. Olmalar pishib, toʻkilib ketayotibdi, xoʻjayindan ruxsatsiz terishga hech kim botina olmaydi. Otlarga yem-xashak yoʻq. Xizmatkorlar och, lekin boyning oldiga borishga hech kimning yuragi dov bermaydi. Har gapdan keyin beriladigan «innaykeyin» savolidan hamma qoʻrqadi.

Bir kun kechqurun xizmatkorlar bilan oʻtirib qanday qilib boyni oʻz joyiga chaqirib kelish toʻgʻrisida maslahatlashdik ham kim borishini oʻylashdik, nima deb chaqirib kelishni fikrlashdik. Toinki «innaykeyin» dardidan keyin boyning oʻzini tinkasi quriydigan boʻlsin.

Chek menga chiqdi.

Erta bilan bir otga minib, boyning oldiga qarab yoʻl soldim. Yoʻl-yoʻlakay ming xil xayollarga botib oʻylayman. Qanday qilib «innayke-yin»iga javob topish kerak?

Yetib borib otdan tushdim. Boy shiyponda kalla goʻshti bilan nonushta qilib oʻtirgan ekan. Salom berib sekingina poygakka tushib oʻtirdim.

- Xo'sh?!



- Shunday o'zim, sizni sog'inib, bir ko'rib kelay deb kelgan edim.
- Yaxshi, yaxshi, barakalla juda ham quruq kelmagandursan, biror ishing bordur, xoʻsh, nimaga kelding?

Shu paytda boyga xizmatkor yurishda qoʻygan shartim esimga tushib qoldi. «Shart qilgan yolgʻonni endi gapirmasang, qachon gapirasan», dedim-da, gap boshladim:

- Anavi, haligi, dandon sopli pichogʻingiz sinib qolib edi, shuning xabarini bergani keldim.

Ana shu soʻzdan keyin menga «innaykeyin» savoli yogʻila boshladi.

- Xo'sh, innaykeyin, qanday qilib sindi? Ro'zg'orda mening pichog'imdan boshqa pichoq qurib ketgan ekanmi?
 - Tozi itingizning terisini shilayotgan edim, suyakka tegib sinib qoldi.
- Iyya?! dedi boy. Tozining terisini mening dandon sopli picho-g'imda shilasanlarmi, o'zing ayt-chi, nimaga shildilaring?
- Shoshib qoldik-da, oʻlib qolgandan keyin, bekor ketmasin deb terisini shilib oldik.
 - Nima qilib oʻldi?
 - Harom o'lgan otning go'shtini ko'p yeb qo'ygan ekan, bo'kib o'ldi.
 - Harom o'lgan ot go'shti qayoqda ekan?
- Ha, o'zimizning to'riq qashqaning go'shtini yeb o'ldi-da, begona ot emas.

Boy alanglab qoldi.

- Hay-hay, bola ogʻzingga qarab gapir, toʻriq qashqa oʻldi dedingmi? Hoʻsh, toʻriq qashqa nima qilib oʻldi?
 - Xomlik qilib oʻldi.
 - Nimaga xomlik qiladi?
- Hech aravaga qoʻshilmagan ekan, biz uni aravaga qoʻshib, suv tashigan edik, zoʻriqib oʻldi.
- Nima deyapsan, haromi, boshqa shuncha aravakash otlar turib, kelibkelib mening birdan-bir boqib qoʻygan uloqchi otim bilan suv tashiysanlarmi, padarla'natilar?
- Ha, o't tushgandan keyin uning uloqchiligiga qarab o'tiradimi, duch kelganini qo'shib, ishqilib bir chelak bo'lsa ham suv tashiy beradi-da!



Boyning chaynab turgan yaxna tilni yutishga ham darmoni qolmadi. Ogʻzidan olib qoʻydi-da, baqraygancha menga tikilib:

- Oʻzing jinni-pinni boʻldingmi? Oʻt tushdi deganing nima deganing, qayerga oʻt tushdi, nimaga tushadi?
- Sogʻman, xoʻjayin, oʻt, avvalo, ogʻilxonaga tushdi. Ot shoʻrliklarning hammasi nobud boʻlib ketdi-da, xoʻjayin.
 - Iyya, ogʻilxonada oʻt nima qiladi?
- Mening ham fikrim shu, boshqa xizmatkorlaringizning ham fikri shuki, oʻt ombordan oʻtgan boʻlsa kerak.
- Axir omborda o't chiqadigan narsa yo'q-ku? Bug'doy bor edi, to'g'ri, guruch bor edi, to'g'ri, yog' bor edi, gazmol bor edi, to'g'ri, shulardan o't chiqadimi?
- Berdisini aytguncha shoshmang, xoʻjayin, omborga qoʻrgʻondan oʻtibdi. Ogʻilxonaga ombordan oʻtgan boʻlsa kerak. Shunaqa qilib birbiriga tutashib ketgan-da.
 - Iyya hali qoʻrgʻon ham yondi, degin!
- Qoʻrgʻon ham yondi, ombor ham yondi, ogʻilxona ham yondi, otlar ham oʻldi, pichogʻingiz ham sindi.
 - Qoʻrgʻonga qayerdan oʻt ketibdi?
 - Shamdan tutashib ketibdi, shamdan.
- Hoy, oʻzing jinni boʻlib qolibsan, oʻgʻlim! Axir, mening dargohimda shamga kun qoldimi? Qator-qator lampalar, oʻzim Toshkentdan atay sotib olib kelgan qirqinchi fanorlar qayoqqa ketibdi, kerosin boʻlsa bir yilga yetarligini bochka-bochka zapas qilib qoʻygan edim. Nimaga sham yoqasanlar!
- Xoʻjayin, deyman, oʻzingiz ham odamni juda xit qilib yuborar ekansiz-da! Butun boshlik oʻlikning arvohiga sham yoqmay lampa yoqiladimi? Kelgan arvoh nimaning shu'lasi bilan oʻynashadi. Axir, kosaga suv quyib, ustiga olma shoxi qoʻyiladi. Kelgan arvoh avval shoxga qoʻnib oʻtiradi. Bir nafas damini rostlagandan keyin haligi shamning pirpirab turgan shu'lasi bilan oʻynashadi.

Mening entak-tentak soʻzlarimdan boy talmovsirab qoldi. Goʻyo shu gaplarni eshitgisi kelmaganday, sekin, qoʻrqa-pisa soʻradi:





- Kim oʻldi?

Shu yerda men yuzimga qalbaki qaygʻular chiqarib, hoʻngrab yigʻlab yubordim.

 Kenjatoy oʻgʻlingiz Boʻriboyvachcha, terakka chiqib, chumchuq bolasini olaman deb yiqilib tushib, bir marta «dada» dedi-yu, «gʻiyq...» etib jon berdi.

Boy gaplarimning keyingi jumlalarini eshitdimi, eshitmadimi — bil-mayman, choy ichib turgan piyolasini boshiga urib, chakkasini yordi-yu, soqolini yulib, dodlab yigʻlamoqqa boshladi. Men ham qoʻshilib yigʻlar edim.

Bir nafas ayyuhannos solib yigʻlagandan keyin men toʻxtadim, boy ham toʻxtadi. Boyning juda ham oʻpkasini uzib yuborganimdan endi uni yupatish uchun oʻzimdan bir gap toʻqimoqchi boʻldim.

- Xoʻjayin, - dedim, - xudo berardan qismasin, xafa boʻlmang, bordi-yu, oʻgʻlingiz oʻlib, uyingizga oʻt tushgan boʻlsa, it nobud boʻlgan boʻlsa, pichoq singan boʻlsa, hammasining oʻrnini bosadigan bitta xushxabar ham topib kelganman.

Boy hiqillab turib soʻradi:

- Xushxabaring qursin, padarla'nat, qanaqa xushxabar?
- Oʻrtancha qizingiz Adol opam dunyoga arziydigan bitta oʻgʻilcha tugʻdilar.
- Iyya! dedi boy koʻzlarining shox soqqasi chiqquday, Adol opang hali erga chiqmagan-ku!
- Biz ham shunisiga hayronmiz-da, xoʻjayin. Xudo beraman desa, erga tegmasa ham berar ekan. Bolani ayting-a xoʻjayin. Badal aravakashingiz bor-ku, quyib qoʻyganday oʻshaning oʻzginasi.

Boy ortiq chidab tura olmadi. Hushidan ketib yiqildi. Men ham qamchi oʻrimidan yeydigan kaltakni nasiya qilib joʻnab qoldim. Mendan biror soatlardan keyin tulpor saman otda barlari osilib ketgan alpang-talpang, bir koʻzi yerda, bir koʻzi osmonda, egar qoshiga qamchi dastani tirab, yigʻlab boy kelib qoldi.

«Yana biron falokat yuz berib qolmasin», deb oʻzimni chetga oldim. Boyning yigʻlab kelishini uy ichlari eshitib, ular ham «bir balo boʻlipti shekilli», deb uydan yigʻlab chiqa boshladilar. Bir-birlarini quchoqlab arosat boshlanib ketdi.

Yigʻi tamom boʻlgandan keyin, bir-birlarini anglashib, surishtira boshladilar. Keyin ma'lum boʻlishiga qaraganda, na ot, na it oʻlgan, na qoʻrgʻonchaga oʻt tushgan, na pichoq singan. Boʻriboyvachcha boʻlsa soʻlakayini oqizib oʻzi chiqib qoldi.

Oʻsha kuni men koʻrinmay yurdim. Ertasiga boy meni qidirib, chalpak qilib koʻtartirib olib keldi. Avval qurttakkina qilib yigirma qamchini boshkoʻz aralash yedik. Soʻngra soʻradi:

- Hoy itdan tarqagan, bu qiligʻing nimasi?!
- Axir, boshida bay qilishgan edik-ku, aylanay xoʻjayin, har zamonda bir yolgʻon gapiraman, deb.
 - Bu o'sha yolg'oningmi?
 - Lekin hammasi emas edi.
- Agar hammasi bo'lmasa, butun yolg'on qilsang, men xonavayron bo'lar ekanman-da, tur-ey, padaringga la'nat seni, qorning oshga to'ymasin, juvonmarg bo'l! Haydang bu kazzobni.

Haydab chiqarmoqchi boʻldilar. Ketish oldidan boydan haq talab qildim. Chunki boyning eshigida bir oy-u oʻn toʻqqiz kun ishlagan ekanman. Haligacha bergan yigirma ikki tiyin choychaqani bosib qolib, qayoqdagi sasigan, qurt tushgan olmalardan ikki pud olmani bitta chipta qopga solib berdi. Men shunga ham shukr qilib, namozshom yoʻlga tushdim.

Yana oʻsha darbadarlik, yana oʻsha makonsizlik balosi. Qoʻndoqdan ajragan kakku bolasiday, qoʻnarga shox-butoqsiz. Kalasdan yuqoriroq tomon oʻrlab ketar edim.

Qirga chiqqandan keyin uzoqda bir oʻtov koʻrindi. Shunga qarab bordim. Oʻtovning eshigini qoqib, «xudoyi qoʻnoq», dedim. Bu kecha tunab ketishga ijozat soʻradim. Avval menga bir sidra shubha bilan qarab chiqqanlaridan keyin, qabul qildilar. Orqamdagi yukni koʻrib, oʻgʻri deb xayol qilgan boʻlsalar kerak. Qopning ogʻzini ochib bolalarga ikkita-ikkitadan olma olib berdim. Boshlari koʻkka yetib ketdi. Ular meni tuya suti—qimron bilan mehmon qildilar. Qozonga yopilgan nondan yarimtasini oldimga ushatib qoʻydilar. Qorin toʻygandan keyin, qopni boshga qoʻyib uyquga ketdim.

Tong azonda turib, o'tov egalari, er-xotin bilan xayrlashib, «Sariog'och



qaydasan?» deb yoʻlga tushdim. Oʻsha kezlarda mening toleim juda ham shoʻr edi. Qaysi qishloqqa borsam, bozorning ustidan chiqar edim. Aksiga olib bugun Sariogʻochning bozor kuni edi.

Mendan boshqa ham bozorga olma keltirganlar koʻp edi.

– Kep qoling, armonda qolasiz, sotaman-u ketaman! Buni yeganlar non yemaydi, shinavandaga sotaman, – deb javrab, maqtab peshinda arang sotib tugatdim. Gʻaladonni hisoblab koʻrsam, olti tanga bir miri boʻpti. Keyingi bir necha oy mobaynida belboqqa tugilgan naqdina shundan iborat edi.

Pul koʻp, qaygʻu yoʻq. Bozorni aylanib yurib hamma narsaga xaridor boʻlib koʻraman. Hamma narsaning narxini bilgim keladi. Bir kishining tunuka vannasiga xaridor boʻlib, kam soʻraganim uchun, undan yaxshigina soʻkish ham eshitib oldim. Kiyim bozorga kirib qunduz yoqalik bobrik paltolarga xaridor boʻlib koʻraman.

Qoʻy bozoriga kirib, shoxlari mullavachchalarning sallasiday buralibburalib ketgan doʻng peshonalik, katta bir qoʻchqorga xaridor boʻlib turganimda koʻzim tanish bir basharaga uchradi. U qoʻshoqlangan bir qoʻra qoʻy ustida kuzatib turar edi. Bu kim, qayerda koʻrgan ekanman?

Chang bosgan kipriklar tagidagi qoʻy koʻzlar menga juda tanish.

Yoʻlning gard-gʻubori qoqilmagan namatdek qilib yuborgan bu bashara koʻzimga issiq-issiq koʻrinadi. Lekin egnidagi qozoqi chakmon bilan boshidagi teskari agʻdarilgan telpak, qoʻlidagi boshi choʻqmor kaltagi menga tanish emas. Undan koʻzimni uzmay tikilib turaman. U ham menga gʻilt-gʻilt etib tikilib turadi.

Birdan qichqirib yubordim:

- Omon!!

Bir-birovimizning quchogʻimizga otildik, yalab-yulqashdik, hol-ahvol soʻrashdik. Oʻz boshimdan kechirganlarimni bir chetdan hikoya qilib berdim. Sarguzashtimning oxiri yonimdagi tanga-chaqa aralash olti tanga bir miri pulni jaraqlatib qoʻyish bilan tamom boʻldi.

U ham boshidan o'tganlarini so'zlab ketdi:

Oʻlik yuvdirgan koʻchmanchilarning qoʻlidan arang qochib qutulibdi. «Ulardan bitta-yarimtasiga uchrab qolib, tagʻin bir baloga yoʻliqmay», degan xayol bilan qishloqma-qishloq gadoylik qilib yurib, adashib-uloqib



oʻn yetti kun deganda Chimkentga yetib boribdi. Chimkentga bir amakisini qora tortib borgan ekan. Lekin bu bechoraning toleiga amakisi ham allaqachonlar oʻlib ketgan ekan. Shu bilan dard qolib, chor-nochor toshkentlik qoʻychi boylardan bittasiga bir yilga ikki toʻqli-yu, bir echkiga choʻponlikka yollanibdi. «Xudo berib, har qaysisi ikkitadan egiz tugʻib bersa, zora xoʻjayinimdek katta qoʻychi boy boʻlib ketsam», deb moʻljal qilibdi. Hozir shu boyning qoʻylarini haydashib Toshkent bozoriga keltirmoqda ekanlar. Bugun Sariogʻochning bozorida, «narxi kelsa sotamiz», degan umid bilan qoʻylarni bozorga solib turgan ekanlar.

Omonning bu topgan xizmati menga juda ma'qul tushdi. Omonning toleiga kunlasha boshladim.

- Jon oʻrtoq, xoʻjayiningga aytib meni ham bir amallab, qoʻychivonlikka oldirsang-chi, astoydil xolis xizmat qilib berar edim, – deb Omonga yalindim. U ham ma'qul koʻrib:
 - Ko'kterakka borganda, xo'jayinimga aytib ko'raman, dedi.

Kechgacha Omonning qoʻylarini qaytarishib yurdim. Sariogʻochda bu bozor echkining soʻrovi chaqqon ekan. Hamma echkilar sotilib ketdi-yu, lekin qoʻylardan koʻpi — yetmish uchta qoʻy bozordan qaytdi. Kechga yaqin xoʻjayin oʻzining yoʻrgʻasiga mindi-da:

 Oʻrtogʻing yaxshi bola koʻrinadi, unchalik koʻp ham qoʻy qolgani yoʻq. Omon uka, oʻrtogʻing bilan ikkoving kechalab qoʻylarni haydashib, ertalab Koʻkterakning bozoriga yetkazib bora qollaring. Men oldinroq borib turay, – deb otiga qamchi berib joʻnab ketdi.

Biz qoʻylarni bir saroyga qamab, ovqatlangan boʻldik. Biroz yon-boshlab dam oldik.

Yarim kechada oy koʻtarilgandan keyin, oldinma-ketin hushtak chalishib, «qurey-qurey»lashib Koʻkterakka qarab keta boshladik.

Qoʻy degan harom oʻlgur juda ahmoq, asov hayvon boʻlar ekan. Uni echki eplab yurar edi. Echki boʻlmagandan keyin boshi oqqan yoqqa sanqib keta berar ekan. Echki boʻlmaganida, eshakka minib, oldinga tushib ma'rab borish kerak boʻladi. Bizda na echki bor, na eshak bor. Men yangi havaskor choʻpon boʻlganim uchun ma'rashni uncha oʻrinlata olmas edim.

Ketib boramiz. Oydin kecha, salqin havoli qir.



Ahyon-ahyon qoʻylar ma'rab qoʻyadi. Bir yonboshimizda temir yoʻl yoqasidagi telegraf simlari gʻuvullab turadi. Juda gashtli umr, avjini baland qilib, ashulani qoʻyib yubordim.

- Ayt, uka, - dedi Omon. - Ancha vaqtdan buyon shunaqa bir rohat, tanish ovoz eshitganim yoʻq, - dedi.

Unga sari men zavqlanib ketganman, avjga avj qoʻshib boraman, osmonning chetlarini titratib yuborgim keladi. Temir yoʻlni yoqalagan uzun yoʻlda qoʻylar juda tixirlik bilan ilgarilamoqda. Echkining qadri gʻoyat oʻtmoqda.

Qandaydir kichkina qishloqqa ham yaqinlashib qoldik. Uning pastakpastak paxsa devorlari koʻrinib qoldi. Temir yoʻlga tutashib ketgan qishloq koʻchasida qoʻylarni gʻuj qilib haydab ketmoqdamiz. Omon temir yoʻlni koʻrsatib:

- Poyezdda yurgan odamlar xoʻpam mazza qiladi-da, deb qoʻyadi.
 Poyezdga tushib uzoq joylarga ketsang, deydi.
- Shuni ayt-a, ogʻayni, deyman. Qani endi odoq boʻlmas puling boʻlsa-yu, yuraversang. Qovunchiga borsang, Turkistonga borsang, Chinozga borsang, Maskopga borsang, hech kim churq etmasa, keta bersang, yana keta bersang, mazza... deyman.

Poyezdni ta'rif-tavsiflab kelamiz.

- Rost, qani endi, - deydi Omon.

* * *

Xalqimizning «Tuyani shamol uchirsa, echkini osmonda koʻr» degan maqolini eshitgan boʻlsangiz kerak. Bu degani «bir falokat koʻpchilikning boshiga yogʻilsa ham, u har kimga har xil ta'sir qiladi — «yoʻgʻon choʻzilguncha, ingichka uziladi» deganidir. Gʻafur Gʻulom tugʻilgan oilaning taqdiri yodingizdami? Gʻafurjon toʻqqiz yoshida otasidan, oʻn beshga kirib-kirmay mehribon onasidan ajraladi. Ukalari va singillari bilan gʻirt yetim qoladi. Yana qanaqa paytda deng? Aytganimizdek, butun dunyoda urushning sovuq nafasi kezib yurgan, oʻlkamizda iqtisodiy va ma'naviy tanazzul ayni chuqurlashgan yillarda. Bunday paytda ota-onasiz qolgan bolalarning hayoti juda ogʻir kechishini tasavvur qilsangiz kerak. Nima bilandir qorin toʻygʻazish, egniga kiyim-bosh topish oson ish emas.



«Shum bola» qissasining bosh qahramoni ham shunday og'ir kunlarda otasidan ayrilgan, qariyb siz tengi – oʻn toʻrt yoshli bolakay. Onasi bir etak bolani boqish uchun kun bo'yi tinim nimaligini bilmaydi. Shum bola bo'lsa, tengdoshlariga qo'shilib, erta tongdan to qorong'i kechgacha koʻchadan kirmaydi. U – yerga ursa koʻkka sapchiydigan, bir joyda uzoqroq turib qolsa yuragi siqilib ketadigan, tinib-tinchimas bolalar xilidan. Kunlarning birida u onasini xafa qilib qoʻyganidan xijolat bo'lib, qolaversa, biror oy mehnat qilib, pul topib kelish ilinjida yo'lga tushadi. Uning Toshkent atrofidagi qishloqlarda kechadigan sarguzashtlariga sarguzasht ulanib, yarim yildan ortiq davom etadi. Mana shu vaqt mobaynida Shum bola bir-biridan qiziq voqealar ishtirokchisiga aylanadi. Pochehasi ayaylab boqayotgan qimmatbaho qushlarga qatiq, suzma ichirib, harom o'ldirib qo'yadi, do'sti Omonga qo'shilib Sulton oʻgʻri boshchiligidagi kissavurlar bilan tunni oʻtkazadi, koʻchmanchi qozoq ovulida o'lik yuvib sharmanda bo'lishadi, masjid imomining ogʻilxonasida oʻsallab qolgan hoʻkiz oʻrniga soppa-sogʻ eshakni soʻyib qoʻyib, rosa kaltak yeydi va hokazo.

Shum bola qayerga bormasin, kim bilan toʻqnashmasin, hamma joyda kattalarning oʻziga bepisand qarashi, qoʻpol muomalasiga duch keladi. Oʻzlarini goʻyo yetimning boshini silaydigan himmatli kishilar qilib koʻrsatadigan turli noinsof kimsalar uning navqiron kuchidan suvtekin foydalanib qolishga urinadilar. Bu ham mayli, shu yosh bolani turli qingʻir yoʻllarga boshlovchilar ham topiladi. Masalan, yuzlab qalandarlarga yoʻlboshchi boʻlib olib, har gapida qayta-qayta Xudoni tilga oladigan ikkiyuzlamachi Eshon Shum bolani toʻgʻridan-toʻgʻri oʻgʻirlik qilishga yoʻllaydi. Eshonning Shum bolaga aytgan quyidagi gaplari uning naqadar tuban kimsa ekanidan dalolatdir:

«Oyoq-qoʻling chaqqongina, epchil yigitsan. Sen ham axir qarab turmasdan, boshqacharoq yoʻl bilan boʻlsa ham tirikchilikning payidan boʻlsang edi, oʻgʻlim... Axir kissa-karmon degan gaplar ham boʻladi. Naqdina pul – ham yengil, ham qimmat, ham yashirishga oson boʻladi. Naqdina boʻlsin, bolam, naqdina boʻlsin...»

Shaharning bir chekkasidagi xaroba uyni nashavand-bangilar yigʻi-

ladigan takyaxonaga aylantirgan Hoji bobo ham oʻzicha xudojoʻylikda boyagi Eshondan qolishmaydi. Biroq uning qilayotgan ishlari Xudoning aytganlariga ayni teskariligi bilan oʻquvchini hayratga soladi.

Biroq, shunisi muhimki, Gʻafur Gʻulom mana shu nursiz, qabohat va jaholatga toʻla muhitni yosh bola nigohi orqali rang-barang mazmunga toʻla holda tasvirlaydi. Qissani oʻqir ekansiz, undagi hodisalarning qiziqligi, qahramonlar xarakteridagi yorqin jihatlar Sizni butunlay oʻziga rom qilib oladi. Garchi, yuqorida aytganimizdek, bosh qahramon duch keladigan odamlarning koʻpchiligi ochkoʻz, xasis, nazari past kimsalar boʻlsa-da, bizning Shum bola bunday kimsalarni bir koʻrishda taniydi, ularning chirkin muhitidan iloji boricha tezroq qutulish yoʻllarini qidiradi va, albatta, topadi! Mana shu paytlarda Shum bolaning naqadar topqir, ziyrak, ba'zan esa, yaxshi ma'noda shum bola ekaniga qayta-qayta amin boʻlamiz.

Qissadan o'qigan parchamizda ham Shum bolaning Sariboyday ezma, injiq, xasis kimsani boplab dodini berganiga guvoh bo'ldik.

Avvalo shuni aytish kerakki, Shum bolaning Sariboyni mot qilish usuli Sharq xalqlari ogʻzaki ijodi namunalarini – ertaklarni ijodiy qayta ishlash mahsuli hisoblanadi. Biron muhim voqeani aytish uchun uni, bu voqeaga mutlaqo aloqasi yoʻq tafsilotlar orqali bayon qilish usuli, jumladan, «Uch yolgʻonda qirq yolgʻon» ertagida uchraydi. Sharq adabiyotining katta bilimdoni hisoblangan Gʻafur Gʻulom «oʻz Shum bolasini» bu safar ayni shu usul bilan Sariboyning gʻazabidan omon olib chiqib ketadi.

Guvohi boʻlganimizdek, shu paytga qadar bu ezma va laqma boyga odam bolasi teng kela olgan emas. Uning qoʻlida umrbod xizmat qilib charchagan kishilarning dard-u alami ichida. Hech biri yurak yutib xoʻjayinga gap qaytara olmaydi. Gap qaytarish qayda, umuman, bu odamga roʻpara kelishdan qoʻrqib yurishadi. Chunki, xoh yaxshi, xoh yomon gap boʻlsin, Sariboy nuqul «xoʻsh, innaykeyin-chi» deb, Shum bola aytganidek, «odamni xit qilib yuboradi».

Xo'sh, nima qilish kerak?

Bu yoqda olmalar pishib, tagiga toʻkilib, uvol boʻlyapti. Xoʻjayin ruxsatisiz terishsa ham bir balo, vaqtida terilmay, qolib ketsa, yana bir



balo. Har ikki holda ham bechora xizmatkorlar aybdor boʻlib qoladi. Shu muammoni yechib kelish Shum bolaning chekiga tushgan.

Sezgan boʻlsangiz, birovlarning dard-u tashvishi, olamda boʻlayotgan ming turli ishlar Sariboyning yetti uxlab tushiga kirmasdi. U dunyoda faqat oʻzim boʻlay, deb yashaydiganlar xilidan edi. Shu ahvolda Shum bola xoʻjayinning «innaykeyin»iga munosib javob topishi, eng muhimi esa — boyni bu savolni berishdan bezdirib tashlashi kerak! U Sariboyni uncha-muncha gap bilan, yangilik bilan lol qilib boʻlmasligini yaxshi biladi. Demak, «sopini oʻzidan chiqarish» — boyning «nozik joyi»dan ushlash lozim. Uning nozik joyi esa mol-mulki, boyligi bilan bogʻliq. Gap ana shu mavzuga burilsa, «boyning chaynab turgan yaxna tilni yutishga ham darmoni qolmaydi». Bir xabarni ikkinchi bir xabarga shunday ulash kerakki, natijada «innaykeyin» degan bema'ni savolni berishga Sariboyning yuragi dosh bermasin.

Shum bola xuddi shunday qiladi ham. «Dandon sopli pichoq»ning sinishi bilan boshlangan gap kenjatoy oʻgʻil Boʻriboyvachchaning «terakdan yiqilib oʻlishi» bilan tugaydi. Bu ham yetmaganday, boyning turmushga chiqmagan oʻrtancha qizi «dunyoga arziydigan oʻgʻilcha tuqqani», chaqaloq esa Badal aravakashga «quyib qoʻyganday» oʻxshashi toʻgʻrisidagi gaplar Sariboyni, nihoyat, yiqitadi. Shundan keyin ham ezma boy «innaykeyin»lab koʻrsin-chi!

Nafaqat bu voqeada, balki butun qissa davomida biz Shum bolaning topqirligi, hozirjavobligi, har qanday qiyin vaziyatdan bir amallab sogʻ chiqib keta olishiga qayta-qayta iqror boʻlamiz.

Endi «Shum bola» qissasida uchraydigan koʻplab badiiy tasvir vositalaridan ayrimlarini — oʻxshatishlarni e'tiboringizga havola etamiz. Siz qissani toʻliq oʻqish jarayonida bu ishni davom ettirib, boshqa noyob badiiy durdonalarni ham daftaringizga qayd etib borasiz, degan umiddamiz:

«To'ti patlarining rang-barangligi Oysha chevarning ish qutisidagi ipaklarday tovlanar edi»;

«It quvgan tulkiday olazarak Omon menga ergashdi»;

«O'choqdan chiqqan zangori tutun osmonga o'rlab, tevarak-atrofga ko'rpadek yoyilar edi»;



«Hazrat boʻlsa, oʻzini umr boʻyi oʻlikdan boshqa narsani yuvmagan kishiday qilib koʻrsatishga harakat qilar edi»;

«Orqamdan oʻlik quvlab kelayotgandek orqamga qayrilib boqar edim»;

«Men bo'lsam, domlaning nima niyatda ekanligini tushunmasdan, hurkovich kiyikdek oyog'imni bir yerga g'uj qilib, qochishga hozirlangan, og'zimni bo'lsa, dodlashga juftlagan edim»;

«Sirlangan xumchaga tushgan sichqonday toʻrt tomonga alanglab, oʻzimga bir najot yoʻli qidirar edim»;

«Zinadan chiqqan itdek toʻrt oyoqlab narvonga tirmashib tomga chiqdim»;

«Ora-chorada tor koʻchalar yoʻlimni toʻsib qolsa ham, tulki quvlagan tovuqday sakrab oʻtib ketar edim»;

«Haytovur domla ishtonbogʻini mahkam bogʻlamagani uchun chopish vaqtida oyogʻiga tushib, kishan boʻlib paypoqdor tovuqday kalavlab qoldi-da, men qochib qutuldim»;

«Piyozdogʻning hidlari dimogʻimga kirib, ishtaha ham namozshomgulning karnayiday ochilib ketgan edi»;

«Xotin qozonning qopqogʻini ochdi – baliqday boʻlib, oppoq laganda moshkichiri chiqdi, oʻrtaga qoʻydilar»;

«Qoʻylar xuddi sutga tushgan sichqonday boshlarini koʻtarib suzar edilar»;

«Tepamizda saman otga mingan, moshkichiri soqolli, burni xuddi paxtali toʻnga qadalgan tugmaday ichiga botib ketgan puchuq bir kishi qamchi oʻynatib siyosat qilar edi»;

«Har ikkovimizning yuragimiz dard tekkan terak yaprogʻiday qaltirab turibdi»;

«Omon uyqudan chap yonboshi bilan turdi. Qovogʻining peshayvoni tushib ketgan, toʻgʻri gapga ham tersayib javob berar, mechkay kasalga uchragan bolalarday injiq edi» va h. k.

Savol va topshiriqlar

- 1. Gʻafur Gʻulom hayoti va ijodi toʻgʻrisida nimalarni bilasiz?
- 2. «Shum bola» qissasining yaratilishiga nimalar sabab boʻlgan, deb oʻylaysiz?



- 3. Qissada yozuvchining bolalik hayoti toʻgʻridan-toʻgʻri va toʻliq aks etgan, deb boʻladimi?
- 4. Shum bolaning sarson-sargardon kezib yurishining asosiy sababi nimada edi?
- 5. Shum bola ba'zan yolg'on gapiradi, yomon ko'rgan odamlaridan o'ch oladi, hatto ozgina o'g'rilikka ham qo'l uradi. Uning bu harakatlarini qanday baholaysiz?
- 6. Shum bola bilan mahalladoshi Omonning qanday farqi bor?
- 7. Qissadan olingan parchada Shum bolaning qaysi xususiyatlari boʻrtib koʻrinadi?
- 8. Sariboyning Shum bola toʻqigan yolgʻonlarga chippa-chin ishonishining asosiy sababi nimada, deb oʻylaysiz?
- Boy Shum bolani uyidan haydar ekan, unga xizmat haqi uchun «qurt tushgan olmalardan ikki pud olmani bitta chipta qopga solib» beradi. Hozirgi oʻlchovda buning qancha boʻlishini aniqlang-chi.
- 10. 5-sinfda oʻrganganingiz Gʻafur Gʻulomning «Mening oʻgʻrigina bolam» hikoyasi bilan «Shum bola» qissasining qanday umumiy jihatlari bor, deb oʻylaysiz?
- 11. «Shum bola» qissasi asosida yaratilgan badiiy film bilan qissaning oʻzi orasida qanday farqlarni uchratdingiz?
- 12. Adabiy asar asosida yaratiladigan kinofilm yoki spektakllar oʻsha asar bilan bir xil boʻlishi kerak, deb hisoblaysizmi? Kinofilm va qissaning oʻziga xos hikoya yoʻsinini solishtirishga harakat qiling.
- 13. «Shum bola» qissasi an'analarini keyinchalik qaysi oʻzbek yozuvchilari davom ettirganini bilasizmi?
- 14. Sinfingizda «Shum bola» qissasidan keltirilgan parcha asosida kichik spektakl qoʻyib, qay biringiz Shum bola, qay biringiz esa Sariboy roliga koʻproq mos tushishingizni aniqlashga harakat qiling.



AND SHOW SHOWING SHOW

Azim SUYUN (1948 -yilda tugʻilgan)

Children Children

Zamonaviy oʻzbek she'riyatining koʻzga koʻringan vakillaridan biri shoir Azim Suyun (Azimboy Alimovich Suyunov) 1948-yilning 22-fevralida Samarqand viloyatidagi Nurota tizma togʻlari bagʻrida joylashgan Nakurt qishlogʻida tavallud topgan. Uning bolaligi ulkan togʻ darasida bunyod boʻlgan mana shu qishloqda, aksariyat chorvachilik bilan shugʻullanadigan odamlar orasida kechadi. Otasi Olim aka, bobosi mulla Suyun davrasida kechgan begʻam, betashvish kunlarida u xalq ogʻzaki ijodining koʻplab namunalaridan bahramand boʻladi, navqiron qalbida badiiy soʻzga ixlos va muhabbat uygʻonadi. Oʻsha kunlarni shoirning oʻzi shunday xotirlaydi:

«Shom tushishi bilan bobomning toshdan qurilgan yakka-yu yagona, duddan qorayib ketgan uyiga (uyning oʻrtasida sandal ham qoʻyilmagan, tosh oʻchoq bor edi) suhbattalab keksa-yu yosh yigʻilardi. Lampachi-roq lipillar, qish kechalari oʻchoqda tarasha choʻgʻi lovillardi. U Ahmad Yassaviy «Hikmat»ini oʻqiganda butun olam unutilardi. Kitobxonliklar, suhbatlar, gurunglar gohida tonggacha davom etardi. Eh-he... bu kechalarda nimalar soʻzlanmasdi, nimalar eslanmasdi».

Shu kechalarda eslangan xalq dostonlaridagi voqealar, afsonaviy qahramonlar siymosi boʻlgʻusi ijodkor tasavvuri va badiiy tafakkurining kengayishiga ijobiy ta'sir koʻrsatadi.

Azim Suyun oʻzining mehnat faoliyatini oddiy ishchilikdan boshlagan



– harbiy xizmatdan qaytgach, poytaxt qurilishlarida mehnat qilgan. Murakkab hayot sinovlarini juda erta boshdan oʻtkazgan ijodkor shundan keyin hozirgi Oʻzbekiston Milliy universitetining jurnalistika fakultetiga oʻqishga kiradi va uni muvaffaqiyatli bitiradi. Oʻqib yurgan paytidayoq uning dastlabki maqola va she'rlari «Toshkent universiteti» gazetasida ketma-ket chop etiladi. Oʻqishni bitirgach, Gʻafur Gʻulom nomidagi adabiyot va san'at nashriyotida muharrir, Davlat matbuot qoʻmitasida adabiy maslahatchi, Oʻzbekiston Yozuvchilar uyushmasida mas'ul kotib, «Xalq soʻzi» gazetasida boʻlim muharriri vazifalarida xizmat qiladi. 1993–2002-yillar oraligʻida «Oʻzbekiston ovozi» va «Golos Uzbekistana» gazetalarining bosh muharriri boʻlgan boʻlsa, ayni paytda «Guliston» jurnali ijodiy jamoasiga rahbarlik qilmoqda.

Shoirning dastlabki she'riy toʻplami 1978-yilda «Mening osmonim» nomi bilan chop qilingandi. Shundan keyin Azim Suyunning quyidagi kitoblari adabiyot muxlislari mulkiga aylangan:

- 1. «Zarb» 1979-yil
- 2. «Zamin taqdiri» 1981-yil
- 3. «Xayolot» 1984-yil
- 4. «Ziyo yoʻli» 1986-yil
- 5. «Javzo» 1987-yil
- 6. «Olis tonglar» 1989-yil
- 7. «Kuyganim suyganim» 1992-yil
- 8. «Sarbadorlar» 1994-vil
- 9. «Qora koʻzing sening» 1994-yil
- 10. «Saylanma» 1997-yil
- 11. «Oʻzlik» 1999-yil
- 12. «Sharq hikmati» 2000-yil
- 13. «Oʻzbekyurt» 2005-yil
- 14. «Ey do'st» 2005-yil

Azim Suyun she'rlar bilan birga «Sarbadorlar» dramatik dostoni, «Zamin taqdiri», «Oʻzbekiston», «Imorat va yoki bir tomchi dengizga aylangan kecha dostoni» singari dostonlarini oʻquvchilari hukmiga havola etgan. U yaratgan qator asarlar ingliz, rus, turk, arab, qozoq, tojik, qirgʻiz, turkman, qoraqalpoq, tuva va boshqa xalqlar tillariga tarjima qilingan.



Shoirning oʻzi esa dunyoning koʻplab koʻzga koʻringan ijodkorlari asarlarini ona tilimizga mahorat bilan oʻgirgan.

Shoirning oʻziga xos she'riy uslubi, uni koʻproq jalb etgan mavzular, ijodkor badiiy mahorati bilan yaqinroq tanishish uchun, keling, uning she'rlaridan ayrim namunalarni mutolaa qilaylik.

DARADA

(manzara)

Koʻrinmas olovdan erib borar tun Burgutlar qoyada potirlashmoqda. Ona qornidagi goʻdakday, beun, Tuman gʻimirlamoqda.

Tong otdi, eng soʻnggi yulduz koʻzlarin Qudratli pahlavon – uyqu eltmoqda. Qoʻradan chiqishgan suruvdek, vazmin, Tuman koʻtarilmoqda.

Kumush choʻqqilardan ohista oshib, Quyosh sim-sim qoʻshiq kuylab kelmoqda. Osmon qozonida sut kabi toshib, Tuman tarqalmoqda...



Azim Suyun yurtimizning eng goʻzal goʻshalaridan boʻlmish Samarqand zaminida, Nurota togʻlari bagʻrida joylashgan qishloqda oʻsibulgʻayganini aytdik. Bunday joylarda mingyillar davomida oʻzgarishsiz saqlangan ona tabiat manzaralari inson ruhiyatini pokiza hislarga oshno etadi. Bu goʻshalarda odam mayda-chuyda tashvishlarni unutib, oʻzining aslini – tabiat farzandi ekanini anglaydi, borliq bilan ruhan uygʻunlikni, his qiladi. Badiiy didi oʻtkir kishida esa bu manzaralar kuchli ijodiy qoʻzgʻalishni vujudga keltiradi. Goʻyo harakatsizdek tuyulgan borliqqa uning xayolida jon kiradi. Obrazli tafakkur kuchi harakatdagi manzarani dunyoga keltiradi. Rassom kartinasidagidan farqli oʻlaroq, she'riy manzarada butun borliq hayotiy oqim kasb etadi.

Shoirning «Darada» she'ri buning yaqqol namunasidir.

Tong otdi. Quyosh koʻrinishiga hali ancha bor. Biroq uning tafti — «koʻrinmas olov»ning issigʻi tunni asta eritishni boshlagan. Bilasizki, tong otishini birinchi boʻlib qushlar sezadi, ularning mitti yuraklari potirlab, tillari chugʻurlashga tushadi. Quyoshni boshiga toj qilib koʻtaradigan togʻlarda esa tong sezgisi avvalo qoyalar hukmdori — burgutlarga nasib etadi.

Agar onaning oppoq umidlari oʻz bagʻridagi goʻdagiga payvasta — bogʻliq boʻlsa, togʻlar bagʻridagi oppoq tuman xuddi shu goʻdakday «beun» gʻimirlab, borligini ma'lum qilib qoʻyadi. Bobo quyosh uygʻonib, Yer yuzidagi jamiki mavjudotni ham uygʻotishni boshlagan pallada osmondagi yulduz koʻzlarini uyqu eltadi. Boya ojiz gʻimirlayotgan tuman, qoʻradan chiqib adir tomon oʻrlab borayotgan oppoq qoʻylar suruvidek atrofga yoyiladi. Quyoshning zabardast qadamlari uchun choʻqqilarini abadiy muzliklar qoplagan ulkan togʻlar nima? Oftob ulardan bemalol sakrab oʻtib, oʻzining buyuk qoʻshigʻi—hayot, yorugʻlik qoʻshigʻini kuylashni boshlaydi. Yangi sogʻilgan sutni qozonga quyib, ostidan olov yoqib qaynatishganini hech kuzatganmisiz? Sut qizib qaynay boshlagach, uning tepasi oppoq koʻpikka aylanadi. Agar vaqtida olov oʻchirilib, qozon kavlanmasa, sut voshillab qozondan toshib chiqadi. Tabiatda boʻlsa, quyosh kuchga kirib qizdira boshlagach, nahorgi tuman xuddi shu sutdek tarqalib ketadi...

Guvohi boʻlganimizdek, shoir bolaligidan koʻrib katta boʻlgan muhit manzaralari uning she'rlarida asl rangi, tarovati bilan qayta jonlanadi. Siz bilan biz ham tabiatning har qanday koʻrinishi aslida buyuk moʻjiza ekaniga iqror boʻlamiz. Bu moʻjizani idrok etmoq uchun ona tabiatga koʻngil koʻzi bilan qaramogʻimiz kerakligini his qilamiz. Shundagina tilsiz togʻlar ovozini eshita olamiz, tuman nafasini tuyamiz, oftobning sim-sim qoʻshigʻidan zavqlanib, olam bagʻrida goʻdakdek begʻubor tuygʻular bilan yashaymiz. She'rning, she'riyatning insonga koʻrsatadigan eng kuchli ta'siri ham aslida mana shundadir. U insonning loyqalanib ketgan xotiralarini tiniqlashtiradi, odamni bir muddat tirikchilik gʻamlarini nari su-



rib, dunyoga balandroqdan nazar tashlashga da'vat etadi. Olamda avval koʻrilmagan ranglar, avval eshitilmagan ovozlar, begʻubor kengliklar ham borligini unga eslatadi. Bir soʻz bilan aytganda, haqiqiy she'riyat olamni odam uchun behad kengaytirib, boyitib beradi.

BAHODIRNING QILICHI

Bahodirning qilichi sindi...
Soʻnggi nuqta. Tugadi ertak.
Pastak hovli chetida dilxun
Bir bola yigʻlaydi —
qoʻlida kitob.
Bahodirning qilichi sindi,
Bahodirning qilichi sindi.
Yovniki butun!

Qayga ketdi yaproqdek bola, Boʻta kabi qayda boʻzlaydi? Uchib yurgan varaqlar, ana, Shamollarga ertak soʻzlaydi. Bola qani?.. Bilmayman, ammo, Ishonaman, qaylardadir u Bahodirga qilich izlaydi...



Shoir biografiyasidan bilib oldingizki, u otasi va bobosidan koʻplab xalq dostonlari, ertaklarini tinglab katta boʻlgan. Xalq kitoblarida boʻlsa, koʻpincha oʻtmish ajdodlarimizning yovuzlikka, zulmatga qarshi kurashlari, inson sha'ni va ozodligi uchun olib borgan adolatli janglari tasvirlanadi. «Bahodirning qilichi» she'ri qahramoni — Siz tengi bola oʻqigan ertak oxirida mana shunday pahlavonlardan birining qilichi yov bilan boʻlgan tengsiz jangda sinib qoladi. Yogʻiyning qilichi boʻlsa — butun!

Ertak shunday – afsuslanarli tarzda tugadi.

Siz ziyrak aqlingiz bilan darrov bir narsani sezdingiz... va hayron



boʻlmoqdasiz: axir deyarli barcha ertaklarning oxiri yaxshilik bilan tugar edi-ku! Ertaklar oxirida yomonlar — yovuzlar, zoʻravonlar, bosqinchilar va boshqa barcha qora kuchlar magʻlubiyatga uchrar, sharmanda boʻlar, yaxshilar gʻalaba nashidasini surardi-ku! Koʻp ertaklardagi oxirgi gap — qahramonlar «qirq kecha-kunduz toʻy qilib, el-u yurtga osh berib, murodmaqsadiga yetibdi» degan, ertak eshitgan odamning koʻnglini xotirjam qiladigan gaplar boʻlardi-ku. Bu qanaqa ertakki, uning qahramoni — bahodir qoʻlida singan qilich bilan yov qarshisida yolgʻiz qolsa?! Bu qanaqa ertakki, oʻlim bilan yuzma-yuz qolgan bahodirga na sehrli tayoqcha, na sirli soʻzlar, na najotkor qanotli ot yordam bermasa?!

Demak...

Demak, bu – Siz bilan biz koʻnikib qolgan, har qancha fantastik voqealar qoʻshilsa-da, oxiri bari bir baxayr tugaydigan ertaklar sirasidan emas ekan-da. Bu ancha jiddiy ertak ekan-da. Umuman, ertakmikin bu?

Bu savollar Sizni ayni she'r mazmun-mohiyatiga jiddiyroq yondoshishga undayotganini sezib turibsiz. Bu yondoshish esa she'rning yozilgan sanasiga e'tibor berish bilan boshlanmog'i kerak. «Bahodirning qilichi» she'ri 1978-yilda yozilgan. U paytlar yurtimizni istilo qilib olgan sho'rolar hukumatining eng kuchaygan, xalqimiz orzu-istaklari nazarpisand qilinmagan yillar edi. Bizning ming yillik tariximizni xolis o'rganilishiga, buyuk bobolarimiz, bahodir ajdodlarimiz bilan faxrlanishga yo'l qo'yilmasdi. Aksincha, bizni «ikkinchi darajali, madaniyati past, aqliy imkoniyatlari zaif xalqlar» deya munosabat bildirilardi. XX asr boshida milliy mustaqillik uchun kurashgan ne-ne fidoyi otalarimiz yomonotliqqa chiqarilgan, ularning qilgan ishlarini xolis eslash, yozgan asarlarini chop etish va o'qish katta jinoyatdek qaralardi. Boshqacha qilib aytganda, yov shu qadar kuchli ediki, bahodirlarning qilichi sindirilib, o'zlari o'limga hukm etilgandilar...

Lekin, shoʻre hukumatining siyosati har qancha tahdidli boʻlmasin, xalq koʻnglidagi, uning eng ilgʻor vakillari boʻlmish shoir-ijodkorlar qalbidagi ozodlikka boʻlgan umid va ishonchni soʻndira olmadi. Xuddi shu tufayli ham shoirning kelayotgan avloddan umidi katta, unga ishonchi zoʻr. Garchi «uchib yurgan varaqlar» — xalq xotirasi parishon — sochilgan

holga keltirilgan boʻlsa-da, kelajak avlod oʻz ajdodlarining armonini, albatta, roʻyobga chiqaradi. She'r yakunidagi

Bola qani?.. Bilmayman, ammo, Ishonaman, qaylardadir u Bahodirga qilich izlaydi...

misralari ayni shu ezgu umid ifodasidir. 1991-yilga kelib xalqimizning 130 yillik istibdod davrida ham qalbidan oʻchmagan istiqlolga erishish umidi roʻyobga chiqdi. Xuddi shu yili yovning qilichi sindi, yurt bahodirlarining muzaffar bayrogʻi mustaqil mamlakat osmoni uzra hilpiradi!

Hurmatli oʻquvchi, koʻryapsizki, shoirning har bir she'ridan koʻplab ma'no-mazmunlar uqish, bilim va saviyamizni oshirish imkoniyati bor. Yuqorida oʻzlashtirganingiz she'riy asar tahlili tajribasiga suyanib, Azim Suyunning shu mavzular doirasida yaratilgan «Dasht toʻrgʻayi», «Bahodirsiz kelar argʻumoq» va «Tutqun» she'rlarini oʻzingiz izohlashga harakat qiling. Bunda har bir misrada ifoda etilgan holat, kayfiyatga atroflicha nigoh tashlab koʻrishdan, matnda ishlatilgan badiiy san'atlarni ilgʻashdan erinmang, she'rlarning yaratilgan davrini, albatta, hisobga oling. Shunda koʻz oldingizda yaxlit she'riy manzaralar namoyon boʻladi. She'r qahramonlarining his-tuygʻulari koʻnglingizga koʻchib oʻtadi, tasavvuringiz kengayib, badiiy goʻzalliklarga oshno tutinasiz.

DASHT TO'RG'AYI

O'zbekiston dashtlarining bir qushi bor, Ul qushining bir parvozi, uchishi bor. Osmonlarning toqlarida chuldiraydi, Havolarda bir muallaq turishi bor.

Nima haqda toʻlib-toʻlib sayraydi ul, Anduh bilmas – nimalardan yayraydi ul. Tinglab-tinglab koʻnglim iyar, koʻnglim ketar, Shoir tilim qayraladi, qayraydi ul.





Boʻztoʻrgʻay deb ataydilar goho uni, Soʻfitoʻrgʻay ataydilar goho uni. Cheksiz dashtda men turibman koʻkka qarab, Dalli toʻrgʻay ataydilar uni, meni.

Men bilaman, boʻztoʻrgʻayim, boʻzlaydir ul, Men bilaman, soʻfiqushim, soʻzlaydir ul. Ota makon – dashtlarini suyar jondan, Faqat-faqat erkinlikni koʻzlaydir ul.

Sog'inaman tog'lar kezib, yo'llar o'zib, Sog'inaman dengizlarda suzib-suzib. Shuvoqlarning taglarida uyalari, Sog'inaman yurtlar kezib, ellar kezib.

Tomoqlari bulkillagan dasht toʻrgʻayim, Hur-hur uchib-uchavergil, joʻsh toʻrgʻayim, Oqkoʻngilim, kuylab-kuylab oʻtadirmiz, Sening kabi men ham bitta qush, toʻrgʻayim.

O'zbekiston dashtlarining bir qushi bor, Ul qushining bir parvozi, uchishi bor. Osmonlarning toqlarida chuldiraydi, Havolarda bir pirillab turishi bor.

BAHODIRSIZ KELAR ARGUMOQ

Maysalar lol egdi boshini, Qizgʻaldoqlar toʻkdi yoshini, Koʻk berkitdi shan quyoshini, Bahodirsiz kelar argʻumoq. Unsiz qoldi qushlar samoda, Uchqur jayron yelmas sahroda, Tindi latif, sarin shabboda, Bahodirsiz kelar argʻumoq.



Togʻlar boqar gʻamgin, tund, behol, Oq na'matak tebranmas xushhol, Bemajoldir chashmai zilol, Bahodirsiz kelar argʻumoq. Qonxoʻr gʻanim, qonxoʻr qotil kim?.. Havo boʻgʻiq, badqavoq va dim, Chopib chiqqan el, xaloyiq jim, Bahodirsiz kelar argʻumoq.

OO VA QORA

Oq buloqni izladim, Qora buloq duch keldi. Qora buloq suvidan ichdim, yoronlar, Oq buloqqa yetguncha.

Oq daryoni izladim, Qora daryo duch keldi. Qora daryo bagʻrida choʻmildim, doʻstlar, Oq daryoga oʻtguncha.

Oq togʻlarni izladim, Qora togʻlar duch keldi. Qora togʻlar quchogʻini kezdim, yoronlar, Oq togʻlarga ketguncha.

Oq va qora dunyoni Chappor urib aylangum, Oq shomlar tugab, do'stlar, Qora shomlar quchguncha...



Bu she'r, koʻrib turganingizdek, osonlikcha «hazm boʻladigan» asarlar xilidan emas. Tabiatda butunlay «oq buloq» ham, «qora buloq» ham, «oq daryo» ham, «qora daryo» ham, «oq togʻlar» ham, «qora togʻlar» ham

uchramasligini yaxshi bilasiz. Qolaversa, shoir dunyoni «oq» va «qora» deb ataganida, kun bilan tunni nazarda tutmayotgani ham aniq. Unda gap nimada? Shoir she'riy tashbehlari bilan nimalarga ishora qilyapti?

Inson tugʻilib yashaydigan dunyo nihoyatda murakkab, chigal muammolarga toʻlib-toshgandir. Har qanday odam bolasi tugʻilganida buloq suvidek, togʻlar qoridek pok — begunoh boʻladi. Dunyoda goʻdak kulgisi va yigʻisidek, u emib katta boʻladigan ona sutidek begʻubor narsaning oʻzi yoʻq. Lekin... lekin nega odamzod mangu baxtiyor yashay olmaydi? Nega olamda urushlar boʻladi, minglab, millionlab odamlar ularning qurboniga aylanadi? Nega Yer yuzidan yovuzlik hech yoʻqolib bitmaydi? Nima uchun odamlar arzimagan narsalar deb bir-birlariga dushman boʻlib qolishadi?..

Sanayman desangiz, bunday savollarning cheki-chegarasi yoʻq.

Demak, odam «HAZRATI INSON» boʻlishi nihoyatda qiyin ekan-da. Uning mukammallikka erishmogʻi gʻoyat mushkul — butun umrni talab qiladigan jarayon ekan-da. Shoir mana shu nomukammal dunyo ishlaridan koʻngli ozorlanib she'r bitadi. U bolaligida qilgan koʻplab orzulariga yetisha olmaganidan, hayotda nopok odamlarga ham duch kelganidan oʻkinadi. Barcha kishilarning koʻngli buloq suvidek oppoq — begʻubor boʻlishini istasada, koʻngil koʻzi koʻr kimsalar uning dilini vayron qiladi. Xohlaydimiyoʻqmi, shunday kishilar bilan bir havodan nafas olishga majbur boʻlgan lirik qahramon «oq buloq» — chinakam insonlar diydoriga talpinadi. She'rning qolgan bandlarida ham ayni kayfiyat izhori kuchayib borgan.

Biroq uning oxirgi bandi Sizni yanada oʻylantirib qoʻygani aniq. Yuqorida aytilgan muammolarga toʻla oq va qora dunyoni chappor urib aylanib yashayotgan lirik qahramon birdaniga «Oq shomlar tugab, doʻstlar, Qora shomlar quchguncha...» degan, bir qaraganda tushuniksiz kayfiyatni izhor qiladi.

Gap shundaki, tiriklik – hayot har qancha murakkab, chigal va zid-diyatli boʻlmasin, bari bir goʻzaldir. Bari bir inson yashashga, hayot na-shidasini surishga, tiriklikka bor kuchi bilan tirmashadi. Hayotning shomlari ham oq-oppoqdir. Negaki, ertaga kun chiqishi, hammayoq yana nurga koʻmilishi aniq. Agar inson tirik boʻlsa, ertaga ham yashasa, bu yorugʻ-

likdan, albatta, bahramand boʻladi! Agar... uning umri poyoniga yetsa, bu yorugʻ olam – hayot bilan vidolashishga majbur boʻlsa-chi?! Unda insonni «qora shomlar quchadi» – oʻlim oʻz bagʻriga oladi...

Demak, shungacha – umrining oxiriga qadar odam «oq va qora dunyo»da chappor urib aylanmogʻi – insondek yashamogʻi, ezguliklar qilishga ulgurmogʻi, olamda «oq buloq»lar, «oq daryolar», «oq togʻlar» salomatligi uchun kurashmogʻi lozim! Shundagina bu inson olam va odamni yashnatadi, Yaratganning roziligiga ega boʻladi!

Savol va topshiriqlar

- 1. Azim Suyunning hayoti va ijodi toʻgʻrisidagi ma'lumotni toʻliq oʻzlashtirib olishga harakat qiling.
- 2. Ijodkorlar asarlarida ular oʻsib-ulgʻaygan muhit qanday iz qoldirishi mumkinligini misollar bilan izohlashga urining.
- Azim Suyun tabiat manzaralarini «jonlantirish» da koʻproq qanday badiiy usullardan foydalanishini oʻqigan she'rlaringiz misolida izohlang.
- 4. «Bahodirsiz kelar argʻumoq» she'rida tasvirlangan tabiat oʻzgarishlari aslida qanday holatning ifodasi, deb oʻylaysiz?
- 5. Qanday oʻylaysiz: she'rda tasvirlangan «Chopib chiqqan el, xaloyiq jim»ligi argʻumoqning bahodirsiz kelishiga ta'siri bormi-yoʻqmi?
- 6. Yurtimiz tarixidan «Bahodirsiz kelar argʻumoq» she'rida koʻrsatilgandek voqealarni eslashga harakat qiling.
- 7. «Bahodirsiz kelar argʻumoq» va «Tutqun» she'rlari voqealari oʻrtasida qanday bogʻliqlik bor?
- 8. Shoir «Tutqun» she'ri orqali dunyoda eng aziz narsa sifatida nimani ko'rsatadi?
- 9. Tuqqan onasidan, sevimli yoridan ayrilganini eshitganda ham yov qarshisida koʻzidan qatra yosh toʻkmagan tutqun Vatanidan ayrilganini eshitib, qanday holga tushdi? U nega shunday holga tushdi?
- 10. Vatanidan ixtiyoriy ayrilib yashashni or bilmaydigan kimsalar bilan «Tutqun» she'ridagi qahramon oʻrtasida qanday insoniy farqlar bor?
- 11. «Yalla» ansambli ijrosida yangragan «Oq va qora» ashulasini topib, sinfdoshlaringiz bilan birga tinglashga harakat qiling.
- 12. Azim Suyun she'rlaridan yod oling.



SHE'RIY NUTO

Kuzatgan bo'lsangiz, shoirlar ishtirok etgan uchrashuvlarda o'zgacha ruh va kayfiyat hukmron bo'ladi. Ayniqsa, ular o'z she'rlaridan o'qiy boshlashlari bilan shu paytga qadar zerikibroq oʻtirgan tengdoshlaringiz ham birdan jonlanib qolishadi, butun vujudlari quloqqa aylanib, shoirni tinglashadi. Buning sababi nimada deb o'ylaysiz?

Gap shundaki, nasriy (sochma) nutqdan farq qilaroq, she'riy (tizma) nutq muayyan ohangga boʻysundirilgan boʻladi. Xuddi yurak urishi yoki vagon g'ildiraklarining ovozidek takrorlanuvchi ritmga egaligi bilan eshituvchini oʻziga darrov jalb qiladi. She'riy nutq musiqiy jarangi bilan birga insoniy his-tuygʻularga nihoyatda boy boʻladi.

Masalan, Erkin Vohidovning «Inson» gasidasidan olingan guyidagi parchaga e'tibor beraylik:

Onaizoring - zamin, Tanho yo'g'-u boring - zamin, Xasta bemoring - zamin, O'g'lon o'zing, darmon - o'zing... Bo'ston o'zing, rizvon o'zing.

Kelding olamga, demak, Yetmas uni so'rmak, yemak, Yerni etmogʻing kerak

Shu parchadagi ma'no-mohiyatni, agar oddiy gap bilan ifoda qilinsa, kamida ikki soatlik ma'ruzaga aylanishi hech gap emas. Shoir esa ona zaminning odamzod qismatidagi ahamiyatini, uning bugungi ayanchli ahvolini, Yerda insoniy hayot kechirish qoidalarini, butun insoniyat oldida turgan dolzarb vazifalarni nihoyatda ta'sirli – his-tuygʻular bilan toʻyintirilgan shaklda ifoda etadi. Birinchi banddagi «zamin» soʻzining takrori xuddi harsillab nafas olayotgan ona yerimizning «yurak urishi»dek eshitiladi qulog'imizga. Ikkinchi bandni o'qiyotganimizda esa («demak» – «emak» – «kerak») beixtiyor qoʻllarimiz tugilib, yakka-yu yagona sayyoramizni barcha falokatlardan asrab qolish uchun o'zimizga o'zimiz qat'iy talab qo'yayotgandek bo'lamiz.

Demak, she'riy nutq - muayyan bir o'lchov (vazn) asosidagi ritmga, musiqiy jarangga ega boʻlgan, hissiy jihatdan toʻyintirilgan nutqdir.



LANGER CHARLES CHARLES

Jonatan SVIFT (1667 – 1745)

Buyuk ingliz adibi Jonatan Svift 1667-yilda Irlandiyaning poytaxti Dublinda tugʻildi. Otasidan erta ajralgan yosh Jonatan uzoq yillar muhtojlikda kun kechiradi. Badavlat qarindoshlarining ba'zan koʻrsatadigan yordamini hisobga olmaganda uning tirikchiligi nochor edi. Tabiatan tirishqoq, ilmga tashna Jonatan oʻn toʻrt yoshida maktabni bitirgach, Dublin universitetining diniy bilimlar fakultetiga oʻqishga kiradi, uni bitirmay Angliyaga ketadi. U bir necha yil Qirollikning sobiq ministri Vilyam Templning saroyida kotib boʻlib ishlaydi. Templning boy kutubxonasidan foydalanish Svift dunyoqarashining kengayishida muhim omil boʻladi. Keyinchalik Svift universitetni bitiradi, dissertatsiya yoqlab magistrlik unvonini qoʻlga kiritadi.

Svift badiiy ijod bilan shugʻullana boshlaydi. Uning ilk asarlari tezda xalq oʻrtasida shuhrat qozonadi. Adibning ketma-ket «Kitoblar jangi», «Bochka choʻpchagi», «Movutfurush xatlari» kabi hajviy kitoblari nashr etiladi. Biroq Sviftga haqiqiy shuhratni uning «Gulliverning sayohatlari» romani olib keldi. Asarning toʻliq nomi «Lemyuel Gulliverning jahondagi bir necha olis mamlakatlarga avvalo jarroh, keyinchalik esa bir necha kemalar kapitani sifatida qilgan sayohatlari» deb atalib u 1726-yilda yaratilgan.

Roman ajoyib-g'aroyib voqealarga, kulgili holatlarga boy. Asar bir



aarashda shunchaki kulgi uchun bitilgan bo'lib tuyulsa-da, uning zamirida achchiq kinova, zaharxanda votibdi. Muallif bu asar orgali Angliya davlatining tartib-qoidalari, urf-odatlari ustidan kuladi. «Gulliverning sayohatlari» romani to'rt qismdan tashkil topgan. Birinchi qismda Gulliverning liliputlar – mitti odamlar mamlakatidagi sarguzashtlari hikova qilinadi. Mitti odamlar hayot tarzi, davlat tartiblari Angliyanikiga oʻxshash. Mitti odamchalar yashaydigan mamlakatda ham qirol, ministrlar, harbiylar, dengiz floti va turli-tuman qonunlar mavjud. Liliputiyada ham Angliyadagi kabi partiyalar bor. Ular ham Angliyadagidek o'z manfaatlarini o'ylab janjallashadilar, bahslashadilar. Bu partiyalar baland poshnalilar va past poshnalilar deb ataladi. Mazkur partiyalar vakillari qanchalik mitti bo'lsalar ularning maqsad va oʻylari ham oʻzlari kabi arzimas va joʻn. Ular siyosatlari orasida farq poshnalarining baland yoki past boʻlganligidadir. Liliputiya davlatining qoʻshni Blefusku davlati bilan nizolari sababi ham arzimas va kulgili - ular tuxumni qaysi tomonidan chaqishda kelisha olmaydilar. Birlari tuxumni uch qismidan sindirish kerak desalar, birlari poynak qismidan sindirish kerakligini uqtiradilar. Svift ularning bu kelishmovchiliklari arzimas va bachkana ekanligi ustidan kular ekan, ayni paytda Angliyadagi diniy, siyosiy parokandalik sabablari hech qanday ahamiyatga molik bo'lmagan ixtiloflar ekanligini uqtirgandek bo'ladi.

Romanning ikkinchi qismida Gulliverning ulkan odamlar yurti – Brobdingnegga sayohati hikoya qilinadi. Bu mamlakatda Gulliver teskari holatga tushadi – Liliputiyadagi odamlardan nafratlangan boʻlsa, ushbu mamlakat odamlarining tanti, olijanob, ma'rifatparvarligiga qoyil qoladi.

Asarning uchinchi qismi Gulliverning olimlar mamlakati – Leputadagi sayohatlariga bagʻishlangan. Bu yerdagi Buyuk akademiya bilan tanishib, umri behuda sarflanayotgan olimlar ishini koʻradi. Ularning real hayotdan ajrab qolib, foydasiz ixtirolar bilan bandliklari muallif kulgisini qoʻzgʻaydi. Ayniqsa, bir olimning bodringdan quyosh energiyasini ajratib olib, undan yoz sovuq kelganda foydalanishga ahd qilganini, yana bir «alloma»ning uyni poydevoridan emas, tomidan boshlab qurish kashfiyoti haqidagi loyihasi — buning isboti sifatida hasharotlar — asalari va oʻrgimchak

faoliyati misol qilib keltirilganini koʻrib kishi oʻzini kulgidan tiya olmaydi. Yozuvchi haqiqiy olimlar ustidan emas, soxta fan kishilari ustidan kuladi.

Romanning toʻrtinchi qismi Gulliverning guigngnmlar mamlakatiga qilgan sayohati haqida. Muallif Gulliverning bu sayohatini oʻtkir zaharxanda, nafratli kulgi bilan tasvirlaydi. Bu mamlakatda inson qiyofasidagi ikki oyoqli maxluqlar yexular va aqlli, dono, halol mehnat bilan kun koʻruvchi otlar yashaydilar. Yexular jirkanch, hazar qiladigan darajada tuban kimsalar. Ular Sviftning Angliyadagi vatandoshlarini eslatadilar. Ular oʻz manfaatlari uchun bir-birlarini halok qilishga tayyor.

Asar bilan tanishadigan boʻlsangiz, romanda Svift tasvirlagan mamlakatlar dunyo xaritasida yoʻq. Bu shaharlar badiiy uydirma mahsuli, ularni yozuvchining oʻzi oʻylab topgan. Adib yashagan jamiyatda tanqidiy gap aytish, bir-bir amaldor kirdikorlarini ochiq aytish juda xavfli edi. Svift oʻzi yashagan Angliya qirolligidagi barcha kamchiliklar ustidan xayoliy mamlakatlar odamlari xatti-harakatlarini fosh qilish orqali kuladi. Roman uslubi juda ravon, sarguzashtlar nihoyatda qiziqarli tarzda bayon qilinadi. Ushbu roman barcha xalqlar kabi oʻzbek kitobxonlarining ham sevimli asariga aylangan. «Gulliverning sayohatlari»ning oʻzbek tilida olti marta nashr etilganligi ham buni isbotlaydi.

Aziz oʻquvchilar, yaxshisi romanni oʻzingiz toʻliq oʻqib chiqing.

GULLIVERNING SAYOHATLARI

BIRINCHI QISM

LILIPUTIYAGA SAYOHAT

BIRINCHI BOB

Men Nottingempshirda tugʻilganman, u yerda otamning uncha katta boʻlmagan mulki bor edi. Yoshim oʻn toʻrtga toʻlganda otam meni Kembrij shahridagi Imanyuel kollejiga oʻqishga yubordi. U yerda uch yil bilimlarni zoʻr hafsala bilan oʻrgandim. Biroq, kollejda oʻqishim uchun mablagʻ yetkazib berishga otamning qudrati yetmay qoldi, shuning uchun u meni u yerdan olib, Londondagi mashhur vrach Jems Betsga shogirdlikka berdi, undan toʻrt yil ta'lim oldim. Otam har zamonda yuborgan pullarning hammasini navigatsiya hamda matematikaning boshqa sohalarini oʻrganishga sarfladim. Bu fanlar hamma sayohatda qoʻl kelishi mumkin, men esa, taqdir meni sayohatchi qiladi, degan fikrga qattiq ishongandim. Mister Betsnikidan ketib, uyga Nottingempshirga qaytib keldim. Otam, togʻam Jons hamda boshqa qarindosh-urugʻlarimizning qoʻllab-quvvatlashi tufayli qirq funt toʻplashga muvaffaq boʻldim va ma'lumot olishni davom ettirish uchun Leydenga joʻnashga ahd qildim. Qarindoshurugʻlarim menga har yili oʻttiz funtdan pul yuborishga va'da qilishdi. Leyden shahrida, uzoq sayohatlarda asqatib qolishini bilib, ikki yil-u yetti oy meditsinani oʻrgandim.

Leydendan qaytgach, saxovatli ustozim mister Betsning yordamida kapitan Eybregem Pennell qoʻmondonlik qilayotgan «Qaldirgʻoch» kemasiga xirurg boʻlib ishga kirdim. Ana shu kemada uch yarim yil xizmat qildim. Levant va boshqa mamlakatlarga sayohat qildim. Yurtimga qaytgach, Londonga koʻchib kelishga jazm etdim. Mister Bets bu fikrimni judayam ma'qulladi va meni bir qancha patsientlarga tavsiya etdi. Men Old-Juridagi uncha katta boʻlmagan uyning bir qismini ijaraga oldim, Nyugetstritda yashovchi paypoqfurush mister Edmond Bertonning qizi miss Meri Bertonga uylanib, toʻrt yuz funt sep oldim.

Oradan ikki yil oʻtgach, saxovatli ustozim Bets vafot etdi; maoshim keskin kamayib ketdi. Doʻstlarim juda oz edi, koʻpgina hamkasblarimning bema'ni qiliqlariga taqlid qilishga esa vijdonim yoʻl qoʻymadi. Shuning uchun ham xotinim, ba'zi tanish-bilishlarim bilan maslahatlashib, yana dengizchi boʻlishga ahd qildim. Olti yil mobaynida kema xirurgi boʻlib ishladim, ikkita kema almashtirdim, Ost hamda Vest-Indiyaga bir necha marta sayohat qildim. Ana shu xizmatda oʻz ishlarimni ancha oʻnglab oldim.

Safarga ketayotganda koʻplab kitob olar va boʻsh vaqtlarimni qadimiy hamda yangi eng yaxshi yozuvchilarning kitoblarini oʻqishga bagʻishlardim, qirgʻoqqa chiqqanda esa yerli aholining urf-odatlarini kuzatardim, tillarini oʻrganardim. Xotiramning yaxshiligi tufayli bularni osongina oʻzlashtirib olardim.

Keyin sayohatim uncha muvaffaqiyatli bo'lmadi. Dengiz me'damga

tegdi, xotinim, bola-chaqalarim bilan uyda qolmoqchi boʻldim. Men dengizchilar orasida boʻlib koʻproq tajriba orttirish niyatida Old-Juridan Fegter-Leynga, u yerdan Uoppingga koʻchdim, lekin moʻljalim amalga oshmadi. Uch yillik behuda kutishdan keyin «Ohu» kemasining egasi, kapitan Vilyam Prichardning naf keltiradigan taklifini qabul qildim, u bilan Janubiy dengizga¹ joʻnadim.

Biz Bristoldan 1699-yil l4-mayda yoʻlga chiqdik. Avvaliga sayohatimiz juda muvaffaqiyatli boʻldi. Hamroh shamol kemamizni oldinga yoʻnaltirdi. Koʻp oʻtmay Ost-Indiya tomon yoʻl oldik. Xuddi shu paytda dahshatli boʻron koʻtarildi. Dovul bizni Vandimen Yeridan² shimoli-gʻarb tomonga qarab surib ketdi. Biz janubiy kenglikning 30° 2' ida edik. Ekipajimizdagi oʻn ikki kishi oʻta charchash hamda maza-matrasiz ovqatdan vafot etdi, boshqalar ham haddan tashqari holdan toygandi. 5 noyabr kuni (oʻsha yerlarda yozning boshlanishi) qattiq shamol kemamizni hamon oldinga haydab borishda davom etdi; hammayoqni qalin tuman qoplagandi. Toʻsatdan kemadan qandaydir yarim kabelt³ uzoqroq masofada toʻlqinlar urilib pishqirayotgan joy koʻrindi. Shiddatli shamol kemani oʻz ogʻushiga olib, qoya sari surib boraverdi; biror chora koʻrish uchun vaqt oʻtgan edi. Kema shitob bilan borib toshga urildi va bir zumda chil-chil boʻldi.

Ekipajdan olti kishi, shu jumladan men ham, dengizga qayiq tushirishga, kema va qoyadan uzoqlashishga muvaffaq boʻlgandik. Mening hisobimga koʻra, eshkak eshib faqat uch milya⁴ yurdik. Keyingi kunlarda kemada shunchalik qattiq ishlagan edikki, eshkak eshishga ham darmonimiz yetmay qoldi. Biz eshkaklarni uloqtirib, oʻzimizni toʻlqinlar ixtiyoriga topshirdik. Yarim soatdan keyin shimoldan esgan qattiq shamol qayigʻimizni agʻdarib tashladi. Qayiqdagi hamrohlarimga ham, shuningdek, xalos boʻlish umidida qoyada yoki kemada qolganlarga ham nima boʻlganini bilmayman. Fikrimcha, ularning hammasi halok boʻlgan boʻlsa kerak.

Janubiy dengiz – Tinch okeanning janubiy qismi ilgari shunday atalardi.

² Vandimen Yeri – Avstraliyaning janubi-sharq tomonida joylashgan. Tasmaniya orolining eski nomi.

³ Kabelt - ingliz dengiz o'lchovi. Bir kabelt 183 metrga teng.

⁴ Milya - bu yerda 10 kabeltga teng dengiz milyasi haqida gap boradi.

Oʻzim esa suvga dumalab tushgach, shamol va oqim yoʻnalishida boshim oqqan tomonga qarab suzaverdim. Bir necha marta suv tubini paypaslab koʻrdim. Nihoyat, juda holdan toyib, toʻlqinlar bilan olishishga kuchim yetmay qolganda oyogʻim yerga tekkanini sezdim.

Xuddi shu paytga kelib boʻron ham ancha tindi. Suv tubi shunchalik qiyalik ekanki, sohilga yetguncha bir milya masofagacha suv kechib borishga toʻgʻri keldi. Shunda kech soat sakkizlar boʻlsa kerak. Men mamlakat ichkarisiga yarim milyacha yurib bordim, biroq uy yoki u yerda yashovchilardan nom-nishon ham topolmadim. Charchashdan, issiqdan hamda kemani tark etish paytida yarim pint¹ aroq ichib olganimdan qattiq uyqum keldi. Juda ham past hamda mayin koʻkat ustiga choʻzildim va qattiq uyquga ketdim, umrim bino boʻlib bunaqa qattiq uxlamagandim.

Mening hisobimga koʻra uyqum toʻqqiz soatdan oz davom etmagan boʻlsa kerak, chunki uygʻonganimda hammayoq yop-yorugʻ edi. Men oʻrnimdan turmoqchi boʻldim, biroq qimirlay olmadim. Qoʻl-oyoqlarim yerga mahkam chirmab tashlanibdi; oʻzim osmonga qarab yotardim. Uzun va qalin sochlarim ham yerga bogʻlab tashlangan edi. Ayni paytda butun gavdam — qoʻltigʻimdan sonimgacha ingichka chilvirlar bilan tortib bogʻlanganligini sezdim. Men faqat osmonga qaray olardim, xolos; quyosh omonsiz kuydirar, koʻzlarimni qamashtirardi. Qulogʻimga allaqanday noaniq shovqin chalindi, lekin tepaga qarab yotganimdan hech narsani koʻra olmadim.

Koʻp oʻtmay qandaydir bir jonli narsa chap oyogʻimdan oʻrmalab, asta-sekin koʻkragimga chiqqanini, iyagimga yaqinlashib kelganini sezdim. Koʻz qirimni tashlab, qoʻliga oʻq-yoy ushlagan, sadoq osgan, boʻyi bir qarich ham kelar-kelmas odamni koʻrdim. Uning orqasidan oʻshanga oʻxshash yana qirqta odam kelayotganini ham payqadim. Hayratdan qattiq baqirib yubordim, ustimdan yerga sakrab tushgan odamchalarning ba'zilari mayib boʻlishdi. Biroq koʻp oʻtmay ular yana qaytishdi. Bitta botirrogʻi yuzimga shu qadar yaqin keldiki, uni roʻy-rost koʻrdim. Hayron boʻlganini izhor qilib qoʻlini koʻtardi. Koʻzlarini olaytirdi, aniq, lekin chinqiriq tovush bilan: «Gekina degul!» — dedi. Boshqalar ham bu soʻzni bir necha marta takrorlashdi, lekin men oʻshanda uning ma'nosini bilmadim.

¹ Pint – yarim litrga teng ingliz suyuqlik oʻlchovi.





Kitobxon osongina tasavvur etayotgan shu muddat ichida juda noqulay ahvolda yotdim. Nihoyat, ozgina urinib, chap qoʻlimni chirmab turgan arqonni uzib, arqon bogʻlangan qoziqlarni yerdan sugʻurib tashladim. Qoʻlimni koʻzimga olib bordim, shu payt meni bogʻlab tashlashda naqadar ustalik qilinganini sezdim.

Boshimni keskin burib, menga behad azob berayotgan, chap tomondan sochimga bogʻlab qoʻyilgan chilvirlarni sal boʻshatdim. Endilikda boshimni oʻng tomonga sal burishga imkon tugʻildi. Biroq mitti odamchalar yana qochib ketishdi, ulardan birortasini ham ushlay olmadim.

Shundan soʻng quloqni teshib yuboradigan darajada qichqiriqlar yangradi. Shovqin tingach, kimningdir «Tollgo fonak!» deb xitob qilganini eshitdim. Shu zahotiyoq yuzlarcha yoy oʻqlari chap qoʻlimga sanchilganini sezdim. Oʻqlar menga ignadek sanchilardi. Yangidan yana oʻq uzishdi. Endi ular, bizning Yevropada bomba otganday, osmonga qarab oʻq uzishardi. Tanamga (garchi buni uncha sezmasam-da) oʻq yomgʻiri yogʻildi. Bir necha oʻq yuzimga kelib tegdi, yuzimni qoʻlim bilan toʻsib oldim. Diqqatpazlik va ogʻriqdan ingradim, boʻshalish uchun yana harakat qildim. Biroq bu odamchalar oldingisidan ham kuchliroq qilib yana oʻq uzishdi; ulardan ba'zilari biqinimga nayza suqa boshladi, lekin baxtimga, nayzalar qoʻtos terisidan tikilgan kamzulimni tesha olmadi.

Men to qorongʻi tushgunga qadar qimirlamay yotgan ma'qul, deb oʻyladim. Qorongʻida, chap qoʻlim yordamida boʻshalib olishim uncha qiyin emas. Bordi-yu, bu mamlakat odamlarining hammasi ham shu koʻrib turganlarim singari mitti boʻlsa, menga qarshi qoʻyiladigan har qanday armiyani bir yoqlik qilishga qudratim yetadi, deb oʻylashga toʻliq asosim bor edi.

Ammo taqdir menga boshqacha boqdi. Jim yotganimga ishonch hosil qilgan odamlar oʻq uzishni toʻxtatishdi, lekin qulogʻimga chalinayotgan shovqin-surondan ularning soni ancha koʻpayganini bildim. Oʻng tomonda, qulogʻimning naq roʻparasida qandaydir taqillash ovozlari eshitildi — nimadir qurishayotganga oʻxshashardi. Ming mashaqqat bilan oʻsha tomonga boshimni burdim va oʻzimdan toʻrt yard¹ uzoqroqda boʻyi bir

¹ Yard – 91,4 santimetrga teng.

yarim fut keladigan minbarga koʻzim tushdi. Minbarga oʻsha yerlik odamlardan toʻrt-beshtasi bemalol sigʻardi. Ulardan biri, eng zodagoni boʻlsa kerak, uch mulozim kuzatuvida minbarga chiqdi, uzundan-uzoq nutq soʻzlab menga murojaat qildi, lekin uning birorta ham soʻzini tushunmadim

Shuni eslatib oʻtish kerakki, bu amaldor gapini boshlashdan oldin uch marta: «Lengrodegil san!» deb qichqirdi. Bu soʻzlarni eshitgan zahotiyoq, ellikka yaqin odam menga yaqinlashib, sochimga bogʻlab qoʻyilgan chap tomondagi arqonlarni kesib tashlashdi. Bu boshimni oʻng tomonga burishga va gapirayotgan odamning tashqi qiyofasi hamda qoʻl harakatlarini bemalol koʻrishga imkon berdi.

Koʻrinishdan u qirq yoshlarda boʻlib, boʻyi safdoshlarinikidan balandroq edi. Ulardan biri – mening oʻrta barmogʻimday keladigani, ehtimol, u mahram boʻlsa kerak – xoʻjasining uzun etagini ushlab turar, qolgan ikkitasi esa ikki tomonda tik turishardi. U chinakam notiq singari gapirardi. Nutqda ba'zan doʻq, ba'zan va'da, achinish, muruvvat ohanglari yangrardi. Men eng itoatkor qiyofada qisqa javob qaytardim, soʻng chap qoʻlimni koʻtardim, quyoshga boqdim, goʻyo uni oʻzimga guvoh ekanligini anglatdim. Men ochlikdan oʻlar holatga yetgandim (oxirgi marta, halokatga uchramasimizdan bir necha soat avval, kemada ovqatlanganman), shu vajdan sabrsizligimni bosa olmadim va odob qoidalariga zid boʻlsa-da, ovqat yegim kelayotganini bildirib, tez-tez barmogʻimni ogʻzimga olib bordim.

Gurgo (keyin bilishimcha, amaldorlarni shunday deb atasharkan) meni yaxshi tushundi. U minbardan tushib, yon tomonlarimga bir necha narvon qoʻyishni buyurdi. Turli xil noz-ne'matlar solingan savatlarni koʻtargan yuzdan ortiq odam narvondan yuqoriga koʻtarilib, ogʻzim tomon ravona boʻlishdi.

Ovqatlar, mening haqimdagi xabar yetib borishi bilanoq, podshohning amri bilan bu yerga yetkazib kelingandi. Ne'matlar turli-tuman jonivor goʻshtidan tayyorlangan edi, biroq ta'miga qarab, qaysisi qanday jonivor goʻshti ekanligini ajrata olmadim. Bu yerda kurak, son, biqin goʻshtlari bor edi, ular koʻrinishdan qoʻy goʻshtini eslatsa-da, kattaligi arang turna

qanotiday kelardi. Men ulardan ikki-uchtasini har biri miltiq oʻqiday keladigan uchta nonga qoʻshib birdaniga ogʻzimga solardim. Odamchalar menga juda chaqqonlik bilan xizmat qilishar va boʻyimdan, ishtahamning karnayligidan mamnun boʻlishib, ming xil imo-ishoralar qilishardi.

Qornim toʻygach, biror narsa ichgim kelganligiga ishora qildim. Bular juda ham ziyrak, kashfiyotchi xalq ekan. Yegan ovqatimga qarab, meni oz narsa bilan qondirib boʻlmasligini bilishib, odatdan tashqari epchillik bilan arqon yordamida bochkalardan eng kattasini ustimga tortib chiqarishdi, qoʻlimga yumalatib olib borishdi va ogʻzini ochishdi. Bochkada chorak litrcha vino bor edi, uni bir koʻtarishda ichib yubordim. U burgund vinosiga oʻxshasa-da, mazasi ancha yaxshi edi. Ular ikkinchi bochkani ham olib kelishdi, buni ham oldingisi singari ichib, yana soʻradim, lekin ularda boshqa vino topilmadi.

Men bu karomatlarni koʻrsatayotganimda odamchalar xursandlikdan qiyqirib yuborishdi va koʻksimda ha deb: «Gekina degul!» degancha oʻyinga tushishdi. Ular imo-ishora bilan har ikkala bochkani yerga tashlashni iltimos qilishdi, biroq bundan oldin pastda turganlarning chetlanishlari lozimligini ogohlantirib: «Borach mivola!» deb qattiq baqirishdi. Bochkalarni osmonda koʻrishgach, yana baravariga: «Gekina degul!» deb qichqirishdi.

Rostini aytsam, ular tanamda u yoq-bu yoqqa yurishayotganida dastavval qoʻlimga tushgan qirq yoki ellik kishini ushlab olib, yerga uloqtirish vasvasasi ham qoʻzgʻaldi. Ammo ular meni ancha azobga qoʻyishganini, boshimga bundan ham battar azoblarni solishlarini, ularga boʻysunishga va'da berganimni oʻylab, bu fikrlarni miyamdan chiqarib tashladim. Bundan tashqari, oʻzimni xarajatlarning yuziga qaramay meni bu qadar siylagan xalq mehmondoʻst odamlar toifasidan boʻlmogʻi kerak, deb hisobladim.

Harholda, bu mitti odamlarning qoʻrqmasligidan ajablanmasdan ilojim yoʻq edi. Men ularga qandaydir ulkan maxluq boʻlib koʻrinishim kerak edi, ular boʻlsa dadil ustimga chiqib, bitta qoʻlim boʻshligini parvolariga ham keltirmay, bemalol oʻynab yurishardi.

Oradan biroz vaqt oʻtgach, qarshimda ulugʻ martabali zot — imperator hazratlarining elchisi paydo boʻldi. Elchi janobi oliylari koʻpgina



mulozimlari kuzatuvida oyogʻimdan chiqib, yuzim tomon yura boshladi. U imperatorning muhri bosilgan ishonch yorligʻini koʻzimga yaqin olib kelib koʻrsatdi, menga qarab nutq soʻzladi. Elchi qiyofasida gʻazab alomati koʻrinmasdi, ammo oʻta qat'iyatlilik bilan oʻn minutcha gapirdi. Gap orasida qoʻli bilan bir tomonni koʻrsataverdi. Keyinroq bilishimcha, gap oliy hazratlari davlat kengashi bilan birgalikda meni bu yerdan yarim milya naridagi poytaxtga olib kelishga qaror berganligi ustida borgan ekan.

Uning nutqiga javoban men ham bir necha soʻz aytdim, biroq, uni hech kim tushunmadi. Shunda men imo-ishora tiliga oʻtdim. Men boʻsh qoʻlimni boshqa qoʻlimga, soʻng boshim va tanamga qoʻydim, bu bilan erkinlik olmoqchi ekanligimni bildirdim. Nazarimda, oliy janoblari bu xattiharakatlarni yaxshi angladi shekilli, chunki yoʻq degan ishorani bildirib bosh chayqadi, meni asir sifatida olib ketishlarini imo bilan uqtirdi. Ayni paytda, menga nisbatan yaxshi munosabatda boʻlishlarini ham pisanda qildi.

Shu payt, arqonlarni uzib tashlashga yana bir urinib koʻraymikan, deb oʻyladim. Biroq terimga sanchilgan yoy oʻqlari tufayli yaralar bilan qoplangan yuz va qoʻllarimning achishib ogʻrishi meni bu niyatdan qaytardi. Buning ustiga, dushmanlarim tobora koʻpayib borayotganligini sezdim. Shu sababli, menga nisbatan koʻngillari xohlaganicha munosabatda boʻlishlari mumkinligini imo bilan tushuntirdim. Shundan keyin Gurgo hamda uning mulozimlari menga odob bilan ta'zim qilishdi va ancha xursand boʻlishib, uzoqlashishdi.

Koʻp oʻtmay quvnoq hayqiriqlar yangradi, «Peplon selai» soʻzi teztez takrorlanib turdi. Toʻsatdan, meni qoʻriqlayotganlar oʻng yonboshimga agʻdarilishga imkon beradigan qilib, chap tomondagi arqonni boʻshatishganini payqadim. Bundan ilgariroq qoʻl va yuzlarimga qandaydir xushboʻy malham surtib chiqishgan va oʻq tekkan joylardagi ogʻriq darhol qolgandi. Rohatlanib, uyqum kela boshladi. Keyin aytib berishlariga qaraganda, sakkiz soatga yaqin uxlabman. Buning ajablanadigan joyi yoʻq edi, chunki vrachlar imperatorning buyrugʻiga koʻra vinoga uxlatadigan dori solib qoʻyishgandi.

Aslida ahvol bunday bo'lgan ekan: imperator men haqimdagi ma'-



lumotni olishi bilanoq, kengash bilan kelishib, meni darhol bogʻlash haqida farmoyish beribdi (buyruq kechasi, men uxlayotganda bajarilgan). U yana, uygʻonishim bilanoq meni ovqatlantirish hamda poytaxtga olib ketish uchun arava yasashni ham buyurgan.

Bir qarashda bunday yoʻl tutish ham oʻta xavfli, ham qahramonlik. Men ishonamanki, yevropalik hokimlardan birortasining ham bunday qilishga yuragi betlamas edi.

Biroq, mening fikrimcha, imperatorning buyrugʻi adolatli edi. Darvoqe, bu odamlar uxlab yotganimda meni oʻldirishga urinishdi ham deylik. Dastlabki hujumdanoq ogʻriqdan oʻzimga kelishim va shunday gʻazabga tushishim mumkin ediki, arqonlarni uzib yuborib, oʻz navbatida ularga hamla qilishim turgan gap edi. Ular mendan rahm-shafqat kuta olmas edilar, bu aniq.

Bu odamlar ajoyib matematiklar ekan, ular bilimlarning mashhur homiysi imperatorning qoʻllab-quvvatlashi va ragʻbatlantirishi tufayli mexanika sohasida ulkan kamolotga erishishgandi. Podsho ixtiyorida xodalar va boshqa ogʻir narsalarni tashiydigan gʻildirakli har xil mashina bor. Bu yerda, qurilishbop yogʻoch beradigan oʻrmonzorlar bor joyda, uzunligi toʻqqiz fut keladigan eng yirik harbiy kemalar qurish odat tusiga kirib qolgan ekan. Keyin kemalarni ana shu mashinalarga yuklab, dengizga olib borishar ekan.

Besh yuz duradgor va injenerga darhol ana shu mashinalardan eng kattasini yasash topshirilgan ekan. Buyruq juda qisqa bir muddatda bajarilgan. Qirgʻoqqa chiqqanimga toʻrt soat boʻlar-boʻlmas mashina orqamdan joʻnatilgan. Men turgan joyga mashinaning yetib kelishini xalq shodon qiyqiriqlar bilan kutib oldi. Bu — balandligi uch dyuym, uzunligi yetti va eni toʻrt futga yaqin, yigirma ikki gʻildirakli yogʻoch platforma edi. Uni mening gavdamga parallel ravishda qoʻyishdi.

Eng mushkul narsa meni koʻtarib, platformaga yotqizish edi. Ular yerga har biri bir fut balandlikdagi saksonta xoda qoqishdi, keyin ishchilar boʻynim, qoʻlim, tanam va oyoqlarimga son-sanoqsiz ilmoqli bogʻlarni bogʻlashdi; ilmoqlardan pishiq chilvir oʻtqazib, ularni xodalar ustiga oʻrnatilgan chigʻir tepasidan olib oʻtishdi. Eng baquvvat ishchilardan



toʻqqiz yuz kishi chilvirni torta boshladi, shunday qilib, uch soat oʻtaroʻtmas meni aravaga olishdi va unga mahkamlab bogʻlashdi.

Bularning hammasini menga keyin aytib berishdi. Uyqu dori sharofati bilan qattiq uyquga ketib, bu ishlarning birontasini ham sezmabman.

Ilgari aytganimdek, meni toʻrt milya naridagi poytaxtga olib borish uchun saroy otxonasidan, har birining boʻyi yarim dyuym keladigan eng katta otlardan bir yarim mingtasi kerak boʻldi.

Bir gʻaroyib hodisa tufayli meni uygʻotishganda toʻrt soat yoʻl yurgan ekanmiz. Arava tuzatishga muhtoj boʻlib toʻxtabdi. Bundan foydalangan mahalliy xalq yoshlaridan ikki-uchtasi uxlayotganimda aft-angorim qanaqaligini koʻrmoqchi boʻlibdi. Ular arava ustiga chiqib, yuzim tomonga sekin yashirinib borishibdi. Ulardan biri, gvardiya ofitseri, burnimning chap teshigiga qilichining uchini ancha kirgizibdi. Burnimga xas-xashak tekkanday qattiq aksirib yubordim, uygʻonib ketdim. Botirlar oʻzlarini menga sezdirmay yashirinishdi. Oradan uch hafta oʻtgandan keyingina toʻsatdan uygʻonib ketganligim sababini bildim.

Butun kunni yoʻl yurish bilan oʻtkazdik. Tunaydigan joyda aravamning ikki tomoniga besh yuzga yaqin gvardiyachi qoʻyildi. Ularning yarmi mash'ala, qolganlari esa, sal-turishga intilsam oʻq uzish uchun, oʻq-yoyni shay qilib ushlab turardi.

Quyosh chiqishi bilan yana yoʻlga tushdik, tush paytida shahar darvozasidan ikki yuz yard berida edik. Imperator saroydagi barcha arkoni davlati bilan bizga peshvoz chiqdi, lekin oliy tabaqa amaldorlar oliy hazratlarining ustimga chiqib, oʻz hayotini xavf-xatar ostida qoldirishiga qat'iy qarshilik koʻrsatishdi.

Arava qirollik boʻyicha eng katta deb hisoblangan ibodatxona yonida toʻxtadi. Bundan bir necha yil muqaddam ana shu ibodatxonada dahshatli qotillik yuz bergan. Mahalliy xalq oʻta xudojoʻy boʻlganligidan ibodatxonani harom boʻldi, deb unga kirmay qoʻygan. Ibodatxonani yopishib, u yerdagi ashyo va ziynatlarni olib chiqishgan, u ancha vaqtdan beri boʻmboʻsh yotgan. Ana shu yerga meni joylashtirmoqchi boʻlishdi.

Ibodatxonaning shimolga qaragan eshiklarining balandligi toʻrt futga, eni ikki futga yaqin boʻlib, osongina sigʻishim mumkin edi. Eshiklarning



har ikki tomonida, yerdan bor-yoʻgʻi olti dyuym balandlikda ikkita deraza bor edi. Chap derazadan saroy temirchilari yevropalik xonimlar soatining zanjiri yoʻgʻonligidagi toʻqson bitta zanjirni oʻtkazib, ularning uchini chap oyogʻimga oʻttiz oltita osma qulf bilan mahkamlab bogʻlab qoʻyishdi. Katta yoʻlning boshqa tomonida, ibodatxona roʻparasida balandligi besh fut keladigan minora turardi. Imperator eng yaqin amaldorlari bilan, meni yaxshiroq koʻrish uchun, minora ustiga koʻtarildi. Meni koʻrish uchun, alohida hisobga koʻra, ibodatxona yoniga yuz mingdan ortiq shaharlik toʻplandi. Ularning oʻn mingdan ortigʻi menga chirmashib oldi, deb oʻyladim. Biroq koʻp oʻtmay, buni man etib, chirmashganlarga oʻlim jazosi berilishi haqidagi buyruq chiqarildi.

Temirchilar oʻz ishlarini tugallab, meni aravaga bogʻlab turgan arqonlarni qirqishdi, umrimda hech qachon his etmagan chuqur qaygʻuli kayfiyatda oʻrnimdan turdim.

Oʻrnimdan turib, u yoq-bu yoqqa yurganimni kuzatib turgan xalqning shovqin va hayrati ta'rifga sigʻmaydi. Meni bogʻlab qoʻyilgan zanjirning uzunligi ikki yardga yaqin boʻlib, oldinga yoki orqaga yurish tugul, yarim doira yasab harakat qilish, emaklab ibodatxona ichiga kirish, u yerda uzala tushib yotish imkoniga ham ega edim.

IKKINCHI BOB

Oʻrnimdan turib, atrofga nazar tashladim. E'tirof qilib aytamanki, umrim bino boʻlib bunaqa ajoyib va gʻaroyib manzarani koʻrmaganman. Atrofim nuqul bogʻning oʻzginasi; har biri qirqʻkvadrat fut keladigan, devor bilan qurshalgan dalalar gulzorga oʻxshaydi. Bu dalalarning ba'zilari oʻrmon bilan qoplangan boʻlib, daraxtlarning balandligi yetti futdan oshmasdi. Chapda esa teatr dekoratsiyasini eslatuvchi shahar yastanib yotardi.

Bu odatdan tashqari goʻzal manzarani tomosha qilarkanman, imperator minoradan pastga tushdi, otliq yonimga keldi. Bu jasorati uchun uni falokat bosishiga sal qoldi. Ot meni koʻrishi bilanoq hurkib, ikki oyogʻida tik turdi; chamasi ustiga togʻ yurib kelayotganday tuyulgan boʻlsa kerak. Imperator ajoyib chavandoz boʻlgani uchun egardan yiqilmay qoldi. Shu payt uning baxtiga mulozimlar yugurib kelishdi. Ular irgʻishlayotgan otning jilovidan

tutib, oliy hazratlarining otdan tushib olishiga yordamlashishdi. Imperator oʻzini bamaylixotir tutardi. U kiyim-boshlarining u yoq-bu yogʻini toʻgʻrilab, har tomonimdan oʻtib, boshimdan oyogʻimgacha koʻzdan kechira boshladi. U hozir-u nozir boʻlib turgan oshpazlarga va saroy xizmatkorlariga menga ovqat hamda ichimlik berishni buyurdi. Ular ovqat va vino solingan aravani qoʻlim yetadigan masofagacha gʻildiratib kelishdi. Men bu ne'matlarni pok-pokiza tushirdim. Aravalarning yigirmatasida taomlar, oʻntasida ichimliklar bor edi. Har bir aravadagi taom menga ikki-uch luqma boʻldi, xolos, ichimlikni esa oʻnta koʻzadagisini bitta aravaga qoʻyib birdaniga koʻtardim; qolgan vinolarni ham ana shu alfozda ichdim...

Xonimlar va saroy amaldorlari juda yaxshi kiyinishgandi. Uzoqdan rang-barang kiyingan bu olomon, zarbof va kumush rang ip bilan tikilgan yubkani yerga yozib qoʻyilishini eslatardi.

Imperator oliy hazratlari menga tez-tez savol bilan murojaat qilib turdi. Men javob qaytarardim, biroq u ham, men ham bir-birimizning gapimizdan hech narsa tushuna olmasdik. Shunda u arkoni davlat ichidagi ruhoniylar va yuristlarga (kiyimlaridan shunday boʻlishsa kerak deb oʻyladim) men bilan muloqotda boʻlishga amr qildi. Men, oʻz navbatida, ular bilan oʻzim bilgan hamma tillarda: nemischa, gollandcha, lotincha, fransuzcha, ispancha, italyancha gaplashdim, biroq bu urinishlar hech qanday natija bermadi.

Oradan ikki soat o'tgach saroy ahli jo'nab ketdi, men kuchaytirilgan soqchilar nazorati ostida qoldim — ular menga yaqinlashishga zo'r berib urinuvchi, hattoki beodob avom xalqdan saqlashi lozim edi. Uyim eshigi oldida — yerda o'tirganimda menga qarab yoydan o'q uzishdek uyatsizlikka borib yetuvchilar ham topildi. O'qlardan biri chap ko'zimga sanchilishiga sal qoldi.

Bunday surbetlikdan jahli chiqqan polkovnik bemaza qiliq qiluvchilardan oltitasini ushlashga buyruq berdi. Jazolash uchun ularni mening qoʻlimga berishga ahd qildi. Soldatlar toʻpolonchilarni nayzalar halqasiga oʻrab olib, men tomon haydab kelishdi. Men ularning hammasini birdaniga oʻng qoʻlim bilan changalladim, beshtasini kamzulimning choʻntagiga soldim, oltinchisini tiriklayin yeb qoʻymoqchiday ogʻzimga olib bordim. Bechora jon talvasasida chinqirdi, choʻntagimdan qalamtaroshimni olga-



nimda esa polkovnik bilan ofitserlar gʻoyat tashvishda qolishdi. Biroq koʻp oʻtmay ularning koʻngli oʻrniga tushdi. Men oʻz asirimga mehr bilan boqib, uni bogʻlab turgan arqonlarni kesdim-da, avaylabgina yerga qoʻydim; u bir zumda juftakni rostlab qochib qoldi. Qolganlarini ham birin-ketin choʻntagimdan olib, xuddi shu yoʻsinda qoʻyib yubordim. Mening marhamatimdan qorovullar ham, olomon ham mamnun boʻlganligini payqadim. Ozor yetkazuvchilarga nisbatan tutgan yoʻlim saroydagilarda men haqimda yaxshi taassurot tugʻdirdi.

Tun boshlanishi bilan hech bir qiyinchiliksiz uyimga kirib oldim va quruq yerga choʻzildim. Imperatorning maxsus buyrugʻi bilan men uchun koʻrpa-yostiq tikishgunga qadar ikki haftagacha shu alfozda hayot kechirdim. Oʻrtacha kattalikda olti yuzta koʻrpa keltirishdi, uyimda ish qizib ketdi. Bir yuz ellikta koʻrpani bitta qilib tikishdi, shunday qilib, uzunasiga ham, eniga ham menga toʻgʻri keladigan toʻshak hosil boʻldi; ana shunaqangi toʻrtta toʻshakni ustma-ust qoʻyishdi; biroq bundan tosh yotqizilgan yer yumshab qolmadi. Xuddi shu usulda ustimga yopinadigan koʻrpa, choyshablar ham tayyorlandi. Allaqachonlar muhtojlikka koʻnikib qolgan odam uchun bu ham harna edi.

Men haqimdagi xabar qirollik boʻyicha yoyilishi bilanoq meni koʻrish uchun hamma yoqdan boyonlar, bekorchilar va har narsaga qiziquvchi odamlar daryoday oqib kela boshladi. Qishloqlar huvillab, dala ishlari toʻxtab qoldi, uy ishlari izdan chiqdi. Agar oliy hazratlari oqilona yoʻl tutmaganda buning oqibati voy boʻlardi. Imperator meni koʻrib boʻlganlarning hammasi darhol uyga qaytishi haqida buyruq berdi; ularga saroyning alohida ruxsatisiz ikkinchi marotaba uyimga ellik yard masofagacha yaqinlashish qat'iy man etildi. Bu farmoyish ba'zi ministrlar uchun yirik daromad manbaiga aylandi.

Huzurimdan ketgach, imperator kengash chaqirdi, unda menga qanday munosabatda boʻlish masalasi muhokama qilindi. Mening yaqin doʻstlarimdan biriga aylangan saroy aslzodasidan keyinroq bilishimcha, davlat kengashi anchagacha bir fikrga kelolmapti. Bir tomondan zanjirlarni parchalab yuborishimdan qoʻrqishibdi, boshqa tomondan esa meni boqish ancha qimmatga tushishi va mamlakatda ocharchilik boshlanishidan hadiksirashibdi. Kengashning ba'zi a'zolari meni ochdan oʻldirishni yoki



zaharli oʻq otib, yoʻq qilishni astoydil talab qilishibdi. Biroq bu taklif rad etilibdi, shunday ulkan jasad poytaxtda va butun qirollikda vabo tarqalishiga sababchi boʻladi, deb koʻnishmabdi.

Kengash avji qizib turgan paytda kengash zalining katta eshigi yonida bir necha ofitser paydo boʻlibdi; ulardan ikki nafari majlisga qoʻyilibdi va ular mening jigʻimga tekkan olti toʻpolonchiga nisbatan qanday yoʻl tutganim xususida toʻliq ma'lumot berishibdi. Bundan oliy hazratlari ham, davlat kengashi a'zolari ham juda ta'sirlanib ketishibdi.

Imperator oʻsha zahotiyoq farmon chiqarib, poytaxtdan toʻqqiz yuz yard masofagacha boʻlgan joyda joylashgan qishloqlar zimmasiga har kuni ertalab mening dasturxonimga oltita novvos, qirqta qoʻy va tegishli non hamda vino bilan birga boshqa yeguliklar keltirishni yukladi. Bularning hammasiga belgilangan narx boʻyicha oliy hazratlarining xazinasidan haq toʻlandi. Shuni ta'kidlab oʻtish kerakki, bu podshoh asosan oʻz mulkidan keladigan daromadlar hisobiga yashaydi, faqat doʻppi tor kelib qolgan paytlardagina yordam soʻrab fuqarolariga murojaat qiladi.

Bundan tashqari huzurimda olti yuz odamdan iborat mulozimlar shtati ta'sis etildi. Imperator ularning maoshi uchun alohida mablagʻ ajratdi va uyimning har ikki tomoniga ular uchun qulay chodirlar tikishga buyruq berdi. Bundan tashqari, uch yuz chevarga shu yerning fasonida menga kostyum tikish va eng mashhur olimlardan oltitasiga mahalliy tilni oʻrgatish amr qilindi. Eng oxirida, imperator oʻziga, saroy amaldorlariga va gvardiyaga qarashli otlar menga koʻniksin uchun, ularni mening huzurimda mashq qildirish haqida farmoyish berdi.

Bu buyruqlarning hammasi bekam-koʻst bajarildi. Uch haftadan keyin liliputlar tilini oʻrganishda katta yutuqlarni qoʻlga kiritdim. Shu muddat ichida imperator huzurimga tez-tez tashrif buyurib, menga ta'lim berayotgan ustozlarimga bajonudil yordam qildi. Biz bir-birimiz bilan bemalol gaplashadigan boʻlib qoldik. Dastlabki oʻrgangan soʻzlarim oliy hazratlaridan meni ozod etishini soʻrash istagi boʻldi. Bu soʻzlarni har kuni imperator oldida tiz choʻkib takrorlayverdim. Iltimosimga imperator sal dudmalroq javob qildi. Men uning gaplaridan, mening ozod qilinishim uchun davlat kengashining roziligi zarurligini va eng avvalo, men «lyumoz kelmin pesso

deemarlon Empozo», ya'ni u va uning imperiyasi bilan urushmasligim, tinchtotuv yashashim haqida qasamyod qilishim lozimligini arang bilib oldim. Biroq, mening ozod etilishim sharoitga bogʻliq ekanligini, shu vajdan sabrqanoat qilishni, oʻzining ham, fuqarolarining ham koʻz oʻngida yaxshi nom qozonish uchun xizmat qilishimni pisanda qilib qoʻshib qoʻydi.

Kunlarning birida u, alohida amaldorlarga meni tintuv qilish uchun buyruq bersa buni haqorat deb bilmasligimni iltimos qildi. Ulkan gavdamga yarasha oʻta xavfli qurol taqib yurishimga uning ishonchi komilmish. Men oliy hazratlaridan bu xususda koʻngli toʻq boʻlishini iltimos qildim hamda uning koʻz oldida hamma choʻntaklarimni agʻdarib koʻrsatishga tayyor ekanligimni aytdim. Oʻz fikrimni qisman soʻzlar, qisman imo-ishora bilan uqtirdim. Imperator imperiya qonuniga binoan tintuv ikkita amaldor tomonidan oʻtkazilishini aytdi.

«Qonunning bu talabi sizning roziligingizsiz va yordamingizsiz bajo keltirilmaydi, albatta, — dedi u, — lekin, sizni oʻta muruvvatli, adolatli kishi deb bilganim uchun manovi amaldorlarni bamaylixotir qoʻlingizga topshiraman. Biz olib qoʻygan buyumlar mamlakatimizdan ketayotganingizda qaytarilib beriladi yoki ularga qancha narx qoʻysangiz shuncha haq toʻlanadi».

Men har ikkala amaldorni qoʻlimga oldim-da, kamzulimning choʻntagiga solib qoʻydim. Ular bu choʻntakni tekshirib boʻlishgach, boshqalariga soldim. Men ularga ikkita soat hamda oʻzimdan boshqa hech kimga kerak boʻlmaydigan mayda-chuyda saqlanadigan yashirin choʻntagimdan boshqa hammasini koʻrsatdim. Soat choʻntaklarimdan birida kumush soat, boshqasida bir necha dona oltin tanga solingan hamyon bor edi. Amaldorlar qoʻliga qogʻoz, qalam va siyoh olib, nima topgan boʻlishsa hammasini roʻyxatga olishdi. Roʻyxat tuzib boʻlingach, ular mendan pastga tushirib qoʻyishni iltimos qilishdi. Ular oʻz roʻyxatlarini imperatorga topshirishdi. Keyinroq bu hujjatni ingliz tiliga tarjima qildim. Uning soʻzma-soʻz mazmuni quyidagicha:

«Ulkan odam («Kuinbus Flestrin» soʻzini shunday tarjima qildim) kamzulining oʻng choʻntagidan bir boʻlak katta dagʻal matoni topdik, uni oliy hazratlari saroyining kiraverishdagi zaliga gilam qilib toʻshasa ham

boʻladi. Chap choʻntakda juda katta kumush sandiq bor ekan, qopqogʻi ham kumushdan. Uni oʻrnidan qoʻzgʻata olmadik. Bizning soʻrovimizga koʻra Ulkan Odam sandiqni ochdi. Birimiz sandiq ichiga tushdik, u tizzasigacha allaqanday changga botib ketdi. Chang havoga koʻtarilib, ikkovimizni ham bir necha bor qattiq aksa urdirdi.

Nimchasining oʻng choʻntagidan bitta qilib taxlangan, pishiq arqon bilan bogʻlangan bir dasta katta yupqa oq varaqlarni topdik. Varaqlar qandaydir qora belgilar bilan toʻla. Bizning kamtarona taxminimizga koʻra, bu belgilar yozuv boʻlsa kerak; har bir harf kattaligi kaftimiz yarmicha keladi. Nimchaning chap choʻntagida maxsus bir asbob bor ekan. Asbobga uzun-uzun yigirmata qoziq oʻrnatilgan, ular oliy hazratlari saroyi qarshisidagi panjara devorni eslatadi. Fikrimizcha, Ulkan Odam bu asbob bilan sochlarini tarasa kerak, lekin bu bizning taxminimiz, xolos. Biz Ulkan Odamni savolga tutishdan qochdik, chunki u bilan soʻzlashish biz uchun ancha qiyin.

Ulkan Odamning oʻrta yopigʻining («ranfulo» soʻzini shunday tarjima qildim, ular bu soʻz orqali «shim» demoqchi) oʻng tomonidagi katta choʻntagida odam boʻyi keladigan ichi kavak temir ustunni koʻrdik. Bu ustun oʻzidan ham yoʻgʻonroq qattiq yogʻoch parchasiga mahkamlab qoʻyilgan; ustunning bir tomonida gʻalati shakldagi katta temir parchasi dikkayib turibdi, uning vazifasi nima ekanligini bilolmadik. Ana shunaqa mashina chap choʻntagidan ham topildi. Oʻng tomondagi kichkina choʻntakda oq va qizil metalldan yasalgan va kattaligi har xil bir necha sip-silliq gardishlar bor ekan. Oq gardishlarning ba'zilari shunaqayam katta va ogʻirki, ikkovimiz ularni arang koʻtardik. Bular kumushdan yasalgan boʻlsa kerak.

Chap choʻntakdan shakli notekis ikki qora kolonnani topdik. Choʻntak tubida turib qoʻl choʻzganimizda, uning uchiga arang yetdi. Har bir kolonnaga juda katta poʻlat taxta qoʻyilgan. Bu juda xavfli qurol boʻlsa kerak deb oʻylab, uni qanday ishlatilishini Ulkan Odamdan talab qildik. U har ikkala qurolni gʻilofdan chiqarib, oʻz mamlakatida bularning birida soqol qirishlarini, boshqasida esa goʻsht kesishlarini aytdi.

Bundan tashqari, Ulkan Odamda yana ikkita choʻntak bor ekan, ularning ichiga kira olmadik. Ulkan Odam ularni soat choʻntak deb aytdi.



Bular uning o'rta yopig'ining yuqori qismiga joylashgan, kesib hosil qilingan keng yoriqlar boʻlib, qornining qisuvida yopilib qolibdi. Chap cho'ntakdan katta kumush zanjir pastga osilib turibdi; u cho'ntak tubidagi ajib bir mashinaga ulangan. Biz mashinani bu yoqqa olishni buyurdik; u sharsimon bir narsa ekan; uning yarmi kumushdan, boshqa tomoni qandaydir tiniq metalldan yasalgan. Sharning shu tomonidagi qandaydir gʻalati belgilarni koʻrib, ularni ushlab koʻrmoqchi boʻldik; barmoqlarimiz o'sha tiniq narsaga tiralib qoldi. Ulkan Odam mashinani quloqlarimizga tutdi, biz suv tegirmonning parragi ovozini eslatuvchi uzluksiz shovqinni eshitdik. Fikrimizcha, bu yo bizga noma'lum bir hayvon yoki ular sig'inadigan xudo bo'lsa kerak. Biz shaxsan keyingi fikrga ko'proq ishonamiz, chunki Ulkan Odam bizga biron narsani uning maslahatisiz qilmasligini (agar uning soʻzlarini toʻgʻri tushungan boʻlsak) aytdi. Bu narsani u o'zining folnomasi deb atab, u o'z umrining har bir daqiqasini ko'rsatib bera olishini aytdi. Ulkan Odam chap tomondagi soat cho'ntagidan kattakon toʻr oldi. Hajmi jihatidan baliqchilar toʻriday keladi, lekin u shunday narsaki, hamyon singari ochilaveradi ham, yopilaveradi ham. Toʻr ichidan bir nechta yaxlit sariq metall boʻlaklarini topdik. Bordi-yu, u sof oltin bo'lsa, bahosi juda yuqori bo'ladi.

Ulkan Odamning hamma choʻntaklarida tintuv oʻtkazgach, ulkan hayvonning terisidan yasalgan kamarini koʻzdan kechirishga tushdik. Kamarning chap tomonida oʻrtacha odam boʻyidan besh baravar uzunroq qilich osigʻliq, oʻng tomonida sumka yoki ikki xonali qop bor. Qopning har bir xonasiga mamlakatimiz fuqarosidan uchtasini joylashtirish mumkin. Qop xonalaridan birida har biri bizning boshimizday keladigan koʻpgina sharlarni topdik. Ularning hammasi haddan tashqari ogʻir metalldan yasalgan. Qopning boshqa xonasida qandaydir juda mayda va yengil donachalar bor. Ana shunday donachalarning elliktasi kaftimizga joy boʻldi.

Ulkan Odamni tintuv qilganimizda undan topilgan narsalarning roʻyxati ana shunday. Tintuv vaqtida u oʻzini odobli tutdi va oliy hazratlarining farmoyishlarini bajaruvchilarga oʻta itoatkor ekanligini amalda isbot etdi.

Ushbu roʻyxatga oliy hazratlarining podshohligi gullab-yashnab turgan sakson toʻqqizinchi qamar oyining toʻrtinchi kuni imzo chekildi va muhrbosildi.



«Klefrin Frelok, Marsi Frelok».

Mana shu roʻyxat imperatorga oʻqib berilganda, oliy hazratlari unda koʻrsatilgan ba'zi bir buyumlarni berishimni nazokat bilan taklif qildi. Eng avvalo u qilichimga ishora qildi. Men oʻsha zahoti qilichni yechib, qin-pini bilan topshirdim. Bu orada imperator uch ming saralangan askarga (oʻsha kuni ular oliy hazratlarini qoʻriqlashardi) yoylarni shay tutgan holda meni qurshashni buyurdi. Lekin men buni payqamadim, chunki koʻzim oliy hazratlarida edi.

Imperator qilichni yalangʻochlashimni iltimos qildi. Men iltimosni bajo keltirdim, qilichni boshim uzra bir necha bor aylantirdim. Soldatlar hayrat va dahshatga tushib, baqirib yuborishdan oʻzlarini tiya olishmadi. Qilich dengiz suvidan sal zanglab qolgan boʻlsa-da, harholda durust yaraqlardi. Qilichga tushgan quyosh nurlari charaqlab, atrofdagilarning koʻzini qamashtirib yubordi. Barcha podsholardan ham botirroq oliy hazratlari men kutgandan koʻra ozroq qoʻrqdi. U menga qilichni qiniga solishni va oʻzim bogʻlangan zanjirdan olti fut nariroqqa imkoni boricha sekinroq tashlashni amr etdi.

Keyin u, ular ichi kovak ustun, deb atagan toʻpponchalarimni koʻrsatishni talab qildi. Men toʻpponchani chiqardim, imperatorning iltimosiga koʻra uni qanday ishlatilishini qoʻlimdan kelganicha tushuntirdim. Keyin uni porox bilan oʻqladim (porox xalta zich berkitilgani uchun u qupquruqligicha qolgan ekan), imperatorni qoʻrqmang deb ogohlantirdimda, osmonga qarab oʻq uzdim. Bu safar qilichdan qoʻrqqandan koʻra battarroq qoʻrqib ketishdi. Yuzlarcha odamlar oʻq yeb oʻlganday yerga yiqildi. Hatto imperator, oyoqda tik turgan boʻlsa-da, anchagacha oʻziga kelolmadi. Men ikkala toʻpponchamni ham, oʻq-dori solingan haltachani ham topshirdim. Oliy hazratlariga oʻq-dorini olovdan uzoqroq saqlashni tayinladim, u sal uchqun tegsa alanga olib, imperator saroyini portlatib yuborishini aytdim.

Soatimni ham berdim. Imperator uni zoʻr qiziqish bilan tomosha qildi, soʻng ikkita eng kuchli gvardiyachisiga soatni halqasidan yogʻoch oʻtkazib olib ketishni buyurdi. Gvardiyachilar soat halqasidan yogʻoch oʻtkazib, Angliyada el solingan bochkani koʻtarganday, yelkalarida koʻtarib ketishdi.

Hammasidan ham imperatorni soat mexanizmlarining uzluksiz shovqini va minut milining harakati hayratga soldi. Liliputlar bizdan koʻra ancha ravshan va yaxshi koʻrishadi: oliy hazratlari milning doimiy harakatda ekanligini bir zumda payqadi. U bu mashina nima uchun xizmat qilishini aniqlashni olimlarga topshirdi. Biroq, olimlar hech qanday xulosaga kelolmasligini kitobxon shundogʻam tushunib turgan boʻlsa kerak. Ularning hamma taxminlari haqiqatdan ancha yiroq edi.

Keyin kumush va mis tangalarimni, oʻnta yirik hamda mayda oltin tangalar solingan hamyonimni, pichoq, ustara, taroq, kumush tamakidon, roʻmolcha va yon daftarlarimni ham topshirdim. Qilich, toʻpponchalar, oʻq va porox solingan sumka aravaga yuklandi va oliy hazratlarining qurolxonasiga joʻnatildi. Imperator boshqa buyumlarni menga qaytarib berishni amr qildi.

Amaldorlarga yashirin choʻntagimni koʻrsatmaganimni oldin aytgandim. Unda koʻzoynak, choʻntakda olib yuriladigan durbin va yana bir qancha mayda-chuyda narsalar bor edi. Bu narsalar imperatorda hech qanday qiziqish tugʻdirmasdi, buning ustiga ularni tashiyotganda buzish, sindirish yoki ishdan chiqarib qoʻyish mumkin, shu vajdan, oʻz va'damni buzmasdan, ularni imperator amaldorlaridan yashirishni ma'qul koʻrdim.

* * *

TO'RTINCHI BOB

Ozodlik olgach, eng avvalo mamlakat poytaxti Mildendoni tomosha qilish uchun ijozat soʻradim. Imperator paysalga solmay darhol ijozat berdi, lekin aholiga ham, ularning uylariga ham hech qanday ziyon-zahmat yetkazmasligimni qattiq tayinladi. Shahar aylanish niyatim borligi haqida varaqa tarqatilib, aholini xabardor qilindi...

Bir kuni ertalab, ozod boʻlganimga ikki hafta boʻlganida, huzurimga maxfiy ishlar boʻyicha bosh kotib (uni shunday unvon bilan chaqirishadi) Reldresel keldi. U kucheriga chetroqqa borib turishni buyurib, oʻzini qabul qilishimni iltimos qildi. Men uning lavozimi va shaxsiy obroʻyiga hurmat bilan qaraganim uchun bunga bajonudil rozi boʻldim. Bundan tashqari, u saroyda menga koʻpgina yaxshiliklar ham qilgan. Men yerga



yotishga shay ekanligimni aytdim, lekin u suhbatlashayotganimizda oʻzini kaftimda turishini afzal deb bildi.

Avvalo, u meni ozod boʻlishim bilan tabrikladi, albatta, uning aralashuvisiz bunga erisholmasdim. Biroq, uning gaplariga qaraganda, ozod boʻlganim uchun voqealar oqimidan mamnun boʻlishim kerak ekan.

«Mamlakatimizdagi umumiy ahvol, – dedi u, — xorijiy odamga juda yaxshiga oʻxshab koʻrinadi. Lekin bu tasavvur xato. Vatanimiz boshiga ikkita zoʻr, dahshatli musibat tushib turibdi. Yetmish qamar yil muqaddam imperiyada bir-biriga dushman Tremeksenlar va Slemeksenlar degan nom bilan mashhur boʻlgan ikkita partiya vujudga kelgan. Birinchilari baland poshna tarafdorlari, ikkinchilari past poshna tarafdorlari.

Tremeksenlar, baland poshnalar qadimiy davlatimiz tuzilishiga mos keladi, deb ta'kidlashadi, biroq oliy hazratlari past poshna tarafdori, u barcha hukumat va saroy mahkamalari xizmatchilari faqat past poshnali poyabzalda yurishsin, deb farmoyish chiqardi. Siz bu narsaga e'tibor bergan bo'lsangiz kerak. Ehtimol, oliy hazratlari kovushining poshnasi boshqa hamma saroy amaldorlarinikidan bir drerr past ekanligini ham sezgandirsiz (drerr dyuymning o'n to'rtdan biriga teng).

Har ikkala partiya oʻrtasidagi adovat va dushmanlik shu darajaga yetib boradiki, bir partiyaning a'zolari boshqa partiya a'zolari bilan birgalikda yemaydi ham, ichmaydi ham, gaplashmaydi ham. Tremeksenlar yoki Baland Poshnalar son jihatdan bizdan ancha koʻp deb hisoblaymiz, lekin hokimiyat butunlay oʻz qoʻlimizda. Ammo xavfsirashga asosimiz bor, toj-taxt vorisi imperator oliy hazratlarining Baland Poshnalarga ancha moyilligi bor. Uning bir poshnasi sal baland, shu vajdan oliy hazratlari biroz oqsaydi.

Davlatimizni ana shunday nizolar qiynab turgan bir paytda, oliy hazratlarining imperiyasidek zoʻr va qudratli Blefusku buyuk imperiyasi bizga hujum qilmoqchi. Toʻgʻri, siz dunyoning boshqa joylarida oʻzingizga oʻxshash ulkan odamlar yashaydigan davlat va qirolliklar borligini aytdingiz. Biroq, faylasuflarimiz bunga hech ishongilari kelmayapti. Ular sizni oy yoki qandaydir bir yulduzdan tushganingizga koʻproq ishonishadi. Sizday odamlardan yuztasi qisqa muddat ichida oliy hazratlari qoʻli

ostidagi mamlakatning meva-cheva va hayvonlarini yeb qoʻyishiga hech qanday shak-shubha yoʻq. Bundan tashqari, bizda yilnoma bor. Yilnomada olti ming qamar yil vaqt ichida yuz bergan voqealar vasf qilingan, lekin unda Liliputiya va Blefusku singari buyuk imperiyadan boshqa hech qanaqa mamlakat haqida gap yuritilmaydi.

Mana, oʻttiz olti qamar yildan beri bu buyuk davlatlar oʻzaro qattiq urush olib boradi. Bunga quyidagi voqea sababchi boʻlgan. Hammaga ma'lumki, qadim zamonlardan beri pishgan tuxumlarni poynak tomonidan sindirish rasm boʻlib qolgan. Nima boʻladi-yu, hozirgi imperatorimizning bobosi hali goʻdak paytida uning nonushtasiga pishgan tuxum berishadi. Bola tuxumni qadimiy odatga koʻra sindirayotib, barmogʻini kesib oladi. Oʻshanda uning otasi — imperator oʻz fuqarolariga, aks holda qattiq jazo berajagini eslatib, tuxumni uch tomonidan sindirish haqida farmon beradi.

Bu farmon aholining shunaqayam g'azabini qo'zg'atganki, yilnomalarda yozilishicha, yetti marta qoʻzgʻolon koʻtarilgan, natijada bir imperator o'lgan, boshqasi tojidan mahrum bo'lgan. Blefusku hukmdorlari bu qo'zg'olonlarni avi oldirishgan, qo'zg'olon qatnashchilarini o'z mamlakatlarida yashirishgan. Tuxumni uchidan sindirishdan bosh tortganligi uchun o'n bir ming fanatik o'lim jazosiga hukm qilingan. Mana shu masalaga bag'ishlab, yuzlarcha tom kitoblar yozilgan. Biroq poynakchilar tarafdorlarining kitoblari allaqachonlar man etilgan, partiya esa davlat lavozimlarini egallashdan mahrum etilgan. Blefusku imperatorlari o'z elchilari orqali bizni bir necha bor ogohlantirishdi. Ular bizni cherkov sohasida parchalanishda, ulugʻ paygʻambarimiz Lyustrogning Blundekralning (bu asar liliputlarning Qur'oni) ellik to'rtinchi bobida bayon qilingan asosiy aqidalarini buzishda ayblashadi. Lekin ularning bu da'vosi aqlga sig'maydi. Aqidaning asl matnida: «Barcha xaqiqiy dindorlar tuxumni oʻziga qulay tomonidan sindiradilar» deviladi. Tuxumning qaysi tomoni qulay – uch yoki poynak tomonimi – bu, menimcha, har bir dindorning o'z shaxsiy ishi, Hech bo'lmaganda bu masalani hal etishni imperatorning oliy sudiga oshirish mumkin.

Nima bo'lsa ham, surgun qilingan poynakchilar Blefusku imperiyasida ishonchli boshpana topishdi. Bora-bora ular imperatorga shunday ta'-



sir oʻtkazishdiki, u bizning davlatimizga urush e'lon qilishgacha borib yetdi. Urush oʻttiz olti qamar yildan beri davom etmoqda, ammo bir-biriga dushman tomonlardan birontasi ham uzil-kesil gʻalaba bilan maqtana olmaydi. Shu muddat ichida biz qirqta katta harbiy kema va oʻttiz ming eng yaxshi dengizchilari bilan juda koʻp mayda kemalarni yoʻqotdik. Aytishlaricha, dushman bizdan ham koʻra koʻproq talafot koʻrgan. Biroq, shunga qaramay, dushman yangi flotni shayladi, bizning territoriyamizga desant tushirishga hozirlik koʻrmoqda. Shuning uchun ham oliy hazratlari, sizning kuch va jasoratingizga toʻliq ishongan holda, mamlakatimizdagi haqiqiy ahvolni sizga bayon qilishni menga topshirdi».

Garchi men xorijiy kishi sifatida mahalliy partiyalar oʻrtasidagi nizolarga aralashmasligim kerak boʻlsa-da, xalos boʻlishim va ozod etilishimda imperator oldida oʻta qarzdorligim vajidan, uning davlatini dushman hujumidan jonimni ayamay himoya qilishga tayyor ekanligimni imperator hazratlariga ma'lum qilib qoʻyishini kotibdan oʻtinib soʻradim.

Savol va topshiriqlar

- 1. Jonatan Svift ijodi, u yashagan davr haqida nimalarni bilasiz?
- 2. J. Svift ijodining shakllanishida kimning yordami katta boʻldi?
- 3. «Gulliverning sayohatlari» asarining toʻliq nomini ayting. U necha qismdan iborat?
- 4. Liliputiyadagi siyosiy hayotni tasvirlang. Asarda Liliputiyadagi qaysi partiyalar haqida gap ketadi?
- 5. Liliputiya va Blefusku mamlakatlari oʻrtasidagi ixtilofning sababi nimada?
- 6. Svift nima uchun asar voqealari kechgan mamlakatlarni toʻqib chiqarishga majbur edi?
- 7. «Gulliverning sayohatlari» romani asosida yaratilgan badiiy film bilan romanning oʻzi orasida qanday farqlarni koʻrdingiz?
- 8. Adabiyot daftaringizga romandagi eng qiziq holat va tasvirlarni qayd qilib boring. Masalan, «dor ustida mohirlik bilan raqs tushadiganlarni yuqori davlat lavozimlariga koʻtarish yoki ordenlar bilan taqdirlash» kabi.



KECHAGI KUN - SABOO

THE SHE SHE SHE SHE SHE SHE SHE SHE

Muhammad Aminxoʻja MUQIMIY (1850 – 1903)



Milliy uygʻonish davri adabiyotining zabardast vakillaridan biri Muhammad Aminxoʻja Muqimiydir.

Shoir ijodini oʻrganish uning hayotlik chogʻidanoq boshlangan. Muqimiy vafotidan keyin shoirning devoni ilk bor «Devoni Muqimiy» (1907-yil) nomi bilan nashr etildi. Unda she'riy namunalar qatori hassos shoirning qisqacha tarjimai holi va ijodi haqida ma'lumot ham beriladi. 1910-yilda Portsev litografiyasida shoirning hajviy she'rlari «Muqimiy maa hajviyot» nomi bilan nashr etildi, 1912-yilda esa Muqimiyning yana bir she'riy toʻplami chop qilindi.

Shoir ijodini jiddiy va samarali oʻrganish oʻtgan asrning 30-yillarida boshlandi. Bu davrda Muqimiy asarlarini toʻplash, oʻrganish, nashr etish qizgʻin va samarali olib borildi. Gazeta va jurnallarda qator maqolalar e'lon qilindi. Bu xayrli ishning boshida otaxon shoirimiz Gʻafur Gʻulom turdi.

1998-yilda ulugʻ shoir Gʻ.Gʻulom tomonidan tuzilib «Muqimiy bayozi» deb nomlangan toʻplam katta ahamiyatga ega boʻldi. 1950-yilda Mosk-



vada Muqimiyning «Lirika i satira» nomli ikkinchi toʻplami rus tilida nashr etildi.

1953-yil Muqimiy ijodini oʻrganish tarixida yangi davr boʻldi. Shu yili vafotining 50 yilligi munosabati bilan Muqimiy hayoti va ijodiga oid maxsus kitoblar chiqarildi, shoirning tanlangan asarlari oʻzbek va rus tillarida nashr etildi.

H. Yoqubov, A. Olimjonov, H. Zaripov, H. Razzoqov, Gʻ. Karimov kabi olimlar hassos shoir haqida kitoblar yozdilar, ilmiy tadqiqot ishlariga rahbarlik qildilar.

Muhammad Aminxoʻja Mirzaxoʻja oʻgʻli Muqimiy 1850-yilda Qoʻqon shahrida Bekvachcha mahallasida, novvoy oilasida tugʻildi.

Muqimiy dastlab oʻz mahallasidagi mulla Abduxalil maktabida tahsil oladi. Shoirning ilm oʻrganishi va badiiy ijodga erta qiziqishida uning volidasi, qobiliyatli ayol Oyshabibi aytib bergan koʻplab ertak va qoʻshiqlarning ta'siri kuchli boʻldi.

Muqimiy dastlab Qoʻqondagi «Hokimoyim» madrasasida ta'lim oladi. 1872–73-yillarda Buxoroga borib, u yerdagi «Mehtar anbar» madrasasida oʻqishni davom ettirdi. 1876-yilda oʻqishni tamomlab Qoʻqonga qaytadi, uylanadi. Shoir dastlab yer qurilishi mahkamasida mirzalik, soʻngra Sirdaryo yoqasida joylashgan Oqjardagi paromda pattachilik qiladi.

Muqimiy bu vazifani tark etib, Qoʻqonga qaytadi. Moddiy muhtojlik Muqimiy oilasining buzilishiga olib keladi. Xotini oʻgʻlini onasiga tashlab, boshqa kishiga turmushga chiqadi. Shoir oʻz ota hovlisini tark etib, shu mahallada joylashgan Hazrat madrasasidan bir hujra oladi. Shu «hujrai tang va torlikda bekaslik va gʻariblik chirogʻini yoqib» muhtojlikda umr oʻtkazadi.

Muqimiy hayotini mutolaa va ijod qilishga bagʻishlaydi. Zamonasining yetuk xattotlaridan boʻlgan Muhammad Yusuf Xattotdan ta'lim olib, xushxat boʻlib yetishgan Muqimiyga xattotlik asosiy kasb va tirikchilik manbai boʻlib xizmat qiladi.

Bu davrga kelib Muqimiy oʻzining joʻshqin lirikasi va davrning hukmron ijtimoiy guruhlarini achchiq tanqid ostiga oluvchi hajviy asarlari, yumorlari bilan shuhrat qozonadi. Oʻz davri adabiy harakatining yetak-



chilaridan biriga aylanadi. Muqimiy Qoʻqonda Furqat, Zavqiy, Nisbat, Muhayyir, Gʻaribiy, Nasimiy, Mavlaviy va boshqa shoirlardan tashkil topgan adabiy guruhga boshchilik qiladi.

1885–86-yillarda shoirning otasi Mirzaxoʻja vafot etadi. Oilani boqish shoir zimmasiga tushadi. Muqimiyning ahvoli yanada mushkullashadi. Shoir bu ahvoldan qutulish yoʻllarini izlaydi. Shu sababdan boʻlsa kerak, 1887–88-yillarda Qoʻqonni tark etib Toshkentga boradi. 1892-yilning boshlarida shoir ikkinchi marta Toshkentga boradi. Muqimiy Toshkent safari vaqtida qarindosh-urugʻlarini topadi, doʻstlar orttiradi.

Muqimiy Toshkent safaridan keyin ham Farg'ona vodiysining shahar va qishloqlariga bir necha marta sayohat qiladi.

Muttasil davom etgan moddiy muhtojlik, kamsitish va ta'qiblar shoir sog'lig'iga ta'sir qilgan edi. 1898–99-yillarga kelib Muqimiy tez-tez kasalga chalinib, 4–5 oylab yotib qoladi va xastalik tufayli 1903-yilda, 53 yoshida, ayni ijodiy kamolotga yetgan paytda vafot etadi.

Muqimiydan boy ijodiy meros qolgan. Shoir, asosan, poeziya janrida ijod etgan boʻlsa-da, asarlari oʻzining tematikasi va badiiy-gʻoyaviy xusu-siyatlari jihatidan rang-barangdir. Muqimiydan bizgacha yetib kelgan merosning umumiy hajmi, hozircha, taxminan 10 ming misradan iboratdir.

Bolalar, bu hazilakam meros emas. Shu raqamlar ham shoirning barakali ijod qilganini koʻrsatadi. Ular lirik asarlar (gʻazal, muxammas, murabba, masnaviy, ruboiy, tuyuq, fard), hajviyot (satira, yumor), «Sayohatnoma»lar, maktublar (she'riy va prozaik shakllar)dan tashkil topgan.

Muqimiy lirikaning gʻazal, muxammas, murabba, masnaviy, ruboiy, tuyuq, fard kabi janrlarida barakali ijod qildi. Bu adabiy shakllarda qalam tebratib qolmay, uning takomiliga ham hissa qoʻshdi.

Muqimiy ijodiy merosi haqida gapirar ekanmiz, shoirning oʻz davrida muomalada boʻlgan barcha adabiy janrlarda qalam tebratgani ma'lum. Bolalar, agar yodingizda boʻlsa 5-sinfda hassos shoirning «Sayohatnoma»lari — yoʻl xotiralarini batafsil oʻrgangan edingiz. 6-sinfda Muqimiyni elga mashhur qilgan, uni oʻtkir hajvgoʻy sifatida tanitgan «Tanobchilar» satirik she'riy hikoyasi bilan yaqindan tanishamiz.



«Tanobchilar» satirik hikoyasi amaldorlar zulmiga yoʻliqqan dehqon arz-dodi bilan boshlanadi:

Bo'ldi taajjub qiziq hangomalar, Arz etayin emdi yozib nomalar.

Oʻn iki oyda keladur bir tanob, Oʻzgalara rohat-u menga azob.

Bechora dehqon amaldorlar zulmi tufayli oʻz boshiga tushgan kulfatazoblarni birma-bir hikoya qiladi. Asarda kambagʻal chorakor dehqon mehnatini suiiste'mol qilgan, ularni aldab katta zararga tushirgan Sulton Ali va Hakimjon kabi hiylakor mahalliy amaldorlar qiyofasi shoir tomonidan oʻtkir, ta'sirchan misralarda fosh etiladi. Siz quyida tanishadigan «Tanobchilar» satirik hikoyasi ana shular haqida.

TANOBCHILAR

Bo'ldi taajjub qiziq hangomalar, Arz¹ etayin emdi yozib nomalar.

Adl qulog'ila eshit holimi, Zulm qilur, baski, menga zolimi.

Oʻn iki oyda keladur bir tanob², Oʻzgalara rohat-u menga azob.

Sulton Ali Xoʻja, Hakimjon ikav, Biri xotun, birisi boʻldi kuyav.

Ikkalasi boʻldi chunon ittifoq, Goʻyo xayol aylaki, qilmay nifoq³.

³ Nifog - nizo, ikkiyuzlamalik.



¹ Adl - adolat.

² Tanob – arqon, o'lehov birligi.

Osh yesalar oʻrtada sarson ilik, Xoʻja – chirogʻ yogʻi, Hakimjon – pilik.

Bir-birisiga solishurlar oʻrun, Erta-yu kech oʻpushub ogʻiz-burun.

Sallalari boshlarida oq savat, Koʻrpacha tagda hamavaqt uch qavat.

Birlari moʻltoninamo, hiylagar, Birlaridur kunda pix-u¹ gavda xar².

Ogʻizlari maqtanib oʻnbesh qarish, Mayda suxan³, ezmachuruk, zanchalish.

Qaysiki qishloqqa tushar otidin, Elni yigʻib, voqif etar zotidin.

Derki: «Koʻzunga hali kal joʻjaman, Maxdumi a'zam⁴lik oʻzim xoʻjaman.

Bizga bobo hazrati Shohligʻ mazor⁵, Muxlisimiz mardumi ahli diyor.

Ham yana Erhubbi⁶ bo'lodur tag'o, Ammamizning erlaridur Nurato⁷.

⁷ Nurato – hozirgi Nurotada oʻtgan avliyo.



¹ Kunda pix – to'nkaday qo'pol.

² Gavda xar - eshak gavdali.

³ Suxan – so^{*}z.

⁴ Maxdumi A'zam - mashhur avliyo Abdulqodir G'iloniyning unvoni.

⁵ Shohligʻ mazor - Shohi Zinda maqbarasidagi azizlar koʻzda tutilmoqda.

⁶ Erhubbi - islomgacha boʻlgan davrdagi avliyo.

Bibi Ubayda¹ boʻladur xolamiz, Goh kelur erdi kichik bolamiz.

Xizr² otamlarga birodar erur, Chimligʻ azizlar³ menga dodar⁴ erur.

Garchiki men olim-u shayxi zamon, Qirqingiza emdi beray bir qozon.

Manki tanobinggʻa chiqibman kelib, Xizmatimi yaxshi qilinglar bilib.

O't qo'yubon kuyduradurg'on o'zim, Hokiming-u o'lduradurg'on o'zim.

Xoh tanobingni du chandon qilay, Xoh karam birla boshingni silay».

Xoʻja soʻzini munga bermay qaror, Mardumi sahroyi⁵ boʻlur beqaror.

Derki Hakimjoni: – «Ayo oqsoqol, Bizni topibsan magaramkim oʻsol⁶?

Hozir etib to'rt nafar mardikor, To'g'ri qil oldimg'a qilibon qator.



¹ Bibi Ubayda – avliyo ayollardan.

² Xizr - Qur'onda nomi tilga olingan payg'ambar.

³ Chimligʻ azizlar - Turkiston tomonlarda oʻtgan avliyolar.

⁴ Dodar - ini, uka.

⁵ Mardumi sahroyi - qishloq odami.

⁶ Bizni topibsan magaramkim oʻsol? – Bizni juda bechora odamlardan deb oʻyladingmi?

Arqonimi yeringa sudrab chiqay, Bachchataloq qishloqilarni uray.

Bir burayin moʻylabimni chiqib, Tort tanobini jazosi siqib!

Yaxshiligʻingni fuqaro bilmagay, Holi bular koʻzga bizi ilmagay.

Ikki tanobini qilay oʻn tanob, Yurtingizi kuydurub aylay xarob.

Xoh o'ling, xoh qoling, bachchag'ar», Debki, uzangiga ayog'in tirar.

Bir-biriga qishloq eli boqishib, Goh u yon, goh bu yon chopishib.

Jam bo'lishib, aylayubon maslahat: «Do'g'mag'a, – der, – bir nima berib jo'nat»!.

Aqcha qoʻlida iki-uch moʻysafid, Derki: «Bu nazringiz-u, bizlar murid».

Zulm bilan ellig-u yuzni olur, Boz tanobini duchandon solur.

Tagʻi bular yaxshi-yu, bizlar yomon, El tamizidin² hazar et, alamon³...

Soʻzni, Muqimiy, kerak etmak tamom, Mazzasi qolmas uzun oʻlsa kalom.

³ Alamon – xonavayron, xarob. Misraning umumiy ma'nosi: Elning toza zotlaridan ehtiyot lozim, ey xonavayron bo'lganlar.



¹ Do'g'mag'a, - der, - bir nima berib jo'nat misrasining mazmuni: Amaldorlarga biror narsa berib jo'natish lozim.

² Tamiz – toza, ulugʻ, asl.


Savol va topshiriqlar

- 1. Muqimiy hayoti va ijodi haqida nimalar bilasiz? Gapirib bering.
- 2. Muqimiy adabiy merosi qaysi janrlardan tashkil topgan? Ularning miqdori qancha misrani tashkil etadi?
- 3. Muqimiy ijodini tadqiq etdan olimlardan kimlarni bilasiz?
- 4. «Tanobchilar» asarida qanday voqealar hikoya qilinadi?
- 5. Asardagi amaldorlarning kirdikorlarini nimalarda koʻrasiz?
- 6. Asardan amaldorlarning hiylakorligi, maqtanchoqligi, «erta-yu kech ogʻiz-burun oʻpishish»lari aks etgan misralarni sharhlang.
- 7. Tanobchi amaldorlar oʻz nasl-nasablari bilan maqtanishlari zamirida qanday maqsad yotganini tushuntiring.
- 8. Ushbu bandlarni sharhlang:

Zulm birla ellig-u yuzni olur, Boz tanobini duchandon solur.

Tagʻi bular yaxshi-yu, bizlar yomon, El tamizidin hazar et, alamon.

«Tanobchilar» satirik she'riy hikoyasidan olgan taassurotlaringizni yozma bayon qiling.





Milliy oʻzbek nasrining zabardast vakillaridan biri yozuvchi Abdulla Qahhor 1907-yilning 17-sentabrida Qoʻqon shahridan uncha uzoq boʻlmagan Asht qishlogʻida dunyoga kelgan. Uning otasi usta Abduqahhor temirchilik bilan shugʻullanardi. Ustaning oilasida garchi juda koʻp farzand tugʻilgan boʻlsa-da, ular orasidan faqat Abdullajongina yashab qolib, qolgan bolalar goʻdaklik chogʻlaridayoq turli sabablarga koʻra nobud boʻlishadi. Abdullajon tugʻilgan davrini tasavvur qilar ekansiz, avvalgi darslarda oʻtgan Gʻafur Gʻulom mavzusi, oʻsha ijodkor, ayniqsa, uning Shum bolasi taqdiri darrov yodingizga tushgan boʻlsa, ajab emas. Toʻgʻri sezdingiz — Abdulla Qahhorning bolalik yillari ham boshqa tengdosh yozuvchi-shoirlarniki singari juda ogʻir kechgandi. Yana bir oʻzbek shoiri Hamid Olimjon oʻsha yillarni eslab:

Men bir qora kunda tugʻildim, Tugʻildim-u, shu on boʻgʻildim, —

deyishi bejiz emas edi. Zero, oʻsha yillardagi Turkiston oʻlkasi nihoyatda ogʻir ijtimoiy-iqtisodiy, siyosiy-ma'naviy tanglikni boshdan kechirardi. Abdulla Qahhor endigina yetti yoshga kirganida boshlangan Birinchi jahon urushi esa bu ahvolni yanada ogʻirlashtirgandi.

Usta Abduqahhor tirikchilik uchun pul topish ilinjida Qoʻqon atro-

fidagi qishloq-kentlarga ustaxonasini koʻchirib borar, oila ham uning ortidan sarson-sargardon sudralib yurardi. Bir qishloqda yarim yil turilsa, boshqa birida ikki oyga yetar-yetmas temirchi usta qiladigan ishlarning tagi koʻrinib qolardi. Yana koʻch-koʻronni koʻtarib yoʻlga chiqilar, qayerga borilsa, birovlarning uyi yoki tashlandiq hovlisida sigʻindi boʻlib yashashga toʻgʻri kelardi. Bularning bari Abdullajonning – boʻlgʻuvsi yozuvchining ruhiyatiga, dunyoqarashi va xarakteriga ta'sir qilmasligi mumkin emas edi, albatta. Agar A.Qahhorning «Sarob» romani (uning 1937-yildagi 1-nashridan oʻrin olgan temirchining oʻgʻli Sarimsoq tarixi), «Oʻtmishdan ertaklar» (yozuvchi bolaligi toʻgʻrisida batafsil hikoya qilingan avtobiografik asar) qissasi, oʻtmish hodisalari yoritilgan oʻnlab hikoyalariga nazar solsak, bu ta'sirning qanchalar kuchli boʻlganini koʻramiz. Mazkur asarlarida yozuvchi oʻsha kunlarni quyuq boʻyoqlarda – xalq taqdiridagi eng ogʻir kunlar sifatida tasvirlaydi.

Abdullajonning savodi oʻsha qishloqlardagi eski maktablarda chiqqan boʻlsa-da, ota-onasi Qoʻqonga koʻchib kelib, muqim oʻrnashgandan keyingina u chinakam maktab ta'limini oladi. Avvaliga shahardagi sobiq xotin-qizlar gimnaziyasi oʻrnida tashkil qilingan internatda, keyin esa (1922–1924-yillari) oʻqituvchilar tayyorlanadigan texnikumda oʻqiydi.

U yillari savodli, qoʻlida qalami bor yosh kadrlarga talab nihoyatda katta edi. Shu tufayli ham A.Qahhor Turkiston oʻlkasining markazi — Toshkentga keladi va «Qizil Oʻzbekiston» (hozirgi «Oʻzbekiston ovozi») gazetasiga adabiy xodim boʻlib ishga joylashadi. 1926—1930-yillar oraligʻida Oʻrta Osiyo davlat universiteti (hozirgi Oʻzbekiston Milliy universiteti) ning pedagogika fakultetida oʻqiydi. Oʻqib yurgan kezlari «Mushtum» jurnalida, koʻplab gazetalarda uning oʻnlab felyetonlari, hikoya va hajviyalari ketma-ket chop etiladi. Yozuvchi bu asarlar ostiga Norin shilpiq, Sarimsoq singari taxalluslar qoʻyardi.

Yosh yozuvchi tez orada yirik janrlarga ham dadil qoʻl uradi. Agar «Qishloq hukm ostida» nomli dastlabki qissasi 1932-yilda chop etilgan boʻlsa, 1934-yilda u «Sarob» deb atalgan yirik romanini yozib tugatadi. 1935–1939-yillar

oraligʻida adibning uchta «Hikoyalar» toʻplami, 1937-yilning oxirida esa «Sarob» romani oʻquvchilarga kitob shaklida taqdim etiladi.

1941–1945-yillarda boʻlib oʻtgan Ikkinchi jahon urushi Abdulla Qahhor ijodida ham oʻz izini qoldirmay qoʻymadi. Oʻsha yillari adib fashist gazandalarini la'natlagan qator felyetonlar, urushda mardlik namunalarini koʻrsatayotgan oʻzbek jangchilarini madh etgan maqolalar, urush ortida zahmatli mehnat qilayotgan qariyalar va ayollar toʻgʻrisidagi oʻnlab hikoyalarini bitdi.

Urushdan keyin — 1949-yilda A. Qahhor qishloq xoʻjaligini jamoalashtirish (kolxozlashtirish) mavzusi yoritilgan «Qoʻshchinor» nomli romanini yozib, e'lon qiladi. Biroq matbuotda, Yozuvchilar uyushmasida va boshqa joylarda bildirilgan nooʻrin tanqidiy gaplar tufayli bu asar jiddiy qayta ishlanadi va «Qoʻshchinor chiroqlari» nomi bilan 1951-yilda boshqatdan chop etiladi.

Abdulla Qahhor milliy teatr san'atimiz rivojiga ham jiddiy hissa qoʻshgan ijodkor sanaladi. Uning «Shohi soʻzana» (1951-y.), «Ogʻriq tishlar» (1954-y.), «Tobutdan tovush» (1962-y.), «Ayajonlarim» (1967-y.) singari komediyalari oʻz davri tomoshabinlarining sevimli asarlariga aylangan edi. Xuddi shuningdek, adibning «Sinchalak», «Oʻtmishdan ertaklar», «Muhabbat», «Zilzila» (tugallanmagan) qissalari zamonaviy qissachilik rivojiga sezilarli ta'sir koʻrsatdi.

Abdulla Qahhorning qator hikoyalari, hajviy asarlari, «Sinchalak» qissasi, «Qoʻshchinor chiroqlari» romani asosida telespektakllar, video va badiiy filmlar suratga olingan.

Abdulla Qahhor 1968-yilning 25-may kuni vafot etdi va Toshkent-dagi Chigʻatoy qabristoniga dafn qilindi. Poytaxtimizda adib yashab ijod etgan maskan bugungi kunda «Abdulla Qahhor uy-muzeyi»ga aylantirilgan.

Oʻzbek adabiyoti va madaniyati rivojiga qoʻshgan ulkan hissasi uchun Abdulla Qahhor «Oʻzbekiston xalq yozuvchisi» unvoniga, mustaqillik davrida esa «Buyuk xizmatlari uchun» ordeniga munosib topilgan.

BEMOR

(hikoya)

«Osmon yiroq, yer qattiq» (Maqol)

Sotiboldining xotini ogʻrib qoldi. Sotiboldi kasalni oʻqitdi – boʻlmadi, tabibga koʻrsatdi. Tabib qon oldi. Betobning koʻzi tinib, boshi aylanadigan boʻlib qoldi. Baxshi oʻqidi. Allaqanday bir xotin kelib tolning xipchini bilan savaladi, tovuq soʻyib qonladi... Bularning hammasi, albatta, pul bilan boʻladi. Bunday vaqtlarda yoʻgʻon choʻziladi, ingichka uziladi.

Shaharda bitta doktorxona bor. Bu doktorxona toʻgʻrisida Sotiboldining bilgani shu: salqin, tinch parkda, daraxtlar ichiga koʻmilgan baland va chiroyli imorat; shisha qabzali kulrang eshigida qoʻngʻiroq tugmasi bor. Chigit poʻchoq va kunjara bilan savdo qiladigan xoʻjayini Abdugʻaniboy omborda qulab ketgan qoplar ostida qolib oʻladigan boʻlganida bu doktorxonaga bormay Simga ketgan edi. Doktorxona deganda Sotiboldining koʻz oldiga izvosh va oq podshoning surati solingan 25 soʻmlik pul kelar edi.

Bemor ogʻirlashdi. Sotiboldi xoʻjayinining oldiga arzga bordi, ammo bu borishdan muddaosi nima ekanini aniq bilmas edi. Abdugʻaniboy uning soʻzini eshitib koʻp afsuslandi, qoʻlidan kelsa hozir uning xotinini oyoqqa bostirib berishga tayyor ekanini bildirdi, keyin soʻradi:

– Devonai Bahouddinga hech narsa koʻtardingmi? Gʻavsula'zamga-chi? Sotiboldi ketdi. Bemorning oldidan jilmaslik va shu bilan birga tirikchilik uchun xonaki bir kasb qilishga majbur boʻldi – har xil savatchalar toʻqishni oʻrgandi. U ertadan kechgacha oftobshuvoqda gavronlar ichida koʻmilib savat toʻqirdi. Toʻrt yashar qizchasi qoʻliga roʻmolcha olib, onasining yuzini karaxt, xira pashshalardan qoʻriydi; ba'zan qoʻlida roʻmolcha, mukka tushib uxlab qoladi. Hammayoq jim. Faqat pashsha gʻingʻillaydi, bemor inqillaydi; har zamon yaqin-yiroqdan gadoy tovushi eshitiladi: «Hey doʻst, shaydullo, ba nomi ollo, sadaqa raddi balo, baqavli rasuli xudo...»

Bir kechasi bemor juda azob tortdi. U har ingraganda Sotiboldi chakkasiga burov solingan kishiday talvasaga tushar edi. Qoʻshnisi — bir kampirni chaqirdi. Kampir bemorning toʻzigan sochlarini tuzatdi, u yoqbu yogʻini siladi, soʻngra... oʻtirib yigʻladi. Begunoh goʻdakning saharda qilgan duosi ijobat boʻladi, uygʻoting qizingizni!
 dedi.

Bola anchagacha uyqu gʻashligi bilan yigʻladi, keyin otasining gʻazabidan, onasining ahvolidan qoʻrqib, kampir oʻrgatganicha duo qildi:

- Xudoyo ayamdi daydiga davo beygin...

Bemor kundan-kun battar, oxiri oʻsal boʻldi. «Koʻngilga armon boʻlmasin» deb, «chilyosin» ham qildirishga toʻgʻri keldi. Sotiboldi toʻqigan savatchalarini ulgurji oladigan baqqoldan yigirma tanga qarz koʻtardi. «Chilyosin»dan bemor tetik chiqqanday boʻldi; shu kechasi hatto koʻzini ochib, qizchasini yoniga tortdi va pichirladi:

Xudo qizimning saharlari qilgan duosini dargohiga qabul qildi.
 Dadasi, endi tuzukman, qizimni saharlari uygʻotmang.

Yana koʻzini yumdi, shu yumgancha qaytib ochmadi — saharga borib uzildi. Sotiboldi qizchasini oʻlik yonidan olib, boshqa yoqqa yotqizayotganda, qizcha uygʻondi va koʻzini ochmasdan odatdagicha duo qildi:

- Xudoyo ayamdi daydiga davo beygin...

(1936-yil)

Mana, anchagina hazin hikoyani ham oʻqidik. Harqalay, hayotdan erta koʻz yumgan onaga, uning eri Sotiboldiga, murgʻak qiziga yuragingiz achigan boʻlsa kerak? Shu achinish barobarida oʻnlab savollar Sizga tinchlik bermayotgandir ham:

Nega shunday bo'ldi?

Sotiboldining xotini oʻzi nima kasal bilan ogʻrigan edi?

Nahotki, bu kasalning davosi bo'lmasa?

Nega Sotiboldi xotinini koʻrsatgani doʻxtirga olib bormadi?

Bu qanaqa tabibki, ayolning qanday kasal bilan ogʻriganini aniq bilmay turib, undan qon oladi?

Baxshi kelib, kasal xotinning ustida nimalarni o'qidi? Nega o'qidi?

Axir kasal xotinni, kelib-kelib, tolning xipchini bilan savalashadimi?

Tovuq soʻyib, qonini oqizish bilan ayolga tekkan dardning oʻrtasida nima aloqa bor?

Sotiboldining xoʻjayini Abdugʻaniboy qanaqa odam oʻzi? Imkoniyati boʻla turib, nimaga bir insonga yordam bermadi?..



Bunday savollarni yana koʻplab keltirish mumkin.

Zamonni qarangki, kichik bir hikoyaga jo bo'lgan birgina hayot man-

lay band qilib olgan, millat «tanasidan qon oldirgan bemor» (Hamza Hakimzoda Niyoziy iborasi) holiga tushgan edi.

Hikoyaning mazmun-mohiyati, ta'sir kuchi hali bu bilan ham tugamaydi. Oʻlayotgan xotini uchun biror najot yoʻlini topa olmagan Sotiboldi qoʻshni kampirning maslahati bilan endi toʻrt yashar qizchasining saharlab turib, uyqusiragan holda qiladigan duosiga umidvor boʻladi. Qarang, butun boshli jamiyat bor – doktorxona bor, tabib bor, baxshi bor, qoʻlida pul oʻynagan boylar bor, har qanday mehnat boʻlsa qilishga rozi Sotiboldi bor...biroq najot yoʻq! Bor-yoʻq umid – shu toʻrt yasharlik qizaloqning ojiz duosi.

Demak...

Demak, BEMOR faqat Sotiboldining xotini emas ekan-da! Butun jamiyat bemor – xasta, najotga zor, tuzalishga muhtoj ekan-da!

Xuddi shu haqiqatni teran anglaganlari tufayli ham Munavvarqori Abdurashidxonov, Fitrat, Choʻlpon, Abdulla Avloniy singari bizning yuzlab jadid bobolarimiz el-u yurt dardini yengillatish, uni ma'rifatga oshno etish, ilm-u madaniyatini yuksaltirish, oxir-oqibat mamlakatni istiqlolga olib chiqish uchun kurashdilar, shu yoʻlda qurbon boʻldilar.

Abdulla Qahhorning bor-yoʻgʻi bir sahifaga jo boʻlgan hikoyasi Siz bilan bizni shuncha mulohazaga oshno etdi. Holbuki, bu mulohazalarni yana davom ettirish, hikoya mazmun-mohiyatiga yanada chuqurroq kirib borish ham mumkin. Bu bilan esa yozuvchining badiiy olami sirlari koʻz oldimizda yaqqol namoyon boʻladi. Adibning moʻjaz hikoyalar bagʻriga olam-olam mazmun sigʻdira bilish, har bir soʻz, jumla ustiga chuqur fikr yuklash mahoratiga tan beramiz.

Quyida berilayotgan savol-topshiriqlar orqali Siz mana shu mahoratni oʻzingiz uchun kashf etishga harakat qilasiz, degan umiddamiz.

Savol va topshiriqlar

- Abdulla Qahhor hayoti va ijodiga xos boʻlgan asosiy jihatlarni esda saqlab qolishga urining.
- 2. «Bemor» hikoyasi orqali yozuvchi aks ettirgan hayot haqiqati nimalardan iborat edi?
- 3. Sotiboldi shahardagi yakka-yu yagona doktorxona ichiga kirganmi-kirmaganmi? Qayerdan bildingiz?

- 4. Sotiboldining xoʻjayini Abdugʻaniboy nega shu kasalxonada emas, Simdagi kasalxonada davolanganini oʻylab koʻring-chi.
- 5. Sotiboldining «toʻrt yashar qizchasi qoʻliga roʻmolcha olib, onasining yuzini karaxt, xira pashshalardan» qoʻrishi hikoyaning umumiy ruhiga mos ekanini isbotlang.
- 6. Bemor yotgan xonadonga boshqa tovush emas, aynan gadolarning tovushi eshitilishi bilan nimaga urgʻu berilyapti?
- 7. Bemorga qaragani chiqqan qoʻshni kampirning oʻtirib yigʻlashiga sabab nima?
- 8. Kasal odamga «chilyosin» qildirish nima ekanini uyingizdagi kattalardan yaxshilab bilib oling.
- 9. «Chilyosindan bemor tetik chiqqanday» boʻlishi bilan shamning yonib tugashi oʻrtasida qanday oʻxshashlik koʻrasiz?
- 10. «Bemor» hikoyasi toʻgʻrisida uy inshosi yozib, sinfda oʻqib bering.

Nazariy ma'lumot

BADIIY ASAR TILI

Til bilan bogʻliq uchta tushunchani aralashtirib yubormaslik, ularni oʻzaro farqlash lozim. Bular:

- 1. Umumxalq tili (milliy til).
- 2. Adabiy til.
- 3. Badiiy til.

Umumxalq tili (milliy til) deganda yurtimizdagi oʻzbek tilida soʻzla-shuvchilarning barchasi — ularning yashash hududi, qaysi ijtimoiy tabaqaga mansubligi, hayotda bajarayotgan mashgʻulot turi va boshqalaridan qat'i nazar, foydalanadigan til tushuniladi.

Adabiy til deganda umumxalq tilining leksik, grammatik, imlo va talaffuz jihatdan me'yorlashtirilgan shaklini tushunamiz.

Badiiy til esa, bir tomondan, umumxalq tili va adabiy tilga tayanadigan, boshqa jihatdan esa ularning har ikkisidan farqlanib turadigan alohida san'at hodisasidir. Badiiy tilning mavjudligi ijodkor shoir-yozuvchilar faoliyati bilan chambarchas bogʻliqdir. Shu ma'noda badiiy til oʻz zamirida milliy adabiyotimizning asrlar osha shakllanib kelgan an'analarini (an'anaviy sifatlashlar, ramz va majozlar, oʻxshatish va boshqalarni) saqlab



qolgan. Ayni paytda har bir iste'dodli ijodkor badiiy til imkoniyatlari doirasini kengaytirishi, bu tilning yanada joziba kashf etishini ta'minlashi mumkin. Bu jarayonda adabiy til qonun-qoidalaridan chekinishga, umumxalq tili boyliklariga dadil murojaat qilishga to'g'ri keladi. Siz bu narsaga kelgusi darslarda o'rganiladigan qator asarlar, jumladan, «Qisasi Rabg'uziy», Gulxaniyning «Zarbulmasal», Tog'ay Murodning «Yulduzlar mangu yonadi» asarlari mutolaasida yana bir bor guvoh bo'lasiz.

Modomiki, adabiyot insonni, uning shakl-u shamovilini, o'ta murakkab ruhiy olamini tasvirlar ekan, bunda o'sha obyekt – insonga yondashuy turli usullarni talab qiladi. Chunki dunyoda bir-birini har jihatdan to'liq takrorlaydigan ikki kishini hech qachon topib bo'lmaydi. Demak, har bir qahramon oʻziga oʻzgacha yondashuvni talab qiladi, har birining yuragi alohida kalit bilan «ochiladi». Bu kalit – uning kayfiyati, fe'l-atvori, nutqi, axlogi, dunyoqarashi singari o'nlab unsurlarning betakror tasviri tufayligina ishga tushadi. Shundagina o'quvchi ko'z oldida qahramon xuddi tirikdek harakat qiladi, gapiradi, kuladi, o'ylanadi, iztirob chekadi, shodlanadi va ... oʻladi. Qahramonning har bir harakati oʻquvchiga ham «yuqadi», uni o'z olamiga «olib kirib ketadi». Demak, qahramon oʻquvchini oʻziga ishontirishi uchun xuddi uningdek jonli soʻzlashishi, fikrlashi lozim ekan, yozuvchi xalq tilidagi shevaga xos soʻzlardan ham: agar qahramon tarixiy shaxs obrazi bo'lsa, qadimiy yoki unutilgan so'zlardan ham; hatto bir guruh odamlargina tushunadigan jargonlardan ham foydalanishiga toʻgʻri keladi. Qahramonning ruhiy holatlarini ifodalash uchun esa dialoglarning turli shakllari, hatto sukut holati ham «ishga solinadi».

Agar e'tibor bersak, kundalik soʻzlashuvimizda ishlatiladigan til ham, badiiy til ham, oxir-oqibat, axborot yetkazish va axborot olishga xizmat qiladi. Soʻzlashuv tili yetkazayotgan axborot oddiy axborot boʻlsa, badiiy til badiiy axborotni yetkazadi, ijodkor va oʻquvchi orasida badiiy muloqotning vujudga kelishini ta'minlaydi. Abdulla Qahhor oʻzining moʻjazgina «Bemor» hikoyasi orqali biz bilan oʻtkazgan badiiy muloqoti oʻzining ta'sir kuchini oʻn yillar davomida saqlab qolishi badiiy til naqadar qudratli hodisa ekanining yaqqol isbotidir.





Hozirgi zamon jahon adabiyotining yirik vakili, qardosh qirgʻiz xalqining yuksak iste'dodli farzandi Chingiz Aytmatov 1928-yilning 12dekabrida Qirgʻizistonning Talas vodiysida joylashgan Shakar qishlogʻida tavallud topgan. Bolaligidan uning boshiga hayotning shafqatsiz zarbasi tushadi. Otasi Toʻraqul Aytmatov shoʻro davrida oʻtkazilgan mash'um qatagʻon qurboni boʻladi (1937-yil).

Aziz oʻquvchi, endi Siz, albatta, bilishingiz kerak boʻlgan bir tarixiy haqiqatga biroz toʻxtalib oʻtamiz. Chunki «shoʻro (sovet) davri», «qatagʻon», «qizil imperiya» degan soʻzlarni eshitgansiz-u, biroq ularning mazmun-mohiyatini toʻla anglamagan boʻlishingiz mumkin. Busiz esa adabiyot darsligingizga kirgan juda koʻp asarlarni ham, ularning yozilish tarixi va mualliflari qismatini ham toʻla tushunish qiyin boʻladi.

Oʻtgan asrning boshlarida — 1917-yilda Yer yuzining oltidan bir qismini egallagan Rossiya imperiyasida davlat toʻntarishi yuz berdi. Bu zoʻravonlikni oʻzlarini «sovetlar» (shoʻro), «bolsheviklar» deb atagan, savodsiz aholining bir qismini turli va'dalar berish orqali aldab, oʻz tomoniga ogʻdirishga erishgan Vladimir Ulyanov (laqabi Lenin) boshchiligidagi kimsalar amalga oshiradilar. Ular odamlarni «boylar» va «kambagʻallar» deya guruhlarga ajratib, ularni bir-biriga qarama-qarshi qoʻyadilar va oraga keskin nizolar solishadi. Shu tariqa uzoq (1918–1930-yillar) davom etgan birodarkushlik urushiga sababchi boʻladilar. Bundan

tashqari shoʻrolar hukumati davlatni toʻla qoʻlga kiritib, unga SSSR deb nom berishgach (1922-yilda), oʻz hokimiyatlarini saqlab qolish ilinjida mustaqil fikrga ega, erkparvar kishilarni doimiy ta'qib ostiga oladilar. Koʻplab millatlarning millionlab asl farzandlarini ommaviy qirgʻin qilishni uzoq yillar (1991-yilda SSSR tarkibidagi aksariyat milliy respublikalar oʻz mustaqilliklariga erishgunga qadar) davom ettirib, haqiqiy qatli om – qatagʻonni amalga oshiradilar. Bu yovuz siyosat bizning xalqimiz boshiga ham ogʻir kulfatlarni solgan. Agar poytaxtimiz Toshkentning «Shahidlar xotirasi maydoni»dagi «Qatagʻon qurbonlari» muzeyiga borsangiz, bu koʻrgiliklar toʻgʻrisida batafsil bilib olasiz.

Demak, Chingiz Aytmatovning davlat idoralarida xizmat qilgan otasini ham mana shu qatagʻon olovi oʻz domiga tortib ketgan edi. Bu ayriliq alami yosh Chingizni hayotga chuqur mushohada bilan qarashga, oʻzgalar dardi bilan yashashga oʻrgatadi. Qolaversa, hozirga qadar yaratgan deyarli barcha asarlarida yozuvchi mana shu dardni – insoniyat boshiga tushgan alamli kunlarni badiiy qayta jonlantirgan.

Ch. Aytmatov avval Qirgʻiziston qishloq xoʻjaligi institutida, 1956—1958-yillarda esa Moskvadagi Oliy Adabiyot kursida tahsil oldi. Uning ona tili qirgʻizcha bilan rus tilida ham birdek ijod qila olishi asarlarining erta e'tiborga tushishiga turtki boʻldi. Agar yozuvchi oʻzining dastlabki hikoyalarini 1950-yillarda yoza boshlagan boʻlsa, 1957-yilda e'lon qilingan «Yuzma-yuz» nomli qissasi adabiyot ixlosmandlarining jiddiy e'tiborini tortdi. Shundan soʻng adibning «Jamila», «Sarvqomat dilbarim», «Momo yer», «Somon yoʻli», «Alvido, ey Gulsari» nomli qissalari ketmaket chop etildi va butun dunyoda juda katta qiziqish bilan kutib olindi. 1970-yilda yozilgan «Oq kema» qissasidagi achchiq insoniy taqdirlar talqini, 1977-yilda yaratilgan «Dengiz yoqalab chopayotgan olapar» qissasida esa shoʻro davlatining ayanchli tarixi yaxlit holda ochib berilgani adabiyot olamida jiddiy yangilik boʻldi.

Hikoya va qissalar yozish orqali katta ijodiy tajriba toʻplagan Ch. Aytmatov 1980-yilda oʻzining dastlabki romani «Asrga tatigulik kun»ni, 1986-yilda «Qiyomat», 1990-yilda esa «Kassandra tamgʻasi» nomli romanlarini

e'lon qildi. Bu asarlarida yozuvchi endi bir mamlakat, bir xalq qismati haqidagina emas, balki butun insoniyat taqdiri to'g'risida kuyinib yozdi.

Tabiiyki, Siz bilan bizda ayni romanlarning barchasiga, ularda aks ettirilgan hodisalar talqiniga batafsil toʻxtalish imkoniyati yoʻq. Biroq, tomchida quyosh aks etganidek, yozuvchining «Qiyomat» romanidan olingan kichik bir parcha orqali adib ijodining muhim qirralari haqida bilib olishimiz mumkin.

OLTOVLON VA YETTINCHI

(«Qiyomat» romanidan)

Bu lavha «Oltovlon va yettinchi» deb nomlangan hikoya boʻlib, undagi hodisalar oʻtgan asrning 20-yillarida, shoʻrolar hukumati aybi bilan birodarkushlik urushi olovida qolgan Gruziyaning togʻli hududlarida boʻlib oʻtadi.

Hamma xalqlar singari gruzin xalqi ham bir bosqinchi — Rossiya imperiyasidan qutulib, ikkinchi bir bosqinchi — shoʻrolar hukumatiga tobe boʻlishni xohlamas edi. Biroq, ayyor shoʻrolar kuchli targʻibot bilan xalqni ikkiga ajratib tashlagan, biz — oʻzbeklar iborasi bilan aytganda, «boltaning sopini oʻzidan chiqargan edi». Bir tomonda yangi hukumatning puch va'dalariga ishonib, unga xizmat qilayotgan gruzin Sandro boʻlsa, ikkinchi tomonda boshqa bir gruzin oʻgʻloni, yilqiboqar Guram Joʻxadze boshliq chin yurtparvar yigitlar. Eng yomoni shundaki, Sandro shoʻrolar oʻtkazgan qatagʻon siyosatining ijrochisi boʻlgan CHK (chrezvichaynaya komissiya — favqulodda komissiya)ning a'zosi (chekist) hisoblanib, u Guram Joʻxadze otryadiga pinhona kirib olgan. Joʻxadze va uning yigitlari oʻzlariga dushman tomonning odami boʻlgan Sandroning asl niyatini bilmaydilar.

Kunlarning birida Sandro Guram Joʻxadze toʻdasini chekistlar qoʻygan pistirmaga ustalik bilan roʻpara qiladi. Qattiq olishuvdan keyin Joʻxadze besh yigiti bilan pistirmani yorib chiqishga erishadi, qolgan yigitlari qurbon boʻladi. Niyatiga yetolmagan, shoʻrolar topshirigʻini oxirigacha ba-

jarolmagan Sandro ham darhol yettinchi sifatida yana to'daga qo'shilib oladi.

Guram Joʻxadze boshliq yigitlar kun kech boʻlayotganda qoʻshni Turkiya chegarasiga yaqin xilvat oʻrmonda toʻxtaydilar.

«Shom tushganda oltovlon va yettinchi bir joyga toʻplandilar. Oʻrmonning chekka yoqasida oʻt yoqdilar, yerga qalin dasturxon toʻshab, unga Guram Joʻxadzening sodiq odamlari berib yuborgan non, tuz, vino va boshqa taomlarni qoʻydilar. Gulxan alangasi osmonga oʻrladi. Yettovlon oʻtga yaqinroq keldilar.


- Hamma otlar egarlandimi? Hamma doʻstlar uzangiga oyoq qoʻyishga shaymi? - soʻradi Guram Joʻxadze.

Hamma tasdiqlab bosh silkidi.

- Hey, Sandro, dedi Guram Joʻxadze, yaxshi oʻtin yigʻib kelibsan, nega oʻtinlaringni gulxandan uzoqqa qoʻyding?
- Tashvish qilma, Guram, bu mening ishim, gulxanga men qarab turaman. Sen aytaringni ayt.

Shunda Guram Jo'xadze aytdi:

- Birodarlarim! Biz ishimizni boy berib qo'ydik. Ikki taraf urushganda kimdir yengib chiqadi. Boshqasi magʻlub boʻladi. Urush degani shu. Biz qon to'kdik. Bizning qonimizni to'kishdi. U tarafdan ham, bu tarafdan ham koʻp asl oʻgʻlonlarning boshlari ketdi. Boʻlganicha boʻldi. Halok boʻlgan doʻstlarimdan va gʻanimlarimdan uzr-ma'zur soʻrayman. Jangda o'lgan g'anim – g'anim emas. Oyog'im uzangida turganda ham, bari bir men halok bo'lganlardan kechirim so'rar edim. Lekin qismat bizdan yuzini o'girdi. Shuning uchun ham xalqning ko'pchiligi bizga ishonmay qoʻydi. Hatto bizni yoʻrgaklab voyaga yetkazgan jonajon yerimiz ham bizni sigʻdirmayapti. Bizga joy yoʻq bu yerda. Bizga afv ham yo'q. Xudo shohid, agar men g'alaba qilsam, dushmanlarni omon qo'ymasdim. Bizga birdan-bir yoʻl qoldi. Boshimizni olib begona yurtlarga ketamiz... Biz yetti kishi qolibmiz. Koʻp oʻtmay hammamiz har yoqqa, begona yurtlarga tarqalib ketamiz. Peshonada borini koʻramiz. Boshqa hech qachon koʻrishmaymiz. Bir-birimizni oxirgi marta koʻrib turibmiz. Oxirgi marta bir-birimizning soʻzlarimizni eshityapmiz. Kelinglar, bir-





birimiz bilan xayrlashaylik, ona-Yerimiz bilan xayrlashaylik, gruzinning non-tuzi bilan xayrlashaylik, vinosi bilan xayrlashaylik. Bunday vino boshqa hech yerda yoʻq. Vidolashgach, har kim oʻz yoʻliga ketadi. Biz oʻzimiz bilan tariqcha narsa olganimiz yoʻq. Vatanni olib ketib boʻlmaydi. Faqat sogʻinch va armonlarimizni olib ketamiz. Agar Vatanni xurjun kabi olib yurish va tashib ketish mumkin boʻlganda, u sariq chaqaga ham arzimasdi. Kelinglar, yoʻlimiz oldidan ichaylik, yoʻl oldidan qoʻshiqlarimizni aytaylik...

Yettovlonning, toʻgʻrirogʻi, oltovlon va yettinchining xayrlashuv qoʻshigʻi ana shunday boshlandi. Biroq yettinchi oʻz zimmasidagi topshiriqni bir zum boʻlsin unutmasdi. Ularning hech qaysilari va ayniqsa, Guram Joʻxadze oʻz jazosini olmasdan chet ellarga chiqib ketmasligi kerak edi. Chekist bunga aslo yoʻl qoʻyolmasdi. Shunday buyruq olgandi. U buyruqni bajarishi kerak edi.

Qoʻshiqqa yangi qoʻshiq ulanar, vino ichilar va ichilgan sayin yana koʻproq ichilgisi kelar, yurak ham shunga monand alanga olib yonar, yongan sayin yana mayga tashna boʻlar, yana qoʻshiq toshardi.

Ular davra yasab turishar, ba'zan qo'llarini bir-birlarining yelkalariga tashlashar, ba'zan qamchiday yerga solintirishar, ba'zan esa, bilib bo'lmas va ko'rib bo'lmas, lekin har narsani biluvchi va har nimani ko'ruvchi ilohiy qudrat eshitsin debmi, qo'llarini osmonga ko'tarar edilar. Agar Yaratgan hammasini ko'rib turgan va bilib turgan bo'lsa, nega unda ularni o'z ona-Yerlaridan quvg'in qilmoqda, bu qanday bo'ldi axir? Nega axir bunday, nega axir odamlar bir-birlari bilan urushadilar, qon to'kadilar, ko'zyoshlarni daryo qilib oqizadilar, hammalari o'zlarini haq, boshqalarni nohaq deb hisoblaydilar, qani axir haqiqat, kim haqiqatni aytadi, kim? Qani ularni adolat bilan ajrim qiluvchi nabiy?..

Xalq xotirasida saqlanib qolgan oʻsha qadim qoʻshiqlarda olis-olis zamonlarda roʻy berib oʻtgan azob-uqubatlar, yaxshilik va yomonliklarning azaliy tajribalari, ularga ota-bobolarning bagʻishlagan ma'nolari, ular orqali his qilingan goʻzallik va abadiyat aks etmasmidi, shular haqida emasmidi oʻsha qoʻshiqlar? Shuning uchun yettovlon bir qoʻshiq tugar-tugamas boshqasini ulab yuborar va qoʻshiqlarning halqasi sira uzilmasdi. Faqat

Sandrogina vaqt-vaqti bilan davradan chiqib, oʻtin keltirib, yana gulxanga qalardi. Bekorga u shuncha quruq oʻtin yigʻmagan ekan oʻrmonda (hayotda har bir narsaning oʻz bahonai sababi boʻladi), mana endi, olovga oʻzi zoʻr berib oʻtiribdi. Qoʻshiqlarni ham u barcha qatori chin yurakdan aytar — axir qoʻshiq hammaga bab-baravar tegishli emasmi? Boshqalar aytishi man etilgan, faqat podshohlarning oʻzlari aytadigan qoʻshiqlar yoʻq. Qoʻshiq ayt, quvna, yayra, dard chek va yigʻla, oʻynab qol bu tiriklik ayvonida...

Kimni titrab-qaltirab kutgan eding, kim seni tashlab ketdi, qanchalar oʻrtanding, kuyding, seni tushunmadilar, bundan koʻra oʻlganim yaxshiydi deding, oʻlim oldida aytgan soʻnggi qoʻshigʻingni u eshitishini orzu qilding, onang qanchalar erkalardi seni goʻdakligingda, dov va tanti otangning boshi qaylarda qoldi, qanday jang qilishardi jasur doʻstlaring, qaysi xudolarga ocharding begʻaraz va pok dilingni, oʻylaganmiding hech odam nega tugʻiladi-yu, nega oʻladi va nega oʻlim doim sen bilan birga, sendan nari jilmaydi va oʻlgandan soʻng oʻlim yoʻq, lekin hayot oʻlimdan yuqori, dunyoda hayotdan koʻra yuqori oʻlchov yoʻq — shuning uchun tirik jonni mahv etma, lekin elingga yov bostirib kelsa, darhol himoyaga otlan, sevganingni nomusini asra xuddi ona-Yerni yotlardan asraganday; ayriliqni hech totib koʻrganmisan, bilasanmi ayriliqning dushvorligini, xuddi yelkangga choʻng togʻlarning yuklari ortilganday; suyganing boʻlmasa, hech narsa koʻzlaringni quvontirmaydi: na gullar, na nurlar va na kelajak kunlar — ana nimalar kuylanmaydi qoʻshiqda, aytib ado qilib boʻlarmidi barini...

Oxirgi qoʻshiqni aytamiz deyishdi, keyin yana va undan keyin yana xayrlashuv oldidan aytaylik deyishdi, hech tinchiydigan emas, yana davraga turishdi, boshlarini quyi egib, qoʻshiq boshlashdi — ohang goʻyo yer ostidan kelayotganday oʻychan va qudratli yangrab borardi. Garchi gulxan alanga olib yonayotgan boʻlsa ham, Sandro yana oʻtin keltirgani orqaga oʻtdi. Buni u aniq hisobga olgan edi — chetdan u olov atrofida qur tashlagan, koʻzlari oʻtdan yoshlanib qoʻshiq aytayotgan oltovlonning har birini aniq-taniq koʻrib turar, uni esa hech kim koʻrmasdi... Ogʻir mauzer allaqachon shay edi. Qasos pallasi yetgandi. Koʻp oʻqli tezotar mauzerni ikkinchi qoʻli ustiga qoʻydi. Birinchi oʻq bilan qoʻr yigitlar boshligʻi Guram

Joʻxadzeni qulatdi. Topponcha ovozi tun qoʻynida momaqaldiroqdek gumburlab ketdi va shu zahoti, yigitlar boʻgʻzidan hali qoʻshiq soʻzlari uzilmayoq boshqa beshovini ham ketma-ket otib yiqitdi. Ular nima roʻy berganini hatto anglolmay qoldilar. Shunday qilib, oʻlim charxi yana bir sharmandali aylandi. Toʻkilgan qonlar uchun yana qonlar toʻkildi.

Shunday. Inson munosabatlarining qonunlari aljabr hisob-kitoblariga boʻysunmaydilar. Zamin esa qonli fojialarning kajavasi kabi doʻnaveradi...

Nahot, axir, bu kajava to oxir zamon boʻlguncha, Yer oftob atrofida kezib charchaguncha evriladi, nahot aylanaveradi qonli charx?

Oʻqlar moʻljalga aniq urildi. Faqat bir odam titragancha qoʻliga tiralib turmoqchi boʻldi. Sandro sakrab-sakrab borib, uning chakkasidan oʻq qoʻydi... Otlar qoʻrqib orqaga tisarildilar va soʻng jilovlangan yerlarida qotib qoldilar...

Gulxan yonib bitmagandi. Daryo vagʻillardi, oʻrmon va togʻlar bari oʻz joyida edi, oy yuksaklarda sokin kezardi hech narsa yuz bermaganday, yolgʻiz uzoq davom etgan taronagina uzildi, uzildi...

Sandroning basharasi tun shu'lasida boʻzday oqarib koʻrinardi. U harshars nafas olar, oʻpkasiga havo yetmasdi. U meshni shart koʻtardi-da, tagida qolgan vinoni toʻkib-sochib yutoqib icha boshladi, u ichida yonayotgan olovni bosmoqchi boʻlardi... Keyin sal oʻziga keldi, gulxan atrofida yotgan oʻliklarni xotirjam aylanib chiqdi. Soʻng oʻlganlarning qurollarini oldi, ularni egarlarning boshlariga osib qoʻydi. Otlarni jilov, noʻxtalaridan batamom boʻshatdi, ularni erkinlikka qoʻyib yubordi. Hamma otlarni, jumladan, oʻz toʻrigʻini ham boʻshatdi... Otlar erkinlikni sezgach, togʻdan pastga, odamlar qoʻnalgʻasi tomon turnaqator tizilishib tushib keta boshladilar. Axir otlar doim odamlar yashaydigan tomonga qarab yuradilar... Ularning ortlaridan birpas qarab turdi... Lekin mana, taqalarning ovozlari ham eshitilmay qoldi, pastda oyning tutab yotgan beqaror shuʻlalari qoʻynida qator tizilib borayotgan otlarning sharpalari ham koʻzdan gʻoyib boʻldi...

Hammasi tugadi. Sandro yana bir marta yerda agʻanab yotgan oltovlon atrofidan aylanib chiqdi-da, sal chekkaroqqa oʻtdi. Mauzerning ogʻzini chakkasiga tiradi. Togʻlarda yana bir oʻq ovozi sadolandi. Bu yettinchi edi. U ham oʻz qoʻshigʻini aytib bitirgandi...»



Mana, yana bir mungli hikoyani tingladik. Har qalay, undan Sizning murgʻak koʻnglingiz ham larzaga tushgan boʻlsa kerak. Ayni fojianing kelib chiqish sabablari, uning aybdorlari toʻgʻrisida ham oʻylay boshlagandirsiz. Qolaversa, oltovlon va yettinchi toʻgʻrisidagi qissa faqat adabiy toʻqima, yozuvchi xayolotining mahsuligina emasligini sezayotgandirsiz. Bu voqealarni qachonlardir, bizdan uzoq Gruziya oʻlkasida, bir marotabagina yuz bergan-da, deb oʻylash katta xatodir. Oʻzingiz yashayotgan joydagi kishilarning suhbatlarida ham «Falonchi ota inqilob payti otilib ketgan, bedarak yoʻq boʻlib ketishgan» degan soʻzlarni eshitgan boʻlsangiz ehtimol. Demak, bu jonli tarix, oʻtgan asrda boʻlib oʻtgan hayotiy voqealarning aksi, sadosi.

Shoʻro hukumati oʻtkazgan siyosat toʻgʻrisida gapirganimizda, bu siyosat zamirida bir millat vakillarini bir-biriga qarshi qayrash, ular orasida oʻzaro nafrat tugʻdirib, qonli olishuvlar keltirib chiqarishdek insoniylikka yot gʻoyalar yotganini alohida ta'kidlagan edik. Guram Joʻxadze boshliq oltovlon ham, yettinchi Sandro ham aslida bir Vatan tuprogʻida oʻsib-ulgʻayishgan, hammasining jon tomirlari Gurjistonning qadim oʻtmishiga payvasta. Shu tufayli ham xalq ruhiyati oʻz ifodasini topgan koʻhna qoʻshiqlar kuylanayotganda bu bahodirlarni bir-birovidan hech ajratib boʻlmaydi. Afsuski, mashhur shoirimiz Abdulla Oripov iborasi bilan aytganda, oraga «uchinchi odam», insonlar tabiatiga yot gʻoya va mafkura tiqishtirilgach, qoʻshiq shafqatsizlarcha uzildi – qiyomat sodir boʻldi.

Bevaqt uzilgan narsa aslida qoʻshiqqina emas edi. E'tibor bergan boʻlsangiz, yozuvchi qoʻshiqda aks etgan millat ruhiyatining yaxlitligini sezdirish uchun oʻsha ifodani hatto gaplarga ham boʻlmaydi («Kimni jondan sevgan eding...» deb boshlanadigan matnga diqqat qiling!).

Sho'ro mafkurasi ajdodlar tajribasini o'zida mujassam etgan xalq turmushini izdan chiqargan, odamlarni bir-biriga yovlashtirib qo'ygandi. Guram Jo'xadze oddiygina yilqiboqar edi. Uning to'lib-toshib yotgan boyligi ham, birov bilan talashadigan amali ham yo'q edi. Biroq u va unga sodiq yigitlarning hech kimga berishni istamagan VATANI bor edi. Vatan tuprog'i o'zgalar oyog'i ostida toptalmasligini, bobolar zaminiga boshqalar egalik qilmasligini, bu yurt kishilarining mag'rur boshlari hech

kimning oldida egilmasligini istar edi ular. Ular oʻzlarining kindik qoni toʻkilgan Vatanida emin-erkin yashashni, tirikchilik qilishni, oila qurib, bola-chaqa orttirishni xohlashardi. Shoʻro hukumati ularni mana shu oliy huquqdan mahrum qilmoqchi boʻldi. Erkparvar xalqning eng joʻmard farzandlari esa bu bedodlikka qarshi bosh koʻtardi.

Afsuski, dushmanning makkor siyosatiga aldangan, uning qoʻlida bir qoʻgʻirchoq holiga tushgan kimsalar ham topildi. Sandro mana shunday qismat egasi edi.

Albatta, Sandro amalga oshirgan mudhish jinoyatni hech narsa bilan oqlab boʻlmaydi. Biroq uni oʻz millatiga qarshi qoʻl koʻtarishga majbur qilgan siyosat va matkurani ham yoddan chiqarmasligimiz lozim. Sandroga oʻxshash odamlarga «kommunizm» deb atalgan «baxtli kelajak»ni va'da qilib, ularni yoʻldan ozdirgan shoʻro hukumati qutqusi nafaqat Gruziyada, balki boshqa oʻlkalarda, jumladan, bizning yurtimizda ham shunga oʻxshash koʻplab fojialarga sabab boʻlgandi. Boshqacha qilib aytganda, Ch. Aytmatov oltovlon va yettinchi toʻgʻrisidagi mungli hikoya orqali zararli gʻoya va mafkura qurboni boʻlgan millionlab odamlar taqdiridan bizni ogoh etadi.

«Qiyomat» romanidagi boshqa oʻrinlar singari bu hodisalar tasvirida ham muallif badiiy tafakkur va badiiy so'z imkoniyatlaridan samarali foydalangan. Biz sal avval bekorga «Oltovlon va yettinchi» tarixini «mungli hikoya» deya ataganimiz yoʻq. Koʻplab qurbonlar berilgan soʻnggi jangdan chiqib kelgan toʻda kayfiyatida ham, Guram Joʻxadzening doʻstlariga qilgan murojaatida ham, ular kuylayotgan, oxiri koʻrinmaydigan qoʻshiqlarda ham, egalaridan ayrilishgach qator tizilib qishloqqa tushib ketayotgan otlar tuyogʻi sadosida ham cheksiz bir mung eshitilib turadi. Ayni ohangni esa yozuvchi oddiygina soʻzlar yordamida hosil qiladi. Buni faqat yozuvchilik mahoratidan deb oʻylasak, unchalik toʻgʻri boʻlmaydi. Siz avvalgi darslarda oʻrgangan asarlardan ham koʻrdingizki, iste'dodli adiblar hayot hodisasini oʻzining qalbi orqali o'tkazib, o'zini shu hodisaning faol ishtirokchisi sifatida his etgachgina qoʻliga qalam oladi. Voqealarni tasvirlar ekan, u oʻz qahramonlari holatiga tushib koʻradi, ular bilan birga oʻylaydi, iztirob chekadi, quvonadi. Faqat shundagina bu hodisaning tasviri o'quvchiga ham kuchli ta'sir ko'rsatadi, uni ishontiradi.

Ana endi Siz bilan biz ham yozuvchi bilan birga Sandro holatiga tushib koʻraylik. Yuqorida Sandro oʻzining ong-u shuurini egallashga ulgurgan shoʻrolar koʻrsatmasi boʻyicha harakat qilganini, u oʻziga topshirilgan vazifani bajarmasdan orqaga qaytishi mumkin emasligini aytgan edik. Xoʻp, u topshiriqni bajardi — oʻz doʻstlarini, qardoshlarini, millatdoshlarini halok qildi. Keyin, fojia yuz bergandan keyingina u oʻziga keldi. Nima qilib qoʻyganini birdan angladi. Axir shuncha odamning qoni evaziga quriladigan yurt qanday ravnaq topishi, tinchlik-omonlikda yashashi mumkin? Axir bu qurbonlarning bor-yoʻq «aybi» ona-Vatanini birovga berishni xohlamaganimi? Ular Vatanni qanchalar sevar edi! Axir Vatan toʻgʻrisida kuylayotgan qoʻshiqlarining hech poyoniga yetmasligining ham bosh sababi mana shu sevgilari emasmidi? Ular qoʻshiq tugab qolsa, yurtdan abadiy ketishgina qolishini yurak-yuraklaridan his qilishmaganmidi? Ularni ushlab turgan qoʻshiq emas, bu qoʻshiqda mujassam boʻlgan Vatan mehri ediku. Guram Joʻxadzening yolqinli soʻzlariga e'tibor bering:

«Vatanni olib ketib boʻlmaydi. Faqat sogʻinch va armonlarimizni olib ketamiz. Agar Vatanni xurjun kabi olib yurish va tashib ketish mumkin boʻlganda, u sariq chaqaga ham arzimasdi».

Sandro shu qoʻshiqqa, shu muhabbatga, shu mehrga oʻq uzdi. U faqat oltovlonning jismini oʻldirgani yoʻq, balki bu jism-u jonda yashayotgan Vatanga muhabbatni, yurtga mehrni mahv etdi. Muhabbat va mehrsiz esa ozod Vatan qurib boʻlmaydi. Muhabbat va mehrsiz yurtda yashab ham boʻlmaydi!...

Sandroga, kechikib boʻlsa-da, mardlik, imon va vijdon qaytib keldi. U oʻzi yoʻl qoʻygan fojiali xatoni anglab yetdi.

Ch. Aytmatov oltovlon va yettinchi haqidagi hikoyani aynan shunday yakunlashi bejiz emas. Uning talqinidan anglaymizki, tarixda ham, bugun ham, kelajakda ham birodarkushlik urushi biror xalqni roʻshnolikka olib chiqmaydi. Qon ortidan qon, jinoyat ortidan undan-da mudhishroq jinoyat ulanib kelaveradi. Bu oʻlmas haqiqatni bizga qoʻshni mamlakatlarda boʻlib oʻtgan voqealar ham yana bir marta tasdiqlaydi.

«Qiyomat» romanidan abadiy haqiqatlar tarannum etilgan yana koʻplab sahifalar oʻrin olganki, yoshingiz sal ulgʻaygach ularni ham toʻla bilib olasiz.

Bugungi kunda Chingiz Aytmatov nafaqat mashhur yozuvchi, balki yirik jamoat arbobi, siyosatchi, olim sifatida ham barakali faoliyat olib bormoqda. U Qirgʻiziston Respublikasining Lyuksemburg va Belgiyadagi elchisi hisoblanadi. Shuningdek, yozuvchi 1995-yilda tashkil etilgan Markaziy Osiyo xalqlari madaniyati assambleyasining Prezidenti hamdir. Bu assambleyaning markaziy idorasi poytaxtimiz Toshkentda joylashgan boʻlib, adib bizning yurtimizga tez-tez kelib turadi.

Ch. Aytmatovning hozirga qadar yozgan asarlari dunyoning 154 tiliga tarjima qilingan. Uning deyarli barcha kitoblari oʻzbek tiliga oʻgirilgan boʻlib, xalqimiz orasida sevib mutolaa qilinadi. «Qiyomat» romanini yirik adabiyotshunos, yozuvchi Ibrohim Gʻafurov ona tilimizga yuksak mahorat bilan tarjima qilganki, Siz bunga guvoh boʻldingiz.

Ch. Aytmatov 1995-yilda Oʻzbekiston Respublikasining «Doʻstlik», 1998-yilda esa «Buyuk xizmatlari uchun» ordenlari bilan taqdirlangani ham yozuvchi bizning xalqimizga naqadar yaqin va doʻst ekanligini koʻrsatadi.

Savol va topshiriqlar

- 1. «Oltovlon va yettinchi» afsonasining yaratilishiga turtki boʻlgan tarixiy hodisalar toʻgʻrisida soʻzlab bering.
- 2. Sandrodan farq qilaroq, Guram Joʻxadze boshliq oltovlonning shoʻro tomoniga oʻtmaganining asosiy sababi nimada, deb oʻylaysiz?
- 3. Vatanparvarlarning yurtga boʻlgan sadoqati asarda tasvirlangan qaysi holatlarda yorqinroq aks etgan?
- 4. Bizning yurtimiz tarixida ham «Oltovlon va yettinchi»da hikoya qilingandek hodisalar boʻlganini eshitganmisiz?
- 5. Ch. Aytmatov asarlari asosida yaratilgan qaysi kinofilmni koʻrgansiz? Undagi voqealar haqida sinfdoshlaringizga soʻzlab bering.

Nazariy ma'lumot

AFSONALAR HAQIDA

Afsonalar Sharq xalqlari ogʻzaki va yozma adabiyotining eng koʻhna va keng tarqalgan janrlaridan biridir. Arab xalqlari bunday asarlarni «asotirlar» deb atashadi. Oʻtmishdan bizga juda koʻp afsona va asotir

kitoblari yetib kelgan. Bu hikoyalarning aksariyati zamirida tarixda boʻlib oʻtgan hodisalar, kishilar hayoti yotsa-da, vaqt oʻtishi bilan ularga turli qoʻshimchalar, oʻzgarishlar kirib borgan. Masalan, Xorun ar-Rashid degan hukmdor faoliyati bilan bogʻliq shu qadar koʻp afsona toʻqilganki, ularning birida bu podshoh oʻta adolatparvar, xalqparvar qilib koʻrsatilsa, boshqasida buning aksiga duch kelamiz.

Afsonalarning yana bir muhim jihati shundan iboratki, ular deyarli chegara bilmaydi. Xalqlardan xalqlarga, yurtlardan yurtlarga koʻchib yurar ekan, afsonalarga oʻsha xalq tushunchasi darajasida yangidan ishlov berilaveradi.

Ch. Aytmatovning oltovlon va yettinchi toʻgʻrisidagi zamonaviy afsonasiga kelsak, uni yozuvchining ijodiy fantaziyasi mahsuli, deb qarash kerak. Asarni oʻrganish davomida aytganimizdek, shunga oʻxshash hodisalar nafaqat gruzin xalqi hayotida, balki juda koʻp xalqlar hayotida ham kechgani aniq. Biroq, oltovlon va yettinchi taqdirini aynan shu shaklda, shu mazmun va koʻlamda yaratish xizmati, shubhasiz, Ch. Aytmatovga taalluqlidir.



Odil YOQUBOV

(1926-yilda tugʻilgan)

Aziz oʻquvchi!

Siz O'zbekiston xalq yozuvchisi Odil Yoqubov hikoya, qissa va romanlarini oʻqigansiz, uning asarlari asosida tayyorlangan koʻp qismli videofilmlarni koʻrgansiz. U hozirgi oʻzbek adabiyotining atoqli vakillaridan biridir.

Bo'lajak yozuvchi 1926-yili Qozog'iston Respublikasining Chimkent viloyati Qarnoq qishlogʻida tugʻilgan. Oʻsha yerda oʻrta maktabni tugatib, armiya xizmatiga ketgan. U armiya saflariga chaqirilganida Ikkinchi jahon urushi tugash arafasida edi. Shu paytda Yaponiya davlati bilan urush boshlanib, O. Yogubov ana shu urushda ishtirok etadi. 50-yillarda u armiya xizmatidan qaytib, Oʻrta Osiyo davlat universitetining filologiya fakultetida oʻqiydi. Soʻngra turli yillarda Oʻzbekiston Yozuvchilar uyushmasida, «Literaturnaya gazeta»da, «O'zbekfilm» kinostudiyasida, nashriyotlarda ishlaydi. 1982-1989-yillarda «Oʻzbekiston adabiyoti va san'ati» gazetasini, 1989–1996-yillarda Respublika Yozuvchilar uyushmasini boshqaradi. Keyin Oʻzbekiston Atamalar qoʻmitasi raisi, hozirda esa Markaziy Osiyo xalqlari madaniyati assambleyasining vitse-prezidenti lavozimida faoliyat yuritmoqda.

Odil Yoqubovning dastlabki yirik asari 1951-yilda bosilib chiqqan «Tengdoshlar» povesti edi. So'ngra uning «Chin muhabbat», «Aytsam tilim, aytmasam dilim kuyadi», «Yurak yonmogʻi kerak», «Olma gullaganda» pyesalari yaratiladi. Birin-ketin «Bir felyeton qissasi», «Muqaddas», «Qanot juft boʻladi», «Izlayman», «Billur qandillar», «Adolat manzili» qissalari e'lon qilinadi.

Odil Yoqubov oʻzbek adabiyotida roman janrini rivojlantirishga ulkan hissa qoʻshgan adibdir. Uning turli davrlarda yaratilgan «Er boshiga ish tushsa», «Ulugʻbek xazinasi», «Koʻhna dunyo», «Diyonat», «Oqqushlar, oppoq qushlar» romanlari kitobxonlarning mehrini qozongan. Bu romanlarda yozuvchi gohi oʻrta asrlar Vatanimiz tarixidagi buyuk allomalar Abu Rayhon Beruniy, Abu Ali ibn Sino, Ulugʻbeklar hayoti, ularning ulugʻvor ishlari haqida hikoya qilsa, gohi zamonaviy mavzularni qalamga olib, odamlar oʻrtasidagi mehr-oqibat, muhabbat, adolat, burch kabi yuksak tuygʻularni asrash toʻgʻrisida fikr yuritadi. Shuning uchun ham bu asarlar hozirgacha oʻquvchilar tomonidan sevib oʻqiladi.

MUZQAYMOQ

Oʻsha oilamiz boshiga ogʻir kulfat tushgan kuni, men, oʻn yashar bola, nimadandir koʻnglim gʻash, uyimiz roʻparasidagi paxsa devorga chiqib, oʻzimcha goʻyo otga minib oʻtirardim.

U mahalda biz Turkiston shahrining eng soʻlim joylaridan biri – Lager koʻchasida ikki xonadan iborat, oldi ayvon, oʻsha zamon imkoniyatiga koʻra tuzukkina uyda istiqomat qilardik. Bu uyning kattagina hovlisi ham bor edi. Ikki qavatli ulkan darvoza orqali kiradigan bu hovlida bizdan tashqari yana bir nechta xonadon yashardi. Darvozaning ustida quruq pichan saqlanadigan boloxona boʻlar, biz, bolalar oqshom paytlari berkinmachoq oʻynaganda boloxonaga chiqib pichan tagida «jon saqlardik».

Oilamiz boshiga musibat tushgan oʻsha mash'um kundan bir necha oy muqaddam dadam uyimizdagi deyarli barcha kitoblarni uch-toʻrt qopga solib, beda tagiga yashirgan-u, boloxona eshigiga otning kallasidek qulf osib qoʻygandilar. Endilikda boloxonaga hech kim kirolmas, faqat men goho-goho tuynukdan tushib, qoplardagi kitoblarni, ayniqsa sersurat, qalin kitoblarni tuynuk shu'lasiga solib, tomosha qilib oʻtirishni yoqtirardim.

Bu suratlar ham juda gʻalati, ularning aksari charm palto kiyib, bellariga

qilich va toʻpponcha taqib olgan harbiy, ba'zilari esa ot oʻynatgan, qizil alvon koʻtarib dushman sari ot surib ketayotgan mard-u maydonlar boʻlsa ham, negadir barchasining koʻzlari oʻyib olingan yoki yuzlariga koʻk siyoh tortilgan edi. Nega shunday? Men bu sir-asrorning tagiga yetolmay qiynalardim, dadamlardan soʻrashga esa yuragim dov bermas, sababi, dadamlar qahri qattiq odam edi, «bu kitoblarni senga kim koʻrsatdi» deb dashnom berishlari mumkin edi.

Oʻsha qora kun ham, nimadandir koʻnglim notinch, kitob titish esimga tushib tomga chiqdim. Ammo tanish tuynukka yaqinlashganimda koʻchaning boshida qoʻsh ot qoʻshilgan chiroyli foytunga koʻzim tushdi. Sal oʻtmay, foytun darvozamiz roʻparasiga kelib toʻxtadi. Undan oʻsha paytlarda barcha kattalar uchun rasm boʻlgan yashil rang galife shim va gimnastorka kiygan oʻrta yashar ikki kishi bilan qizil koʻylakli, koʻzlari qiygʻoch bir ayol tushdi. Erkaklardan biri tomda meni koʻrib qolib:

- Egamberdi Jaqipovning uyi shulma? deb soʻradi.
- Shu, dedim men. Shu payt hovlidan chiqqan oyimlarning:
- Kelinglar, mehmonlar, xush kelibsizlar, degan ovozi eshitildi. Men boloxona ustunidan sirpanib, yerga sakrab tushdim. Mehmonlar ichkariga kirishgan, oyimlar allaqanday hayajonda edilar.
- Dadangning mahkamasiga chop! dedilar oyimlar negadir shivirlab. – Ayt: SAKUda birga oʻqishgan ogʻaynilaringiz kelishdi, de! Kutib oʻtirishibdi, tezroq kelar ekansiz, de! Ha, aytmoqchi, bir yoʻla maktabga borib, opang bilan pochchangga ham ayt – tezroq kelishsin. Dasturxonpasturxonga qarashib yuborishsin!

Men negadir, aftidan «mehmon» soʻzidan koʻnglim yorishib, ikki oyogʻimni qoʻlimga olib chopa ketdim. Garchi pochcham bilan katta opamlar oʻqituvchilik qiladigan maktab dadamlar ishlaydigan mahkamadan xiyla narida boʻlsa-da, avval oʻsha tomonga oʻtib, oyimlarning gapini opamlarga aytdim, soʻng, hamon ikki oyogʻim qoʻlimda, yalangoyoq, yalangbosh, koʻcha changitib dadamlarning mahkamasiga qarab chopdim.

Dadamlarning mahkamasi ulkan savdogar qurgan va endilikda partiya qoʻmitasi joylashgan koʻrkam binoning shundoq biqiniga joylashgan edi. Men borganimda dadamlar ham idoradan chiqqan ekanlar. Meni uzoqdan



koʻrib darvoza oldida toʻxtadilar. Dadamlar toʻladan kelgan, novcha, qirraburun, oʻsha davrda rasm boʻlgan toʻmtoq moʻylovli, xushqad, salobatli kishi edilar. Egnidagi libosi hozir xotiramda yoʻq, agar yanglishmasam oʻsha mahalda dohiy Stalinga taqlidan kiyiladigan koʻkrak choʻntakli yashil kostum va galife shim kiygan, oyoqlarida ham oʻsha zamonlarda rasm boʻlgan gʻarch-gʻurch xrom etik.

Rahmatlik dadamlar, uyqusizlikdanmi, boshqami – koʻzlari qizargan, allaqanday horgʻin koʻrindilar menga. U kishi hansiray-hansiray aytgan gaplarimni eshitdilar-u, chehralari sal yorishib:

 Yur, bolam! – dedilar boshimni silab. – Senga bitta muzqaymoq oberay!

Boya aytganimdek, dadamlar diydasi qattiqroq, oʻktam, kamgap odam edilar. Oʻsha kungacha men u kishining biror marta boshimni silaganlarini bilmasdim. Aksincha, hanuz esimdan chiqmaydi: dadamlar ur kaltak, sur kaltak tagidan chiqolmay, ishdan haydala-haydala oxir pirovardida qishloqqa qaytib, uyda koʻkragini zaxga berib yotgan paytlar. Bir kun oyimlar qoʻlimga pul va ikki-uch litrli grafin (dadamlar katta lavozimlarda ishlagan mahalda orttirgan nodir matoh) tutqazib:

- Do'konga kirib qimiz olib chiq, dadang aytdilar! - dedilar.

Do'konga kirsam qimiz tugagan ekan. Men parvoyifalak, qo'limdagi grafinni o'ynatib uyga qaytdim. Yo'lim yog'och va temir qoziqlar qoqilgan mol bozoridan o'tardi. To'satdan nimadir «shaq» etdi. Qarasam, qo'limdagi grafin temir qoziqlardan biriga tegib, tangaday joyi o'pirilib tushibdi. Yuragim orqamga tortib ketdi. Uyga qaytishga jur'at qilolmay anchagacha bog'imiz poyidagi soy bo'yida aylanib yurdim. Nihoyat, yuragimni hovuchlab uyga kirib bordim. Oyimlar meni ko'rib:

 Qayoqlarda daydib yuribsan, bevosh? Dadang shoʻrlik kutaverib diqqinafas boʻp ketdilar-ku! — deb koyidilar, soʻng grafindagi teshikka koʻzlari tushib, qoʻlimdan ushlagancha ichkariga sudradilar.

Dadamlar ulkan, chorxari uyimizning toʻrida kitob varaqlab, yonboshlab yotardilar.

 Do'konda qimiz yo'q ekan, bu ham yetmagandek, o'g'lingiz grafinni sindirib qo'yibdi...
 Oyimlar shunday deb grafinni dadamlarning oldidagi xontaxtaga qo'ydilar.



Keyinchalik oyimlar bu ishlaridan pushaymon bo'lib ko'p gapirganlar. «Nega shunday qilganimni o'zim ham bilmayman, bolam, dadanglarning nochor ahvoli hammamizni ezib qo'ygan edi», deguvchi edilar rahmatlik.

Dadamlar shitob bilan qadlarini rostladilar-u xontaxtadagi grafinni olib, menga qarab otdilar. Zarb bilan otilgan grafin shundoq qulogʻim tagidan oʻtib (chamasi, jonholatda boshimni olib qochgan boʻlsam kerak!) devorga tegib chil-chil sindi.

Men tura qochdim, qocharkanman, oyimlarning: – qimiz ham oʻlsin! qimiz deb bolamni oʻldirmoqchimisiz, adasi? – degan achchiq faryodini eshitdim.

Oyimlarning aytishicha, keyinchalik dadamlar ham bu qilmishidan pushaymon boʻlganlar. Kim bilsin, ehtimol boshiga ogʻir musibat tushishini sezib yurgani uchundir, ehtimol bir mahal dilimga ozor bergani esiga tushib, uni koʻnglimdan chiqarmoqchi boʻlgandir, har qalay, umrimda birinchi bor boshimni silab, muzqaymoq oberishga ahd qildilar.

Koʻchaning narigi yuzida shahar bogʻi boʻlar, bogʻ oldidagi maydonchada har xil suv, meva sharbatlari, muzqaymoq sotiladigan mitti-mitti doʻkonchalar boʻlardi. Borsak, doʻkonlar yopilgan ekan. Dadamlar astoydil ranjidilar.

Umrimda bir marta senga muzqaymoq olib bermoqchi boʻlgandim,
 bu ham nasib qilmadi-yov, bolam! – dedilar u kishi allaqanday chuqur
 oʻkinch bilan.

Uyga borganimizda chiroqlar yongan, hovlidagi oʻchoqqa qozon osilgan, bizdan avval yetib kelgan katta opamlar bilan oyimlar oʻchoq atrofida kuymalanib yurishar pochchamlar koʻrinmas edilar.

Dadamlar ichkariga kirib ketdilar-u darhol qaytib chiqdilar. Chehralari ochilgan, kayflari chogʻ edi.

SAKUda birga oʻqigan eski qadrdonlarim kelishipti. Qalay, tuzukroq
goʻsht-poʻshtlaring bormi, Gulshan? – dedilar dadamlar oyimlarga qarab.
Bor bisotingni dasturxonga toʻkasan bugun...

Hovlimizda, shundoq oʻchoq yonida bir tup gujum oʻsar, gujum tagida chuqur quduq boʻlar, issiq yoz va iliq kuz kunlari goʻshtni shu quduqda asrardik.



Oyimlar menga quduqdan goʻsht olib ber, dedilar. Men quduq changʻirogʻining dastasini aylantirib, goʻsht osilgan changakni torta boshladim-u, toʻsatdan koʻchadan kirib kelgan ikki harbiyga koʻzim tushib, negadir yuragim orqamga tortib ketdi. Ular oʻchoq atrofida kuymalanib yurgan oyimlar bilan opamlarga bir qarab qoʻydilar-da, etiklari bilan yerni tap-tap bosib ayvonga chiqishdi. Ayvondan uyga kirishdi. Harbiylarni koʻrishlari bilanoq turgan joylarida tosh qotib qolgan oyimlar bilan opamlar birdan dod solishib, uyga qarab yugurishdi. Quduq changʻirogʻini beixtiyor qoʻyib yuborib men ham ketlaridan chopdim.

Men oʻsha paytlar mamlakatimizda va hatto shahrimizda nima boʻlayotganidan bexabar edim, albatta. Shu bois oyimlar bilan opamlarning harbiylarni koʻrishlari bilanoq faryod chekib, ichkariga otilishlari sababini anglamadim. Ammo ular mudhish maqsad bilan kelishganini aql bilan boʻlmasa-da, yurak bilan his etgandim. Keyin bilsam, oʻsha davrda hamma joyda boʻlganidek, Turkistonda ham har kuni, har daqiqada koʻplab odamlar hibsga olingan ekan. Oyimlar va opamlar bundan boxabar boʻlganlari uchun ham harbiylarni koʻrib dod solishgan ekan. Eshikdan kirishim bilan harbiylardan biri — novchadan kelgan, malla sochlarining uchlari qoshlariga nafis egilib tushgan xushsurat oʻris kapitan polni gʻarchgʻurch bosib, eshikka keldi-da, uning ilmogʻini solib:

- Tintuv tugaguncha endi hech kim uyga kirmaydiyam, chiqmaydiyam! - dedi yurakka gʻulgʻula soluvchi bir qat'iyat bilan.

Uyda qiy-chuv boshlangan, katta opamlar oʻrta eshikda haykalday qotib qolgan dadamlarning boʻyniga osilib yigʻlamoqda, oyimlar ham dadamlarning yelkasiga suyanib, unsiz titramoqda, kichik opamlar bilan ukalarim burchakka tiqilishib, xuddi kalxatlardan qoʻrqqan joʻjalarday, koʻzlari ola-kula, bir-birining pinjiga kirib olishgandi.

Ikki tavaqali oʻrta eshik ochiq, ichkari xonaning toʻrida SAKUda dadamlar bilan birga oʻqigan mehmonlar, ranglarida rang yoʻq, tippa-tik serrayib turishardi. Ikkinchi harbiy esa ichkari uydagi katta qizil shkafga terilgan kitob va albomlarni bitta-bitta koʻzdan oʻtkazmoqda edi.

Xushsurat, mallasoch kapitan esa tashqi xonadagi qutilar, sandiq va sandiqchalar, shkaflarning tortmalarini ochib, ulardagi buyumlarni titkilar,



latta-puttalar orasidan allanimalarni qidirar edi. Navbatdagi shkafga kelganda harbiy qancha urinmasin, uning pastki tortmalarini ocholmadi. Uyda birorta sandiq yo shkaf yoʻq ediki, men uni ocholmasam. Kapitanning qiynalayotganini koʻrib, men qoʻlimga mix oldim-u pildirab borib shkafning tortmasini shartta ochib berdim. Kapitan chehrasi yorishib kuldi-da:

– Malades! – dedi boshimni silab, – kelgusida Pavlik Morozov chiqadi sendan!

Kapitanning bu kutilmagan maqtovidan yuragim «jiz» etdi. Keyinchalik, katta boʻlganimda, men uydagi dod-faryodga qaramasdan otamni qamashga kelgan jallodning maqtovidan bir zumgina boʻlsa-da, yayrab ketganimni har eslaganimda bir oʻzimdan ijirgʻanib yurdim. Ammo oʻsha daqiqada, afsus-nadomatlar boʻlsinkim, uning soʻzlaridan gʻururlanib ketganim ham haqiqat, mudhish haqiqat!

Shu payt dadamlarning:

– Suv! – degan ovozlari eshitildi. – Bir piyola quduq suvi beringlar, yuragim kuyib ketyapti!

Uyda suv yoʻq ekan. Opam yigʻidan toʻxtab:

- O'rtoq kapitan! - dedilar hiqillab. - Ruxsat bering, ukam quduqdan suv olib kirsin!

Kapitan shkaf tortmasidan boshini ko'tarib:

Agar dod-voyingni qoʻysang – ruxsat beraman! – dedi va kuldi: –
 Shunday chiroyli qiz ham bunaqa yigʻloqi boʻladimi?

Kapitanning meni Pavlik Morozovga oʻxshatgani menga qanchalik xush yoqqan boʻlsa, uning opamlarga qilayotgan soxta xushomadi shunchalik yoqmadi. Lekin nima ham qilardim? Chelakni olib tashqariga otildim. Hovlidagi chiroq oʻchgan, ayvondan uzoqroqda, quduq yonidagi gujum panasida kimdir qoqqan qoziqdek qaqqayib turardi. Bu — pochchamlar edi. U lom-mim demasdan qoʻlidagi chaqaloqni menga tutqazib, quduqdan yarim chelak suv olib berdi-da, sharpasiz odimlab hovlining qorongʻi burchagiga qarab ketdi.

Keyinchalik marhum oyimlar koʻp aytguchi edilar:

- O'sha kuni pochchangni Xudo o'zi asradi! Agar pochchang opang bilan birga kelganida, kim bilsin, uni ham birga opketisharmidi bu toshbag'irlar? Oyimlarning bu gapida jon bor edi, chunki tintuv tugab, dadamlarni olib ketayotganlarida harbiylar SAKUchi shoʻrlik mehmonlarga Turkistondan ketishdan avval NKVDga borib, ruxsat olishlari shart ekanini uqtirishib, qoʻllaridan tilxat olishdi...

Nihoyat, tintuv tugadi. Dadamlarga kiyinishni buyurdilar. Oyimlar bilan opamlarning nolasi koʻkka chiqib, uyimiz achchiq faryoddan zir titradi. Oyimlar dadamlarning yelkasiga paltosini ildilar. SAKUni bitirgan shoʻrlik mehmonlarga tuzalgan dasturxondan ilingan narsani roʻmolga tugib, qoʻllariga tutqizdilar.

Boyagidan ham battar qorayib, bir zumda allaqanday ozib, munkayib qolgan dadamlar avval hamon faryod chekayotdan oyimlar bilan opamlar, soʻng qaqshab-qaltirab qolgan ukalarimning peshonalaridan oʻpdilar-u navbat menga kelganda:

- Hay, attang! - dedilar to'satdan ko'zlariga yosh olib. - Umrimda bir marta senga muzqaymoq olib bermoqchi bo'luvdim. Shuniyam evlayolmadim-ov, bolam!..

Butun tintuv davomida koʻzimga yosh olmagan, «kelgusida Pavlik Morozov boʻlasan», degan soʻzlardan shishib ketgan norasida, birdan hamma narsa – dadamlarning hech qachon erkalamaganini ham, doʻkondan qimiz topolmay qaytganimda grafinni qulochkashlab otganlari ham – hammasi esimdan chiqdi-yu alamli chinqiriq bilan dadamlarning tizzalarini quchoqlab oldim...

... Bir necha oy oʻtdi. Bu orada xonadonimiz motamsaro bir makonga aylandi. Qish yaqinlashib qolgan, kun sayin uning qahrli nafasi kuchayib borar, uyda esa na oʻtin bor, na koʻmir!.. Biz tancha qurib, bir amallab kun kechiramiz.

Haftada bir marta, yanglishmasam, shanba kunlari dadamga ovqat olishadi. Oyimlar bir amallab topgan-tutganlarini pishiradilar-u tong mahal u kishi bilan birga avaxtaga ravona boʻlamiz.

Turkistonda Qul Xoʻja Ahmad Yassaviy maqbarasining shundoq biqinida Oʻrta Osiyoni zabt etgan general Chernyayev qurdirgan besh-oltita mustahkam gʻishtin binolar boʻlardi. Chernyayev bu binolarni chor askarlari uchun qurdirgan. Sovet hokimiyati esa ularni qamoqxonaga aylantirgan-u atrofini tikanli sim bilan oʻrab tashlagan.



Har shanba tikanli sim bilan chegaralangan bu qal'a ro'parasiga kamida 150–200 ayol, chol-kampirlar yigʻilishadi, bular «xalq dushmanlari»ning oila a'zolari. Yosh-yosh juvonlar qaqshab-qaltirab qolgan keksalar hibsxona xodimlarining ovqat qabul qilishini kutib, ertalabdan kechgacha tikanli sim oldida diydirab turishadi. Oyimlar qamoqxonaga gohida meni ham yetaklab borishlariga sabab – mabodo dadamlar bilan yuz koʻrishish nasib etsa otamlar meni koʻrib qolsinlar degan niyatda edilar. Lekin dadamlarni biror marta ko'rsatishmadi, ko'rsatishmaganlari ham mayli. bot-bot olib borgan ovqatlarimizni qabul qilmasdan qaytarib yuborishardi. Goho men bir necha soat mahtal bo'lib kutganimdan kevin biror bahonani ro'kach qilib, hibsxonaning shundoq yonginasidagi shahar bog'iga garab chopardim. U verda xudoning kuni borki, miting bo'lar, shahar maktablaridan nogʻoralar gumburi va karnay-surnaylar sadosi ostida pionerlar va hatto oktabryatlar saf tortib bogga kelishardi. Bogʻ oʻrtasiga qizil alvon bilan o'ralgan ulkan minbar o'rnatilgan bo'lib, charm palto kiygan, to'pponcha taqqan faollar unga chiqib va'z aytishar, va'zlarning aksariyati trotskiychilar va ularning «dum»larini fosh qilishga bagʻishlanardi. Bu va'zxonliklarning dahshatli tomoni shunda ediki, bugun Trotskiyning «dum»larini fosh etib, otashin nutq soʻzlagan notiqlarning aksari ertasiga o'zlari «dum»ga aylanib, fosh etilganlar ro'yxatiga tushib qolishardi. Meni bu mitinglarga borishga nima chorlaganini hanuz tushunolmayman. Aftidan, karnay-surnay va nog'oralar sadosi saf tortib oʻtadigan tengdoshlarimning quvnoq va joʻshqin qoʻshiqlari boʻlsa, ajab emas. Chunki bu gumbur-gumbur sadolar-u otashin qoʻshiqlar qulogʻimga chalinishi bilan xuddi nogʻoraga oʻrgangan harbiy otday oyoqlarim oʻzoʻzidan raqsga tushib, yuragim hapriqib ketaverardi. Faqat bir narsa murg'ak qalbimni ezar, u ham bo'lsa, minbardan turib aytiladigan nutqlarda ba'zi-ba'zida dadamlarning nomi ham «dum»lar qatori tilga olinardi. Lekin shunday paytlarda dadamlarning Stalin to'g'risidagi so'zlari esimga tushardi-yu yuragimga quyilib kelgan alamli tuyg'uni haydardim. Bu hol toki shahar komsomol qo'mitasining kotibi bilan yuzma-yuz kelgunimcha davom etdi.

Bu yosh, xushqad, xushsurat yigitcha bizga qoʻshni edi. Oilamiz

boshiga musibat tushgunga qadar, u xonadonimizga boʻzchining mokisidek qatnar, dadamlar bilan kechalari uzoq suhbatlashib oʻtirardi. U oʻsha yozda uylangan, xotini ham, oʻziga oʻxshash koʻhlik, xushqad, xushsurat edi. Dadamlar ularning toʻylariga toʻyboshi boʻlgan, oyimlarning aytishicha, dadamlar unga moddiy yordam ham bergan ekanlar.

Dadamlar qamalganlaridan keyin yon qoʻshnimiz qorasini ham koʻrsatmaydigan boʻldi. Bunga ajablanmasa ham boʻlardi, chunki shogird tugul qarindosh-urugʻlar ham bu ogʻir, gʻurbatli kunlarda uyimizni chetlab oʻtishar, bitta-yarimta kelsa ham kechalari qoʻrqa-pisa kelib, soʻng devor panalab qaytib ketardi.

Shanba kuni edi. Chamasi, qamalganlar soni koʻpaygan, chunki avaxtaga ovqat koʻtarib kelganlar soni ancha ortgan, navbat kutayotganlarning dumi koʻrinmasdi. Kun sovuq, sevalab mayda yomgʻir yogʻardi. Shu boisdanmi, boshqami, oyimlar men soʻramasdanoq uyga ketishimga ruxsat berdilar. Men tinimsiz maydalab yogʻayotgan yomgʻirdan diydirab, uyimizga tomon ravona boʻldim-u toʻsatdan bogʻ tomonda yangragan nogʻoralar gumburi-yu karnay-surnaylar sadosini eshitib, beixtiyor toʻxtadim.

Nogʻoralar va karnay-surnaylar sadosi tobora avjga chiqmoqda, chamasi, odatdagidan ham katta miting boshlanmoqda edi. Oʻrgatilgan otga oʻxshab yana nogʻoralar gumburlayotgan tomonga burildim. Haqiqatan ham yomgʻirga qaramay, pionerlar har tomondan saf-saf boʻlib boqqa yopirilib kelishardi.

Darvozaga yaqinlashib qolganimda nogahon roʻpara tomondan kelayotgan qoʻshnimiz – shahar komsomol qoʻmitasining kotibiga koʻzim tushdi. U bir oʻzi emas, charm paltolik harbiy odam bilan uchburchak soqol qoʻygan, jikkakkina moʻysafid qurshovida kelardi.

Kotibni koʻrishim bilan yuragim negadir «shuv» etib, boqqa shoʻngʻishga chogʻlandim, ammo kotib bir sakrashda yoʻlimni toʻsib, bilagimdan shappa ushladi-da:

– Ha, qashqirdan tugʻilgan qashqircha! – dedi titroq bosib. – Bitta shaltoq buzoq bir podani buzadi! Boʻyningga soxta qizil galstuk taqib, bu sofdil qizil pionerlarni buzmoqchimisan? – U qoʻlimni ogʻritib siqqancha oʻziga torta boshladi. Lekin shu payt jikkak moʻysafid:



 Qoʻyib yubor, bolapaqirni, – dedi oraga tushib. – Oʻrtoq Stalin aytdiku, bola otasi uchun javob bermaydi, deb? Gunohi nima bu norasidaning!

Yosh kotib qovogʻidan qor yoqqanicha bir qariyaga, bir charm paltoli harbiyga qaradi-da, qoʻlimni qoʻyib yubordi va: «Yoʻqol koʻzimdan!» – deb oʻshqirdi.

Shandan keyin nima bo'ldi, nima qo'ydi – hozir esimda yo'q, faqat kotibning omburdek metin changalidan chiqdim-u tomog'imni g'ip bo'qqan ko'z yoshini yuta-yuta, saf-saf bo'lib o'tayotgan baxtli tengdoshlarim yonidan katta ko'cha tomon otildim...

* * *

Nihoyat, dadamlar bilan vidolashadigan kun ham keldi. Vidolashishga uch kishiga ruxsat berishgandi: oyimlar, katta opamlar va menga! Shu boisdan bo'lsa kerak, qarindosh-urug'lardan hech kim, na dadamlarning ukalari, na yor-do'stlari — hech kim kelmadi.

Oyimlar bilan opamlar kechasi uxlashmay, dadamlar uchun bugʻdoy talqon, soʻk talqon va yana allaqanday narsalar tayyorlashdi. Chunki bu payt dadamlar ozod boʻladi degan umid ojiz miltirab turgan shamday soʻngan, u kishini uzoqlarga olib ketishlari chamasi oyimlarga ayon edi.

Ertalab toʻrva-xaltalarni koʻtarib qamoqxonaga qarab yoʻl oldik. Bu safar bizni koʻp kuttirishmadi. Beliga choynakday toʻpponcha taqib olgan harbiy bizni uzun, tor, nimqorongʻi yoʻlakdan ichkariga boshladi. Yoʻlakning yarmiga borganda oʻng qoʻldagi eshikni ochib, bizga yoʻl berdi. Chogʻroqqina toʻrtburchak xonaning toʻridagi stol oldida gimnastorka kiygan, sochlari oppoq bir odam allanimalarni yozib oʻtirardi.

Dadamlar burchakda kursida oʻtirgan ekanlar (men avval u kishini tanimay qolibman!), biz kirishimiz bilan dik etib oʻrindan turdilar. Azaldan barvasta, toʻladan kelgan, novcha odam bir-ikki oy ichida choʻpday ozib, lunjlari ichiga botgan, koʻzlari kirtayib, qiygʻir burni soʻrrayib qolgandi.

Yana qamalgan kechasidagidek yigʻi-sigʻi boshlandi. Oyimlar-ku, yuzini roʻmoliga yashirib, jimgina titrab yigʻlar, lekin opamlar... dadamlarning boʻyinlariga osilib olgan opamlarning faryodi tor xonani zir titratardi.

Keyinchalik marhum oyimlar koʻp aytguvchi edilar:

 Noinsoflar jilla qursa yarim soat ham fursat bermadilar. Dadang shoʻrlikning diydoriga ham toʻymadik. Bergan chorak soatlari koʻz ochib yumguncha oʻtib ketdi...

Bu safar chorak soat davom etgan vidolashuv davomida dadamlar biror marta Stalinning nomini tilga olmadilar, qamalgan kunlaridagidek: «Men partiya oldida gunohkor emasman! Oʻrtoq Stalin barhayot ekan, meni oyoqosti qilib qoʻymaydi!», – demadilar. Bil'aks, bir necha marta koʻzlariga yosh olib:

 Meni kechir, Gulshan. Ayol boshing bilan besh bolani qanday boqasan – aqlim bovar qilmaydi. Endi yuz koʻrishishimizga ham koʻzim yetmaydi, kechir meni! – dedilar.

Har safar dadam shunday deganlarida stolga mukka tushib, allanimalarni yozayotgan kishi:

– Hoy, Yoqubov! – derdi qogʻozdan bosh koʻtarmay. – Senga nima boʻldi? Yosh bolamisan, Yoqubov!

Nihoyat, bu odam qarshisidagi devorga osilgan almisoqdan qolgan devor soatiga koʻz tashlab:

- Fursat tugadi, Yoqubov. Endi xayrlashinglar! - deb buyurdi.

Opamlarning nidosi battar avjiga chiqdi. Oyimlar ozgina pul olib kelgan ekanlar, dir-dir titragan qoʻllari bilan dadamlarga tutdi, dadamlar esa:

- Bolalaringga yarat, Gulshan!- deb yolvorar edilar. Lekin oyim koʻnmay, axiri pulni olishga majbur qildilar.

Oyimlar keltirgan pul bor-yoʻgʻi ellik soʻm boʻliboʻnta besh soʻmlikdan iborat edi. Dadamlar pulni qiynala-qiynala olarkanlar, besh soʻmliklardan birini menga uzatdilar. Oyimlar pulni mendan olib, dadamlarga qaytarib bermoqchi boʻlgandilar, dadamlar koʻnmadilar, kaftlarini boshimga qoʻyib:

 Sen endi bu uydagi eng katta erkaksan, bolam, - dedilar va yana koʻziga yosh oldilar. - Oyingga yordamlashib, ukalaringga qarab turgin, bolam!

Dadamlar shunday deb besh soʻmlikni choʻntagimga soldilar.

- Umrimda bir marta senga muzqaymoq olib bermoqchi boʻlgan edim,



bu ham nasib etmadi. Bu pulga daftar-kitob ol! Qolganiga muzqaymoq olib ye, oʻgʻlim!..

Boyadan beri oyim va opamlarga qoʻshilib yigʻlashni oʻzimga ep koʻrmay serrayib turgan bola, toʻsatdan, xuddi dadamlarni olib chiqib ketayotgan paytlaridagidek yuragimda nimadir darz ketganday tuyuldi-yu NKVD xodimining maqtovlari ham, aksilinqilobchilar kirdikorlarini fosh etgan hushyor pioner ekanligim ham — bari yoddan chiqib, «Dadajon!», degancha otamning tizzasini quchoqlab oldim.

«Muzqaymoq» hikoyasi haqida

XX asr mamlakatimiz hayotida ham fojialar, ham buyuk oʻzgarishlar asridir. Biz mustaqil davlatga aylangunimizga qadar ne-ne xoʻrlik va qiyinchiliklarni boshdan kechirdik. Millionlab asl insonlar arzimagan sabablar, tuhmat, adolatsizliklar tufayli tazyiqlarga uchragan, qamalgan va hatto otib, yoʻq qilib yuborilgan davrlar boʻldi. Bir millat vakili boʻlib, bir mahallada yonma-yon yashab, bir-biriga yov, dushmanga aylangan odamlar ham boʻldi. Ana shunday jamiyat barpo etib, kishilarni qoʻrquvga, vahshatga solib turgan siyosat shoʻrolar zamonida necha oʻn yillar hukm surdi. Bu davr insoniyat tarixiga Stalin qatagʻonlari davri boʻlib kirdi.

Aziz oʻquvchi! Hali Siz Abdulla Qodiriy, Abdurauf Fitrat, Abdulhamid Choʻlpon, Usmon Nosir kabi xalqimizning ulkan ijodkorlari hayoti va ijodi bilan tanishganingizda, qatagʻon siyosati va uning yovuzliklari haqida yana koʻp ma'lumotlarga ega boʻlasiz. Bu siyosat oʻz haq-huquqini tanishda, ozodlik, erkinlikni istagan, pok, halol yashagan har bir ziyoli, har bir fuqaroga qarshi qaratilgan edi.

Adib Odil Yoqubov ham oʻz otasi misolida qatagʻon davrlarining dahshatlari aks etgan bolalik xotiralarini qalamga oladi. Mehnatkash, halol, sadoqatli otasining oʻz xizmatlari uchun tuhmatga uchrab, qatagʻon qilingani voqealarini tasvirlaydi.

Boʻlajak yozuvchi oʻn yashar chogʻlarida otasining qoʻrquv va xavotir ichida yurgan kezlarining guvohi boʻlgan. Otasi shoʻro idoralarida katta-



katta lavozimlarda ishlagan, buvalari Yoqubshayx soʻfilik qilgani uchun oʻgʻli urilib, tuman moliya boʻlimiga kichik bir vazifaga tushirib qoʻyilgan. Qatagʻon siyosati avjiga chiqayotgan pallalar. Barcha tahlikada, bir-biridan gumonsiragan davrlar. Ana shunday kunlarning birida universitetda birga oʻqigan oʻrtoqlari mehmon boʻlib turgan bir paytda ota hibsga olinadi. Yozuvchi ana shu manzarani tasvirlar ekan, bir tomonda dahshatdan hay-kalday qotib qolgan otasi, dod-faryod solib yigʻlayotgan opasi, burchakka tiqilishib, qoʻrquvdan bir-birining pinjiga kirib olgan ukalari holatlarini koʻrsatib, qatagʻon davrining naqadar qoʻrqinchli bir hodisa ekanini ta'kidlaydi.

Hikoyada yozuvchi go'yo yaqin do'st, qo'shni bo'lgan kishilarning dushmanga aylanishi, yaxshilik kutmagan odamlardan insoniy, samimiy munosabat koʻrganlarini tasvirlab, qaltis, sinovli holatlarda kishilarning asl mohiyati namoyon bo'lishini, kishining sirtiga qarab emas, qilgan ishi, ogʻir vaziyatlarda oʻzini qanday tuta olganligiga qarab baho berish lozimligini uqtiradi. Bu fikrlar xushsurat yigitcha - shahar komsomol qo'mitasi kotibining yozuvchi otasiga qamalgunicha xushomad qilib yurib, musibatdan soʻng yovga aylanib, hatto bolani tahqirlashi, «Qashqirdan tugʻilgan qashqircha» deb haqoratlashi parchasida yoki yosh tatar o'qituvchining bolaga achinib, chekka-chekkada boshini silab, indamay hamdardlik bildirishi lavhalarida yaqqol aks etadi. Davr shunday yovuz ediki, hatto bolani otaga dushman qilib qo'yar edi. Sho'ro zamonida o'z otasini dushman sanab, qizil askarlarga tutib bergan Pavlik Morozov degan bola qahramonga aylantirilib, barcha maktab o'quvchilariga ibrat qilib ko'rsatilar edi. Ana shunday targ'ibot-tashviqotlar ta'sirida asl voqelikni tushunmay yurgan hikoya qahramoni tintuv chogʻi oʻz uyida kitob javoni qulfini ochib berib o'zini Pavlik Morozov deb maqtaganlaridan rus shoiri Pushkin surati tushirilgan daftardan dushmanlar so'zlarini qidirib, maqtov eshitgisi keladi. «Xalq dushmanlari» sifatida qancha-qancha begunoh yurtdoshlarini abgor qiladigan mitinglarga chorlovchi nogʻora gumburi-yu, karnay-surnay sadolariga mahliyo boʻlib, uni chalayotgan pionerlar ketidan ergashib boradi. Bu tasvirlar orqali

yozuvchi inson ichki dunyosining naqadar murakkabligini, yolgʻon aqidalar, gʻoyalarga ishontirilgan odam oʻz yaqinlarining dushmaniga aylanishi mumkinligini, ma'naviy tanazzulga olib boradigan holatlarni koʻrsatib beradi. Ayni chogʻda oʻgʻliga muzqaymoq olib berolmay, armonda qolgan otaning haqsizlik, tuhmatlar tufayli naqadar ojiz, gʻarib bir ahvolga tushishi, adolatsizlik hukm surgan jamiyatning qanchalar insonlar qalbini zada qilganini, tasvirlash orqali yozuvchi mustaqillikning qadriga yetish, oʻshanday yovuzliklar boʻlmasligi uchun kurashishi, mehr-oqibat, adolat gʻoyalari barqaror boʻlishiga erishish fikrini ilgari suradi. Oʻquvchilarni ibratli xulosalar chiqarishga undaydi.

Savol va topshiriqlar

- 1. Yozuvchi Odil Yoqubovning hayoti va ijodini gapirib bering.
- 2. Odil Yoqubovning nasriy asarlaridan qaysilarini bilasiz?
- 3. Adibning tarixiy mavzularga bagʻishlangan qanday romanlari bor?
- 4. «Muzqaymoq» hikoyasida qaysi davr voqealari aks etgan?
- 5. «Qatagʻon davri» qurbonlari boʻlgan qaysi ijodkorlarni bilasiz?
- 6. Hibsga olingan otaning holatini soʻzlab bering.
- 7. Yosh qoʻshni yigit kotibning xatti-harakatini qanday izohlash mumkin?
- 8. Nogʻora sadolari ostida oʻtadigan mitinglardan maqsad nima ekanini aytib bering.
- 9. Hikoya qahramoni nima uchun maqtov eshitadi?
- 10. Hikoyadan kelib chiqadigan xulosalarni aytib bering.
- 11. Mustaqillik tufayli yurtimizda qanday oʻzgarishlar roʻy berdi?



Erkin VOHIDOV (1936-yilda tugʻilgan)



Oʻzbekiston xalq shoiri Erkin Vohidov 1936-yil 28-dekabrda Fargʻona viloyatining Oltiariq tumanida muallim oilasida tugʻilgan. Uning otasi Ikkinchi jahon urushidan ogʻir jarohat olib qaytadi va 1945-yilda vafot etadi. Oradan bir yil o'tgach onasi ham dunyodan o'tadi. O'n yoshga yetaryetmas ham ota, ham onadan ajrab qolgan yosh Erkinni togʻasi oʻz tarbiyasiga oladi.

Toshkentga – togʻasinikiga kelgan shoir qunt bilan oʻqishlarini davom ettiradi. Unda kitobga, adabiyotga havas juda erta uygʻondi. Shoir Gʻayratiy tomonidan O'quvchilar saroyida tashkil etilgan adabiy to'garak uning bu havasini yanada alangalatib yubordi. O'n besh-o'n olti yoshlaridanoq tuppa-tuzuk she'rlar yoza boshladi.

Maktabni oltin medal bilan bitirgan E. Vohidov Toshkent davlat universiteti (hozirgi Mirzo Ulug'bek nomidagi O'zbekiston Milliy universiteti) filologiya fakultetiga oʻqishga kiradi. Endilikda u adabiyotni tom ma'noda chuqur o'rganishga kirishadi. Ham o'zbek mumtoz adabiyotini, ham jahon adabiyotini sinchiklab o'rganar ekan, o'zining ijodi ham takomillasha boradi. Buyuk ijodkorlarning asarlarini berilib o'qir ekan, ulardan badiiy mahorat sirlarini, soʻzga mas'uliyat hissini, soddalik va ravonlikni o'zlashtirishga intiladi. Shuning uchun ham uning «Tong lavhasi», «Kamtarlik haqida», «Buloq», «Sevgi», «Ona tuproq» kabi qator

she'rlaridagi chuqur ma'no go'zal ifodalar, ajoyib tasvirlar bilan uyg'unlashib ketgan. Masalan, shoir turmushdagi oddiygina holatdan – choy suzilayotganda choynakning piyolaga «egilishi», choy ichayotganda inson piyolaning peshonasidan «o'pishi»dan ajoyib she'r yaratadi:

Garchi shuncha magʻrur tursa ham, Piyolaga egilar choynak. Shunday ekan, manmanlik nechun, Kibr-u havo nimaga kerak?

Kamtarin bo'l, hatto bir qadam O'tma g'urur ostonasidan. Piyolani inson shuning-chun O'par doim peshonasidan.

Erkin Vohidov universitetni tugatgach, uzoq yillar nashriyotlarda ishladi, oʻzbek va jahon adabiyotining eng sara asarlarini chop qilishda faol ishtirok etdi. 1964-yilda yaratilgan «Nido» dostonidan soʻng birin-ketin «Orzu chashmasi», «Palatkada yozilgan doston», «Quyosh maskani», «Ruhlar isyoni» kabi ajoyib dostonlar yozdi.

Shoir ijodini tarjimasiz tasavvur etish qiyin. U koʻplab mashhur jahon shoirlarining asarlarini oʻzbek tiliga tarjima qildi. Xususan, E. Vohidov tarjima qilgan rus shoiri Sergey Yesenin she'rlari, nemis shoiri Gyotening «Faust» asari oʻzbek adabiyotida katta hodisa boʻldi. Shoir yangidan tashkil etilgan «Yoshlik» jurnalining dastlabki bosh muharriri sifatida yoshlarning adabiyotga kirib kelishi uchun katta jonbozlik koʻrsatdi.

E. Vohidovning ilk toʻplami 1961-yilda «Tong nafasi» nomi bilan chop etilgan edi. Shundan soʻng birin-ketin «Qoʻshiqlarim sizga», «Yurak va aql», «Mening yulduzim», «Nido», «Lirika», «Palatkada yozilgan doston», «Yoshlik devoni», «Charogʻbon», «Dostonlar», «Muhabbat», «Hozirgi yoshlar», «Tirik sayyoralar», «Iztirob» kabi asarlari bosilib chiqdi.

E. Vohidov faqat she'r va dostonlar yozibgina qolmay, boshqa janrlarda ham barakali ijod qildi. U dramaturgiya sohasida ham o'z qalamini sinab, «Oltin devor», «Istanbul fojiasi» kabi dramalar yaratdi. Ayniqsa, «Oltin

devor» komediyasi uzoq yillar oʻzbek teatri sahnasidan tushmay keldi. Bu komediya jahonning qator tillariga tarjima qilinib, teatrlarda sahnalashtirildi.

E. Vohidov ellik yildan koʻproq davr mobaynida ijod etgan asarlarini toʻplab, «Ishq savdosi», «She'r dunyosi», «Umr daryosi» va «Koʻngil nidosi» nomli toʻrt jildlik saylanmasini oʻquvchilarga taqdim etdi. Bu asarlar faqat shoir qalbining, kechinmalarininggina emas, balki xalq hayotining ham koʻzgusidir.

Shoir asarlaridan hayotga, goʻzallikka muhabbat, yovuzlikka, tubanlikka nafrat yaqqol sezilib turadi. Uning ilk dostoni — «Nido»da insoniyatga ogʻir judoliklar, bitmas jarohatlar keltiradigan urush qattiq qoralansa, keyinroq bitilgan «Ruhlar isyoni» dostonida xalqlar, millatlar, dinlar oʻrtasidagi nizolar bashariyatga naqadar katta falokatlar olib kelishi teran tasvirlangan. Bu esa shoir ijodida insonparvarlik hamisha bosh mavzu boʻlib kelganligini koʻrsatadi.

Erkin Vohidov jamoat arbobi sifatida ham hamisha el-yurt xizmatida bo'lib kelmoqda. U Senat a'zosidir.

Erkin Vohidovning el-yurt va adabiyot oldidagi xizmatlari inobatga olinib, «Buyuk xizmatlari uchun» ordeni va «Oʻzbekiston Qahramoni» unvoni bilan taqdirlandi.

Savol va topshiriqlar

- 1. Erkin Vohidovning bolaligi haqida nimalarni bilasiz?
- 2. E. Vohidovning shoir bo'lib yetishishiga qanday omillar sabab bo'ldi?
- 3. Shoirning qanday to'plamlari chop etilgan?
- 4. 5-sinfda E. Vohidovning «Oʻzbegim» she'ri bilan tanishgan edingiz. Shoir va uning tengdoshlari ijodidagi ana shu mavzuga yaqin boʻlgan boshqa she'rlarni sanab berishga harakat qiling.
- 5. E. Vohidovning ijtimoiy faoliyati haqida soʻzlab bering.
- 6. Shoir she'riyatdan boshqa yana qaysi janrlarda qalam tebratgan?

NIDO1

(bag'ishlov)

Haygiraman, Togʻlar bagʻridan Gumburlagan sado keladi, Ona-Yerning otash qa'ridan «O'g'lim!» degan nido keladi. «O'g'lim!» Vujudimni chulgʻar alanga, Bo'g'zimga tiqilar hayajon. - Mana men, o'g'lingiz, Dardli olamga Sizdan tanho yodgor, So'ylang, otajon! So'ylang, bir daqiqa quloq solayin, Ovozingiz tinglab to'yolmaganman. Bir marta yoʻqotib topolmaganman, Xayolimda tiklab olayin. Otajon! Men axir qutlug' bu so'zni Yigirma yil olmadim tilga, Yigirma yil saqladim dilda. Armonli o'g'lingiz tinglaydi sizni, So'ylang, eshitaman. Vujudim tilka, Yuragimni yoqar oʻtli iztirob, Ammo koʻzlarimda bir tomchi yosh yoʻq. Bag'rim o'vib, Bu kun menga bermoqda azob Sizning ko'ksingizni teshgan qora o'q.

¹ Qisqartirib olindi.

Silqib oqayotir Koʻkragimdan qon. Qalbim oʻrtamoqda soʻngsiz armonim... Yurak qonim bilan bitgan dostonim Sizga bagʻishladim, Otajon!

* * *

Xayolning tumanli pardasi aro
Yillar koʻz oldimda charx urayotir.
Qishloq koʻchasidan zanjiday qaro
Olov bolaligim yugurayotir.
Dunyo qaygʻusiga boʻlmagan oshno,
Qahqah urayotir,
Barq urayotir.
Bilmas, boshi uzra bulutli samo
Chaqmoq chaqayotir,
Guldurayotir.
Bilmas, yaralangan bu majruh dunyo
Qasos soʻrayotir,
Bong urayotir...

Qadamlar,
Qadamlar,
Ogʻir qadamlar...
Etiklar zarbidan titraydi tuproq,
Qayerga ketmoqda shuncha odamlar?
Nahotki, yoʻllari shunchalar yiroq!
– Ana, koʻryapsanmi?
Mening dadamlar!
Dada!!!
Ovozim hech chiqmaydi biroq –
Yuguraman – ortga ketar qadamlar,
Yigʻlayman – koʻzimga kelmaydi namlar,



Murg'ak vujudimda faqat zo'r titroq!
Bo'g'zimda alamlar,
Achchiq alamlar,
Yo'lning o'rtasida turibman,
Shu choq –
Poyezd qichqiradi,
To'xtang, odamlar!
Qayga ketmoqdasiz?
Qani dadamlar?!
Tepamda yonadi zangori chiroq...

Cho'chib uyg'onaman, Onam qoshimda. Mehribon qo'llari Otash hoshimda: - Nega yigʻlayapsan, Yolg'izim, qo'zim? Tun uzog, uxlay gol, Koʻzlaringni yum. Orom ol, men senga Allalar aytay. Tongda peshonangdan O'pib uyg'otay. Ana, derazangga Qoʻnibdi hilol. Boshingga egilib So'rmogchi savol. Sening kiprigingga Sochmon bo'lib zar, Hilol tegrasida O'ynar yulduzlar. Men sening baxtingman Deganday go'yo



Imlab chorlamoqda Yoqut Surayyo. Senikidir bular. Seniki bari. Seniki osmonning Zar qandillari. Somonchining yo'li -Sening yo'llaring, Uzatsang Zuhroga Yetar qo'llaring Ulg'ay, bolajonim, Ulgʻaygin tezroq. Sening yo'llaringga Yulduzlar mushtoq. Hozircha orom ol, Yolg'izim, qo'zim. Tun uzoq, uxlay qol, Koʻzlaringni yum.

Olis sohillarda,
Ufqdan nari
O'lim sochmoqdadir
Yov quzgʻunlari.
O'lim sochmoqdadir
Elga beayov.
Shahar, qishloqlarni
Yutmoqda olov.
Oʻsha olis yurtda
Qon kechib hozir
Otang hayot uchun
Jang qilayotir.
Ellarning erk degan
Sof tilagi deb,



Jahonning nurafshon Kelajagi deb, Ofat solmasin deb Olamga gotil. Otang uzog yurtda Jang qilayotir. Sen uchun, men uchun, O'z uchun emas. Fagat o'zbek va yo Rus uchun emas. Butun Yer - undagi Bor aylod uchun. Dunyoda eng qutlug' E'tigod uchun Uzoq oʻlkalarda Oon kechib hozir Otang hayot uchun Jang qilayotir. Sen uxla, yolg'izim. Sen uxla, qo'zim, Bir nafas orom ol. Koʻzlaringni yum.

* * *

Sentabr tongi otdi.
Meni cheksiz quvonch bilan baxt uygʻotdi.
Koʻk jildimda alifbe va bir burda non,
Birinchi bor qadam qoʻydim maktab tomon.
Oʻyinlardan ancha erta toʻygan edim,
Kitoblarga barvaqt havas qoʻygan edim.
Yod bilardim alifbening harflarini,
Oʻqir edim informbyuro xabarini.
Juman «pochta» dadamdan xat keltirgan kun

Katta bayram boʻlar edi mening uchun. Oʻqir edim yuz hijjalab, yuz tutilib, Takrorlardim yirtilguncha xat titilib. Yayrar edim ma'nosini uqarkanman, Dadam xatin oʻqib savod chiqarganman.

Bu kun yana xat olganmiz,
Ajoyib xat,
Gospitaldan chiqqan emish sogʻ-salomat,
Boshidagi jarohati bitgan emish,
Hatto oʻrni bilinmasdan ketgan emish.
Berlin tomon tushar endi yoʻlim debdi.
Xat soʻngida yaxshi oʻqi, oʻgʻlim, debdi.
Shu kun tunda uch chiziqli daftarimga,
Oro berib katta-katta harflarimga,
Xira chiroq yorugʻida koʻz ishqalab —
Dadamga xat yozmoq uchun surdim qalam:

«Dadajon!
Men sizni juda sogʻindim.
Sogʻindim ikkala koʻzim bilan teng.
Kelib qolarmishsiz ertami-indin,
Ayam shunday dedi,
Rostmi shu, ayting?!
Dada,
U kun sizni tushimda koʻrdim.
Oq otda keldingiz,
Soʻradingiz suv.
Men buni ayamga gapirib berdim.
Dadang keladi, deb aytdi,
Rostmi shu?..

Rustamning akasi urushdan qaytdi, Qoʻltiqtayogʻi bor, Bir oyogʻi yoʻq. Rustam avtib berdi: Ataka payti Tizzasidan olib ketgan emish o'a... Xol aka qaytgandi uyga to'satdan. O'g'li, dadajon, deb chopib kelibdi. Ota quchay desa qo'li yo'q ekan, Tik turgan joyida yigʻlayveribdi. Darsga kelmay qoldi Tunov kun Tal'at. Muallim urishsa turaverdi jim. Dadasidan kelgan ekan qoraxat. Hammamiz vigʻladik. Hatto muallim... Dadajon! Sizga o'q tegmasin hecham, Men uchun ham tezroq qayting salomat, Buvim aytgan, Agar men tilak qilsam, Tilagim bo'larmish doim ijobat. Rost aytaman, Sizni juda sog'indim, Sog'indim ikkala ko'zim bilan teng, Kelib golasizmi, ertami-indin? Kutaman. Dadajon, albatta keling».

Bobolarning hikmati
Hayotga yorugʻ yoʻldir.
Otang bolasi boʻlma,
Odam bolasi boʻl, der.
Bu soʻzni ilk bor menga
Oʻrgatgan otam edi.
Men otam farzandiman,
U esa odam edi.



Oirq birinchi yillarning Dahshati koʻz oldimda, Go'dak edim, otamni Kuzatganim yodimda. U koʻplar baxti uchun Kirar ekan zo'r jangga, Onam boshimni silab. O'xsha, degan otangga. Mening mardlik maktabim Jonfido otam edi. Men otam farzandiman. U esa odam edi. Men otam bosib o'tgan Qonli yoʻlni oʻtmasman. Ammo shonli hayotin Bir umr unutmasman. Ona-Vatan ko'ksiga Qalqon bo'lgan otamning, Koʻplar baxti yoʻlida Qurbon bo'lgan otamning -Aziz nomin qalbimda Vijdonimdek sagladim. Uning o'lmas ruhini Shod etmogdir magsadim. Umrimni fido etav U jon bergan Vatanga. El mendan rozi bo'lsin O'xshabsan, deb otangga.

* * *

Tengdoshim, Asrdosh birodar! Kel, bir on jim oʻyga choʻmaylik.



Bu yerda

yotibdi

fidolar.

Kel, uni

gullarga

ko'maylik.

Bu yerda

baxt bo'lsin.

nur bo'lsin,

Bo'lmasin,

qora tun

zulmati.

Bu yerda

yuraklar

hur boʻlsin.

Qaytmasin,

u kunlar

dahshati.

Tengdoshim,

asrdosh birodar!

Uygʻoq boʻl,

hushyor boq

olamga.

Bu yerni

quchmasin

alanga,

Qabrida

tinch yotsin fidolar.

Eshit,

ingrayapti

Ona-Yer

Qoʻltiqtayoqlarning zahmidan,



Bu tuproq

yuragi

poradir

Atom zontlarining

vahmidan.

Eshit,

chorlayapti

Ona-Yer,

Ko'ksida

olovli

oh-faryod.

Asrdosh birodar,

qoʻlni ber,

Kel, Yerga

qilaylik

qasamyod:

Bo'lurmiz

gal kelsa

har birimizga

Tinchlik janggohining

fidosi.

Bu senga,

bu menga,

bu bizga

Yigirmanchi asr nidosi.

1964

«Nido» dostoni haqida

Urushlar qadim-qadimdan insoniyat boshiga katta kulfatlar solib kelgan. Urush tufayli qanchadan-qancha odamlar qurbon boʻlgan, ayollar tul, bolalar yetim qolgan, gullab-yashnab yotgan shahar-u qishloqlar kultepaga aylangan. Shuning uchun ham yuragida odamzodga mehr-



muhabbat boʻlgan har qanday inson urushni qattiq qoralagan, hamisha unga qarshi chiqqan. Tinchlik uchun kurashda, ayniqsa, olimlar, san'atkorlar, shoir-u yozuvchilarning xizmati kattadir. Chunki ular yaratgan asarlardan, ilgari surgan gʻoyalardan millionlab kishilar bahramand boʻladi.

Afsuski, fan-texnika rivojlanib, qurol-yarogʻlar takomillashib borgani sari urush qurbonlarining ham soni ortib, u keltirgan vayronkorliklarning koʻlami kengayib bordi. Eng oxirgi – Ikkinchi jahon urushida ellik milliondan ortiq odam halok boʻldi.

Erkin Vohidovning «Nido» dostoni ham xuddi ana shu urush va u olib kelgan kulfatlar, u yetkazgan jarohatlar haqidadir. Bu doston qisman avtobiografik xarakterga ega, ya'ni shoirning tarjimai holi bilan bogʻliqdir. Chunki uning ayni qalam ushlab, savod chiqarish davri ana shu urush villariga toʻgʻri keladi.

Doston yigirma yil avval urushda halok boʻlgan otasini xotirlayotgan farzandning xayollari, iztiroblari bilan boshlanadi. Oradan yigirma yil oʻtib ketgan boʻlsa-da, hamon uning jarohatlari bitgani yoʻq. Hamon yer qa'ridan «Oʻgʻlim!» degan nido yangrab turadi. Bu nidoning ma'nosi nima? Shu oʻrinda shoir olis bolalik yillarini eslab ketadi. Koʻz oldidan toʻp-toʻp boʻlib jangga ketayotgan odamlar oʻta boshlaydi. Yoshgina bolakay hali urush nima ekanligini toʻliq tasavvur qila olmaydi. Biroq koʻp oʻtmay bu bolakay koʻcha changitib yurgan olis, sokin qishloqda ham urush oʻz fojiali qiyofasini namoyon eta boshlaydi:

Rustamning akasi urushdan qaytdi, Qoʻltiqtayogʻi bor, Bir oyogʻi yoʻq. Rustam aytib berdi: Ataka payti Tizzasidan olib ketgan emish oʻq...

Yoki urushning ana shu qishloq boshiga solgan yana bir dahshati:

Xol aka qaytganda uyga toʻsatdan, Oʻgʻli, dadajon, deb chopib kelibdi. Ota quchay desa qoʻli yoʻq ekan, Tik turgan joyida yigʻlayveribdi. Rustamning akasi bilan Xol aka-ku nogiron boʻlishsa ham qaytib kelishibdi. Ammo el-yurtning tinchligi, farzandlarning baxtiyor kelajagi deb jon bergan insonlar qancha!

Darsga kelmay qoldi tunov kun Tal'at, Muallim urishsa, turaverdi jim. Dadasidan kelgan ekan qoraxat, Hammamiz yigʻladik, Hatto muallim...

Bu urush har bir xonadonga kulfat olib kelgan, har bir qalbda bitmas jarohat qoldirgan. Lekin urush degan balo hali yer yuzidan butunlay supurib tashlangani yoʻq. U goh terrorchilik shaklida, goh milliy va diniy adovatlar shaklida oʻz sharpasini koʻrsatib turibdi. Agar odamzod ogoh boʻlmasa, ona zamindagi barcha tinchliksevar kuchlar birlashib urushga qarshi chiqmasa, bu fojia avvalgilaridan ham dahshatliroq boʻlib takrorlanishi mumkin. Dostonda tinchlik uchun kurashib jon berganlar nidosi, ularning ortida qolgan farzandlar, onalar, chol-u kampirlar nidosi umumlashib davr nidosiga – tinchlik uchun kurash nidosiga aylanib ketadi:

Boʻlurmiz
Gal kelsa
har birimizga
Tinchlik janggohining fidosi.
Bu senga,
Bu menga, bu bizga
Yigirmanchi asr nidosi.

Ana endi doston nomidan – «Nido»dan anglashilgan ma'no ma'lum bo'ldi. Demak, tinchlik uchun, insoniyatning baxtli kelajagi uchun kurash nidosi XXI asrda ham, undan keyin ham, to Yer yuzida abadiy tinchlik o'rnatilgunga qadar har bir insonning qalbida jaranglab turmog'i kerak.

Savol va topshiriqlar

- 1. «Nido» dostonida qaysi urush tasvirlangan va bu urush insoniyat boshiga qanday falokatlar olib kelgan?
- 2. Urush tugaganidan soʻng oradan yigirma yil oʻtgan boʻlsa ham shoir nega u yillarni alam bilan eslayapti?
- 3. Urushning oddiy bir qishloq boshiga solgan fojialari qaysi misralarda tasvirlangan?
- 4. Urush jangda halok boʻlgan qurbonlardan tashqari yana qanday kulfatlar olib kelgan?
- 5. Doston orqali shoir aytmoqchi boʻlgan eng asosiy muddao nima?
- 6. Urushga qarshi oʻqigan asarlaringiz, koʻrgan film va spektakllaringiz haqida hikoya qilib bering.
- Bugungi kunda tinchlikka tahdid solib turgan qanday yovuz kuchlar borligini va ularga qarshi nima qilish kerakligini soʻzlab bering.
- 8. Dostondan oʻzingizga ma'qul boʻlgan parchani yod oling.





Oʻtkir Hoshimov katta iste'dod egasi. Adib oʻndan ortiq roman va qissa, koʻplab ta'sirchan hikoyalar, bir necha sahna asarlari muallifi. U dastlabki yirik asari bilanoq ulkan adibimiz Abdulla Qahhorning nazariga tushgan, allomadan «Sof, samimiy, tabiiy, iliq, rohat qilib oʻqiladigan asar» yozgani uchun maqtov olgan yozuvchi.

Oʻtkir Hoshimov 1941-yilda Toshkentning Doʻmbirobod mahallasida tugʻilgan. Ijodini oʻquvchilik chogʻlarida boshlagan. Dastlabki kitobi esa talabalik yillarida chop etilgan. Adib asarlarining hayotiyligi, oʻquvchiga tez ta'sir etishi uning tarjimai holi bilan bogʻliq. Darhaqiqat, yozuvchi yoshligidan ijodiy ishni amaliy mehnat bilan barobar olib borgan. Uning hayot yoʻliga diqqat qiladigan boʻlsak, nashriyotda xat tashuvchi, musahhih, muxbir, gazetada boʻlim mudiri, nashriyotda va jurnalda bosh muhartir boʻlib ishlaganini koʻramiz.

Adibning «Urushning soʻnggi qurboni», «Muhabbat» kabi koʻplab hikoyalari, «Nur borki, soya bor», «Ikki eshik orasi», «Tushda kechgan umrlar» nomli romanlari, «Odamlar nima derkin», «Shamollar esaveradi», «Ikki karra ikki besh», «Bahor qaytmaydi», «Dunyoning ishlari» qissalari mamlakatimizda va chet ellarda sevib oʻqilmoqda. «Qatagʻon», «Inson sadoqati», «Toʻylar muborak» nomli dramalari respublikamiz teatrlarida sahnalashtirilgan. Bundan tashqari yozuvchining koʻplab axloqiy-ma'rifiy mavzudagi ssenariylari televideniyada ekranlashtirilgan.

Oʻtkir Hoshimov Hamza nomidagi respublika davlat mukofotining laureati (1986), Oʻzbekiston xalq yozuvchisi (1991) unvoni va «Buyuk xizmatlari uchun» ordeni sohibi.

Aziz oʻquvchilar! Siz bilan sevimli adibimizning «Urushning soʻnggi qurboni» hikoyasi haqida gaplashamiz va bu asarni toʻliq oʻqib chiqishni maslahat beramiz. Chunki asar urush haqida, urushning fojiali oqibatlarga olib kelishi haqida. Darhaqiqat, insoniyat tarixida eng dahshatli qirgʻinbarot — Ikkinchi jahon urushi millionlab kishilar yostigʻini quritishdan tashqari odamlar ongi, ruhiyatida ham yomon oʻzgarishlar yasadi. Ochlik, muhtojlik odamlarni asabiy, bir-biriga gʻanim qilib qoʻydi, ayrimlarni egri yoʻlga boshladi.

«Urushning soʻnggi qurboni» hikoyasi qahramoni Umri xola urush ketayotgan joylardan minglab kilometr uzoqda boʻlsa-da, halok boʻladi. Umri xola oʻlimi sabablarini asarni oʻqigach anglab olasiz.

URUSHNING SO'NGGI QURBONI

Shoikrom ayvon toʻridagi sandal chetida xomush oʻtirardi. Allaqachon bahor kelib kunlar isib ketganiga qaramay, hamon sandal olib tashlanmagani, ammo bu toʻgʻrida hech kim oʻylab koʻrmaganini u endi payqaganday gʻashi keldi. Boʻz koʻrpa ustidan yopilgan, shinni dogʻi tekkan quroq dasturxon ham, hozirgina goʻjadan boʻshagan sopol tovoq, bandi kuygan yogʻoch qoshiq ham uning koʻziga xunuk koʻrinib ketdi. Ammo beparvolik bilan qoʻl siltadi-yu, doʻppisini sandal ustiga tashlab yonboshladi.

Yarim kecha boʻlib qolgan, atrof jimjit. Faqat olislarda it uliydi. Ayvon toʻsinidagi uzun mixga iligʻliq lampochka xira nur taratadi. Chiroq atrofida oʻralashgan chivinlar bir zum tinmaydi. Hovlining yarmigacha ariq tortib ekilgan qulupnay pushtalari orasida suv yaltiraydi. Onda-sonda rang olgan qulupnaylar koʻzga tashlanib qoladi. Qayoqdandir shamol keldi. Hovli etagidagi yongʻoq shoxlari bir guvillab qoʻydi. Shoikrom uyqu elta boshlagan koʻzlari bilan oʻsha tomonga bir qarab qoʻydi-yu, ter hidi anqib turgan loʻlabolishga boshini tashladi. Shu ondayoq yana oʻsha tovoqqa, bandi kuygan qoshiqqa koʻzi tushib, tagʻin gʻashlandi. «Ziqna boʻlmay

o'l! – deb o'yladi xotinini so'kib. – Azaldan qurumsoq edi, zamon og'irlashgandan buyon battar bo'ldi».

Ichkarida chaqaloq yigʻladi. Beshikning gʻichirlagani eshitildi. Bola xuddi shuni kutib turganday, battar bigʻillay boshladi. Kattasi ham uygʻonib ketdi shekilli, qoʻshilishib yigʻlashga tushdi.

Shoikrom siltanib qaddini rostladi.

- Ovozini o'chir, Xadicha!

Ichkaridan xotinining beshikni mushtlagani, zardali tovushi eshitildi.

Ovozi oʻchsa koshkiydi! Toʻqqiz kechasida jin tekkan bunga! «Kambagʻalning ekkani unmaydi, bolasi koʻpayadi oʻzi, – deb oʻyladi Shoikrom ijirgʻanib. – Shu kunimdan koʻra urushga borib oʻlib keta qolganim yaxshiydi».

Uni urushga olishmadi. Toʻqimachilik kombinatida montyor yetishmasmidi yo oʻzi yaxshi ishlarmidi, harqalay, uni olib qolishdi. Shoikrom urushning boshlanishidan sal oldin uylangan edi. Urush boʻldi-yu, zamona oʻzgarib ketdi. Bir xil odamlar tirnoqqa zor. Uning xotini boʻlsa, yonidan oʻtib ketsa ham boshqorongʻi boʻlaveradi. Xudo bergandan keyin tashlab boʻlarmishmi, deb ketma-ket uchta qiz tugʻib berdi. Urushning qora qanoti uzoqlab ketgan boʻlsayam, erta-indin Gitlerning toʻngʻiz qoʻpishi koʻrinib qolgan boʻlsayam, hamon uning soyasi odamlar boshiga koʻlanka tashlab turibdi. Hali u qoʻshninikida aza ochiladi, hali bu qoʻshninikida.

Hovli etagidagi pastak eshik gʻiyqilladi. Shoikrom kafti bilan koʻzini chiroqdan pana qilib qaradi-yu, shu tomonga kelayotgan onasini koʻrdi. U uylangandan keyin otadan qolgan hovlini oʻrtadan ikki paxsa devor olib boʻlishgan. Bungayam bir chekkasi Xadichaning injiqligi sabab boʻlgan edi. Har xil ikir-chikir gaplar chiqavergandan keyin Umri xola roʻzgʻoring boshqa boʻlsa, oʻzingga qayishasan, deb ularning qozonini boshqa qilib berdi. Oʻzi kichik oʻgʻli Shone'mat bilan narigi hovlida qoldi.

Rangi uniqqan chit koʻylak ustidan nimcha kiyib olgan Umri xola sharpaday unsiz yurib keldi-da, yapaloq musulmon gʻishtdan yasalgan zinadan ayvonga koʻtarildi.

- Hali uxlamovmiding? dedi u zinadan enkayib chiqayotganida surilib ketgan roʻmolini qayta oʻrab.
 - Koʻrmaysizmi, chaqaloq tinchitmayapti. Oʻzim itday charchaganman.



 Bola bo'lgandan keyin yig'laydi-da, – dedi Umri xola yupatuvchi tovushda. – Yotaver, bolam. – U yana o'sha unsiz odimlar bilan ichkari uyga kirib ketdi.

Qaynona-kelin bir balo qilib, bolalarni tinchitishdi. Keyin ikkovlari boshlashib chiqishdi. Xadicha bir qoʻlida choynak-piyola, bir qoʻlida zogʻora non keltirib dasturxon ustiga qoʻydi.

- Choy o'lib qopti, - dedi u zog'ora ushatarkan.

Umri xola Shoikromning yonboshiga, shaparak koʻrpacha¹ ga oʻtirdi.

- Ol oʻzing ham,— dedi u tomirlari boʻrtib chiqqan qoʻllari bilan sochilgan uvoqlarni yigʻib ogʻziga solarkan. Shoikrom onasining barmoqlari tars-tars yorilib ketganini endi payqadi. Ilgari ham shunaqamidi, yoʻqmidi, eslay olmadi.
- Ovqatingdan qoldimi? dedi u choʻkkalab oʻtirgancha choy quyayotgan xotiniga qarab.

Xadichaning uzunchoq sargʻish yuzi qizardi. Aybdordek mahzun tovushda uzr soʻradi.

- Qolmovdi-ya.

Shoikrom uning qizarganidan yolgʻon gapirayotganini sezdi. Kim bilsin, ertalab oʻziga isitib berish uchun shunaqa deyotgandir...

- Yoʻq, bolam, ovqat kerakmas, dedi Umri xola shoshilib. Xayol surib yotib uyqum oʻchib ketdi... U bir lahza jim qoldi-da, oʻziga gapirganday sekin qoʻshib qoʻydi. Payshanba kuni Komil tayibning uyiga boruvdim. Har kuni nahorga bir kosadan qoʻy suti ichsa, dard koʻrmaganday boʻlib ketadi, dedi.
- Hozir qoʻy suti qatta, dedi Xadicha. Sigir suti otliqqa yoʻgʻ-u...
 Shu paytda sigirimiz tugʻgan boʻlardi-ya.

Shoikrom xotinining gapini eshitmadi. Birdan uning koʻz oʻngida deraza ostida pastak shiftga tikilib yotgan ukasi jonlandi. Bir hovlida turib oʻn kundan buyon holini soʻramaganiga afsuslanib, ichidan xoʻrsiniq keldi. Shone'mat Rossiyadan koʻchirib keltirilgan zavod qurilishida ishlay boshlaganida uni urushga olishmaganidan Shoikrom suyungan edi. Gap boshqa yoqda ekan. Ukasi sil ekan. Shuning uchun qoldirishgan ekan.

¹ Shaparak koʻrpacha – qavilmagan koʻrpacha.



Mana, uch oydirki, yerga yopishib yotibdi. Shoikrom oʻn kuncha ilgari ishga ketayotib birrov kirib, ukasidan hol soʻragan edi. Oʻshanda Shone'matning qoq suyak boʻlib qolganini, katta-katta koʻzlari nimagadir chuqur ma'no bilan oʻziga tikilganini koʻrgan edi.

«Yaqinda oʻladi, – deb oʻyladi u onasining koʻziga qaramaslikka harakat qilib, – bari bir, oʻladi».

- Tuzukmi? dedi u hammasi uchun oʻzi aybdorday qovogʻini solib.
- Shukur, Umri xola qult etib yutindi. Hozir uxladi. Onasi shu topda chiqib ovora boʻlmagin, degan ma'noda gapirganini Shoikrom tushundi.
 - Ertalab xabar olaman, -dedi-u onasi oʻrnidan turganda.
- Sendan nega gina qilarkan, bolam, dedi Umri xola ayvon labida toʻxtab. Koʻrib turibdi-ku. Ertalab chiqib ketasan, yarim kechada qaytasan. Bukunlar unut boʻlib ketadi, bolam. Zinaga yechgan kalishining bir poyi toʻnkarilib qolgan ekan, Umri xola oyogʻining uchi bilan toʻgʻrilayman deb, ancha ovora boʻldi. Keyin zinalardan enkayib tushdi-yu, sharpaday unsiz yurgancha, hovli etagiga qarab ketdi. Pastak eshik gʻiyqillab ochilib yopildi.
- Padariga la'nat shunday turmushning! dedi Shoikrom bo'g'ilib. Keyin dasturxonni yig'ishtirayotgan xotiniga o'shqirdi.- Seniyam padaringga la'nat! Tumshug'ingni tagidan sigiringni yetaklab ketsa-yu, anqayib o'tirsang.
- Nega menga oʻdagʻaylaysiz? Xadicha tovoqni qoshiqqa urib, yigʻlamsiradi. – Nima, meniyam Ilhom samovarchining xotiniday soʻyib ketsinmidi? Siz kechalari smenda boʻlsangiz. Men uchta joʻja bilan jonimni hovuchlab oʻtirganim yetmaydimi?!

Shoikrom xotinini tarsakilab yubormaslik uchun yuzini oʻgirib, tishini gʻichirlatdi.

Suv qalqisa loyqasi yuqoriga chiqqanday, zamon qalqigandan buyon yomon koʻpaydi. Erta bahorda ularning tugʻay deb turgan sigirini oʻgʻirlab ketishdi. Oʻsha kecha Shoikrom tungi smenada edi. Kechasi bilan sharros jala quyib chiqdi. Shoikrom tong saharda bir nimani sezganday koʻngli gʻash tortib, uyiga qaytdi. Kelsa xotini, onasi, bolalari dod solib oʻtirishibdi.

Xadicha ogʻiroyoq emasmi, oʻzi bilan oʻzi ovora boʻlib, bilolmay qolibdi. Ertalab tursa, koʻcha eshigi lang ochiq, yongʻoqqa bogʻlogʻliq sigir yoʻq.

«Shu paytgacha sigir tugʻardi, ukamning ogʻziga aqalli bir kosa sut tutardim, – deb oʻyladi Shoikrom oʻkinib. – Qani oʻshalar qoʻlimga tushsa, chopib tashlardim».

Shundoq dedi-yu, egasi ming poylasin, oʻgʻri – bir. Mana, bundan ikki oycha ilgari Ilhom samovarchining xotinini pichoqlab ketishdi. Bechoraning bitta-yu bitta echkisi bor ekan. Hovliga oʻgʻri tushganini bilib, xotin shoʻrlik dod solibdi. Eri choyxonada ekan. Yugurib borib echkining arqonidan ushlaganmi, xullas, yetib kelgan qoʻni-qoʻshnilar qora qonga belanib yotganini koʻrishibdi.

- Shu kunda yana oʻgʻri oralab qoldi, dedi Xadicha koʻrpani qoqib tancha chetiga solarkan. – Qulupnay qizarmasdan bitta qoʻymay terib ketishyapti.
- Vahima qilma! dedi Shoikrom qovogʻini uyib. Bolalar terib yegandir. Oʻgʻri qulupnayga keladimi?
- Ogʻziga bir dona olgan boʻlsa, buyurmasin. Nega kelmas ekan? Bir hovuchini obchiqib sotsa, bir kosa joʻxori beradi. Ana, borib qarang, devorning bir cheti oʻpirilib yotibdi?!
- Vahima qilma! dedi Shoikrom yana gʻoʻldirab. Ammo bu safar oʻzining yuragi seskanib ketganini payqadi. Koʻnglida paydo boʻlgan gʻashlikni sezdirmaslik uchun hovliga tushdi. Sekin yurib qulupnay pushtalari oldiga keldi. Ariqlardagi suv chiroq nurida yaltirab, shamolda jimirlar, marjonday terilib rang olgan qulupnaylar suvga tegay-tegay deb turardi.

«Rost-da, – deb oʻyladi u pushtalar atrofida aylanarkan, – bir hovuch qulupnayga bir tovoq joʻxori beradi. Tansiq narsa... Xadicha yolgʻon gapirmaydi. Bolalar yegan boʻlsa, buyurmasin, deyapti-ku. Pishiq, yoʻlatmaydi...»

Bultur xotini shu qulupnay tufayli onasini qattiq ranjitgan edi. Umri xola bir hovuch qulupnay olgan ekan, Xadicha bolalarga non puli boʻlar deb ekkanmiz, norasidalarning nasibasiga tegmang, deb bobillab beribdi.

Shoikrom oʻshanda onasining yoz boʻyi kelini bilan yuzkoʻrmas boʻlib yurganini esladi-da, yana shu gap xayoliga keldi. «Xadicha anoyi emas, qurumsoq...»

U aylanib yongʻoq tagiga bordi. Bordi-yu, chindan ham oʻsha tomondagi devorning bir cheti oʻpirilganini, ostiga tuproq toʻkilganini koʻrib, yuragi orqasiga tortib ketdi. Nazarida devorning kemtik joyidan birov moʻralab turganday boʻldi. Yongʻoq shoxlarining shamolda vishillashi ham, oyogʻi ostida toʻkilib yotgan devor tuprogʻi ham shubhali, vahimali koʻrinib, darrov orqasiga qaytdi.

Xadicha allaqachon uyga kirib ketibdi. U chiroqni oʻchirib, sandal chetiga yotdi-yu, koʻnglidagi gʻulgʻula kuchayib ketaverdi.

Kuzda oʻzi bilan ishlaydigan yigitning hovlisidagi soʻritokdan gʻarq pishib yotgan uzumlarni oʻgʻirlab ketishganini esladi. Shamol borgan sari avjiga chiqar, hovlida yongʻoq barglari shovullab, shoxlari shubhali gʻichirlar, allakim ship-ship qadam bosib, ayvon labiga kelayotganday boʻlardi.

Xadicha rost aytadi. Oʻzi kechalari smenada boʻlsa, xotini uchta joʻja bilan jon hovuchlab tong ottirsa, oʻgʻriga oʻljaning katta-kichigi bormi? Qoʻliga nima ilinsa olaveradi-da. Bordi-yu, oʻzi yoʻgʻida uyini oʻgʻri bossa, xotini dod solsa, pichoqlab tashlasa. U yoqdan onasi chiqsa, uniyam pichoqlasa... «Vijdonsizlar! Odamlarning boshiga kulfat tushganidan foydalanib qoladiganlarni qirish kerak».

Birdan xayoliga kelgan fikrdan uning vujudi titrab ketdi. Qora kunlar uchun, ne umidlar bilan tishida tishlab yurgan gʻunajinini oʻgʻirlagani uchun, oʻlim toʻshagida yotgan ukasini oxirgi nasibasidan mahrum qilgani uchun, non puli boʻlar deb yetishtirgan mevasidan judo qilayotgani uchun shundoq qasos olsinki, oʻsha xudo bexabarlardan.

U oʻrnidan sakrab turib ketdi. Chiroqni yoqib, otilib hovliga tushdi. Hamon shamol oʻkirar, osmonning goh u, goh bu burchida chaqmoq yaraqlab, yongʻoq shoxlari shubhali gʻiyqillar, ammo endi bular uni qoʻrqitolmas edi. U yonboshidagi oshxonaga kirdi-yu, choʻntagidan gugurt olib chaqdi. Titroq qoʻllari bilan qorayib ketgan devordagi mixga iligʻliq turgan ikki oʻram simni oldi. Bir vaqtlar urushdan oldin u bu simlarni bazmlarga olib borar, odamlarning hovlisini mash'aladay yoritib berardi. Endiyam yaxshilikka xizmat qilsin!

«Menga desa otib yubormaydimi! - deb oʻyladi u ayvon labiga choʻq-



qayib oʻtirgancha usti yopiq simni ochiq simga ildam ularkan. — Harna bitta haromxoʻrni oʻldirganim. Bittasi oʻlsa, boshqalari adabini yeydi».

U chaqqon harakat qilarkan, a'zoyi badani terlab ketgan, ammo buni o'zi payqamas, faqat bir so'zni takrorlardi: «Menga desa otib yubormaydimi!»

U simning ochiq qismini qulupnay pushtalari ustiga uloqtirdi. Sim ilonday bilanglab pushta ustiga tushdi. Yopiq qismini ayvon etagidan olib oʻtdi-da, bir uchini ustundagi ilgakka tiqib qoʻydi. Keyin birdan bolalari kechasi hovliga tushsa nima boʻladi, degan xayol miyasiga urildi-yu, uyga kirdi. Xadicha yotgan joyida uyqusirab boshini koʻtardi.

- Ha?
- Hovliga chiqma, bolalar ham chiqmasin, oʻladi! dedi Shoikrom koʻzlari yonib.

Xadicha hech nimaga tushunmadi shekilli, «xoʻp» dedi-yu, boshini yostiqqa tashladi. Zum oʻtmay tekis, chuqur nafas ola boshladi. Shoikrom ayvon chirogʻini oʻchirib yana uyga kirdi. Har ehtimolga qarshi shundoq eshik tagiga, namatga koʻndalang yotib oldi.

«Menga desa otib tashlamaydimi?» deb oʻyladi yana oʻshanday zarda bilan. Shu topda negadir bolalarini emas, xotinini ham emas, ukasini oʻyladi. Shone'mat bolaligida ham zaifgina edi. Shoikrom har kuni uni maktabdan oʻzi olib kelar, ikkinchi smenada dars tugaguncha poylab oʻtirardi. Otasi oʻlganida Shoikrom oltinchida, ukasi ikkinchida oʻqirdi. Oʻshanda Shone'mat yigʻlamagan, ammo ichikib kasal boʻlib qolgan edi. Endi boʻlsa besh kunligi qoldimi yoʻqmi, aka boʻlib xabar ham ololmaydi.

Shoikrom uxladimi, yoʻqmi, bilolmadi. Bir mahal bola yigʻladimi yo tashqarida shamolning guvillashi aralash dahshatli bir faryod qulogʻiga kirdimi, anglay olmay qoldi. Sapchib oʻrnidan turib ketdi. Ayvon chirogʻini yoqishi bilan qulupnay pushtasida muk tushib yotgan odam gavdasini koʻrdi-yu, dahshatdan qotib qoldi. Shu ondayoq xato qilganini, qotillik qilganini payqadi. Sim uchini shartta ilgakdan yulib olib, hovliga otildi. «Boshqalari qochdi» degan fikr lip etib xayolidan oʻtdi. Pushtalar ustida sakrab-sakrab yurib borarkan, oyogʻi botib ketayotganini payqadi. Keyin buklanib yotgan odamdan uch qadam beriroqda

toʻxtadi-yu, birdan choʻkkalab qoldi. Bir lahza koʻzlari olayib tikilib turdida, koʻksidan shamol gʻuvurini ham, oʻz vujudini ham larzaga soluvchi bir nido otilib chiqdi:

- Oyi-i-i!

U boshidan hushi uchib borayotganini elas-elas his qilib oʻzini yerga otdi. Titroq qoʻllari bilan loy changallagancha choʻkkalab koʻksiga mushtlay ketdi.

- Oyi! Oyijon!

Umri xola bir qoʻli bilan uniqqan chit koʻylagining etagini mahkam changallab olgan, etak ichida ikki hovuch pishgan-pishmagan aralash qulupnaylar koʻrinib turar, boshqa qoʻli bilan esa ilondek simni ushlab turardi. Shoikrom uning qulupnay qizili yuqqan, yorilib ketgan barmoqlarini, boʻrtgan tomirlarini aniq koʻrdi. Nariroqda, loyli ariq ichida, uning kalishi yotar, chamasi, sim oyogʻiga tekkanida yulqib olmoqchi boʻlgan-u, qoʻliga oʻralashib yiqilgan edi.

Shoikrom loyli marzadan emaklab borgancha, oʻzini onasining quchogʻiga otdi.

 Oyijon, oching koʻzingizni! – dedi u gezarib ketgan lablari bilan onasining muzday yuzidan oʻpib.

U anchadan keyin oʻziga keldi-yu, tepasida xotini turganini, qizchalari yigʻlayotganini payqadi. Boshini koʻtarishi bilan marza chetida oʻtirgan Shone'matga koʻzi tushdi. Necha haftalardan buyon oʻrnidan jilmay yotgan ukasi, aftidan, qandaydir kuch topib, emaklab chiqqan, koʻylagining yelkalari osilib turar, katta-katta koʻzlari vahima bilan boqar edi.

- Nima qilib qoʻydim, ukam! dedi Shoikrom yana balchiqqa belangan kafti bilan yuzini changallab. Keyin yana onasini koʻtarishga urinar, ammo onasining ikki buklangan gavdasi negadir hech tiklanmas edi.
 - Sut ichmay zahar ichsam bo'lmasmidi, dedi Shone'mat ovozi titrab.
 Shoikrom bu ojiz, titroq tovushdan seskanib, ukasiga tikilib qoldi.
- Zahar ichsam boʻlmasmidi, dedi Shone'mat yana oʻsha ohangda. Aftidan, u yigʻlay olmas, yigʻlashga madori yetmasdi. Kechayam aytuvdim, koʻnmadilar. Qulupnayga sut alishadi, dedilar.

Shoikrom boshqa hech nimani eshitmadi. Eshitolmadi. Foydasi ham yoʻq edi.



Umri xolani peshin namoziga chiqarishdi. Goʻristondan chiqib kelishayotganida Shoikrom odamlarning oʻzaro gapini eshitib qoldi.

- Urush tamom bo'pti, eshitdingizmi?

Savol va topshiriqlar

- 1. O'tkir Hoshimov haqida nimalar bilasiz? Gapirib bering.
- 2. «Urushning soʻnggi qurboni» hikoyasini sinchiklab oʻqing. Asarning asosiy mazmunini soʻzlab bering.
- 3. Hikoyaning bosh qahramoni Shoikromning koʻngli gʻashligi, diqqinafas holatiga nima sabab ekanligini tushuntiring.
- 4. Urush odamlarni oʻzgartirib yuborganligini hikoya qahramonlari soʻzlari orqali tushuntiring.
- 5. Shoikromni qotillikka undagan, koʻrinmas oʻgʻridan oʻch olishga majbur qilgan, oqibatda oʻz onasining oʻlimiga sabab boʻlgan narsa nima?
- 6. Hikoya qahramonlari xatti-harakatlarini tahlil qiling. Umri xola xarakterini tavsiflang.
- 7. Hikoyadagi Umri xola va «Dunyoning ishlari» qissasidagi ona obrazi oʻrtasida qanday oʻxshashlik bor?
- 8. Daftaringizga hikoyada ishlatilgan maqol va iboralarni yozib oling. Ularni yozuvchi qaysi maqsadda qoʻllaganini tushuntirib bering.
- 9. Shoikromning oʻgʻrilar uchun qoʻygan tuzogʻi tufayli Umri xola qurbon boʻldi. Bu yerda Sizningcha kim qotil?
- 10. Umri xolaning harakatini oʻgʻrilik deb boʻladimi?
- 11. Hikoya asosida yoziladigan insho rejasini tuzing. Inshoda Umri xola, aka-uka Shoikrom va Shone'mat, Xadicha obrazlarini tavsiflang.



Said AHMAD (1920- yilda tugʻilgan)



Muhtaram oʻquvchi, yozuvchi Said Ahmad nomi Sizga tanishmi? Bir oʻylab koʻring-a, Siz uni, albatta, taniysiz. «Kelinlar qoʻzgʻoloni» nomli spektaklni yoki kinofilmni har yili kamida ikki marotaba Respublikamiz televideniyasi namoyish etadi. Siz uni koʻrmagan boʻlishingiz mumkin emas. Koʻrgan boʻlsangiz, demak Said Ahmad nomi ham Sizga ma'lum. Oʻzbekiston xalq yozuvchisi, «Oʻzbekiston Qahramoni» Said Ahmad Husanxoʻjayev 1920-yilning 10-iyunida Toshkent shahrining «Samarqand darboza» mahallasida tugʻilgan. Avval oʻrta maktabda, soʻng Navoiy nomli Pedagogika institutida oʻqigan. Boʻlajak yozuvchining ilk mashqi – «Ishqiboz» nomli hajviy hikoyasi oʻn olti yoshlarida «Mushtum» jurnalida chop etilgani uchun uning dastlabki ish faoliyati ham shu jurnal bilan bogʻliq.

Ikkinchi jahon urushi yillari Said Ahmad «Qizil Oʻzbekiston» (hozirgi «Oʻzbekiston ovozi») gazetasi tahririyatida, keyinroq «Sharq yulduzi» jurnalida ishladi.

50-yillarning boshlarida yozuvchi bir qator ziyolilar qatorida qatagʻonga uchrab, «xalq dushmani» degan tuhmatlar bilan qamaladi. Bu siyosat qoralangandan soʻng Said Ahmad ham nohaq jazodan ozod etilib, oʻz oilasiga qaytadi. Oʻzbekiston Yozuvchilar uyushmasida adabiy maslahatchi boʻlib ishlaydi. Said Ahmadning birinchi kitobi «Tortiq» nomli hikoyalar toʻplami boʻlib, 1940-yilda nashr etilgan. Shundan soʻng uning «Er yurak» (1942), «Fargʻona hikoyalari» (1948), «Muhabbat» (1949) toʻplamlari, «Qadrdon dalalar» (1949), «Hukm» (1958) qissalari e'lon qilindi. Yozuvchi ijodida 60-yillarda dastlabki ikki kitobi chop etilgan. «Ufq» romani alohida oʻrin tutadi. Keyinroq uchinchi kitobi ham e'lon qilinib, trilogiya sifatida adabiyotimiz xazinasini boyitgan bu asar xalqimizning Ikkinchi jahon urushi arafasida, urush yillari va undan keyingi ilk davrlardagi hayoti, fidokorona mehnati, kurashlari, orzu-armonlarini badiiy aks ettiradi. 1988-yili adibning «Jimjitlik» romani nashrdan chiqadi. Said Ahmad 70–80- yillarda oʻz hikoyalari asosida «Kelinlar qoʻzgʻoloni», «Kuyov» nomli pesalar yozadi. Milliy teatrimizda ilk bor sahnalashtirilgan bu spektakllar xalqimiz oʻrtasida juda katta shuhrat topib, hozirgacha teatrlar sahnasidan tushmay keladi. Bundan tashqari yozuvchining oʻnlab hajviy hikoyalari televizion miniaturalar teatri orqali, «Xandon pista» (1994), «Bir oʻpichning bahosi» (1995) toʻplamlari orqali xalqimizning ma'naviy mulkiga aylangan.

Said Ahmad keyingi oʻn yil ichida yana bir qator yangi hikoyalar va xotiralar toʻplamlari e'lon qildi. Ayniqsa, Oybek, Gʻafur Gʻulom, Abdulla Qahhor, Mirtemir, Shuhrat, Saida Zunnunova, Oʻlmas Umarbekov kabi adabiyotimizning zabardast vakillari haqidagi xotiralari keng e'tirof topdi. Adibning koʻpgina asarlari xorijiy tillarga ham tarjima qilingan.

QOPLON

Yangi hovli Tillayevga yoqdi. Yuklarni mashinadan tushirayotganda Qurbonboy bir gap aytib qoldi:

- Sizga endi it lozim, oʻrtoq Tillayev. It uyning savlati boʻladi. Albatta it boqing. Oʻzim gʻalatisini topib beraman.

Tillayevning itga unchalik xushi yoʻq edi, indamay qoʻya qoldi. Qurbonboy xotinlarning hayhaylashiga qaramay, polni ham oʻzi yuvdi, gilamni ham oʻzi olib chiqib, qoqib keldi.

– Iya, iya, biz turganda siz nega pol yuvarkansiz, opa? Oʻzimiz qotirib tashlaymiz. Men gilam qoqayin-u, siz tomosha qiling. Ammo-lekin itning gʻalatisini boqish kerak. Koʻchadan kirgan odam kiroyi direktor boʻlsang, shunaqa it boq, deb havas qiladigan boʻlsin.



Qurbonboy uyni saranjom qilib boʻlgandan keyin ham darrov keta qolmadi. Hovlida ancha aylanib yurdi. It bogʻlaydigan joyni oʻzi belgiladi.

- Yoʻoʻq, oʻrtoq Tillayev, it masalasini bizga qoʻyib beravering. Mana, itning joyi shu. Kichkinagina, ixchamgina uycha qurib berilsa, itning ham joni kirib qoladi. Xoʻp, biz ketdik.

Qurbonboy ketdi.

- Bu kishi kim bo'ladilar? dedi Tillayevning xotini orqasidan eshikni ilgaklab qaytarkan.
- Judayam anigʻini bilmayman, garajimizda ishlasa kerak. Koʻchishga mashina soʻraganimda zavgar qarashib yuboradi, deb qoʻshib bergan edi, dedi Tillayev.
 - Durust odamga oʻxshaydi. Chaqqongina ekan.

Ertasi Tillayev ishdan qaytib yuvinayotganda Qurbonboy kattakon it yetaklab keldi. U itni ayvonning ustuniga boylab, iljaydi:

- Oti Qoplon, Tillayev aka. Odamning yaxshisini darrov taniydi.
 Sizga tez oʻrganib ketadi. Ertaga yaxshilab uycha yasab berib ketaman.
 U qoʻlini yuvib kelib, yarim soatcha itning ta'rifini qilib oʻtirdi.
 - It hamma gapni tushunadi, faqat jonivorning tili yoʻq.

Qurbonboy bir soʻzli kishi ekan, aytganini qildi. Tillayev ishga ketganida zambilgʻaltakda gʻisht olib kelib, itga uycha yasab beribdi. Tillayev idoradan chiqib, endi mashinaga oʻtiraman deb turganda, yugurib kelib qogʻozga oʻrogʻliq narsa uzatdi:

- Xoʻjayin, Qoplonga nasiba. Kabobchi oshnamga tayinlab qoʻygan edim, suyakni begona qilma, deb.
- Qurbonboyingiz yaxshi odam ekan, dedi xotini Tillayev uyga kelganda, – bechora jonini fido qivoraman deydi-ya. Bola-chaqali, kamxarj odamga oʻxshaydi. Imoratini yetti yildan beri bitkazolmasmish. Uncha-munchasiga qarashib yuboring.

Tillayev xotinining gaplariga parvo qilmay choy ichardi.

Tillayev bilan Qurbonboy oʻrtasida yaqinlik paydo boʻldi. Bir kuni gap orasida u roʻzgʻordan orttirib uchastkasining tomini yopolmayotganligini aytib qoldi:

- Ayb oʻzimda, yoshligimdan shunaqaman, oʻzimga qaramayman, oshna-ogʻaynilarning ishi bitsin deyman. Ha, odam bolasidan shu qolar ekan. Boʻlmasa, promkombinatda ham, raypoda ham oshnam bor, yuztagina shifer soʻrasam yoʻq demaydi. Soʻramayman. Aslo soʻramayman.
 - Nechta shifer yetmayapti? dedi Tillayev beparvo.
- Yoʻq, xoʻjayin soʻramang. Siz bilan shu maqsadda oshno boʻlmaganman. Bunaqa gapni aytsangiz uyingizga ikkinchi qadam bosmay ketaman.

Shu-shu boʻldi-yu, Tillayevning unga ixlosi oshib ketdi. Shundoq odam garajda mashina yuvib oʻtirmasin, deb uni garaj mudiriga muovin qilib qoʻydi. Uyiga bir yuz saksonta shifer, oʻttizta tunuka tushurib berdi. Qurbonboy ham har kuni tushlikka kelib, Qoplonni oʻynatib ketishni tark qilmadi. Bu orada Tillayevning eski bod kasali tutib, yotib qoldi. Avvaliga Qurbonboy kelib uning holidan xabar olib turdi. Doktorlar endi boʻlmadi, pensiyaga chiqing, deb maslahat berishgandan keyin Tillayev ministrlikka ariza yozib, ishdan boʻshatishlarini soʻradi. Ministrlik uning talabini qondirib, oʻrniga boshqa direktor tayinladi. Qurbonboy oʻsha kuni kelib, Qoplonni aylantirgani olib chiqib ketdi-yu, qaytib kelmadi. Tillayev Qoplonga ancha oʻrganib qolgan ekan, to yarim kechagacha ikki koʻzi toʻrt boʻlib, itni poyladi. Yoʻq, Qoplon bedarak ketdi. Qurbonboy ham qorasini koʻrsatmay qoʻydi.

Oradan anchagina vaqt oʻtdi. Tillayev hassaga tayanib koʻcha aylangani chiqdi. Bir mahal qarasa, koʻchaning narigi betida Qurbonboy Qoplonni yetaklab yuribdi. Chaqirsa it qaradi-yu, Qurbonboy qaramadi. Oʻsha kuni yangi direktor oʻgʻlining tugʻilgan kuniga oʻtirish qilib berayotgan ekan. Tillayevga mashina yuboribdi. Er-xotin borishdi. Darvozadan kirishlari bilan yoʻlakda yotgan Qoplon ularni koʻrib, dumini likillatib erkalandi.

- Bizning it qalay? dedi yangi direktor.
- Bu itni taniyman, dedi Tillayev va nariroqda yangi direktorning charm toʻnini tuflab artayotgan Qurbonboyga bir qarab, uyga kirib ketdi.



Savol va topshiriqlar

- Qurbonboy tabiatiga xos xususiyatlarni hikoya matniga tayangan holda aniqlang.
- 2. Muallifning «Qurbonboy bir soʻzli kishi ekan...» deb bergan bahosi zamiridagi ma'noni toping va sababini tushuntirib bering. Chindan ham uni bir soʻzli deb oʻylaysizsmi?
- 3. Qurbonboy Tillayev va uning ayoli bilan soʻzlashganda oʻzi haqida nima uchun «biz» deb gapirishi haqida oʻylab koʻring.
- 4. Hikoyada «U qoʻlini yuvib kelib, yarim soatcha itning ta'rifini qilib oʻtirdi» degan ta'kid bor. Shunga asoslanib, Qurbonboyning tabiati haqida fikr yuriting.
- 5. Asarda shunday tasvir bor: «Nechta shifer yetmayapti? dedi Tillayev beparvo.
- Yoʻq, xoʻjayin, soʻramang. Siz bilan shu maqsadda oshno boʻlmaganman.
 Bunaqa gapni aytsangiz, uyingizga ikkinchi qadam bosmay ketaman».
 Shu suhbatning mazmuni hajviy qahramon mohiyatiga qanchalik mos kelish-kelmasligi haqidagi mulohazalaringizni bildiring.
- 6. «Bir mahal qarasa, koʻchaning narigi betida Qurbonboy Qoplonni yetaklab yuribdi. Chaqirsa it qaradi-yu, Qurbonboy qaramadi». Hikoyadan olingan shu kichik parchaga tayanib Qurbonboy tabiatining asl mohiyati va yozuvchining tasvir mahorati haqida soʻzlang.
- 7. Tillayev timsolining oʻziga xos xususiyatlarini aniqlashga urinib koʻring.
- 8. Hikoya nima uchun «Qoplon» deb nomlanganini izohlang. Siz uni qanday nomlashingiz mumkin?
- 9. Mehr-oqibat borasida Qoplon tuzukmi yoki Qurbonboymi?
- 10. Hikoyani oʻqish jarayonida sizda kulgi paydo boʻldimi? Kimdan kulgingiz kelgani haqida oʻylab koʻring?
- 11. Asarda tanqid bor deb oʻylaysizmi? Kim va nima uchun tanqid qilinayotir deb oʻylaysiz?

SOBIQ

Xoh ishoning, xoh ishonmang, birinchi kuniyoq toʻqqiz tonna paxta teribman. Avvaliga oʻzim ham hayron boʻlib qoldim. Tavba, shuncha paxtani oʻzim terdimmi yo birov qoʻshib qoʻydimi? Ertasiga bir qaytadan oʻn gʻayrat

bilan paxta terish mana bunaqa boʻladi, deb ishga tushib ketdim. Toʻqqiz yarim boʻpti. Oʻsha kuni oblastdan, Toshkentdan muxbirlar bosib ketdi. Ovozimni lentaga yozib, radiodan eshittirishdi. Televizorda ikki marta koʻrsatishdi. Hammayoqni xat bosib ketdi. Bunaga obroʻ kimning tushiga kiribdi, deysiz. Ruhim tetik, bir gapirib, oʻn kulaman. Yoʻtalsam ham labbay deb turishadi. Raisimiz u yoqqa borsam u yoqqa, bu yoqqa borsam bu yoqqa ergashadi. Bechora meni yer-koʻkka ishonmaydi. Ikki gapining birida:

- Oʻzingni tut, katta-kichikning oldida sharmanda qilma. Sen bizning mash'alimizsan. Ha, shundoq, soqolingni kunda olib tur. Dazmol bosilmagan shim kiyma, - deb nasihat qilib turadi.

Ikki kundan keyin gazetaning birinchi betida chakkamda paxta qistirib kulib turgan suratim chiqdi. Oʻsha kuni rais Berdiali aka, yap-yangi «Volga»sini ishlab turgan joyimga yuboribdi. Tez yetib kelsin deb tayinlabdi. Obbo, bir gap boʻlganga oʻxshaydi, deb ishni tashlab idoraga qarab ketdim. Borsam, rais oyogʻi kuygan tovuqday bezovtalanib, kutib turgan ekan.

– Keldingmi, uka, tez bo'l. Kengashga ketasan. Poyezd bileting tayyor, uyingga borib kiyinib olgin-u, yo'lga chiq.

Ketdim. Kengash ertasi kuni ochilar ekan, uch kun oblastda qolib ketdim. Kelgan kunimoq toʻppa-toʻgʻri dalaga chiqib, endi mashinaga yetay deb qolgan edim, yana oʻsha «Volga» olib ketdi. Idora oldida usti yopiq yuk mashinasi turibdi. Idoraga kirishim bilan yetti-sakkiz odam atrofimni oʻrab olishsa boʻladimi. Kinochilar ekan. Paxta terishimni kinoga olamiz deb, atayin Toshkentdan kelishibdi. Raisning gapini qarang. Ummatalining mashinasida kinoga tushasan, oʻsha tomonda paxta yaxshi ochilgan, kinoda chiroyli chiqadi, deb turib oldi. Ummatalining yeriga qarab ketdik. Kinochilar oʻlarcha ezma, shoshmagan odam boʻlishar ekan, ikki kun ovora qilishsa boʻladimi, mana, chiqib qolsa koʻrasizlar, qandoq qilib mashina haydashimdan tortib, peshanamdagi terni qanaqa qilib, qaysi qoʻl bilan sidirib olishimgacha apparatga olishdi.

Kinochilardan qutulib uyga holdan toyib keldim-u, kiyim-boshim bilan uxlab qolibman. Ertalab raisning oʻzi uygʻotdi.

- Tez bo'l, kutib qolishdi.
- Tagʻin kinomi? Kecha tamom qilishgan edi-ku!



- Yoʻq, boshqa gap. Rayonga yangi qurilgan madaniyat uyining ochilish marosimi boʻladi. Ilgʻor mexanizatorlardan bir kishi tabrik nutqi soʻzlashi kerak. Sen gapirasan. Qani ketdik.

Gapni ham ammo-lekin bopladim. Kuniga nutq soʻzlab turgandan keyin usta boʻlib ketarkansan. Rosa chapak boʻldi. Ichkariga mehmonlar. uchun joy qildirib qoʻyishgan ekan. Artistlar bilan birga oʻsha yoqqa kirdim. Rosa pivoxoʻrlik boʻldi. Uyga kelib yotgan edim, eshik taqillab qoldi. Chiqsam, soch qoʻygan, ingichka moʻylovli bir yigit turibdi. Yelkasida bir metrli faner sumka.

- Xizmat uka, ishlari bormidi?
- Atayin oʻzlarini yoʻqlab keldim. Suratingizni ishlashim kerak. Vistavkaga qoʻyiladi.

Undoq desam, bundoq dedi, bundoq desam, undoq dedi. Sira gapimga koʻnmadi. Janjallashib, raisning oldiga bordik. Rais koyib berdilar.

- Esing joyidami? Bu vistavkaga qoʻyiladigan suratlarning roʻyxatini oblastdan tasdiqlashgan. Qani, darrov boʻl.

Oʻzingiz bilasiz, raisimizning gapini ikki qilib boʻlmaydi. Ishga tushib ketdim. Rassom tushmagur hali yosh, tajribasi kamroq ekan. Rosa toʻqqiz kunda oʻzimga oʻxshatdi. Bu orada uyim xatga toʻlib ketdi. Pionerlar bilan uchrashuv, meditsina xodimlari bilan uchrashuv, mebel fabrikasi ilgʻor ishchilari bilan uchrashuv... Albatta, bularga rais oʻzi bilib muomala qildi-yu, ammo rayon oʻt oʻchirish komandasining pensiyaga chiqayotgan keksa xodimini tabriklashni menga yuklab qoʻysa boʻladimi. Bordim. Bularning tantanasi gʻalati boʻlarkan. Yolgʻondakam oʻt ketdi qilib, birdan gupur-gupur qilishdi. Biri suv sepyapti, biri bolta bilan eski yashiklarni parchalab tashlayapti. Rosa odam yigʻildi. Men uchinchi boʻlib soʻzga chiqdim...

Oʻsha kuni shamollab qolgan ekanman. Toʻrt kun yotib oldim. Darmonim qurib ishga ketayotsam, rais qovoq-dimogʻini osiltirib, samovarning soʻrisida oʻtiribdi. Indamay oʻtib ketish uyat. Odobdan emas. Qoʻrqa-pisa salomlashdim. U meni koʻrdi-yu, koʻzlari yashnab ketdi.

- E, bormisan? Juda uzoq yotib olding-ku Bu yoqda shuncha ish, shuncha joydan taklif. Sen bo'lsang, arzimagan kasalni bahona qilib



yotibsan. Allaqayoqdan polvon kelayotgan emish, vokzalga chiqib kutib oluvchilar roʻyxatining boshida sen turibsan. Shu bugun kech soat yettida poyezd keladi. Kechikmay yetib bor. Mashinani tayinlab qoʻyganman.

Bir nima dey, desam, raisning fe'lidan qo'rqaman. Chidadim. Oxiri yorildim:

Axir, rais buva, bu yoqda shuncha...

Aytdim-ku, rais ogʻiz ochgani qoʻymaydi deb, urishib berdi.

– Uncha-muncha odam qadam bosolmaydigan joylarga boryapsan. Noz qilma. Yigit kishining boshiga baxt bir qoʻnadi. Qani tur, tayyorgarligingni koʻr. Fizkultura komitetidan telefon qilib, miyamni qoqib qoʻlimga berishdi. Uyaltirma-da, uka.

Xuddi soat yettida stantsiyaga chiqdim. Poyezdning oltinchi vagoni. Eshigidan boʻyi salkam bir terak keladigan odam tushib kelyapti. Tikilib qarasam, bir yili domotdixga borganimda tarvuzni butun yutib oʻyin koʻrsatgan polvon. Rayonimizga tosh oʻynashni koʻrsatgani kelgan ekan. Toʻrt kishi, toʻrt kishi boʻlib yigirmata toshni sudrab tushurib qoʻydik. Stantsiya bufetida jindek hozirlik koʻrib qoʻyishgan ekan, oʻtirishdik. Polvonni tabrikladik. Yaxshi kutib olganimizdan sevingan polvon oxirida soʻzga chiqib, olti kishilikni bir qilib kosaga quyib qadah koʻtardi. Hammamiz kayf qilib qolib, toshlar stantsiyada qolib ketaveribdi. Qolsa qolavermaydimi, uni koʻtaradigan mard qayoqda.

Mana, oktabr oyi ham oxirlab qoldi. Mashina terimi tugay deb turibdi. Harna boʻlsa ozroq terib olay, deb dalaga chiqsam, mashinam joyida turibdi. Bechorani biram chang bosibdiki, kimdir boʻr bilan yoniga «Kolxozimizning sobiq mexanizatori falonchi mavsumda bir hafta dalaga chiqib, shu mashinada paxta tergan» deb yozib ketibdi. Juda alam qildi.

Bunaqa beodob gap yozgan odamni topib rosa ta'zirini berardim-u, ishim tigʻizroq edi-da. Axir bugun yosh drujinachilar¹ bilan rayon mar-kazidagi somsapazlikni tekshirishimiz, kaloriyasini² aniqlashimiz kerak.

¹ Drujinachilar – tartib saqlash ishida koʻngilli boʻlib qoʻshilgan yosh bolalar.

² Kaloriya – lotincha issiqlik soʻzidan. Bu oʻrinda somsaning quvvati ma'nosida kelgan.

Said Ahmadning hajviy hikoyalari haqida

Yozuvchi hajviy hikoya janrida juda samarali ijod etib keladi. Jamiyatdagi turli illatlar, nuqson va kamchiliklar, odamlar oʻrtasidagi kulgili munosabatlar, har xil toifa xarakterlar mazkur hikoyalarning bosh mavzusidir.

Said Ahmad hajviyalarining tahlilidan avval badiiy asarda kulgi masalasiga biroz izoh berish lozim. Kulgi turli janrdagi asarlarda uchrashi mumkin boʻlgan hodisa, holat. Biror voqea tarkibida yoki biror obraz tasvirida kulgi, kulgili holatlar boʻlishi mumkin. Kulgi oʻz oʻrnida mahorat bilan, me'yorli qoʻllanilsa, har qanday asarga hayotiylik, oʻquvchiga qiziquvchanlik, yengil kayfiyat bagʻishlaydi. Bunday asarlarga kitobxon ehtiyoji ham katta boʻladi.

Odatda mutaxassislar badiiy asardagi kulgini ikki yoʻnalishga ajratadilar – satira va yumorga.

Satira soʻzi yunoncha turli, aralash degan ma'nolarni anglatib, badiiy asarda keng ma'noda kishilardagi yoki ma'lum bir jamiyatdagi nuqson va kamchiliklarni keskin tanqid qilish, masxaralab bartaraf etish maqsadida qoʻllaniladi.

Yumor ingliz tilidagi namlik, suyuqlik soʻzidan olingan boʻlib, u keng ma'noda badiiy adabiyotda yengil kulgi qoʻzgʻash, hazil-mutoyiba sifatida qoʻllaniladi. Bunda ijodkor ayrim nuqsonlar ustidan kinoya-kesatiqsiz doʻstona, xayrixohlik bilan kuladi. Voqea-hodisalarning, jamiyatdagi insonlarning hech bir nuqsonsiz boʻlishini istab, ularni inkor etmagan holda zukkolik, topqirlik, hozirjavoblik, hazil-askiya bilan munosabat bildiriladi.

Said Ahmadning Siz yuqorida oʻqigan ikki hikoyasi oʻsha ikki yoʻnalishda yaratilgan asarlardir.

«Qoplon» hikoyasi satirik asarning yaxshi namunasi boʻlib, kishilardagi xushomadgoʻylik, laganbardorlik, oʻz manfaati yoʻlida andisha-mulohazaga bormay surbetlarcha ish tutish, odamlarni amal kursisiga qarab munosabat koʻrsatish kabi yaramas illatlar tanqidiga bagʻishlangan. Hikoyadagi Qurbonboy obrazi misolida yozuvchi oʻzini hali tanilmagan rahbarlar pinjiga kirishning nozik yoʻllarini topib olgan, hech bir istiholasiz laganbardorligini oshkora koʻrsatib, xoʻjayinining polini yuvib, gilamini ham qoqib berishdan orlanmaydigan, vaqti kelganda shartta yangi boshliqqa xizmat qilib

ketaveradigan oriyatsiz, ablah bir shaxs qiyofasini koʻrsatib beradi. Tillayev ham, uning xotini ham Qurbonboyning kimligini anglamay, ularga qilib yurgan xizmatini oʻzlaricha yaxshilikka yoʻyib yuradilar. Bu amal vaqtinchalik vazifa uchun qilinayotgan makkorlik ekanini tushunmaydilar. Shu bois Qurbonboyga ixlosi oshib, Tillayev uni mashina yuvuvchidan garaj mudiri muovini vazifasiga koʻtaradi, uyi tomini yopib olishi uchun anchagina shifer, tunuka tushurib beradi. Qurbonboy esa ishi bitguncha girdikapalak bo'lib, har qanday mayda-chuyda oilaviy yumushlarni orlanmay bajarib, yangi boshliq tayinlanishi bilan Tillayev xonadonidan batamom yuz buradi. Xushomadining asosiy vositasi bo'lgan it «Qoplon»ni olib ketib, yangi rahbarga ham xuddi avvalgiday alfozda taqdim qiladi. Uning surbetligi shu qadar kuchliki, Qurbonboy Tillayevni yangi boshliqnikida koʻrib qolganida, hatto uyalmaydi ham. Direktorning charm to'nini artib turaveradi. Hatto it Qoplon eski xoʻjayinini tanib, dumini likillatib erkalanadi. Hikoya soʻngida Tillayev Qoplonni koʻrib, «Bu itni taniyman» desa-da, achchiq istehzo bilan aytilgan bu soʻzlarni asli Ourbonboyga qarab qoʻyib aytadi. Demak, «it» deb Qurbonboyni nazarda tutadi. Yozuvchi bu bilan Qurbonboylar kabi buqalamun kimsalar, ablah odamlarni jamiyatda, insonlar orasida o'rni bo'lishi kerak emas, degan g'oyani ilgari suradi.

Said Ahmadning «Sobiq» nomli ikkinchi hikoyasi achchiq, alamli kulgidan yiroq, hajviy, sof yumoristik yoʻnalishda. Yozuvchi voqeani hikoya qahramonining oʻz tilidan hikoya qilarkan, jamiyatimizda, halol kishilarning xatti-harakatlarida paydo boʻlayotgan dabdababozlik, nozarur yumushlarga chalgʻib, kulgili vaziyatlarga tushib qolish kabi nuqsonlar ustidan yengil kuladi. Katta maqsadlar yoʻlida intilayotgan yaxshi bir mehnatkash insonni asrab-avaylash, uning kuchidan oqilona foydalanish, har bir odam oʻz oʻrnida boʻlib, oʻz vazifasini sidqidildan bajarishi kabi masalalar hajviy yoʻsinda tasvirlangan vaziyatlar orqali anglashiladi.

Turgʻunlik zamonlarida shoʻrolar davrida har narsani mafkuraga bogʻlash odat tusiga kirgan edi. Hikoya qahramoni ham paxta terishda jonbozlik koʻrsatib, hech kutilmaganda dabdababozlikning nishoniga aylanadi. Eng ilgʻor paxtakor deb, asosiy ishini yigʻishtirib, turli kerak-nokerak majlis, kengash, yigʻilishlarga borishga majbur boʻladi. Endi dalaga chiqaman

deganda, bir kinochilar, bir rassomlar kelib gʻanimat vaqtini behuda oʻtkazadi. Yozuvchi bu xatti-harakatlarning be'manilashib ketganini ta'kidlash uchun kulgini shunday kuchaytiradiki, mubolagʻa, lof kabi badiiy tasvir vositalarini qoʻllaydi. Ya'ni paxtakor qahramon rayon oʻt oʻchirish komandasining pensiyaga chiqayotgan kʻksa xodimini tabriklashga yuboriladi. Tarvuzni butun yutib, oʻyin koʻrsatadigan polvonni qutlashga chiqadi. Oxiri yosh drujinachilar bilan rayon markazidagi somsapazlarni tekshirgani otlanadi. Xullas, yozuvchi kulgili vaziyatni mubolagʻa priyomi orqali yanada kuchaytirib, oʻquvchida shodon qahqaha paydo qiladi va bu bilan jamiyat rivojiga xalaqit berayotgan mayda nuqson, kamchiliklarga e'tiborni qaratadi.

Har ikki hikoyada ham yozuvchi badiiy tilning xalqona, nozik qochirimli, shirali, koʻp ma'noli xususiyatlaridan keng foydalanadi.

Savol va topshiriqlar

- 1. Said Ahmadning hayoti va ijod yoʻli haqida soʻzlab bering.
- 2. Yozuvchining qanday hikoyalari va hikoyalar toʻplamlarini bilasiz?
- 3. Said Ahmad roman va dramaturgiya janrida ham asarlar yaratganmi?
- 4. «Kelinlar qoʻzgʻoloni» spektakli va kinofilmini koʻrganmisiz? Koʻrgan boʻlsangiz taassurotlaringizni soʻzlab bering.
- 5. «Qoplon» hikoyasi va satira janrining xususiyatlari haqida soʻzlab bering.
- 6. Qurbonboy obraziga ta'rif bering.
- 7. «Laganbardorlik», «xushomadgoʻylik» kabi illatlar jamiyatga kerakmi yo yoʻqmi?
- 8. Said Ahmadning qaysi hajviy hikoyalarini bilasiz?
- 9. «Sobiq» hikoyasi qahramoni qanday odam?
- 10. Rais obraziga ta'rif bering.
- 11. Yozuvchi kulgili vaziyatni kuchaytirish uchun qanday tasviriy vositalardan foydalanadi?
- 12. Yumor janrining satiradan qanday farqi bor?
- 13. Yozuvchi yumoristik hikoyada qanday maqsadni nazarda tutishini «Sobiq» hajviyasi misolida gapirib bering.
- 14. Siz oʻzingizdagi qanday kamchiliklardan xalos boʻlishni istar edingiz?



SO'ZDA HIKMAT BOR

AN AN AN AN AN AN AN AN AN AN

BADIIY SO'Z QUDRATI

Aziz oʻquvchilar! Agar e'tibor bersangiz, insonlar oʻrtasida aloqa, munosabatlarning asosida soʻz yotganini koʻramiz. Soʻz dunyodagi barcha narsa-hodisalarning asosi, desak yanglishmaymiz. Chunki Tangri taoloning «Yaralgin» soʻzidagi amri bilan butun olam yaralgan, soʻzning qudrati ana shunda. Soʻz, agar ilmiy mulohaza qiladigan boʻlsak, eng muhim til birligi. Tilimizda narsa-hodisalar, jarayonlar va xususiyatlarni nomlash uchun xizmat qiladigan asosiy unsur soʻzdir. Negaki, har bir narsani oʻz nomi bilan atash kerak ekan, uni faqat soʻzda ifodalay olamiz. Masalan, tilshunoslik ilmida badiiy til, rasmiy til, ilmiy til kabi tushunchalar boʻlgani kabi soʻzni ham oʻz navbatida badiiy soʻz, ilmiy soʻz deb ataymiz.

Soʻz turli koʻchma ma'nolarni ham anglatadi: «Bir soʻz aytdi – *hikoya*, *naql qildi*», «Soʻz berdi – *va'da berdi*» kabi.

Inson hayotida soʻzning ahamiyatini oʻlchab, baholash qiyin. U kishilar oʻrtasida muloqot vositasi, jamiki qadriyatlar faqat soʻz orqali namoyon boʻladi. Agar shunday boʻlmaganda ajdodlarimiz yaratgan behisob ogʻzaki va yozma ilmiy, badiiy asarlar, benazir hadislar bizgacha yetib kelmagan boʻlardi. Hazrat Navoiy bobomiz aytganlaridek, olamda soʻzdan yuksak boylikni topib boʻlmaydi. Insonni boshqa maxluqotdan ajratib turuvchi narsa ham soʻzdir:

Insonni soʻz ayladi judo hayvondin, Bilki guhari sharifroq yoʻq ondin.

Hazrat yana bir joyda so'z haqida shunday deydilar:



Dona-u dur soʻzni afsona bil, Soʻzni jahon bahrida durdona bil.

Soʻz qudratli narsa. Soʻz bilan qurmoq mumkin, soʻz bilan koʻngilni vayron qilmoq mumkin. Har qanday xasta koʻngil soʻz bilan obod boʻladi, shu ma'noda soʻz tibbiyotda ham shifo oʻrnida qoʻllanishi bejiz emas. Toʻshakda yotgan ogʻir xastani ham shirin soʻz bilan, dalda bilan oyoqqa turgʻizish, aksincha, soppa-sogʻ odamni yomon soʻz bilan bir lahzada koʻnglini vayron qilish mumkin. Yaxshi soʻz ham, yomon soʻz ham bir ogʻizdan chiqadi, demak har bir soʻzni oʻylab gapirish har kimning oʻziga bogʻliq. Aytaylik, koʻchadan chinqirgancha «Tez yordam» mashinasi oʻtib ketyapti. Farosatsiz odam yana birortani kuni bitdi deyishi yoki shunga oʻxshagan xunuk gap qilishi mumkin, biroq farosatli odam «Qaranglar, yangi mehmon dunyoga kelyapti» deyishi mumkin. Shunday ekan, doimo yaxshi niyat qilaylik, chunki «Yaxshi soʻz – jon ozigʻi» deb bekorga aytmaydilar.


Aziz oʻquvchilar, yuqorida soʻz tushunchasi, uning inson hayotidagi oʻrni haqida gaplashdik. Endi badiiy soʻz nima, u bizga nima beradi, ana shular haqida fikr yuritamiz. Soʻz ham til kabi (jonli til umumxalq tili, adabiy til, badiiy til) jonli soʻz, adabiy soʻz, badiiy soʻz sifatida farqlanadi. Jonli soʻzdan kundalik turmushda oʻzaro muloqot sifatida foydalanamiz. Soʻzning bu turi cheklanmagan tarzda muomalada boʻladi. Adabiy soʻzdan esa muayyan qoidalarga rioya qilgan holda foydalaniladi. Masalan, matbuot, ya'ni gazeta-jurnal, radio, televideniya, fan, adabiyot, kitob, teatr, kinoda qoʻllaniladigan soʻzlar.

Badiiy soʻz — bevosita adabiy asar yozishda qoʻllaniladigan soʻzlar. Endi ular faqat adabiy soʻzlargina emas, balki kishi hissiyotlariga, tuygʻulariga ijobiy ta'sir qiladigan xarakter, obraz, manzaralar yaratishga xizmat qiladigan soʻzlardir. Adabiyot soʻz orqali badiiy tasvirlash san'ati boʻlsa, uning asosiy quroli soʻzdir. Badiiy tasvir soʻzlar orqali roʻyobga chiqadi. Demak, u voqea-hodisalarni obrazli, yuksak did va mahorat bilan tasvirlashda ishtirok etadi. U yoki bu qiziqarli voqeani oddiy hikoya qilish bilan badiiy tarzda hikoya qilish oʻrtasida yer bilan osmoncha farq bor. Biror-bir voqeani gapirib berish oddiy xabardan iborat, xolos. Badiiy hikoyalash, obrazlar vositasida tasvirlash esa insonga estetik zavq beradi,

uni goʻzallikka undaydi. Badiiy asardagi har bir soʻz muayyan salmoqqa, mazmunga ega boʻladi. Bobokalon shoirlarimiz Alisher Navoiy, Zahiriddin Bobur, Muqimiy va boshqa ijodkorlar soʻzning bagʻriga hikmat jo qilganlar, unga sehr ato etganlar. Soʻzda hikmat bor deganda ana shu badiiylikka yoʻgʻrilgan qudratli badiiy soʻz tushuniladi. Badiiy adabiyotlar bilan tanishganda uning yozma va ogʻzaki turlariga, she'riy, nasriy, dramatik shakllariga duch kelasiz. Badiiy soʻz bilan qanchalik chuqur tanishgan sari uning sehr va hikmat toʻla olamiga kirib borasiz. Bu yoʻldagi har bir qadamingiz qutlugʻ boʻlishini tilaymiz.

Savol va topshiriqlar

- 1. So'z nima? Uning haqiqiy mohiyatini tushuntirib bering.
- 2. Ishlatilish oʻrniga koʻra soʻz qanday farqlanadi?
- 3. So'z san'ati deganda qaysi san'atni tushunasiz?
- 4. Badiiy soʻzning jonli, ilmiy soʻzdan farqini, badiiy adabiyotning ilmiy, siyosiy adabiyotlardan farqini tushuntiring.
- 5. Hazrat Navoiyning soʻzga bergan ta'rifini adabiyot darsligidan koʻchirib oling va ogʻzaki sharhlang.
- 6. Soʻzda hikmat bor deganda nimani tushunasiz?





Aziz oʻquvchi, Siz buyuk bobokalonimiz hazrati Alisher Navoiy haqida ko'p eshitgansiz, kitoblar o'qigansiz va balki atoqli yozuvchi Oybekning «Navoiy» romani asosida suratga olingan koʻp qismli videofilmni tomosha qilgansiz. Har yili 9-fevral kuni ulugʻ bobomizning tugʻilgan kunlari Toshkent shahridagi Milliy bogʻ hamda Shayxontohur mavzeidagi xiyobonga o'rnatilgan haykallari poyiga gullar qo'yib, xotiralarini yod etish qat'iy an'anaga aylanganini ham bilasiz. Nima uchun shunday ehtirom va e'zoz bildiramiz shoir bobomizga? Asarlarini qayta-qayta nashr etib, keng targ'ibot qilamiz? Buning asosiy sababi shundaki, hazrati Alisher Navoiy bizning Vatanimiz tarixidagi barcha zamonlarda, xoh o'tmish, xoh bugun yo kelgusida bo'lsin, eng ulug' siymodir. Bu zot millatimizni dunyodagi eng madaniyatli, ma'rifatli xalqlar qatoriga olib chiqqan, jahon adabiyotining eng buyuk siymolari qatorida turadigan zotdirlar. Bobomizning mustaqillik yillarida nashr etilgan yigirma jildlik mukammal asarlari to'plamlariga kirgan she'r-u dostonlari, ilmiy va tarixiy asarlari, xotira va yozishmalari ruhiy dunyomizni nihoyatda boyitadigan, aql-tafakkurimizni charxlaydigan yurtimiz tarixi va uning buyuk siymolari haqida juda qimmatli ma'lumotlar beradigan asarlardir. Mazkur asarlarning orasida besh ulug'vor dostonlarni o'z ichiga olgan «Xamsa» ayniqsa alohida e'tiborga sazovor. Siz avvalgi sinflarda bobomizning ijodiy faoliyatlari bilan tanishganingizda «Xamsa» yaratish juda mushkul, ammo sharafli hodisa

hisoblanganini, jahon adabiyotida faqat ozarboyjon shoiri Nizomiy Ganjaviy, hind adibi Xisrav Dehlaviy va fors-tojik adabiyoti namoyandasi Abdurahmon Jomiyga va oʻzbek hamda boshqa turkiy adabiyot vakillari orasida faqat Alisher Navoiyga nasib etganini bilib olgansiz. Alisher Navoiy hazratlarining «Xamsa» beshligiga kiradigan birinchi doston – «Hayrat ul-abror», ya'ni «Yaxshi insonlarning hayratlanishi» deb nomlanadi. Bu doston 63 bobdan iborat boʻlib, kishilardagi yaxshi, ibratli fazilatlar, ayrim yomon illatlar haqida hikoya qiladi. Dostonda mutafakkir bobomiz juda keng toʻxtalgan mavzu bu XIV va XV boblaridagi badiiy ijod, badiiy soʻzning qudrati, insonga ta'siri haqidagi mavzudir.

HAYRAT UL-ABROR

XIV BOB

So'z ta'rifida

So'z guharig'a erur oncha sharaf – Kim, bo'la olmas anga gavhar sadaf.

To'rt sadaf gavharining durji ul, Yetti falak axtarining burji ul.

Bogʻchai dahrki yuz toza gul, Topti qayonkim nazar etti koʻngul...

Katmi adam gulshani ichra nuhuft, G'unchalar erdi borisi noshuguft.

Chun bu nasim esti azal togʻidin, Muncha gul ochildi jahon bogʻidin.

Qaysi nasim ulki erur gulfishon, Bargi gul-u nastaran andin nishon.

Bu ikki yafrogʻni qachon zufunun, Bir-biriga qoʻysa boʻlur «kof-u nun».



Dahri muqayyad bila ozodasi, Borcha erur «kof» ila «nun» zodasi.

Tengriki, insonni qilib ganji roz, Soʻz bila hayvondin anga imtiyoz.

Donai dur soʻzini afsona bil, Soʻzni jahon bahrida durdona bil.

Munchaki sharh etti qalam soʻzga hol, Nasridadur, nazmida bor oʻzga hol.

So'z aro yolg'on kibi yo'q nopisand, Aylar aning nazmini dono pisand.

O'rnida tishlar duri manzum erur, Chun sochilur qiymati ma'lum erur.

Vardu shajar shohid erur bogʻ aro, Lek oʻtun silkidadur togʻ aro.

Munda parishonligʻi noxush qilib, Anda murattabligʻi dilkash qilib.

Nav'i bashar boshig'a rabbi g'afur, Qo'ydi tafovut bila toji zuhur.

Shohki gulshanni bisot aylagay, Bazm tuzub, azmi nishot aylagay.

Har kishi oʻz poyasi birla maqom Tutsa erur anjuman ichra nizom.

Emdiki may zoyil etib hushni, Shah yonigʻa tortti chovushni.

Qul beg ila tuzdi uzun mojaro, Qayda halovat yana ul bazm aro?



Arsada shatranjni ulkim to'kar, Necha yig'och porasidurkim o'kar.

Chunki birov oʻlturubon har taraf, Tersa bisot ichra ani ikki saf.

Har yon iki saf iki misra' kibi, Toʻrt saf oʻlsa, iki matla' kibi.

Har biri bir turfa muammo boʻlub, Otlar aning zimnida paydo boʻlub.

Fikri sahih elga bisotida ot, Qilsa parishonligʻ oʻlub anda mot.

Daftari nazmida chu sherozadur, Gul varaqi gulshan aro tozadur.

Uzdi chu sherozasini daftari, Yel uchurur har varaqin bir sari.

Nazm anga gulshanda ochilmogʻligʻi, Nasr qaro yerga sochilmogʻligʻi.

Bo'lmasa e'joz maqomida nazm, Bo'lmas edi tengri kalomida nazm.

Nazmda ham asl anga ma'ni durur, Bo'lsun aning surati harne durur.

Nazmki ma'ni anga marg'ub emas, Ahli maoniy qoshida xo'b emas.

Nazmki ham surat erur xush anga, Zimnida ma'ni dog'i dilkash anga.

So'z ta'rifida

(nasriy bayoni)

Soʻz gavharining sharofati shunchalar yuksakki, gavhardek qimmatbaho narsa ham unga sadaf boʻla olmaydi. Toʻrt sadaf¹ ichidagi gavharga quti ham shu soʻz, yetti osmon yulduzlarining burji ham shu soʻz.

Inson koʻngli qaysi tomonga boʻlmasin boqib, jahon bogʻchasida yuz xil yangi gullarni koʻrarkan, ular barchasi bir vaqtlar sirli yoʻqlikning gulshanida yashiringan, gʻunchalar ham hammasi ochilmagan holda edi. Azaliyat togʻidan mayin shabada esa boshlashi bilan jahon bogʻidagi shuncha gullar ochilib ketdi. Bu oddiy shabada emas, gullar sochuvchi shabada boʻlib, u na'matak va undan toʻkilgan gul yafrogʻiga oʻxshab ketadi. Shu ikki narsani donishmand odam bir-biriga yopishtirsa, «kof-u nun» hosil boʻladi². Tangri insonni sirlar xazinasi darajasiga koʻtargan ekan, uni soʻzlash qobiliyatiga ega boʻlgani uchun hayvonlardan ortiq qilib yaratdi.

Durning bir donasi bilan bogʻliq gapga ishonma, soʻzni jahon dengizidagi haqiqiy durdona deb bil.

Qalam soʻzni sharhlab yozgan shuncha gaplar nasrga oiddir, Nazmdagi soʻzning xossasi bundan ham boshqacha. Oddiy soʻzlashuvda yolgʻondan e'tiborsiz narsa yoʻq. Lekin nazmdagi yolgʻon (mubolagʻa)ni donolar ham ma'qul koʻradi. Tish durlari oʻz joyida tizilib turganda, tartibli, yaxshi koʻrinadi. Ular sochilib ketguday boʻlsa, qanday qimmatga ega boʻlishi mumkin?!

Gul va meva daraxtlari bogʻda chiroyli koʻrinadi. Togʻda esa ular hammasi oʻtin hisobida qaraladi. Bunda (nasrda) sochilib yotganligi kishini noxush qilsa, unda (she'rda) mavjud tartib-qoida koʻngulni xursand etadi. Bandalarini kechiruvchi xudo ularni xilma-xil qilib yaratar ekan, ularning har qaysisini boshiga bir-biridan farq qiladigan toj bilan paydo qilgan. Shoh odatda gulshanda boʻlishi, unda bazm qurib, shodlik yoʻlini tutishi kerak. Har kishi oʻz darajasini bilib oʻtirsa, oʻtirishda tartib-intizom boʻladi.

¹ **To'rt** | **sadaf** – suv, havo, o't, tuproq.

² Arabcha «k» va «n» harfi bir-biriga qoʻshilsa, «kun!» boʻlib, «yarat!», «ijod qil!» degan ma'nolarni bildiradi.

Bordi-yu ichkilik aqlini yeb, shoh oʻz yoniga eshik ogʻasini oʻltirgʻizsa yoki qul oʻz begi bilan adi-badi aytishadigan boʻlsa, unday bazmda tagʻin qanday halovat boʻlishi mumkin?!

Shaxmat taxtasiga donalarni toʻkkan odam uning yogʻoch donalarini qancha maqtamasin, u chiroyli koʻrinadi shu vaqtdaki, birov – ikki tomonga u donalarni ikki qatordan qilib tersa. Shaxmatning ikki tomonidagi ikki qator xuddi ikki misra she'rga, toʻrt qator esa she'rning ikki matlaiga oʻxshab ketadi. Bundagi har dona ajoyib muammo boʻlib, ularning orasida otlar ham paydo boʻladi. Odam qancha toʻgʻri fikr qilmasin, bunda ozgina parishonlikka yoʻl qoʻysa, otning yurishi tufayli mot boʻlib qolishi mumkin.

She'r daftari ham bir-biriga bog'langani uchun uning varaqlari gulzordagi gulday toza. Daftarning ipi so'kilsa, uning varaqlarini shamol har tomonga uchirib yuboradi. Gulshanda gullarning saf tortib ochilib turishi, bu – nazm; ularning yerda sochilib-to'kilib yotishi esa nasrdir. Nazm bu qadar yuksak e'zozlanmasa, Tangri so'zi'da bo'lmas edi.

Nazmda ham asosiy narsa ma'nodir, uning shakli esa har xil bo'lishi mumkin. Yaxshi mazmunga ega bo'lmagan she'r tushungan odamlarning yaxshi bahosini ololmaydi. Ham yaxshi shaklga ega bo'lgan, ham go'zal ma'no asosiga qurilgan she'r – haqiqiy she'r.

* * *

So'z inson tanasidagi jon bo'lib, ruh uning qolipi. Tanasida ruhi bor odam, ya'ni tirik inson doim so'zlamoqqa ehtiyoj sezadi. So'z xuddi Iso payg'ambarga o'xshab, odamning o'lgan tanasini tiriltirishi, ya'ni odamga hayot bag'ishlashi mumkin, deydi muallif. Muqaddas kitoblarda yozilishicha, Iso payg'ambar «Masih» («jonbaxsh») o'lgan odamni o'z nafasi bilan hayotga qaytarguvchi zot hisoblangan ekanlar. Alisher Navoiy bobomiz so'zga ana shunday ta'rif berib, uning favqulodda katta ahamiyatini ko'rsatmoqchi bo'ladilar. So'zni barcha odamlar yuragida bo'ladigan eng muqaddas narsa deb aytadilar. Qo'li gul ustalar, hunarmandlar po'lat xanjarlar yasaganlarida, u chiroyli bo'lsin uchun uning sopiga har xil qimmatbaho yaltiroq toshlar qadaganlar. Bobomiz ta'rificha agar odamni tili shu po'lat xanjar kabi bo'lsa, so'z ana shu xanjar bezagi hi-

[«]Qur'on» nazarda tutiladi.



soblangan, uning qiymatini belgilaydigan qimmatbaho tosh — duru injudir. Alloh insonni ham aslida maxluqlar qatori yaratgan. Lekin unga ong-shuur berib, sirlar soʻzlashish ne'matini ato etib, hayvondan ajratgan. Demak, soʻz ongdagi fikrni sirlar xazinasini ifodalaydigan vosita ekan, u maxluqni odamga aylantirgan. Soʻz tufayli inson oʻzgalar bilan munosabatga kirishadi. Bir-birini tushunadi.

Soʻzni goʻzal ifodalarga, oʻxshatish va sifatlarga oʻrab taqdim etish bu badiiy so'zdir. Badiiy so'z inson qalbiga, tuyg'ulariga ta'sir qiladi. Uning xulqi, odobini belgilaydi. Xalqimiz «Yaxshi soʻz jon ozigʻi, yomon so'z jon qozig'i» deydi. Ya'ni so'zda ma'no bo'lib yoqimli fikrlar ifodalansa u kishini yaxshi ishlar qilishga, mehr-u muruvvatli, saxovatli, g'amxo'r bo'lishga undaydi. Yomon so'z esa kishilarni g'azabga, urush janjallarga boshlaydi, kasal qiladi, qalbini yaralaydi. Alisher Navoiy bobomiz soʻzni shunday goʻzal sifatlar bilan bezab ifodalash she'riyatga xos xususiyat ekanini, she'r so'zlarni go'yo durlardek bir qator tizib tartibga soluvchi durlar shodasi ekanini aytadilar. Agar durlar bir joyda tizilib tursa chiroyli koʻrinadi. Ammo sochilib ketsa, qiymati yoʻqoladi. Bahriy soʻz ham shunday. Odatda soʻzlashganimizda birov yolgʻon soʻz aytsa, deylikki, xos bo'lmagan sifatlarni aytib, kimgadir xushomadgo'ylik qilsa hafsalamiz pir bo'ladi, hatto yolg'on so'zlar uchun ranjib ham qolamiz. Lekin nazm - she'riyatda kishiga xos xususiyatlarni boʻrttirib, goho qoʻshib-chatib mubolagʻalar keltirsa, bu yoqimli tuyulishi mumkin. Bobomiz fikrlaricha, she'rda mubolag'a ishlatish donolarga ham ma'qul kelar ekan. Chunki mubolag'a, bo'rttirish orqali she'r qahramoni chiroyli sifatlar kasb etadi, maqtaladi. Ammo mubolag'a, maqtov ham me'yorida bo'lgani yaxshi. Mubolag'a ta'riflanuvchi kimsa yo narsaning asl holatidan juda uzoqlashib ketsa, u endi ma'noga putur yetkazishi mumkin. Aslida she'rlarda ham asosiy o'lchov ma'nodir.

> Nazmda ham asl anga ma'ni durur, Bo'lsun aning surati har ne durur. Nazmki ma'ni anga marg'ub emas, Ahli maoniy qoshida xo'b emas. Nazmki ham surat erur xush anga, Zimnida ma'ni dog'i dilkash anga.



Haqiqiy she'r ma'no bilan uni ifoda etuvchi shakl – badiiy soʻzlarning bir-biriga mutanosibligidan tugʻiladi. Donishmandlar shakli chiroyli, mubolagʻalari haddan ortiq boʻlgan, biroq ma'nosi sust, joʻn she'rni qabul qilmaydilar. Har ikki jihat mos kelganda she'r mukammal boʻlib, oʻquvchiga kuchli ta'sir koʻrsatadi.

ALISHER NAVOIY RUBOIY VA QIT'ALARI

Buyuk bobomizning ijodiy merosida turli shakl va mavzudagi minglab gʻazal, muxammas, ruboiy, qit'a kabi oʻnlab janrdagi she'riy asarlari mavjud. Biz shulardan ayrim ruboiy va qit'alarni koʻrib oʻtmoqchimiz.

Ruboiy – arab tilida toʻrtlik ma'nosini anglatuvchi soʻz boʻlib, mumtoz she'riyatda falsafiy, axloqiy, diniy va ishqiy mavzularda yoziladigan aruz vaznidagi toʻrt misradan iborat lirik she'rdir. Aslida xalq ogʻzaki ijodida toʻrtlik shaklidagi she'rlar koʻplab uchraydi. Ana shu she'rlar oʻzbek adabiyotida ruboiy janriga asos boʻlgan. Faqat yozma adabiyotimizda aruz vazni joriy etilgach, toʻrtliklar qat'iy shu vaznda yozila boshladi. Ruboiylar ikki xilda qofiyalanadi. Biri a – a – b – a shaklida uch misrasi qofiyalansa, ikkinchisi a – a – a – a tarzida barcha misralari qofiyalanadi. Barcha misralar qofiyalanishi asosidagi ruboiylar «taronai ruboiy» deb ataladi. Ya'ni ularda toʻla ohangdoshlik saqlanadi.

Oʻzbek adabiyotidagi deyarli barcha klassik shoirlar ijodida va zamonaviy shoirlarimizning aksariyatida ruboiy janridagi she'rlar uchraydi. Ayniqsa, Alisher Navoiy, Zahiriddin Muhammad Bobur, Muhammad Rizo Ogahiy kabi shoirlarimiz bu janrda «koʻp va xoʻb» yozishgan. Sharq she'riyatida buyuk olim va shoir Umar Xayyom falsafiy ruboiylar yaratishda buyuk mahorat kashf etgan.

Bobokalonimiz hazrati Alisher Navoiy ham yuzlab ruboiylar yozib, bu janr rivojiga ulkan hissa qoʻshganlar.

Gʻurbatda gʻarib shodmon boʻlmas emish, El anga shafiq-u mehribon boʻlmas emish. Oltin qafas ichra gar qizil gul butsa, Bulbulga tikondek oshiyon boʻlmas emish.



Har bir inson, jonzot o'z vatani, o'z tuprog'idan aziz, ardoqli.... o'z yurtidan ajralish fojia. Inson faqat o'z vatanida g'arib, bechora sezmaydi. Oʻzini oʻzga ellar qancha begona boʻlsa, oʻsha yurtning odamlaridan ham shafqat-g'amxo'rlik kutma. Qizil gulga ishqiboz bulbul agar u oltindan yasalgan qafas ichida bo'lsa, o'z oshiyoniga tikon-u xor-xasdan tiklangan bo'lsa-da almashmaydi. Chunki uning erki, ozodligi bo'lmasa, har qanday chamanzorda ham begona sezadi o'zini. Bu to'rt misra zamiriga shoir olam-olam ma'noni jo etib, vatansizlik inson uchun naqadar og'ir azob ekanini, har qanday sharoitda ham o'z yeriga sodiq qolish odamni baxtsaodatga eltishini ta'kidlamoqchi bo'ladi. Vatanni sevish iymonli, ishonche'tiqodli bo'lishning bir belgisi deydi donolar. O'z yurtidan chetlarda yashayotgan odamlar xorlik va xoʻrlik koʻradilar. Yolgʻon va'dalarga ishonib, aqidaparast buzgʻunchi kimsalar ketidan chet ellarga ketib qolgan yosh yigitlarimizning qanchalar pushaymonda ekanliklari, oxir-oqibat yo qamoqlarda yoki boshqa bir vayronalarda xor-u zor boʻlayotganliklari haqida siz koʻp eshitgansiz yoki teleekran orqali koʻrgansiz.

Alisher Navoiy bobomiz besh yuz yil oldin bunday xavfdan ogoq etganlar. Afsuski oltin qafaslardagi qizil gullarga oshiq boʻlib, oʻz hayotini fojiali tugatayotgan kimsalar hanuz uchraydi. Demak bu ruboiy sira ahamiyatini yoʻqotgan emas.

Jondin seni koʻp sevarmen, ey umri aziz, Sondin seni koʻp sevarmen, ey umri aziz. Har neniki sevmoq andin ortuq boʻlmas, Andin seni koʻp sevarmen, ey umri aziz.

Bu ruboiy hayotsevarlik gʻoyalarini ifoda etgan, insonga umid va ishonch tuygʻularini singdiradigan asardir. Jon eng sevimli, nihoyatda ehtiyot qilinadigan holat. Biror yeringiz ogʻrisa, «voy jonim» yoki «jonim ogʻriyapti» deysiz. Dunyodagi hech narsa joningizdan shirinroq yo ortiqroq boʻlmaydi oʻsha pallada. Bobomiz jon qancha shirin boʻlmasin, lekin umr barchasidan azizroq deydilar. Chunki umr Alloh tomonidan insonga ato etilgan oliy ne'mat, buyuk ishlar, ezguliklar qilish uchun berilgan fursat. Undan unumli foydalanib, odamlarga, oʻz yaqinlari, oilasiga naf keltirib oʻtgan umr aziz-u e'zozlidir. Yaxshi tarbiya topgan odam umr daqiqalarini



behuda oʻtkazmaydi. Mehnat qiladi, yaratadi, olamni yashnatib, hayotni goʻzal qiladi. Bunday odamlar hamisha el-yurtda hurmat topadi, e'tirof va ehtiromga sazovor boʻladilar. Chunki ular hayotda iz qoldiradilar. Umr fursatlarini savobli ishlarga sarflaydilar. Bobomiz ana shu umrni aziz deydilar, uni har narsadan ortiqroq sevadilar. Vatanimiz tarixida shunday umr kechirgan ming-minglab tabarruk zotlar bor. Ulugʻ allomalarimiz, shoir-u adiblarimiz, hunarmand me'morlarimiz, yurtimizning buyuk tarixini yaratgan barcha insonlar umrni aziz qilgan zotlardir. Ular hayoti hamisha oʻrnak boʻlmogʻi kerak.

Shoir bobomizning quyidagi keltiriladigan ruboiylari ham yana qator boshqa ruboiylari kabi teran mushohadalarga, fikrga undaydigan, ramztimsollarga, goʻzal obrazlarga boy falsafiy asarlardir.

Jonimdagʻi «jim» ikki dolinggʻa fido, Andin soʻng «alif» toza niholinggʻa fido. «Nun»i dagʻi anbarin hilolingʻa fido, Qolgʻan iki nuqta ikki xolinggʻa fido.

Zohid, sanga hur, manga jonona kerak, Jannat sanga boʻlsun, manga mayxona kerak. Mayxona aro soqi-yu paymona kerak, Paymona necha boʻlsa toʻla, yona kerak.

O'lsam yasamang munda mozorimni mening, Yuklab eliting jismi figorimni mening. O'tru chiqarib ahli diyorimni mening, Ko'yida qo'yung tani nizorimni mening.

Alisher Navoiy hazratlarining she'rlari orasida qit'a janriga mansub moʻjaz asarlar ham koʻp.

Qit'a – Sharq adabiyotida juda keng tarqalgan she'riy janr. U ikki yoki undan ortiq baytlardan iborat bo'lib, juft misralari o'zaro qofiyalanadi. Ya'ni b–a, g–a shaklida. Qit'a ikki xil bo'ladi. Birinchi xili mustaqil asar shaklida, ikkinchi xili esa g'azal, qasida, tarje'band kabi boshqa janrdagi she'rlar tarkibidan ajratib olish tarzida. Qit'a birinchi xil namunasida



shoirda paydo boʻlgan zavq, his-hayajon natijasida oʻsha zahotiyoq qo-gʻozga tushiriladi va keyinroq lozim topilsa yana rivojlantirilib gʻazal, qasida shakliga keltiriladi. Ikkinchi xil qit'alar aksincha biror munosabat bilan boshqa janrdagi she'rlardan ajratib, saralab olinadi. Ular falsafiy jihatdan teran, ta'sirchan, kuchli ibratomuz baytlar boʻlib, tugal mustaqil she'r sifatida ham koʻrilishi mumkin. Qit'a, shoirning kundalik hayotidagi taassurotlari asosida hozirjavoblik bilan yoziladigan ixcham asar. Unga kuzatilgan voqeadan darhol poetik xulosa chiqarish, fikrni boshqa janrdagi qat'iy shakllarga qaraganda erkin ifodalash, vazn, mavzularni belgilashda imkoniyatning kengligi kabi xususiyatlarga xosdir.

Qit'a janrida adabiyotimizning Lutfiy, Alisher Navoiy, Gadoiy, Bobur, Turdi, Ogahiy, Uvaysiy, Komil Xorazmiy kabi ulkan shoirlari ijod etishgan. Albatta bu roʻyxatda eng barakali va eng mahoratli qit'alar muallifi sifatida bobomiz Alisher Navoiy hazratlari birinchi oʻrinda turadilar.

Mana hazratning ba'zi qit'alari:

Chun gʻaraz soʻzdin erur ma'ni anga, Noqil oʻlsa xoh xotun, xoh er. Soʻzchi holin boqma, boq soʻz holini, Koʻrma kim der ani, koʻrgilkim ne der.

Muhtaram oʻquvchi, Siz bilan yuqoriroqda bobomizning «Hayrat ulabror» dostonidagi soʻz xususida aytilgan fikrlarini tahlil qilib, soʻzning qudrati, uning ta'siri, badiiy soʻzning ahamiyati haqida toʻxtalib, soʻz insonni hayvon — maxluqotdan ayirgan eng asosiy omillardan ekanini koʻrgan edik. Hazrat ana shu mavzuni mazkur qit'alarida davom ettirib, endi oʻsha muqaddas boʻlgan soʻzni aytish adabi, madaniyati xususida toʻxtaladilar. Va juda aniq, ixcham shaklda oʻz fikrlarini loʻnda bayon etadilar.

Soʻzni erkakmi, ayolmi, kim aytsa ham ma'noli aytishi kerak. Chunki soʻzlashdan maqsad biror ma'noni anglatishdir. Shuning uchun soʻzni kim aytayapti, uning ahvoli qandayligi bilan qiziqmasdan, balki qanday soʻz aytilayapti — ma'nolimi yoki aksi, mana bunga e'tibor bermoq muhim. Darhaqiqat juda toʻgʻri fikr. Xalqimizda ham «Odamni oʻziga emas, soʻziga boq» degan maqol bor. Kishi balki tashqi qiyofasi koʻrimsiz, ayrim bir sabablar tufayli kiyimlari eskiroq boʻlishi mumkin. Biroq uning soʻzi chiroyli boʻlsa,

soʻzida ma'no-mazmun boʻlsa, e'tiboringizni shu jihati jalb etadi. Suhbatdoshingizga hurmatingiz oshadi. U bilan uzoqroq suhbatlashgingiz, yaqinlashgingiz keladi. Undan aql, ibrat olasiz. Aksincha koʻrinishi goʻzal, ammo soʻzlari dagʻal, qoʻrs-qoʻpol odamlar ham boʻladi. Ularning tashqi qiyofasiga qarab baho berib, suhbatlashsangiz, undan tezroq qutulishni oʻylaysiz, bahona topib, uzoqlashishga harakat qilasiz. Qoʻpol badjahl odamlar xunuk soʻzlar, yoqimsiz iboralar aytishga moyil boʻladilar yoki istehzo, kinoya bilan soʻzlaydilar. Bunday soʻzlar kishilar qalbini yaralaydi, ozor beradi. Shuning uchun ularni «dilozor odamlar» deb barcha qochadi. Ana shularni koʻzda tutib, quyidagi qit'alardan juda ibratli xulosalar chiqarish lozim.

Shoir bobomizning mana bu qit'alari xushomadgo'y kimsalar haqida:

Kimki maxluq xizmatigʻa kamar Chust etar, yaxshiroq ushalsa beli.

Qoʻl qovushtirguncha bu avlodur, Ki aning chiqsa egni, sinsa beli.

Chun xushomad demakni boshlasa kosh Kim, tutulsa dami, kesilsa tili.

Yomon bir kimsaning xizmatini qilib yurgan kishi undan alam koʻrib, tahqirlanib kaltak yesa-yu, yana unga xushomad qilib oʻtirsa, bunday odamning damini qaytarib tilini kesish kerak, deydi shoir. Bu bilan til-yogʻlamalik, yomonni yaxshi deb xushomad qilish, yoʻq sifatlarini keltirib, amaldor yo davlatmand shaxsga yaxshi koʻrinmoqchi boʻlish bu eng badbin illatlardandir.

Koʻngilchan, kamtarin insonlar amal kursisiga oʻtirsa, albatta atrofida ma'lum gʻarazli maqsadlarni koʻzlab xushomadgoʻylik qiluvchi kimsalar paydo boʻlishi mumkin. Ular oʻzlarining nomunosib xatti-harakatlari, yolgʻon maqtovlari, yolgʻon sadoqatlari bilan oʻsha rahbarni notoʻgʻri yoʻllarga boshlaydilar. Rahbar shunday odamlarga aldanib, egri ishlarni qila boshlasa qoqilib qolishi, oxir-oqibat tanazzulga yuz tutishi aniq. Ana shundan, oʻsha xushomadgoʻylar birinchi boʻlib undan qochadilar, turli joylarda yomonlab, obroʻini toʻkadilar. Bunday odamlarni oqil kishilar «buqalamun kimsalar», ya'ni tusini oʻzgartirib turadigan oʻz qiyofasiga ega boʻlmagan

odamlar deb nafratlanadilar. Navoiy bobomiz nafratlanibgina qolmay, xushomadgo'y kimsaning tili kesilsa deya, ularga o'z g'azablarini oshkora bildiradilar.

Soʻzida ma'no yoʻq, xushomadgoʻy badbin kimsalar kabi jaholatda umr oʻtkazgan odamlarni bobomiz yana bir qit'alarida hammomga kirib, undan yuvinmay nopok chiqqan odamlar deb hisoblaydilar.

> Kamol et kasbkim, olam uyidin Sanga farz o'lmag'ay g'amnok chiqmoq.

Jahondin notamom o'tmak biaynih, Erur hammomdin nopok chiqmoq.

Bu yorugʻ olam odamlar uchun sinov dunyosi. Unda yashagan kimsa oʻzini inson deb bilmogʻi uchun oʻzini anglamogʻi, tag-zoti — avlodini bilmogʻi, ilm-u hunar kasb etib, oʻzi va oʻzgalarga nafi yetmogʻi lozim. Olam shu qadar goʻzal va jozibador, sehrliki, uning goʻzalliklaridan bahra olish, sir-sinoat, tilsimotlarini kashf etish beqiyos huzur bagʻishlaydi. Ilm choʻqqilarini egallab, ma'rifatli boʻlgan odamlargina oʻsha huzurga erishadilar. Shu sabab hazrat oʻquvchiga «kamol kasb et», ya'ni ilm oʻrgan, oʻz ma'naviy karnolotingga erishgin, shundagina «olam uyidan» — dunyodan «gʻamnok» — afsuslanib oʻtmaysan. Agar hayotdan ma'no topolmay, hech narsani bilmay, intilmay maxluqlarday yashasang, hammomdan poklanmay chiqqan kabi, ya'ni jaholat botqogʻiga botib, dunyo saodatini bilmay oʻtasan demoqchi boʻladilar. Axir tiriklik, hayotning ne'mati, avvalo, oʻrganib, izlab, anglamoqda, halol mehnat qilib, farovon turmush kechirmoqdalar.

Bobomiz Alisher Navoiyning ruboiy va qit'alari, umuman ijodiy meroslaridan biz avlodlariga qoldirgan pand-u nasihat va ibratlari bir dengizdir. Bu ma'naviy dengizdan barchamiz hamisha bahramand bo'lib tursak, hayotda yanglishmay, to'g'ri yo'ldan boramiz.

Savol va topshiriqlar

1. Alisher Navoiy hazratlari siymosining xalqimiz ma'naviy hayotida tutgan oʻrni haqida soʻzlab bering.



- 2. Nima uchun biz har yili 9-fevral kunini bayram sifatida nishonlaymiz?
- 3. Alisher Navoiy siymosi aks etgan qanday badiiy kitob va boshqa san'at asarlarini bilasiz?
- 4. «Xamsa» soʻzi qanday ma'noni anglatadi va «Xamsa» yaratgan qaysi ijodkorlarni bilasiz?
- 5. «Hayrat ul-abror» qanday ma'noni anglatadi?
- 6. Nima uchun bobokalonimiz Soʻzni ulugʻlaganlar?
- 7. Soʻzning dur kabi tizilishi nimaga nisbat beriladi?
- 8. Mubolagʻali soʻzni qoʻllash qachon foydali boʻladi?
- 9. She'rda ma'noning ahamiyati haqida so'zlang.
- 10. Ruboiy soʻzining ma'nosi, uning she'riy janr sifatidagi ta'rifini aytib bering.
- 11. Qanday ruboiylami «ruboiyi tarona» deb ataymiz?
- 12. Oʻzbek va boshqa xalqlar adabiyotidagi qaysi shoirlar ruboiy yozganlar?
- 13. Alisher Navoiy bobomiz ruboiylaridan namunalar yodlang.
- 14. Bobomiz ruboiylarining mavzulari haqida soʻzlab, ayrimlarining mazmunini sharhlab bering.
- 15. Ruboiylardan qanday ibratli xulosalar chiqardingiz.
- 16. Qit'a janri haqida so'zlab bering.
- 17. Necha xildagi qit'alarni bilasiz?
- 18. Qaysi shoirlar qit'a janrida ijod qilganlar?
- 19. Oit'alardan namunalar yodlang.
- 20. «Odamni oʻziga emas, soʻziga boq» maqolini Alisher Navoiy bobomiz qit'alari asosida sharhlang.
- 21. Shoir bobomizning xushomadgo'y kimsalar haqidagi qit'alaridan qanday xulosalar chiqarish mumkin?
- 22. Qanday odamlar hammomdan nopok chiqqan odamlarga qiyoslanadi?
- 23. Oʻrganilgan ruboiy va qit'alarning ahamiyati va ibrati haqida sinfdoshlaringiz bilan suhbat oʻtkazing.



XALQ QO'SHIQLARI

Qoʻshiqlar xalq poetik ijodining eng qadimiy va ommaviy shakllaridan biridir. Aziz oʻquvchilar! Siz har kuni radio, televizor orqali oʻnlab, yuzlab qoʻshiq tinglaysiz. Oʻzingiz ham biror-bir yoqimli qoʻshiqni xirgoyi qilib yursangiz ham ajab emas. Biroq ularni farqlay bilish kerak.

Qoʻshiqlar yaratilish manbai, tinglovchilarning qaysi qatlamiga bagʻishlangani, mavzulariga koʻra har xil. Masalan, xalq tomonidan va real ijodkorlar (shoir va bastakor) tomonidan yaratilishiga qarab xalq qoʻshiqlari va zamonaviy qoʻshiqlar deb farqlanadi. Xalqimiz tarixida qoʻshiqlarning qadimiy turi mavjud boʻlgan: ov qoʻshiqlari, mavsum qoʻshiqlari, toʻy qoʻshiqlari («Yor-yor»), aza qoʻshiqlari (marsiya) kabi. Bundan tashqari bolalarga moʻljallangan alla, ovunchoq qoʻshiqlar, oʻyin qoʻshiqlari («Boychechak», «Oq terakmi, koʻk terak») ham mavjud.

Siz bilan biz tanishmoqchi boʻlgan xalq qoʻshiqlari kundalik hayotimizni bezovchi koʻngil mulki hisoblanadi. Xalqimiz oʻz quvonchini, shodligini yoki gʻam-hasratini qoʻshiqlarda yorqin aks ettirgan. Xalqimizning ogʻzaki bisotidan lirik qoʻshiqlar va termalar yillar davomida sayqallanib bizgacha yetib kelgan va hozir ham sevilib ijro etilyapti.

Xalqimiz tomonidan yaratilgan qoʻshiqlarda milliy urf-odatlarimiz nafislik va nazokat bilan aks ettiriladi. Kundalik hayotda onalarimiz allani kanda qilmay kuylayotganlari yoki toʻylarimizning «Yor-yor»siz oʻtmayotganligi buning isbotidir.

Qoʻshiq – jon ozigʻi. Uni tinglaganingda ruhing yengil topadi, jon orom oladi. Xalq qoʻshiqlarining bu boradagi oʻrni beqiyos. Quyida e'tiboringizga havola etilayotgan xalq qoʻshiqlari biz ta'riflagan buyuk ummondan tomchilar, xolos. Ularni oʻqing, kuylang, toki qalbingiz zavq-u shavqqa toʻlsin.

BOYCHECHAK

Boychechagim boylandi, Qozon toʻla ayrondi. Ayroningdan bermasang, Qozonlaring vayrondir.

Qattiq yerdan qatalab chiqqan boychechak, Yumshoq yerdan yumalab chiqqan boychechak.

> Boychechakni tutdilar, Tut yogʻochga osdilar. Qilich bilan choptilar, Baxmal bilan yopdilar.

Qattiq yerdan qatalab chiqqan boychechak, Yumshoq yerdan yumalab chiqqan boychechak.

BOSHGINAM OGʻRIYDI

- Onajon, onajon!Boshginam ogʻriydi-ya.Boshginangdan onang aylansin,Nimalarga ogʻriydi-ya?
- Bozorlarda bo'lar ekan,
 Zargarlarda turar ekan,
 Uning oti tillaqosh,
 O'shanga og'riydi-ya!
- Onajon, onajon!Boʻyniginam ogʻriydi-ya.Boʻyniginangdan onang aylansin,Nimalarga ogʻriydi-ya?



Bozorlarda bo'lar ekan,
 Zargarlarda turar ekan,
 Uning oti bo'yintumor,
 O'shanga og'riydi-ya!

Onajon, onajon!Quloqqinam ogʻriydi-ya.Quloqqinangdan onang aylansin,Nimalarga ogʻriydi-ya?

Bozorlada bo'lar ekan,
Zargarlarda turar ekan,
Uning oti oltin isirg'a,
O'shanga og'riydi-ya!

CHITTI GUL

Chitti gul-e, chitti gul, Etagingga gul bosay. Hay-yu, chitti gul, Hay-yu, chitti gul.

Qoʻling qoʻlbogʻda boʻlsin, Beling belbogʻda boʻlsin. Hay-yu, chitti gul, Hay-yu, chitti gul.

Tapir-tupur ot keldi, Chiqib qarang – kim keldi? Hay-yu, chitti gul, Hay-yu, chitti gul.

Aravada un keldi, Childirmada gul keldi.



Hay-yu, chitti gul, Hay-yu, chitti gul.


Gul yaxshi-yu, gul yaxshi, Gulning popugi yaxshi. Hay-yu, chitti gul, Hay-yu, chitti gul.

Oʻrtada oʻynagan qizning Haydar kokili yaxshi. Hay-yu, chitti gul, Hay-yu, chitti gul.

Savol va topshiriqlar

- "Qo'shiq jon ozig'i", "Qo'shiq ko'ngil mulki" deganda nimani tushunasiz?
- 2. Qoʻshiqlar yaratilish manbai, mavzulari, kimlarga moʻljallanganiga qarab har xil dedik. Buni tushuntirib bering.
- 3. Qaysi qo'shiqlarni o'yin qo'shiqlari deya olamiz?
- 4. Mavsum qoʻshiqlari sirasiga qaysi qoʻshiqlar kiradi?
- 5. Xalq qoʻshiqlari qanday xususiyatlarga ega?
- 6. «Boychechak» qoʻshigʻi nima haqda? Sharhlang.
- 7. Kitobingizdagi qaysi qoʻshiqni savol-javob qoʻshigʻi deya olamiz?
- 8. Biror-bir xalq qoʻshigʻini yod oling va uni mukammal kuylashga harakat qiling.





QISAS AR-RABG'UZIY

Oʻzbek mumtoz nasrining ilk goʻzal durdonasi «Qisas ar-Rabgʻuziy» («Rabgʻuziy qissalari») asarining muallifi Nosiruddin Burhonuddin Rabgʻuziyning bizgacha shu birgina asari yetib kelgan. Asar muqaddimasidan ma'lum boʻlishicha, u Xorazmning Raboti oʻgʻuz degan mavzesida tugʻilgan. Rabgʻuziy taxallusi ham shundan kelib chiqqan. Oʻgʻuz urugʻidan boʻlgan. «Qisas ar-Rabgʻuziy» mutolaasi muallifning badiiy salohiyati balandligi, oʻz davrining barcha ilmlaridan, Qur'oni karim, Hadisi sharif va diniy-tasavvufiy adabiyotlardan yetarlicha xabardor donishmand kishisi boʻlganligini koʻrsatadi.

Rabgʻuziy oʻz asarini Movarounnahr hukmdori Alouddin Tormashirinning noibi, musulmonlikni qabul qilgan ma'rifatli moʻgʻul beklaridan boʻlgan Nosiruddin Toʻqbugʻabekning iltimosi va homiyligida 1309–1310-yillarda yozadi. Shundan taxmin qilish mumkinki, u XIII asr oxiri – XIV asr boshlarida yashagan.

Ma'lumki, Qur'onda paygʻambarlar haqidagi qissalar va diniy voqealar bir necha suralarda nozil boʻlganligidan ularni sharhlash, tushuntirishga ehtiyoj tugʻilgan. Shuning natijasi oʻlaroq dastlab arab tilida Abu Is'hoq Nishopuriy, Vahhob binni Munabbih al-Yamaniylarning «Qisas ul-anbiyo» asarlari paydo boʻlgan. Keyin fors tilida shunday asarlar yaratilgan. «Qisas ar-Rabgʻuziy» oʻzbek tilida yaratilgan bu yoʻnalishdagi asarlarning ilk namunasi hisoblanadi.

Rabgʻuziy Qur'on va hadisdan tashqari, Imom Ya'qub Sufyon, Majididdin Anbugoniy, Qaffol Shoshiy va boshqalarning Qur'onga yozgan



tafsirlari, «Usmat ul-avliyo», «Daloyil an-nubuvva» kabi koʻplab diniy adabiyotlar, Abulhasan Kisoiy qissalaridan ham foydalangan. Lekin u oʻzidan oldin yozilgan asarlardan nusxa koʻchirib qoʻya qolmaydi, balki mavzuga ijodiy yondoshadi, qissa va hikoyatlardan eng ishonchlilarini tanlab oladi. Shu bilan birga, salaflari¹ yoʻl qoʻygan xatolarni tuzatadi, bu kitoblardagi chala qissalarni toʻldiradi. Bu haqda Toʻqbugʻabek unga shunday degan edi: «... paygʻambarlar qissalariga qiziqishim juda kuchli. Bunday qissalar koʻp boʻlsa-da, ularning ba'zisi haqiqiy, ba'zisi esa soxta. Bir qanchasi qiyomiga yetgan boʻlsa, bir qanchasi hali notugal. Bir qismining tafsiloti chala boʻlsa, bir qismining maqsadi noayon. Shuning uchun sen oʻqishga yaroqlik bir kitob bitsang...»

Rabg'uziy bor bilimi va mahoratini ishga solib, kitobni bir vil ichida yozib tugatadi. Dunyoning yaratilishidan boshlab soʻnggi paygʻambar Muhammad alayhissalomning nevaralari Hasan va Husaynning shahid bo'lishlari – payg'ambar xonadonining zavoligacha bo'lgan davrni o'z ichiga olgan ushbu asar 72 ta katta-kichik qissalardan iborat. Olam va Odamning paydo bo'lishi, payg'ambarlar hayoti, islom tarixi, boshqa koʻplab diniy voqea-hodisalar, qisqasi, olamning bir butun diniy manzarasini o'quvchi ko'z o'ngida jonlantirishga yo'naltirilganligi jihatidan asar asrlar dayomida koʻplab nusxalarda koʻchirilib, turkiy xalqlar oʻrtasida sevib oʻqilgan. «Oisasi Rabgʻuziy», «Oisas ul-anbiyoi turkiy» nomlari bilan mashhur bo'lgan. Asarning qo'lyozma nusxalari dunyoning turli kutubxona va qo'lyozma fondlarida saqlanadi. Uning eng qadimgi qo'lyozmasi XIV asrning qirqinchi yillarida – muallif hayotligida koʻchirilgan bo'lib, u Londondagi Britaniya muzeyida saqlanadi. Mashhur sharqshunos K. Gronbek tomonidan 1948-yili Kopengagen (Daniya)da uning faksimilesi² chop etilgan. Xuddi shu nashr asosida akademik E, Fozilov, fan nomzodlari A. Yunusov va H. Dadaboyevlar uni o'zbek tilida nashrga tayyorlab, ikki jildda chop etdilar.

«Qisas ar-Rabg'uziy» bir qarashda yagona sujet chizig'iga ega bo'l-

² Faksimile – qoʻlyozmaning aynan tiklangan nusxasi.



¹ Salaf – oldin oʻtganlar; ustozlar.

magan asarday taassurot tugʻdiradi. Chunki unda 33 paygʻambar, 4 xalifa, 7 tarixiy shaxs va boshqalar toʻgʻrisida soʻz boradi. Lekin asarning bosh qahramoni ham bor. U — Muhammad alayhissalom. Ma'lumki, diniy ta'limotga koʻra, olamning asosida Muhammad nuri yotadi. Bu nur olam yaratilmasdan burun ham mavjud edi. Ollohning olamni yaratishidan maqsad — inson, insondan maqsad esa Muhammad alayhissalom edi. Shuning uchun ham asarning boshidan oxiriga qadar Muhammad alayhissalom mustaqil qissalarni bir-biriga bogʻlovchi halqa boʻlib xizmat qiladi. Chunonchi, Odam Ato tugʻilganda uning oldida Muhammad alayhissalom nuri jilva qiladi. Shis paygʻambar tugʻilganda bu nur unga oʻtadi. Nuh kemasining 124 ming temir halqasi boʻlib, har bir halqada bir paygʻambarning ismi bitilgan edi. Ular orasida Muhammad paygʻambar ham bor edi. Bundan tashqari, barcha qissalar ichida Muhammad alayhissalomning biror hadisi yoki u bilan bogʻliq biror rivoyat keltiriladi.

«Qisas ar-Rabgʻuziy» oʻsha davr Movarounnahr va Oltin Oʻrda hududi uchun mushtarak boʻlgan turkiy adabiy tilda yozilgan. U Rabgʻuziyning nafaqat turkiy nasr asoschilaridan biri, balki zabardast shoir ham ekanligini koʻrsatadi. Chunki paygʻambarlar toʻgʻrisidagi har bir qissa she'r bilan boshlanib, ularda qissaning mazmuni umumlashtirilgan. Shuningdek, ayrim qissalar she'riy xulosa bilan yakunlanadi. Qissada jami 600 misra she'r mavjud. Xususan, tabiat manzaralari, bahor tasvirini shoir hassoslik bilan qalamga olgan. «Qissai Yusufi siddiq alayhissalom» ichida kelgan «Bahoriyoti Mavlono Nosiruddin Rabgʻuziy» nomli gʻazalning el ichida mashhur boʻlib ketishi bejiz emas:

Kun hamal¹ gʻa kirdi ersa, keldi olam Navroʻzi, Kechdi bahman² zamharir³ qish, qolmadi qori, muzi. Kun kelu ming koʻrki ortib, tirilur oʻlmish jahon, Tong badiz⁴ lab, naqshi birla bezanur bu yer yuzi.



¹ Hamal – hijriy-shamsiy yilning birinchi oyi (21-mart – 20-aprel).

² Bahman – hijriy-shamsiy yilning oʻn birinchi oyi (22-yanvar – 20-fevral).

³ Zamharir – sovuq, qahraton.

⁴ Badiz - tasvir.

«Qisas ar-Rabgʻuziy» Qur'on, hadis va diniy adabiyotlar ta'sirida, ulardan foydalanilib yozilgan boʻlsa-da, voqealar keng, chuqur va badiiy yoʻsinda bayon qilinib, adabiy asar holiga keltirilgan. Buning uchun adib ifodani ta'sirchan qiladigan badiiy vositalar – tashbeh, talmeh, mubolagʻa, tazod, lutf, tajohuli orifona, irsoli masal kabi san'atlardan mahorat bilan foydalangan, xalq maqol-matallari, obrazli iboralari, folklor motivlarini ustalik bilan asar matniga singdirib yuborgan. Badiiy toʻqimalardan mahorat bilan foydalangan. Pand-nasihat ruhini singdirgan. Bularning barchasi asarning ta'sirchanligi, oʻqimishliligini oshirgan.

«Qisas ar-Rabgʻuziy» — badiiy-estetik qimmati, ma'naviy-axloqiy ahamiyati jihatidan oʻzbek mumtoz adabiyotining durdona asarlari sirasiga kiradi. U paygʻambarlar tarixini ilk bor turkiy xalqlarga oʻz tillarida sodda va tushunarli tarzda bayon qilib berish orqali ularni diniy qadriyatlardan bahramand etgani bilan ham alohida ahamiyat kasb etadi. U Oʻrta Osiyo, Volgaboʻyi va Kavkazorti hududlari turkiy tilli xalqlari tomonidan ham sevib oʻqilgan. Asar nafaqat din tarixi va badiiy adabiyot, ayni paytda, til tarixi, islom tarixi va ahkomlari, tarix, jamiyatshunoslik, etnografiya, psixologiya, falsafa, astronomiya kabi fanlar boʻyicha ham koʻp ma'lumotlarni oʻz ichiga olganligi jihatidan ma'rifiy-ilmiy ahamiyat kasb etadi.

Muallifning hikoya uslubi sodda, samimiy va qiziqarli. Ilk sahifalaridanoq oʻquvchini oʻz ortidan ergashtirib ketadi. Lekin oradan yetti asr oʻtgani uchun hozirgi oʻquvchi asarni oʻqishga qiynaladi. Shuni hisobga olib, asardan olingan hikoyatlarni hozirgi tilimizga tabdil qilib (moslashtirib) berishni ma'qul koʻrdik. Bunda siz aziz oʻquvchilarning yoshingiz, bilim darajangiz, soʻz boyligingizni ham hisobga oldik. Yuqori sinflarga oʻtganingizda, mumtoz adabiyot asarlarini mutolaa qilib, qadimiy soʻz boyligingiz koʻpayganida asarni asl nusxasida oʻqib, zavq olishingiz mumkin. Hozir esa uning zamonaviy tilga moslashtirilgan hikoyatlarini oʻqib, ma'naviy zavq, ma'rifiy bilim oling. Dunyo, hayot, jamiyat va inson haqida xulosa chiqaring.



ODAMNING YARATILISHI¹

Qudratli va ulugʻ Olloh Odamni yaratishga qaror qilganida Jabroilga xitob qildi:

- Borgil, yer yuzidan bir hovuch tuproq keltirgil!

Jabroil kelib, bir hovuch tuproq olmoqchi boʻlganida yer mendan tuproq olmagil deb Jabroildan oʻtindi. Jabroil (uning) hurmatini qilib, tuproq olmadi.

Isrofilni joʻnatdi. (Yer) undan ham tuproq olmasligini oʻtindi. U ham tuproq olmadi.

Keyin Mikoilni joʻnatdi. (Yer) undan ham tuproq olma deb oʻtindi. U ham tuproq olmadi.

Keyin Azroilni joʻnatdi. (Yer) undan ham oʻtindi. Azroil² dedi:

- Menga sening iltimosingdan Tangri taolo amri azizroq!

Shunday deb, yer yuzidan bir hovuch tuproq oldi...

Parvardigori olamdan xitob keldi:

 Ey Azroil, juda qattiq koʻngillik ekansan. Barcha mavjudotlarning jonini olishni senga taqdir qildim.

Savol: Odamni tuproqdan yaratishdan hikmat nima edi?

Javob: Qudratli va ulugʻ Olloh Odamni yarataman deb xitob qilganida barcha narsalar bosh koʻtarib: «Odamni bizdan yaratgil!» – deb tama' qildilar. Togʻ aytdi:

- Men - qutlug'man!

Dengiz aytdi:

- Men - ulug'man!

Osmon aytdi:

- Men -yuksakman!

Shu tariqa barcha narsalar oʻzlarini ulugʻladilar. Yer esa tavoze bilan:

- Men hammadan zaifman, oyoq ostidaman, menda maqtangulik narsa
 yoʻq, deb kamtarlik qilganida xitob keldiki:
 - Men Odamni tuproqdan yaraturman! deb.

Odamni tuproqdan yaratdi.

² Islomdagi farishtalar: **Jabroil** – Xudo bilan paygʻambarlar oʻrtasida elchilik qiladi. Is**rofil** – qiyomat kuni kelganini bildirib, surnay chaladi. **Mikoil** – koinotni boshqaradi. **Azroil** – jon oladi.



¹ Matnni hozirgi tilga E. Ochilov moslashtirgan.

SHAYTONNING LA'NATLANISHI

...Azozil jannatda hukmfarmo edi. Barcha farishtalarga ilm oʻrgatar edi. Bir kuni «Lavh ul-mahfuz»da¹ koʻrdiki, farishtalardan biri mal'un² boʻlar deb. Buni bilib, farishtalarning barchasi qoʻrqdilar. Azozilga kelib aytdilar:

– Sen ustozimizsan, duo qilgil, qudratli va ulugʻ Olloh bizni la'natdan asrasin!

Azozil duo qildi, farishtalar «omin» dedilar. Qudratli va ulugʻ Olloh uning duosi (sharofati) bilan barcha farishtalarni la'natdan asradi, (Azozilning) oʻzi la'natga qoldi.

Farmon boʻldiki: Odamni nurdan yasalgan bir taxtga oʻtqazib, farishtalar uni yelkalarida koʻtarib, jannatni kezar edilar. Sabab bu edikim, Odam yaratilmasdan avval Odam oʻgʻlonlari fasod qilgʻaylar, qon toʻkkaylar deb (farishtalar) gʻiybat qildilar. Biz tasbih³ va taqdis⁴ aytamiz, deb oʻzlarini ulugʻladilar. Parvardigori olamga (ularning) bu soʻzi ma'qul kelmadi. Hukm qildi: sizlar Odamni gʻiybat qildingiz, savoblaringiz bekor boʻldi. U savoblar Odam oʻgʻlonlariga berildi. Bu gʻiybatning jazosi shudir. Bu kun barcha farishtalar boring, Odam taxtini yelkangizga koʻtarib, unga xizmat tariqini koʻrsating, deb farmon boʻldi. Shundan keyin qudratli va ulugʻ Olloh «Asmo»⁵ ilmini Odamga oʻrgata boshladi. Hamma narsalarni farishtalarga koʻrsatdi.

 Agar toʻgʻri soʻzlik boʻlsangiz, bu narsalarning oti nimadir, menga aytib bering.

Farishtalar ojiz boʻlib aytdilar:

- Sen oʻrgatgandan boshqa narsani bilmasmiz.

Yana Odamga farmon bo'ldi:

⁵ **Asmo** – ismlar. Olloh taoloning goʻzal ismlari haqidagi ilm boʻlib, bu ismlarning jami 99 ta. U «Asmoi husna» (goʻzal ismlar) deb ham yuritiladi.



¹ Lavh ul-mahfuz – diniy aqidaga koʻra, kishilarning yaxshi va yomon amallari, taqdiri azaldan bitib qoʻyilgan taxta.

² Mal'un – la'natlangan; qarg'ish urgan.

³ Tasbih (aytish) - Xudoni zikr etish, «subhonolloh-subhonolloh» deyish.

⁴ Taqdis (aytish) - muqaddas hisoblash, poklikka nisbat berish.

- Ey Odam, farishtalarga bu narsalarning otini aytib bergin.

Odam (barcha narsalarning) otini ayta boshladi:

-Bu - daraxt, bu - tosh, bu - suv...

Hamma narsaning nomini boshidan oxiriga qadar barcha tillarda bayon qildi.

Xitob keldi:

– Ey farishtalar, sizlarga aytmadimmi, men bilgan narsani sizlar bilmaysizlar, deb. Endi sizga ma'lum bo'ldiki, Odam olimdir, siz obidsiz¹. Mening huzurimda ming obiddan bir olim afzalroqdir. Qayda obid bo'lsa, u olimga xizmat qilishi kerak. U maxdum² bo'lsin, sizlar xodim³ bo'ling. U masjid bo'lsin, sizlar sajda qiluvchi bo'ling. Odamga sajda qiling!

Barcha farishtalar baravariga sajda qildilar... yolgʻiz Azozil sajda qilmadi. Oʻzini ulugʻ sanab, boʻyin egmadi va kofirlar jumlasidan boʻldi.

Azozil sajda qilmagach, (arshdan) xitob keldi:

- Nima uchun sajda qilmading? deb.
- Men undan ortiqroqman, dedi. Meni oʻtdan yaratding, uni qora tuproqdan...

Bunday dalil keltirgani uchun Azozil otini bekor qilib, Iblis (deb) nom berdilar. Ma'nosi «noumid» demakdir. La'nati Iblis o'tni tuproqdan ortiq dedi. Bilmadiki, tuproq o'tdan ortiqdir. Dalili bukim: o't o'g'ridir, nimaniki o'tga bersa, yo'q qilur, qaytib bermas. Ammo tuproqqa bir hovuch (narsa) solsang, o'nni yuz qilib senga qaytarur...

Iblis aytdi:

- Yo Rabbim, (men) yuz ming yil toat qildim, uning mukofotin menga bergil.

Xitob keldi:

- Nima istaysan?

Iblis uzun yosh tiladi – qiyomat kuniga qadar.

Mufassirlar⁴ ayturlar:

⁴ Mufassir - sharhlovchi, tafsirlovchi (Qur'on va hadisni).



¹ Obid – toat-ibodat qiluvchi, xudojoʻy, taqvodor.

² Maxdum - boshqalar uning xizmatida boʻladigan kishi; xoʻjayin, xoja.

³ Xodim – birovlarga xizmat qiladigan kishi, xizmatkor.

- U badbaxt Olloh taologa nayrang koʻrsatdi qiyomat kuniga qadar umr tiladi. Maqsadi shu ediki, oʻliklar tiriladigan kunga qadar umr koʻrsam, keyin menga oʻlim boʻlmaydi deb. Olloh taolo uning (bu yashirin) sirini bilib, javob qildi:
- Biz senga umr berdik ma'lum kunga qadar, sen tilagan kunga qadar bermadik.

Boshqa bir mo'tabar tafsirda keltirilishicha, (qiyomat kunigacha) deganidan maqsad bu edi: hozirda Tangri farishtalari ko'pdir. Ularga (qarshi) chiqishga qudratim yetmas. O'liklar tiriladigan kungacha umr ko'radigan bo'lsam, ungacha Jabroil, Isrofil, Azroil va boshqa farishtalarning hammasi o'ladigan bo'lsa, Tangri yolg'iz qolganda uning bilan talashaman deb niyat qilgan edi.

Savol: Iblis mal'un bo'lgandan keyin qanday qilib jannatga kira olar edi?

Javob: Olloh marhamat qildi: «Odam oʻgʻlonlari uzra nusrat¹ berdim. Koʻrmasmisanki, Rasul alayhissalom²: «Qon odam bolasining tanasida qanday aylansa, shayton (ham uning ichida) shunday yuradi», – deb ogohlantiradilar.

ODAM ATO VA MOMO HAVONING JANNATDAN HAYDALISHI

Odam (Ato) va (Momo) Havo nikoh qilinganlaridan keyin xitob keldi:

– Ey Odam, jufting bilan jannatga kirgil, ne'matlaridan bahramand bo'l. Faqat mana bu yig'ochga³ yaqinlashmang – zolim bo'lgaysiz.

Ishonchli manbalarga koʻra, u bugʻdoy yigʻochi edi...

Iblis mal'un bo'lgandan keyin jannatdan haydaldi. Jannatga kira olmaydigan bo'ldi. Ko'nglida Odam (Ato) va (Momo) Havoga nisbatan adovat bosh ko'tardi. Ularni yo'ldan urib, jannatdan chiqarishga qasd qildi. O'sha paytda ilon chiroyli suratlik tuyaga o'xshar edi. Qizil, yashil – turli bezaklik qanotlari bor edi. (Momo) Havo ilonning chiroyli suratini

³ Yig'och - daraxt, yog'och.



¹ Nusrat – zafar, gʻalaba, gʻoliblik.

² Bu yerda Muhammad alayhissalom koʻzda tutilmoqda.

xush koʻrib, u bilan suhbat qurar edi. Buni bilgan Iblis ilondan iltimos qildi:

- Meni jannatga olib kir, Havo bilan soʻzlashayin, - deb.

Ilon qoʻrqdi. Unamadi.

Iblis aytdi:

- Ogʻzingni ochgil, men kirayin.

Ilon ogʻzini ochdi.

Iblis ilonning tili ostiga yashirindi. (Shu tariqa ilon Iblisni) jannatga olib kirdi. Ilon Odam (Ato) va (Momo) Havoning taxti roʻparasiga kelib toʻxtadi. Tili ostidan Iblis soʻzga kirdi. Odam (Ato) ilon soʻzini tinglamagach, (Momo) Havoga yuzlandi. «Ayol kishining koʻngli yumshoq boʻladi», – deb (Momo) Havoga soʻzladi:

– Tangri sizni bu bugʻdoy yigʻochidan man qilgani sababini bilarmisan?

(Momo) Havo aytdi:

- Bilmayman.

Iblis aytdi:

- Shuning uchunki, kim bu bugʻdoydan yesa, jannatda abadiy yashaydi, oʻlim koʻrmaydi, yana jannat ne'matlaridan bebahra qolmaydi.

Bu soʻzni eshitib (Momo) Havoning koʻngli sust ketdi. Oʻrnidan turdi. Oʻn qadam yurib, bugʻdoy (yoni)ga bordi. Bir butogʻini sindirib, Odam (Ato)ning qoshiga keltirdi:

 Bu butoq lazzatli ekan, men yedim – hech narsa qilmadi, sen ham yegil, – dedi.

Odam (Ato) oʻsha damda (Tangriga) bergan va'dasini unutdi. Bugʻdoyni ogʻziga soldi, chaynadi, boʻgʻziga tiqilgandagina va'dani esladi. Yutishni ham bilmadi, yutmaslikni ham... Bu gunoh sodir boʻlgach, boshlaridan toj tushdi, ustlaridan libos — yalangʻoch qoldilar. Qoʻllari bilan avratlarini bekitib, yaproq soʻrab, daraxtdan-daraxtga yugura boshladilar. Qaysi daraxtga bormasin (lar, ular) yaproq bermadi...

Hukm keldi:

- Ey Odam, mendan qochayapsanmi?
- Yo Iloho, uyatdan sendan senga qocharman, dedi.



Jabroil Odam (Ato)ning qoʻlidan tutib, Parvardigori olamning oldiga olib keldi.

Farmon bo'ldi:

- Ey Odam, seni tuproqdan yaratmadimmi? Ma'rifat bilan ulug'-lamadimmi? Chiroyli surat bilan bezamadimmi? Farishtalarga ko'tartir-madimmi? Jannatga kirgizmadimmi? (Ilohiy) ne'matlardan bahramand etmadimmi? (Momo) Havoni senga juft qilmadimmi? Bug'doy yig'ochini yemang demadimmi? Shaytonni sizga dushman deb aytmadimmi? Nega bug'doy yeding?
 - Yo Iloho, ul hukmni kim qildi, u qismatni kim belgiladi?

Farmon keldi:

- Men yuritdim, men qismat qildim. Ammo mening (belgilaydigan) qismatim, hukmim, taqdirim (yashirin) sirdir, buyrugʻim, farmonim ochiqdir. Ochiqni qoʻyib, nega yashirin sirga daxl qilding?
- Yo Iloho, agar bunday hukm qilgan, qismat belgilagan boʻlsang, meni endi kechirgil, meni magʻfirat qilgil, dedi.

Farmon keldi:

 Seni mag'firat qildim. Sendan keyin keladigan (tug'iladigan) farzandlaring ham shunday tavba qilsalar, ularni ham kechirgayman. Endi jannatdan chiqgil, – dedi.

Xabarda andogʻ kelur: anjir daraxti Odam (Ato) va (Momo) Havoga besh yaproq berdi – andomlarini yashirib, (jannatdan) chiqdilar. Tong otgach, u besh yaproqdan birini kiyik yedi – mushk¹ boʻldi, birini sigʻir yedi – anbar² boʻldi, birini ari yedi – asal boʻldi, birini qurt yedi – ipak boʻldi, birini Odam (Ato) yerga sanchdi – yung boʻldi. Qiyomatgacha (undan) farzandlariga kafan boʻldi.

Nukta³. Anjir daraxti Odam (Ato)ga yaproq bergani uchun qudratli va ulugʻ Tangri (uni) ulugʻladi. Har qanday meva uch xil boʻladi: olma, nok kabi mevalarning tashqi tomoni yeyiladi, bodom,

³ Nukta - nozik va chuqur ma'noli soʻz, hikmat.



¹ Mushk – qora rangli xushboʻy modda. Kiyiklardan bir turining kindigida mushk hosil boʻladi – bu yerda shunga ishora qilinmoqda.

² **Anbar** – xushboʻy modda.

yongʻoqqa oʻxshaganlarning ichi — magʻizi yeyiladi, qovun, tarvuz kabilarning poʻchogʻi ham, urugʻi ham yeyilmaydi. Ammo anjirning tashi ham, ichi ham yeyiladi.

Jannatdan chiqing deb Odam (Ato)ga, (Momo) Havoga, tovusga, ilonga ilohiy amr keldi. Odam (Ato) bilan (Momo) Havo zor-zor yigʻlab-yolvorib (jannatdan) chiqdilar.

Odam (Ato) Hindistonga, Anjalus¹ degan yerga – Sarandip² togʻiga tushdi. (Momo) Havo Jadda³ (yaqinidagi) toqqa tushdi. Iblis Basraga⁴ tushdi... Odam (Ato) bilan (Momo) Havo yalangʻoch qoldilar, Iblis mal'un boʻldi, ilonning chiroyli koʻrinishi aynidi – yer bagʻirlab yuradigan, achchiq tuproq yeydigan boʻldi.

Odam (Ato) tushgan yerida haddan ziyod koʻp yigʻladi. Yuz yigʻoch⁵ lik yerda koʻzyoshlaridan daraxtlar undi, yoʻllar hosil boʻldi, buloqlar koʻz ochdi. Odam (Ato)ning koʻzyoshi tomgan yerda oʻt-oʻlan, achchiq-chuchuk dorivor oʻsimliklar oʻsdi. (Momo) Havoning koʻzyoshlari tomgan yerda ud⁶, qaranful⁷, sunbul⁸, hino, oʻsma undi. Qiyomatga qadar Odam farzandlariga meros qoldi...

Yana farmon bo'ldi:

- Ey Odam, mag'firat tilasang, Makkaga borgil. Men uchun bir uy tiklagil.

Aytdi:

- Yo Iloho, ul yerning qayerdaligini men bilmasman.

Qudratli va ulugʻ Olloh taolo bir qushni yoʻl koʻrsatuvchi qilib joʻnatdi. (U qushning) oti – koʻk qargʻa edi. U uchar, Odam (Ato) uning ortidan borar edi... Odam (Ato) Makka yeriga kelib bir uy tikladi... Ul uyning atrofini tavof etdi. Olloh Odam (Ato)ning (bu ishlarini) qabul qildi, gunohini kechirdi...

^{*} Sunbul – gullari halqa-halqa va xushboʻy gul.



¹ Anjalus (Andalus) - Ispaniyaning qadimgi nomi.

² Sarandip - Seylon (Shrilanka).

³ Jadda - Saudiya Arabistonidagi shahar.

⁴ Basra – Iroqning janubi-sharqidagi shahar.

⁵ Ylgʻoch – taxminan 9 km ga teng masofa birligi.

⁶ Ud – o'tga solganda xush hid taratadigan yog'och.

⁷ Qaranful – qalampirmunchoq.

Jadda togʻidagi (Momo) Havo qorni ochsa, dengiz qirgʻogʻiga kelib, baliq tutib, tosh ustiga qoʻyib, pishirib yer edi. Odam (Ato) ikki yuz yil yigʻladi. Ikki yuz yildan keyin Arafot (degan) joyda ikkovlari topishdilar.

NUH ALAYHISSALOM QISSASI

...Nuh Sharqdan Gʻarbgacha (boʻlgan) barcha xalqlarga paygʻambar edi. Bir qarich yer odamdan xoli emas edi. Bir parcha yerdan 300 yuk¹ bugʻdoy chiqar edi, 100 botmon bugʻdoy bir yillik oziq boʻlar edi.

Hikoyat qilishlaricha, Sharqdan Gʻarbgacha tutash tomlardan (iborat) uylar edi, tomdan tomga (oʻtib), Sharqdan Gʻarbgacha borsa boʻlar edi...

Hikoyat qilishlaricha, Sharqdan Gʻarbgacha, qayerga tayoq tashlasa, kishi boshiga tushar edi. Yana aytadilarki, mushuk tomdan-tomga oshib yursa, 100 yigʻoch yer yurar edi. Shuncha xalq boʻla turib, Olloh yagona deguvchi kimsa boʻlmadi. Nuh davridagiday koʻp xalq qiyomatgacha boʻlmaydi. Shu vaqtda Jabroil paygʻambarlik (xabarini) keltirdi. Nuh aytdi:

– Dunyo juda keng, kofirlar koʻp. Men qayerga borib, sening yakka-yu yagonaliging (xabarini) yetkazayin?

Xitob keldi:

- Ey Nuh, mendan eshittirish, sendan aytish.

Nuh imonga da'vat qildi. Shamol Nuhning so'zini Sharqdan G'arbgacha olib borar edi:

- Har kuni chiqib, imon keltiring. Olloh taoloning birligiga iqror boʻling. Mening paygʻambarligimga ishoning.

Kofirlar Nuhni ura boshladilar. Shunchalik urdilarki, suyaklari sindi. Qopga solingan suyak qanday shiqirlasa, terisi ichida suyaklari shunday shiqirlar edi. Tunda boshini yostiqqa qoʻyganida qudratli va ulugʻ Olloh shifo berar edi. Jabroil har kuni kelib, vahiy yetkazar edi:

– Ey Nuh, borgil, kofirlarga aytgil: «Lo iloha illallohu Nuhun rasulallohi»², – desinlar.

Borib aytar edi, (yana) shunday urar edilar. Nuh aytdi:

² Olloh yagona, Nuh uning elchisidir.



¹ Yuk – ogʻirlik; bir ulov koʻtaradigan ogʻirlikdagi yuk.

 E Xudoyim, kecha-kunduz sening farmoningni yetkazdim – tinglamadilar, ochiq aytdim – eshitmadilar. Da'vat orasida nasihatlar qildim – qabul qilmadilar.

950 yil da'vat qildi: 80 kishi musulmon bo'ldilar, imon keltirdilar – yarmi er, yarmi ayol. Boshqa hech kishi musulmon bo'lmadi. Kun sayin mashaqqati ziyoda bo'ldi. Nuhning xotini kofir edi.

Kunlardan bir kuni bir keksa chol bir oʻgʻlonni boshlab Nuhning qoshiga keldi. Nuhning yuziga tupurdi, tili (ga kelgan soʻzlar) bilan soʻkdi. U oʻgʻlonga aytdi:

Nuh bir telbadir. Otalarimiz uning soʻzini eshitmadilar. Bugun men unga (nisbatan) nima qilgan boʻlsam, sen ham mendan keyin shunday qil,
deb oʻgʻlonga vasiyat qildi.

Nuh uni koʻrib, soʻzini eshitib, oʻzidan umid uzdi. Umidi bekor boʻldi. Iltijo qilib, aytdi:

- Ey Xudoyim, biror kofirni yer yuzida tirik qo'ymagil!

Qodir Xudo qirq yil yomgʻir yogʻdirmadi, yerda giyoh undirmadi, xotinlarga oʻgʻil-qiz tugʻdirmadi. Hayvonlarning hammasi halok boʻldi, izlarida qolmadi.

Shu vaqtda Nuhga amr boʻldi:

- Iltijongni qabul qildim - borgil, chinor daraxti ekkin...

Nuh chinor ekdi. Qirq yilda uch chinor voyaga yetardi. Avjni¹ taklif qildilar. Ul daraxtni sudrab keltirdilar. Jabroil Nuhga ta'lim berdi. Yogʻochni pona bilan yordilar. Suv yuzida oʻrdak yurganini koʻrsata berdi. Unga oʻxshatib, kema yasay boshladilar. Kofirlar uni koʻrib, kular edilar:

- Hozirga qadar paygʻambar eding, endi duradgor boʻldingmi? Buni nima qilasan? deb soʻrasalar:
 - Kema qilarman, ustiga minib, suv yuzida suzarman, dedi.
 - Egar yasayapsanmi, avval eshak olgil, deb kular edilar...

Nuh javob qilar edi:

¹ **Avj ibn Unuq** – Odam alayhissalomning qizi Unuqning oʻgʻli. Uzun boʻylik boʻlib, ikki oyogʻining orasi bir kunlik yoʻl edi. Togʻning tepasida oʻtirib, qoʻli bilan dengizdan baliq ushlab, quyoshga tutib, pishirib yer edi.



 Siz bizni mazax qilursiz, ertaga azob (ga mustahiq boʻlganda) biz ham sizni mazax qilurmiz, – deb.

Nuh soʻradi:

- To'fon va'dasi qachon bo'lar?

Farmon keldi:

- Qachon sening tandiring ichidan suv chiqsa, u azobni yuborarman.

Kema uch qavat edi: pastki qismida hayvonlar, oʻrtasida Nuh va uning qavmi, yuqori qismida qush va qurtlar edi. Nuhning toʻrt oʻgʻli bor edi: Som, Hom, Yofas va Kan'on. Kema yoʻndilar: uzunligi 300, eni 200 qari¹. Ba'zilarning aytishicha, uzunligi 1200, eni va balandligi 600 qari. 124 ming temir halqa qildilar. Har bir halqada bir paygʻambarning ismi bitilgan edi. «Muhammad rasulullohi» deb bitilgan temir halqani Iblis oʻgʻirladi. Nuh har qancha qidirsa-da, (uni) topmadi. Jabroil kelib xabar berdi. Nuhga bergil desa (men) olmadim, deb ont ichdi. Jabroilning jahli chiqdi. Kemaning bir yogʻochini olib, boshiga urdi. Boshi, koʻzi qonga bulgʻandi. Qoʻrqqanidan (qaytarib) berdi.

Kema tayyor boʻlganida Nuhning kofir xotini non pishirar ekan, tandir ichidan suv chiqdi. Kelib Nuhga (bu haqda) xabar berdi. Nuh musulmonlikni qabul qilgan oʻsha 80 kishi bilan kemaga chiqdi. Toʻrt oʻgʻlidan Som, Hom va Yofas musulmon edilar, Kan'on (esa) kofir edi.

Farmon keldi:

- Har bir mavjudotdan bir juft olib kemaga kiritgil: bir erkak, bir urgʻochi, (toki) urugʻlari kesilmasin. Yana oʻgʻlonlaringni kiritgil.

Nuh aytdi:

- Ey Xudoyim, uchadigan, yuguradigan mavjudotlarni qanday qilib tutayin?

Suv yuzida barcha mavjudotlar yigʻildilar. Har biridan bir erkak, bir urgʻochisini tutib, kemaga kirgizdilar. Oʻgʻli Kan'onni kiritmoqchi boʻlganida farmon keldi:

- Kirgizma, u kofirdir!

^{&#}x27;Qarl - qo'l uchidan tirsakkacha bo'lgan uzunlik o'lchovi birligi; gaz. Gaz - 70 sm ga teng o'lchov birligi.



Aytdi:

- Ey Xudoyim, oila (a'zolari) ngni kirit deb o'zing aytding-ku?

Farmon keldi:

- U sening oilang a'zosi emas.

Nuh aytdi:

- Ey Kan'on, musulmon bo'l, kemaga kirgil, to'fon suvi halok qilmasin.

Kan'on aytdi:

- Men baland togʻlarga sigʻingayman. Togʻ meni suvdan asraydi.

Nuh aytdi:

 Bu kun Ollohdan oʻzga biror kimsani bu azobdan saqlaydigan zot yoʻq.

Shu soʻzni aytar ekan, suv keldi. Kan'onni halok qilgudek boʻlgan edi, toqqa qarab qochdi. Suv keldi, toʻpigʻiga chiqdi. Oʻgʻli bor edi, uni oyogʻi ostiga olib, ustiga chiqdi. Bola oʻldi, oʻzi ham gʻarq boʻldi, (bu dunyodan) imonsiz bordi.

QALDIRG'OCHNING INSONIYATGA DO'STLIGI

...Nuh paygʻambar ilonni, chayonni kemaga qoʻymadi odamga sizdan zarar tegar deb. (Ular) aytdilar:

- Kim sening otingni tutsa, ul kimsaga zarar yetkazmagaymiz...

Aytadilarki, qirq kecha-kunduz yomgʻir yogʻdi. Har bir tomchisi tegirmon toshi chogʻlik edi. Dunyoda qaysi togʻ eng baland boʻlsa, uning ustida qirq qari suv bor edi. Kemadagi 80 kishidan boshqa dunyoda tirik jon qolmadi, hammasi halok boʻldi.

Xabarda keltirishlaricha, kemada uch narsa yoʻq edi, daryo ichida paydo boʻldi: biri — mushuk, ikkinchisi — sichqon, uchinchisi — toʻngʻiz. Sichqon paydo boʻlgach, kemani teshdi. Farmon boʻldi: Nuh qoʻli bilan arslon boshini siladi — burnidan ikki mushuk chiqib, ul sichqonni (tutib) yedilar. Yana aytadilar: sichqon kemani teshgach, odamlarga gʻarq boʻlish xavfi paydo boʻldi, suv ichidagi teshikni qidirib topmadilar. Nuh aytdi:

- Kim bu teshikni berkitsa, har qanday tilagi bo'lsa, ado etgayman.

Ilon aytdi:

- Men uni berkitayin, suv kirmasin. Kirgan suvlarni chiqarsinlar.

Yana ilon aytdi:

- Menga nima berasan?

Nuh aytdi:

- Nimani xohlaysan?

Ilon aytdi:

- (Bu dunyoda) nimaning eti (eng) mazalik bo'lsa, (o'shani menga nasiba qilib) bergil.

Nuh qabul qildi. Ilon suvga kirib, teshikni topdi, ustiga kulcha boʻlib yotdi, suv yoʻli bekildi. (Kema) ichidagi suvni tashqariga chiqarib tashladilar. Suv xavfi qolmadi.

Kemadan chiqqandan keyin ilon kelib, Nuhdan ul etni so'radi.

Nuh aytdi:

- Hamma jonivorlar chiqib, yer yuziga tarqalib ketdilar, (endi) etni qanday topaman?

Ilon soʻrab qoʻymagach, Nuh alayhissalom chivinni joʻnatdi:

- Bor, yer yuzidagi etlarni totib koʻr, (qaysi eng mazali boʻlsa, uni) ilonga (nasiba qilib) beraylik.

Chivin ketdi, (lekin) kech qoldi. Ilon talab qildi. Nuh uyatlik boʻlib, chivinni topib kelishga qaldirgʻochni yubordi. Qaldirgʻoch kelib, chivinni topdi.

- Nega kech qolding? deb soʻragan edi, chivin aytdi:
- Yer yuzi keng ekan, aylanaman deb kechga qoldim.

Qaldirg'och so'radi:

- Etlarni totib koʻrdingmi? Qaysi et mazali ekan?

Chivin aytdi;

- Barcha etlardan odamning eti mazali ekan.

Qaldirg'och aytdi:

- Ul etning mazasi ogʻzingda (hali) boʻlsa kerak. Ogʻzingni och, hidlab koʻrayin.

Chivin ogʻzini ochdi. Qaldirgʻoch uning ogʻzini hidlamoqchi boʻlib, tumshugʻi bilan chivinning tilini uzib oldi. Oʻsha kundan beri chivin tilsiz (bo'lib) qoldi. Ikkovlari Nuh payg'ambar (huzuri)ga keldilar. Chivindan har qancha so'ramasinlar, gapirmas, tushunarsiz ovoz chiqarar edi. Qaldirg'ochdan so'radi:

- Nima uchun gapirmayapti?

Qaldirg'och aytdi:

 Men bilan gaplashganida barcha etlardan suv baqasining eti mazali ekan deb aytgan edi. Kech qolgani uchun qoʻrqib soʻzlolmayapti.

Nuh alayhissalom baqa etini ilonga (nasiba qilib) berdi. Agar qaldirgʻoch oʻsha kuni shunday yaxshilik qilmasa edi, biz barcha odamlar ilonga yemish boʻlar edik¹.

QORUN QISSASI

Qorun Muso paygʻambar xolasining oʻgʻli edi. Bir kuni Muso Fir'avnga (ilohiy) farmonni yetkazgali borayotganida bir tilanchi qarshisidan chiqdi. Musodan narsa tiladi. Muso aytdi:

- Menda senga bergulik hech vaqo yoʻq.

Tilanchi:

- (Juda) ogʻir ahvoldaman, - deb yolvordi.

Qorun Musoga salom qilgani kelayotgan edi. Uzoqdan Musoni darvesh bilan koʻrdi. Muso koʻrsa, narsa soʻraydi, deb yashirindi. Muso aytdi:

- Shu yerda (kutib) turgil. Fir'avnnikidan uyga qaytishda senga (biror) narsa beraman.

Darvesh aytdi:

- Shunchalik ogʻir ahvoldamanki, kutishga toqatim yoʻq.

Muso (uning oʻzidan) umidini uzayotganini koʻrib dedi:

- Yerda koʻringan oʻtlarni yiqqil, quritgil. Shundan keyin biroz temirmi, qalaymi, qoʻrgʻoshinmi, mismi, har nimaki topsang, (uni) eritgil. Quritilgan oʻtingdan unga ozgina aralashtir. Hammasi qizil oltin boʻladi.

¹ Qaldirgʻoch Ibrohim alayhissalomga ham yaxshilik qilgan. Zolim podshoh Namrud uni oʻtga yoqqanida qaldirgʻoch tumshugʻida suv keltirib, u oʻtga separ edi. Ibrohim alayhissalom: «Ey qaldirgʻoch, sening tumshugʻingdagi suv bu oʻtga nima ham foyda qilar edi», — deydi, lekin uni duo qiladi. Qaldirgʻoch keltirgan suv bilan oʻt oʻchmadi, lekin u oʻzining doʻstligini koʻrsatdi. Qiyomatga qadar yaxshilik bilan ot chiqardi. Evaziga yaxshilik mukofot oldi.



Darvesh bilar ediki, Musodan yolgʻon soʻz chiqmas. Bu soʻzga ishonib joʻnadi. Qorun Musoning bu soʻzlarini eshitib turar, ammo Muso Qorunni koʻrmas edi. Muso ketishi bilan Qorun darveshdan:

- Muso senga nima berdi? - deb so'radi.

Darvesh aytdi:

- (Hech) narsa bermadi, ammo o'tlarni misga aralashtir, oltinga aylanadi, dedi.

Qorun aytdi:

- Ey darvesh, Muso sendan qutulish uchun bahona qildi, shu ham so'z bo'ldimi? Borgil, rizqingni (boshqa yerdan) qidir.

Darvesh uyiga ketdi. Qorun u oʻtlarni yigʻdi, quritdi. Temir, mis, qalay, qoʻrgʻoshin eritdi. U oʻtdan ozgina aralashtirgan edi, qizil oltin boʻldi. Yana bir ming botmon¹ temirga, misga, qoʻrgʻoshinga u oʻtdan ozgina solsa, qizil oltin boʻlar edi. Tangri qudrati bilan Qorun yetti kecha-kunduz oltinchilik qildi. Boyliklardan xazinalar hosil qildi. Har bir xazinaga bir oltindan kalit yasatti. Kalitlar koʻp boʻldi. Koʻtarish ogʻir boʻldi. Xachirga yukladilar, xachir koʻtarmadi.

Aytadilarki, har bir xazinaga sigir terisin quritib, barmoq (kattaligida) kalit qildirdi yengil boʻladi deb. Qirq xachirga yuklatti — koʻtarmadi. Har bir xachir yuki toʻrt yuz botmon edi. Aytadilarki, toʻrt qoʻsh hoʻkizlik yerni saroy qildirdi. Tomlari bir gʻisht oltin, bir gʻisht kumush, ikki gʻisht orasiga mushk-anbar, zaʻfaron² yuritdi. Dur-u marvaridlar aralashtirdi.

Toʻshangulari hammasi oltindan, durdan, marvariddan. Qachon qoʻshini otlansa, 50 ming yigit hammasi oltin uzangulik otlanur edi. Boshdan-oyogʻigacha yuzlari, sochlari qizil oltin edi. Quyosh nuridek tovlanar edilar. Oʻzi qoʻshin orasida qora koʻzlik, yoli, quyrugʻi qora oq xachirga minib, yana 400 qul yigitlar qizlar toʻnin kiyib, yana 400 qiz yigitlar toʻnin kiyib, barchasi xachirlarga minib chiqar edilar. Xaloyiq uni koʻrib, dunyo tilaganlar havas qilib aytar edilar:

Ey koshki, bu Qorunga berilgan mol-dunyoni bizga ham bersa edi!
 Ammo u dunyoni tilaganlar aytar edilar:

² Za'faron - sarg'ish tus beruvchi xushbo'y o'simlik.



¹ Botmon – ogʻirlik oʻlchovi. Turli davrlarda va turli mamlakatlarda turlicha hajmda boʻlgan.

- Voy, sizning ahvolingizga! Qudratli va ulugʻ Tangriga imon keltirganlar, ezgu ish qilganlarga Xudoning savoblari yaxshiroq. Sabr qiluvchilardan boshqalar bu savobga ega boʻlmaydilar.

Xabarda kelur: Muso paygʻambar har kuni Isroil xalqini yigʻib, minbarga chiqib, majlis qilar edi, va'z va nasihat aytar edi. Qorun ham oltin piyola chiqarib, Muso roʻparasida oʻtirib, cholgʻuvchilarni muhayyo qilib, orqasi va oldida qullari davra tutib, may ichar edi. Muso sabr qilib turar edi.

Tangri farmon qildi:

- Ey Muso, Qorunga aytgil, molining yarmini darveshlarga bersin...
 Kellub aytsa, Qorun dedi:
- Musoga aytgil, men sening Tangringdan (hech) narsa soʻramayman.
 Yana Jabroil farmon keltirdi:
- Ey Muso, Qorunga aytgil, boyligining beshdan birini kambagʻallarga bersin... Oʻn hissa qilib qaytarayin.

Kellub (yana) Qorunga aytsa, (u) dedi:

– Musoga aytgil, (oʻsha) oʻn hissa boylikni oʻzi kambagʻallarga bersin. Mendan narsa soʻramasin.

Kellub kelib koʻp nasihatlar qildi – unamadi.

- Mol bermayman, - dedi...

Kelib (buni) aytganida, Qorun dedi:

 Narigi dunyoda seni Fir'avn bilan do'zaxda ko'rgayman, – deb jo'nadi.

Muso Tangriga munojot qildi, aytdi:

- Ey Xudoyim, (bunga) balo yuborgil!

Farmon keldi:

- Qaysi baloni xohlarsan?

Muso aytdi:

- Yerni mening ixtiyorimga bergil.

Tangri taolo ijobat qildi.

Muso(ning) jahli chiqib, (qoʻliga) tayoq oldi. Qorun saroyiga bordi. Horun, Yusha', Kellub¹ yana boshqa Isroil xalqi bilan bordilar. Ayvonda

¹ Horun, Yusha', Kellub - Musoning safdoshlari.



arxom toshidan but qilib, oltin bilan bezatib, oʻzi taxt ustida oʻtirardi. Yigitlar, qizlar, qulbachchalar oltin toji atrofida (qoʻl qovushtirib) turar edilar. Muso kirib keldi. Aytdi:

- Ey Qorun, Fir'avn oldida har kuni toʻrtta non uchun xizmat qilmasmi eding? Qudratli va ulugʻ Tangri shuncha mol va ne'mat berdi, nega ehson qilmaysan?

Qorun aytdi:

- Tangri bergan emas, men o'z ilmim bilan ishlab topdim.

Muso achchigʻlanib, tayogʻini koʻtardi. Aytdi:

- Ey yer, yutgil!

Qorunning taxti atrofining yetti yeri oʻprildi. Qorun sakrab yerga tushdi. Yer Qorunni toʻpigʻigacha yutdi. Qorun faryod qildi:

- Ey Muso, kechirgil!

Muso aytdi:

- Azob yetib keldi, endi tavba qilasanmi?

Ikkinchi marta aytdi:

- Yutgil!

Beligacha yutdi. Yana yolvordi. Muso aytdi:

- Azob yetib kelgandan keyin (tavba) foyda qilmas.

Yana aytdi:

- Ey yer, yutgil!

Qorunni butunlay yer yutdi.

Aytishlaricha, Isroil xalqi degan emishki: Muso Qorunning boyligini olish uchun halok qildi. Muso (Xudoga) munojot qildi, aytdi:

– Ey Xudoyim, bilasankim, boylik uchun iltijo qilmadim. Bular menga ta'na qilmasinlar, boyligini berayin. Yer o'ziga yutsin.

Tangri taolo Muso duosin ijobat qildi. Qorunni barcha mol-dunyosi, saroyi bilan yer yutdi.

Savol va topshiriqlar

- 1. Rabgʻuziy hayoti va ijodi haqida soʻzlab bering.
- 2. «Qisas ar-Rabgʻuziy» asarining yaratilish tarixi qanday kechgan va asar qancha muddatda yaratilgan?



- 3. Ollohning olamni yaratishdan maqsadi inson edi. Insonni yaratishdan maqsadi nima edi?
- 4. Olloh insonni nima uchun tuproqdan yaratdi? Bundan hikmat nima edi? Bu hikmatni tushuntirib bering.
- 5. Ollohga tuproqni qaysi xislati ma'qul keldi?
- Ollohning mening huzurimda «ming obiddan bir olim afzalroqdir» degan soʻzlarini nasriy bayondan foydalanib sharhlang.
- 7. Azozil qaysi qiligʻi uchun Ollohning gʻazabiga uchradi va unga nima deb nom berdilar?
- 8. Odam Ato va Momo Havoning jannatdan haydalishi tafsilotini va ularning xatoga yoʻl qoʻyishiga kim sababchi boʻlganini gapirib bering.
- 9. Nuh paygʻambarning insoniyat oldidagi xizmatlari nimada?
- 10. Ollohning birligini xohlamaganlar qanday jazolandilar?
- Nuh paygʻambar oʻz kemasini nima maqsadda yasadi? U necha qavatdan iborat edi, unda tirik mavjudotlarning joylashish tartibini tushuntiring.
- 12. Nuh payg'ambar o'g'illariga tavsif bering.
- 13. Ilon Nuh paygʻambarga qanday xizmat qildi va oʻz xizmati uchun qanday haq talab qildi?
- 14. Ilon ovqati inson eti emas, balki suv baqasi boʻlib qolishida Qaldirgʻoch qanday xizmat qildi?
- 15. Qaldirgʻoch Ibrohim alayhissalomga qanday yaxshilik qildi va buning uchun qanday mukofotga sazovor boʻldi?
- «Qaldirg'ochning insoniyatga do'stligi» mavzusida sodda reja tuzing va uni yozma bayon qiling.
- 17. Qorun kimning rizqini oʻgʻirladi va buning uchun qanday jazo oldi?

Muhammadsharif GULXANIY

(XVIII asr oxiri – XIX asr boshlari)

ZARBULMASAL

Muhammadsharif Gulxaniy XVIII asr oxiri — XIX asr boshlarida Qoʻqonda yashab ijod qilgan mashhur masalnavis adib va hassos shoirdir. Joʻshqin fe'lligi va olovqalbligi tufayli oʻziga Gulxaniy taxallusini tanlagan. Keyinchalik she'rlarida Jur'at taxallusini qoʻllagan. Bizgacha uning oʻzbek va tojik tillaridagi 12 gʻazali, Qoʻqon xoni Amir Umarxonga bagʻishlangan 1 qasidasi va «Zarbulmasal» asari yetib kelgan.

Oʻz davri voqeligini majoziy usulda badiiy ifoda etgan axloqiy-pandnoma va tanqidiy-hajviy yoʻnalishdagi «Zarbulmasal» asari Gulxaniyga
favqulodda shuhrat keltirdi. Unda ijtimoiy hayot muammolari, turli toifadagi odamlar oʻrtasidagi munosabatlar, xalq turmush tarzi va udumlari haqida
majoziy uslubda soʻz yuritiladi. Insonga xos xususiyatlar boshqa jonli va
jonsiz narsalarga koʻchirib tasvirlansa, majoziy asar deyiladi. Gulxaniy ham,
qizim, senga aytaman, kelinim, sen eshit qabilida qushlar misolida oʻz davri
voqeligi manzaralarini tasvirlaydi. Toj-u taxt talashlari, mamlakat urushlar
natijasida yurt vayron, xalq xarob boʻlgan. Buxoro va Qoʻqon xonliklari
oʻrtasidagi munosabat yomon boʻlib, ular oʻzaro urishib yurganlari uchun
ham asarda Buxoro goʻyoki vayronalarga boy muzofot singari tasvirlansada, Qoʻqon ham undan obod emas edi. Adib aytmoqchi, xonning atrofini
Boyoʻgʻli, Yapaloqqush, Koʻrqush, Kordon, Kulonkir sulton kabi yomon
odamlar oʻrab olgan. «Holo, bu turgʻonlaring navola¹ doʻstlari, piyola hariflari², taom yemakka hozir, maslahatga aqli qosir»³. Bu ketishda mamlakat

¹ Navola - in'om, ehson; taom, luqma.

² Piyola hariflari – qadah, ulfatchilik doʻstlari.

³ Qosir - qisqa; ojiz.

vayronaga, shoh uning ustidagi Boyoʻgʻliga aylanib qolishi hech gap emas. Gulxaniyning yirtqich va asosan tunda ov qiladigan qushlarni oʻz asariga qahramon qilib olishida nozik ishora mavjud. Shuning uchun Koʻrqush tilidan nasihat qiladi: «Ulugʻni borgohinda¹ xiradmandi² donish³ va aqli xiradi bohush⁴ har qancha koʻb boʻlsa ham, oz boʻlur. Xususan, podshohi odilgʻa uch toifadin guzir⁵ yoʻqdur: avval, olimi boamalki⁶, podshohning oxiratlik asbobini² taraddudida boʻlsa. Ikkinchi vaziri sohibi ra'yki⁶, podshohning dunyolik yarogʻini taraddudida boʻlsa. Uchunchi, munshiyi⁶ rostnavis¹o, qalamzanu¹¹ nigohdoru¹² shamshirzan¹³ boʻlsa».

«Zarbulmasal» arabcha «zarb» va «masal» soʻzlarining qoʻshilishidan hosil boʻlgan boʻlib, «masallar yigʻindisi» ma'nosini beradi. Masal soʻzi oʻtmishda biz hozir qoʻllaydigan maqol ma'nosida ishlatilgan. Zarbulmasal soʻzga maqol qoʻshib gapirish, oʻxshashi va dalilini keltirish ma'nolarini ham anglatadi. Zarbulmasal boʻlish — el ogʻziga tushish, afsona boʻlish, mashhur boʻlish ma'nolarida ham keladi. Ma'lum boʻladiki, Gulxaniy oʻz davri va zamondoshlarini asarda zarbulmasal qilgan.

Asar qahramonlari oʻz nutqlarida vaziyatga mos koʻplab maqollarni keltiradilar, toʻgʻrirogʻi, maqollar yordamida gapiradilar. Shu bilan birga, ular bir-birlariga turli masal va hikoyatlarni aytib beradilar.

«Zarbulmasal»da 400 ga yaqin maqol, matal, naql va 15 dan ortiq katta-kichik masal va hikoyat mavjud. Bu muallifning xalq hayoti, turmush tarzi, an'ana va marosimlari, ogʻzaki va yozma adabiyotni chuqur bilganligidan dalolat beradi. U mashhur hind eposi «Kalila va Dimna»,

¹³ Shamshirzan - shamshir uruvchi. Bu yerda: yozishga usta ma'nosida.



¹ Borgoh – shoh qabulxonasi, saroy.

² Xiradmand – oqil, dono, donishmand.

³ Donish - ilm, ma'rifat; aql, idrok.

⁴ Bohush – es-hushli.

⁵ Guzir - biror narsadan xalos boʻlish.

⁶ Olimi boamal - ilmiga amal qiladigan olim.

⁷ Oxirat asbobi – oxirat uchun zarur amailar.

⁸ Sohibi ra'y - aql-u tadbir egasi.

⁹ Munshiy - kotib.

¹⁰ Rostnavis – haqiqatni yozadigan.

¹¹ Qalamzan - kotib.

¹² Nigohdor – nazorat qiluvchi.

Abdurahmon Jomiyning «Silsilat uz-zahab» asarlari, shuningdek, Sa'diy Sheroziy, Hofiz Sheroziy, Xusrav Dehlaviy, Alisher Navoiy, So'fi Olloyor kabi ulug' so'z ustalari hikmatlaridan ham mahorat bilan foydalangan. Bularning barchasi asarning ta'sirchanligi va o'qimishliligini oshirgan.

«Zarbulmasal» xalq orasida «Yapaloqqush hikoyasi» nomi bilan mashhur boʻlib, qissaxonlik kechalarida uni eshitgan shinavandalar asarning chuqur hayotiy mazmuniga qoyil qolishgan. Uning qisqacha mazmuni quyidagicha:

Farg'ona iglimida Kaygubod degan podshohdan golgan bir vayrona bor edi. Unda yashovchi Boyo'g'lining Gunashbonu ismli qizi bo'ladi. Shu atrofda manzil tutgan Yapaloqqush uni o'g'li Kulonkir sultonga olib bermoqchi bo'lib, Ko'rqushni sovchilikka yuboradi. Ko'rqush yo'lda Hudhudga duch kelib, o'zaro munozara qiladi. Keyin Kulonkir sulton bilan gaplashib oladi. Boyo'g'linikiga kelsa, u qarindoshlari bilan kengashib, so'ng javob bermoqchi bo'ladi. Buni yaxshilikka yo'ygan Yapaloqqush do'sti Sho'ranul degan qarg'a orqali qushlar shohi Malikshohindan suyunchi oladi. Malikshohin o'zining pahlavoni bo'lmish Kulonkir sultonning to'yini podshohlik hisobidan o'tkazib bermoqchi bo'lib, o'z xazinachisi Kordonni to'y xarajatlarini aniqlash uchun Boyo'g'linikiga joʻnatadi. Boyoʻgʻli qizining qaliniga mingta vayrona soʻraydi. Kordon Umarxon davrida mamlakat obod boʻlib, vayronalar kamaygani, shuning uchun uning sonini 600 taga tushirishni soʻraydi. Boyoʻgʻli koʻnmagach, ortiga qaytib ketadi. Uni eshitgan Koʻrqush oting Kordon – ishbilarmon bo'lsa-da, aslida qo'lingdan hech ish kelmas ekan deb, o'zi Boyo'g'lining yoniga kelib, Qo'qondan topilmasa ham, mingta vayronani Buxoro muzofotidan topib berishga va'da beradi. Shundan keyin dabdabali to'y qilib, kelin-kuyov murod-maqsadlariga yetadilar.

Aziz oʻquvchilar! Sizning yoshingiz, bilim darajangiz, dunyoqarashingizni hisobga olib, «Zarbulmasal»dan olingan bir necha ibratli masal va hikoyatlarni e'tiboringizga havola qildik. Voqealar ortidan quvmay, ularning mazmuniga sinchiklab nazar soling, muallifning bu masal yoki hikoyat orqali nima demoqchi ekanligiga diqqat qiling. Shu narsani yodda tutingki, shoir yoki yozuvchi biror voqea-hodisani shunchaki bayon qilib qoʻya qolmaydi. Voqea-hodisa – shoir va yozuvchilar uchun oʻz badiiy maqsadini amalga oshirish uchun bir vosita. Aytaylik, «Maymun va Najjor» masali orqali qoʻlidan kelmagan ishga uringan kishi albatta, sharmanda boʻladi, degan fikr ilgari surilsa, «Toshbaqa va Chayon» masalida doʻst tanlashda adashmaslik kerakligiga e'tibor qaratiladi. «Tuya bilan boʻtaloq» masalida erki oʻzida boʻlmagan kishining fojiasi koʻrsatiladi va hokazo.

KABUTAR¹ BILAN ZOGʻ2

Hakimi hoziq³ bir gulistoni ruhafzogʻa⁴ doxil boʻldi. Koʻrdiki, bir shox uzasinda Kabutar ila Zogʻ nishast qilib⁵ oʻlturubdur. Ikkisi bir-biriga vahshat bila nazar qilur⁶, ulfati baror kelmas⁶. Shul asnoda⁶ mehmonsaroni⁰ oldida bir joʻy¹⁰ bor erdi – ikkisi suv ichmoqqa qasd qildi. Mehmonsaroni ichida bir rustoiy¹¹ azbaroyi¹² sayd¹³ oʻqin sozlab, muntazir oʻlturub erdi. Zogʻ daraxtdan parvoz qilib, eshikni toʻgʻrisigʻa tushdi. Zogʻdin rustoiy oʻqin otib oʻtkardi, qushigʻa yem qildi. Kabutar parvoz qilib, sihhat¹⁴ ketti. Agar Zogʻ oʻz jinsi birla sahroda va yo juvaripoyada¹⁵ va yo eski xirmanlarda yursa erdi, oʻq zaxmini¹⁶ yeb, qushgʻa yem boʻlmas erdi.

¹ Kabutar – kaptar.

² Zogʻ – qargʻa.

³ Hakimi hoziq – bilimdon tabib.

⁴ Ruhafzo – ruhni yayratuvchi, koʻngilni quvontiruvchi, jonbaxsh.

⁵ Nishast qilib – qaror topib, maqom tutib.

⁶ Nazora – qarash, nazar solish.

⁷ Baror kelmas – mos, muvofiq kelmas.

⁸ Asno – vaqt, payt, holat.

⁹ Mehmonsaro – mehmonxona.

 $^{^{10}}$ Jo'y – ariq, anhor, oqar suv.

¹¹ Rustoiy - qishloqi; majozan: nodon, ahmoq.

¹² Azbaroyi - uchun, sababli.

¹³ **Sayd** - ov.

¹⁴ Sihhat - sog'-omon.

¹⁵ Juvaripoya – joʻxorizor.

¹⁶ Zaxm - zarb, jarohat.

MAYMUN BILAN NALIOR¹

Bor edi Kashmir² navohinda³ togʻ, Bogʻi Eram⁴ rashkdin koʻksida dogʻ.

Anda imoratga yaroqliq yagʻoch, Yetti quloch boʻyi, eniga – quloch.

Bor edi choʻx⁵ ne'mati alvonlari⁶, Xurram-u ma'mur⁷ edi hayvonlari.

Zulf⁸ kabi sunbuli⁹ xushboʻlari, Rohatijon erdi oqar suvlari.

Uydin ulugʻroq¹⁰ edi bir gulbune¹¹, Anda vatan tutmish edi Maymune.

Jon sonub¹² oʻzni, uyin aytardi tan, Oʻqur edi qissai «hubbul vatan»¹³.

Yer edi koʻngli tilagan mevasin, Boshlar edi odamilik shevasin¹⁴.

¹⁴ Sheva - odat, ravish; hunar.



¹ Najjor – duradgor, imorat yasovchi usta.

² Kashmir - Shimoliy Hindistondagi voha va shahar.

³ Navohiy - atrof, tevarak, chegara.

⁴ Bog'i Eram - afsonaviy jannat bog'i.

⁵ Cho'x – ko'p.

⁶ Alvon - rang-barang, turli-tuman.

Ma'mur – obod, farovon; bu yerda: to'q.

⁸ Zulf - soch.

⁹Sunbul – xushbo'y va gullari halqa-halqa giyoh. Qizlarning sochiga nisbat beradilar.

¹⁰ Ulugʻ - bu yerda: katta.

¹¹ Gulbun - gul tupi.

¹² Sonmog - bilmog, hisoblamog.

¹³ Hubbul vatan - vatan muhabbati.

Bir kuni najjori xiradmandi fard¹, Koʻngli yagʻoch yoʻqligidan qildi dard².

Uylaki, nav³ kissalarin qistari, Rasm edi najjor yagʻoch istari.

Egdi kulah⁴ goʻshasini⁵ farrasin⁶, Belga suqub teshasi-yu arrasin.

Bordi o'shal toqg'a – mavquf⁷ edi, Ezgu yag'ochlar anga ma'ruf⁸ edi.

Shahrni zindonidin ozod oʻlib, Togʻni Shiriniga Farhod oʻlib⁹.

Sonur edi oʻzini togʻ xisravi¹⁰, Togʻni uqub Dehlavii ma'navi(y)¹¹.

Borib anga, kesti yagʻoch reshasin¹², Qoʻydi u yerda unutib teshasin.



¹ Fard - yakka, yagona.

² Dard qilmoq - bu yerda: tashvishga tushmoq.

³ Nav - yangi.

⁴ Kulah – bosh kivim.

⁵ Go'sha - chet, chekka, burchak.

⁶ Farr - goʻzallik; dabdaba, hashamat.

[¶] Mavquf - toʻxtash; tegishli.

⁸ Ma'ruf – ma'lum, mashhur.

⁹ Bu yerda «Farhod va Shirin» dostoniga ishora qilinmoqda.

¹⁰ Xisrav – podshoh, hukmdor.

¹¹ Bu yerda buyuk shoir Xusrav Dehlaviy nomi vositasida so'z o'yini qilinmoqda: o'zini tog' xisravi (podshohi), tog'ni esa ma'naviy jihatdan (Xusrav) Dehlaviyi ma'naviy hisoblar edi, ya'ni duradgor uchun tog' Xusrav Dehlaviy kitobiga o'xshar edi.

¹² Resha – ildiz, tomir.

Bordi yana – kesti boʻlak bir yagʻoch, Yormogʻini fikriga qildi iloj.

Bolta bilan bir uchini yordi ul, Pona qoʻyub, tesha sari bordi ul.

Tushti banogah¹ anga Maymun koʻzi, Oqilu dono sonub ul dam oʻzi(n).

Aydi: «Ulus² ichra bu bir kasb erur, «Kasb»ni kessang boshini, «sab»³ erur.

Kissai purzar⁴ emish elga hunar, Behunar elni o'xiyur⁵ (rishi)⁶ xar⁷.

Man dogʻi najjorligʻin⁸ oʻrganay, Zuryalarim⁹ barchasigʻa oʻrgatay.

Jahd qilib turdi ravon borgʻali, Ya'ni yagʻoch qolmishini yorgʻali.

Bar sari on cho'bi kafida rasid, Kibri hunar didu kaduro nadid¹⁰.

¹⁰ «Yorib qoʻyilgan yogʻoch yoniga bordi-yu, hunar oʻrganish shavqi bilan boʻlib, orqasida turgan baloni koʻrmadi».



¹ Banogah - kutilmaganda, daf'atan.

² Ulus – xalq, el.

³ Bu yerda: arab yozuvi asosida soʻz oʻyini qilingan: «kasb» soʻzining bosh harfi oʻchirilsa, «sab» qoladi. Sa'b – qiyin, ogʻir degani.

⁴ Purzar - bu yerda: pulga to'la.

⁵ O'xiyur – aytadilar, hisoblaydilar.

⁶ Rish - soqol.

⁷ Xar - eshak.

⁸ Najjorligʻ - duradgorlik, ustalik.

⁹ Zurya - bu yerda: zurriyod, avlod.

Mindi yagʻoch ustuga najjordek, Kosibi purkardau¹ purkordek².

Ketti hunar shavqi bila gʻussasi, Tushti yagʻoch ayrisiga xossasi³.

Bas, keynidin bo'ldi tutulmog'lig'i, Mumkin emas bo'ldi qutulmoqlig'i.

Odamini jinsida yoʻq qissasi, Qoldi ani xossasini hissasi.

TUYA BILAN BO'TALOQ

Bor edi Farg'onada bir sorbon⁴, Tevasi⁵ bor erdi, tug'ub nogahon.

Ahli ayoli⁶ ani bor erdi cho'x, Ozuqadin kulbasida narsa yo'x.

Hosili dunyo⁷ edi bir tevasi, Emadigʻon orqasidin boʻtasi.

Bir kuni u tevasini qoʻmladi⁸, Ortadigʻon yuklarini joʻmladi⁹.



¹ Purkarda – tajribali, koʻpni koʻrgan.

² Purkor – tajribali, koʻpni koʻrgan, ishchan.

³ Xossa – biron narsaga tegishli, taalluqli. Bu yerda: maymunning dumi ma'nosida kelayapti.

⁴ Sorbon – tuyachi, tuya yetaklovchi.

⁵ Teva - tuya.

⁶ Ahli ayol – bola-chaqa.

⁷ Hosili dunyo – dunyoda orttirgan narsasi, ishongan boyligi.

⁸ Qoʻmladi - choʻktirdi.

⁹ Joʻmladi - jamladi.

Yuklari erdi ogʻir-u yoʻl yiroq, Oʻrtadi tayloqini¹ nori firoq².

Fasli tamuz³ erdi, havo choʻx isigʻ, Yoʻlda temurdek edi, qumlar qiziq.

Och oʻtina kuydi anodin⁴ judo, Modarini⁵ mehrida erdi ado.

Jahd ila yetmay anosin keynidin, Qumda kuyardi gʻami ul siynadin⁶.

Ogʻdi yuki yoʻlda oʻshal sorbon, Yerga choʻkurdi tuzatay deb ravon.

Qoldi horib anosi arqosidin⁷, Yondi haroratlari yagʻmosidin⁸.

Yuzlanib aytdi: «Ayo, berahm enam, Kuydi-yu, yondi-yu, tutashti tanam.

Asta yurusang na boʻlur, man yetay, Tashna boʻlub hordim-u qoldim, emay».

Aydi anosi balosigʻa⁹ boqib, Koʻzlarini yoshlari suvdek oqib:



¹ Tayloq – bu yerda: boʻtaloq.

² Nori firoq – ayriliq azobi.

³ Tamuz - yoz, saraton.

⁴ Ano – ona.

⁵ Modar - ona.

⁶ Siyna – bu yerda; ona koʻkragi.

⁷ Arqosidin – orqasidan.

⁸ Yag'mo – talon-toroj. Bu yerda issiq azobi ko'zda tutilmoqda.

⁹ Balo – bola.

«Koʻrki, burunduq kishini qoʻlida, Bu kishini koʻzlari oʻz yoʻlida.

Manda agar zarra kabi ixtiyor – Boʻlsa edi, boʻlmas edim zeri bor»¹.

TOSHBAQA BILAN CHAYON

Yaxshilar andogʻ aytmishlarki, Sangpusht² Iroqdin Hijozga borur erdi. Bir Chayon anga yoʻldosh boʻldi. Ikisi ketib borur erdi, ammo Sangpusht bagʻoyat³ sohibifahm – farosatlik erdi, toinki choʻx safarlarda yaxshi-yamonlar birla yurub, koʻb tajribalar hosil qilgʻon erdi. Ammo Chayonga inon-ixtiyorini verub⁴, bodiyalar⁵ qat' edub⁶ borur erdi. Shul orada banogoh bir nahri azim² paydo boʻldi. Ikisi oʻtmoqqa qasd qildilar. Sangpusht birla Chayon oʻtmoqqa yoʻl topmay, tafakkur yogʻochi anga koʻpruk boʻlurgʻa ojiz va tadbir qamuchi sol boʻlurgʻa nobudu nochiz³. Oxir ul-amr³ Sangpusht mustajobi da'vadek¹⁰ murod hadafiga¹¹ maqrun¹² oʻlub, shinovarlik¹³ birla muddao istid'osi¹⁴ sohiliga oʻzini oldi, nori yoqigʻa oʻtub, qozu¹⁵ oʻrdakdek silkinib turdi. Banogoh orqasiga boqti, koʻrdiki, yoʻldoshini oti horugʻon, poyluchchak tagʻolardek nayzasini kiftiga tashlab, yuqori va quyi yurur erdi¹⁶. Anda Sangpusht aydiki:

² Sangpusht – toshbaqa.

⁴ Verub - berib.

6 Qat' edub - bosib o'tib.

9 Oxir ul-amr – nihoyat, oqibatda.

11 Hadaf - nishon.

¹ **Zeri bor** – yuk ostida (qolmoq).

³ Bagʻoyat – gʻoyatda, juda, nihoyatda.

⁵ Bodiya – choʻl, dasht, biyobon, sahro.

⁷ Nahri azim – katta daryo.

⁸ Tafakkur kuchi bunga koʻprik va tadbir qamishi sol (kema) boʻlishga ojiz.

¹⁰ **Mustajobi da'va** – duosi qabul bo'ladigan.

¹² Maqrun – yaqin.

¹³ Shinovar – suzuvchi.

¹⁴ Istid'o – iltimos, so'rash, yalinib-yolvorish.

¹⁵ **Qoz** - g'oz.

¹⁶ Bu yerda Chayonning suvdan qoʻrqib, nayzasini kiftiga tashlab, yuqori va quyi yurishi qurolini yelkasiga osib, oyoqyalang uyoqdan-buyoqqa yuruvchi posbonga oʻxshatilyapti.

- Moʻjib¹ nadur - buyon oʻtmaysiz?

Kajdum² aydi:

- Koʻzyoshicha suv boʻlsa, bizga ma'zur tutung.

Sangpusht aydi: «Yoʻldosh boʻlmoq sharti bul ermaski, oz hodisa birla hamrohliq rasmini bartaraf qilsam. Avloroq³ uldurki, tagʻoni oʻtkarib qoʻysam, yaxshi boʻlur. Burungʻilar masalidurki: «Yaxshiliq qil, suvgʻa sol, baliq bilur, baliq bilmasa, Xoliq⁴ bilur». Anda Sangpusht hutchav yagʻochini qoʻlgʻa olib⁵, oz harakat birla najot sohiligʻa oʻzini oldi. Aydi:

- Ey birodar, sani daryodan oʻtkazgali oʻgʻradim⁶. Mani ustimga mingil va lekin bejo harakat qilmagʻilki, oʻz joningga jabr qilursan.

Anda Chayon aydi:

- Har kim o'z maslahatini o'zi bilur.

Andin soʻng Sangpushtni orqasigʻa mindi. Daryogʻa tushib oqdilar. Zamonedin soʻng Chayoni mazkur tebrana berdi. Sangpusht aydi:

– Bul bejo harakatdin muddao nimadur?

Chayon aydi:

 Bu kun maydoningni vase'⁷ topdim. Burung'i yaxshilar «Eshak o'yuni qirq yilda va yana it o'yuni bor anda», debdurlar. Bul fo'lod⁸ nayzamni yakjirma qalqoningga⁹ ozmoyish¹⁰ qiloyin derman.

Anda Sangpusht aydi: «Gʻolibo uldurki: «Oʻz doʻsti dilin resh¹¹ aylayur jahldin kim, ul urur oʻz mushtini devorgʻa!» Anda Sangpusht aydi:



¹ Mo'jib - sabab.

² Kajdum – chayon.

³Avlo – yaxshi, afzal.

⁴ Xoliq - Yaratuvchi, Xudo.

⁵ Suvga suzishga hozirlanib.

⁶ O'g'ramoq - yo'l olmoq, mo'ljallamoq.

⁷ Vase' - keng.

⁸ Fo'lod - po'lat; o'tkir, tez.

⁹ Yakjirma qalqon - toshbaqaning yaxlit kosasi.

¹⁰ Ozmoyish - sinash, imtihon.

¹¹ Resh - yara, jarohat.

— Sani bu xorsifat¹ nayzai bemajoling² mani bu yakjirma qalqonimgʻa ne kor³ qilsin?

Anda Chayon aydi:

- Bilganing yoʻqmuki, aqrabni⁴ muddaosi nish urmoqdur xoh doʻst koʻksina va xoh dushman orqasina!

Qit'a:

Har kimi odati zamima⁵ boʻlur, Beirodat⁶ zuhur etar⁷ andin. Toshdin nish⁸ ayari yoʻq aqrab, Garchi mundoq demak ajab sandin.

Anda Sangpusht aydi:

– Ishonmagil doʻstinggʻa, samon tiqar poʻstinggʻa. «Oshnongdin tob» debdurlar. Ey doʻstum, suv uzra jasadimiz xasdek yurmagi tokay? Bu bahri⁹ amiq¹⁰ javohirlarin tamosho qilmoq kerak, – deb gʻavvoslardek¹¹ bir gʻoʻta¹² urdikim, ul javohir termoqda qoldi va bul jon bermogʻda qoldi.

DUMSIZ ESHAK

Bir dumi yoʻq eshak bor edi. Dumsizligini oʻylab, dardi kundan-kunga ziyoda boʻlar edi. Dum axtarib, dum talab qilib, biyobonma-biyobon kezar edi. Shunday sarson-sargardon kunlardan birida oʻzi bilmagan holda bir ekinzorning oʻrtasidan oʻtib qoldi. Eshakni uzoqdan kuzatib turgan dehqon uni tutib olib, ikki qulogʻini kesib tashladi. Bechora eshak dum orzu qilib, dum topish oʻrniga ikki qulogʻidan ham ajraldi.

¹² G'o'ta urish - suvga sho'ng'ish.



¹ Xorsifat – tikanga oʻxshash.

² Bemajol – ojiz, kuchsiz.

³ Kor – bu yerda: ta'sir.

⁴ Agrab - chayon.

⁵ Zamima – yomon, yaramas.

⁶ Beirodat – beixtiyor.

⁷ Zuhur etish – koʻrinish, namoyon boʻlish.

⁸ Nish - zaharli jonivorlarning chaqish a'zosi.

⁹ Bahr – ummon, dengiz.

¹⁰ **Amiq** – chuqur, teran.

¹¹ **Gʻavvos** — suvga shoʻngʻuvchi.

YOLG'ONCHI TUYA

Qish ayyomi¹ erdi. Havodin qor-yamgʻur behad yogʻib erdi va koʻcha sahrodin osha loy boʻlgʻon erdi. Anda bir Teva loygʻa yiqilib, ikki yonigʻa ogʻnab, dumigacha shoʻmgʻugʻon va har tora² moʻyi³ loyi mazkurdin najote tobqon yoʻq erdi. Ul Teva sorbongʻa javobi xargoʻsh beribʻ, bir shoʻrazor axtarib borur erdi. Yoʻlda bir Tulki yoʻluqti. Salomlashib, Tulki Tevani ahvolini soʻrdi. Aydi:

- Hormasunlar! Qaydin kelurlar?

Anda Teva aydi:

Moʻjibi gʻusl⁵ uchun hammomdan kelurman.

Anda Tulki aydi:

-Borakallo! Rost aytursan. Nishonai tozalugʻing birla tonudum. Hama boshdin-ayogʻ chunon toza turar. Bu saru⁶ gardani⁷ pokizaki sanda bor va bu poyu⁸ siyoqeki⁹ sanda bor, mulohaza qildimki, hammomni garmoba¹⁰ suvini boshing bila ayogʻinggʻa ozoncha ishlatibsan. Magar hammomchi oʻlgan ekanmu va hammomni xoli koʻrdingmu?

Nagl

...Ibrohimbek... bogʻinda tab'i tund¹¹, lavand¹² bir bogʻboni bor erdi. Ani bogʻboni oʻzini bogʻbone sonub, olti tub daraxtni hoʻl shoxini quruq shoxiga payvand qilur erdi va yana bu aql-u farosati birla oʻzini olamni bogʻbonidek sobit qadam olur erdi.

¹² Lavand - yalqov, tanbal, dangasa, bo'shang.



¹ Ayyom - vaqt. Bu yerda: fasl.

^{*} Tora - tola.

 $^{^3}$ Mo 4 y – soch.

⁴ Javobi xargo'sh berib - quyonning rasmini chizib.

⁵ **G'usl** – cho'milish, poklanish.

⁶ Sar - bosh.

⁷ Gardan – boʻyin.

⁸ Poy - oyoq.

⁹ Siyoq – bashara, aft.

¹⁰ Garmoba - hammom; bu yerda: issiq suv.

¹¹ Tund - tez, gʻazabli.

Nagl

...bir odam yaxshi koʻrgan toʻppisini¹ tez suvga oqizib, harchand taraddud bila ololmadi. Mahrum boʻlub qaytur erdiki:

- Yoʻqolgʻoni ham xoʻb boʻldi², boshimgʻa ham tor kelur erdi, - deb.

Naql

...zangi³ yoʻl uzasidin bir oyina topib oldi. Oyinada oʻzini aksi nomuborakini koʻrub, oyinani yerga urub, anga necha ayblar qoʻyub, aytur erdiki:

- Bul o'zi yaxshi mato' bo'lsa, yo'l uzra yoturmidi?!

YODGOR PO'STINDO'Z

Odamizod arosinda Yodgor otligʻ bir odam bor erdi. Goho oʻzini oʻtkir soʻfiy⁴ ot qoʻyar, goho mirishkori⁵ hushyor va donishmandi roʻzgor olib aytur erdiki:

 Oʻn yoshimda hazrati Nuh paygʻambarni obi azobda⁶ qolgʻonlarida kemalarin itorib, boham⁷ erdim.

Va yana aytur erdiki:

 Andogʻ ham ermas. Oʻn besh yoshimda hazrati Ibrohim alayhissalomni kofirlar manjanaqqa⁸ solib oʻtga otarda bir poyasinda⁹ hozir erdim.

Boz aytur erdiki:

Andogʻ ham ermas. Yigirma besh yoshimda hazrati sultoni orifin¹⁰
 Xoja Ahmad Yassaviy xonaqohlarin¹¹ obod qilurda loy tepib, xisht bergan man erdim.

Ul yerda o'lturg'on yor-jo'ralari aytur erdiki:

¹ Toʻppi – doʻppi.

² Xo'b bo'ldi – yaxshi bo'ldi.

³ Zangi – qora tanli, habash, negr.

⁴ Soʻfiy – tasavvuf tariqati namoyandasi.

⁵ Mirishkor – oʻz ishining ustasi.

⁶ Obi azob – azob suvi. Bu yerda: Nuh davridagi toʻfon koʻzda tutilmoqda.

⁷ Boham – birga.

⁸ Manjanaq – palaxmon.

⁹ Poya - joy.

¹⁰ Sultoni orifin – oriflar sultoni. Orif – ma'rifat sohibi, Ollohni tanigan kishi, komil inson.

¹¹ Xonaqoh - soʻfiylar yigʻiladigan, zikr tushadigan joy.

- Ey Yodgor aka, rost naql qiling...

Aytur erdiki:

- Qul Muhammad Bahodirdin boʻlagini bilsam, Xudo ursun!

Yodgorning poʻstin tikkanin koʻrsangiz, chokidin barmoq oʻtar erdi. Bozorga olib chiqsa, xaridorlar barmogʻini chokiga suqub, aytur erdiki:

- Bu na tikish?

Ul javob berurki:

- Musht o'tmasa, xo'b tikish!

Oʻzi din, ilmi sunnatga¹ amri ma'ruf² qilgʻuchi erdi, to onki tahoratda qoʻl-oyoqni bandigʻacha yuvmogʻni farz³-sunnat ekanin bilmay, uch angushtni⁴ birin yuvub, ikkisini yuvmay qoʻyar erdi.

«Zarbulmasal» haqida

Zarbulmasal masallar yigʻindisi demakdir. Masal soʻzi bir vaqtlar hozir biz qo'llaydigan maqol qo'shib gapirish, o'xshatishlar qilish, dalil keltirish ma'nolarini ham anglatadi. Zarbulmasalda u yoki hikoya tarkibida, ularning xulosasi oʻrnida maqol, matallar keltiriladi. Biror-bir xatti-harakati tufayli kishi el orasida mashhur bo'lib ketishi, og'izga tushishi, ya'ni zarbulmasal boʻlishi mumkin. Zarbulmasalni adabiy asar sifatida oladigan bo'lsak, u adabiyotimiz tarixida o'ziga xos ta'sirchan adabiy janr sifatida yashab kelgan. Zarbulmasal koʻproq axloqiy-ta'limiy hikoyalardan iborat bo'lib, maqol, matallar, ularning tarbiyaviy xulosasi sifatida keltirilgan. Bu janrdagi asarlarning asosiy xususiyati ularda majoziy usul qo'llanilganidadir, ya'ni voqea va hodisalar hayvonlar, qushlar tilidan hikoya qilinadi. Mualliflar tanqid qilinajak kishilar ta'qibidan cho'chib shu usulni qo'llaganlar. Mashhur masalnavis Muhammadsharif Gulxaniy ana shunday asarni – Siz yuqorida batafsil tanish boʻlgan «Zarbulmasal»ni yaratgan. 400 ga yaqin maqol, matal, 15 dan ortiq katta-kichik masal va hikoyatni oʻzida jamlagan ushbu asar hozirgacha bizga mislsiz zavq-shavq bagʻishlab, ma'naviy ozuqa berib kelyapti.

¹ Sunnat – yoʻl, ravish, odam. Muhammad alayhissalomning yoʻli va qilgan ishlari.

² Amri ma'ruf - savob ishlarga da'vat qilish.

³ Farz – bajarilishi zarur boʻlgan ish.

⁴ Angusht – barmoq.

Savol va topshiriqlar

- 1. Gulxaniy haqida nimalarni bilasiz?
- 2. Gulxaniyning yana bir taxallusi nima?
- 3. «Kabutar bilan Zog'» hikoyatidan qanday ma'no uqdingiz?
- 4. Qoʻlidan kelmagan ishga uringan kishi albatta, sharmanda boʻladi, degan fikr qaysi hikoyatda aks etgan?
- 5. «Tuya bilan Boʻtaloq» hikoyati nima haqda? Boʻtaloq onasidan nega xafa boʻldi? Ona tuyaning javobini sharhlang.
- «Toshbaqa bilan Chayon» hikoyati mazmuni orqali qanday ibratli fikr ilgari surilgan? Tushuntirib bering.
- 7. O'z ahvolidan doim shikoyat qilib yurish, noshukrlik qaysi hikoyada tanqid qilinadi?
- 8. «Yolgʻonchi tuya», «Yodgor poʻstindoʻz» hikoyalari nima haqda va ularda qanday xulqli odamlar hajv qilinadi?
- «Zarbulmasal»dan keltirilgan naqllardagi odamlarning latifanamo holatini sharhlang.
- 10. «Zarbulmasal» deb qanday asarga aytiladi?
- 11. Daftaringizga «Zarbulmasal»dagi maqol va iboralarni koʻchirib oling. Ularni hozirgi maqollar bilan taqqoslang.



Zohir A'LAM
(1943-yilda tugʻilgan)

Zohir A'lam 1943-yilda Toshkent shahrida tugʻildi. Oʻrta maktabni tugatgach, Toshkent davlat universitetiga oʻqishga kirib, uni 1965-yilda muvaffaqiyatli tamom qildi. Armiya safida xizmat qilib qaytgach, 1967-yilda «Oʻzbekiston» nashriyotiga ishga kiradi.

Zohir A'lamning ilk hikoyalar kitobi «Baxtli bilet» nomi bilan 1972-yilda chop etiladi. Shundan soʻng uning birin-ketin «Muqaddima» (1978), «BAM manzaralari» (1978), «Kiyik koʻzlari» (1981) kitoblari nashr qilinadi.

1985-yilda adibning «Ota oʻgitlari» deb atalgan hujjatli qissasi yaratiladi. Bu qissa Oʻzbekistonda limon yetishtirish boʻyicha faoliyat olib borgan inson Z. Faxriddinov haqida edi. Shu yili u «Afandining qirq bir pashshasi» nomli pyesa yozadi. Dastlab bu asar oʻzbek qoʻgʻirchoq teatrida, keyinroq esa rus va bolgar tillariga tarjima qilinib, ushbu xalqlar teatrlarida ham sahnalashtiriladi. Koʻp oʻtmay mazkur pyesa asosida qissa ham dunyoga keladi.

Yozuvchi jahon adabiyotidan asarlarni oʻzbek tiliga tarjima qilish bilan ham shugʻullandi. Xususan, bolgar adibi Pavel Vasilyevning «Toʻsiq», «Oʻlchamlar» kabi qissalarini, rus yozuvchisi Sergey Zaliginning «Komissiya» romanini oʻzbek tiliga tarjima qildi.

Zohir A'lam publitsist sifatida ham barakali ijod qildi. Uning res-



publikamiz tabiati, uning noz-ne'matlari, ekologiyasi haqidagi maqolalari o'z paytida og'izga tushgan edi.

Zohir A'lam hamisha hayotning eng qaynoq jabhalarida bo'lishga intildi. Ko'p joylarni kezib chiqdi, ko'pgina sohalarda ishladi va bu tajriba uning ijodida munosib iz qoldirdi. Bu ijod hamon davom etmoqda.

Savol va topshiriqlar

- 1. Zohir A'lam qachon va qayerda tugʻildi?
- 2. Yozuvchining adabiyotga kirib kelishiga qaysi omillar sabab boʻlgan deb oʻylaysiz?
- 3. Z. A'lamning qanday tarjimalarini bilasiz?
- 4. «Afandining qirq bir pashshasi» qissasining yozilishiga nima turtki boʻldi?
- 5. Yozuvchi qanday janrlarda ijod qilganligini sanab bering.

AFANDINING QIRQ BIR PASHSHASI

(qissadan boblar)

TUSH

Laylak qishlogʻining eng katta boyi Muhsin guppi yotsa ham, tursa ham yeriga yer qoʻshishni oʻylardi. Yana bir orzusi dono va hozirjavob odam sifatida dovrugʻ taratish edi.

Shu sababli oldiga Nasriddin Afandi kelib, sizga maslahatim bor, deganda, sevinganidan oʻyinga tushib ketgudek boʻldi.

- Xo'sh, xo'sh, dedi u dik etib turib, salom-alikdan so'ng Nasriddin Afandini o'tirishga taklif etarkan.
- Bilasizmi, mulla aka, gap boshladi Nasriddin, «mulla aka»ning Muhsin guppiga moydek yoqishini bilib, men bugun tush koʻrdim.
 - Xo'sh, xo'sh? Muhsin guppi unga bir piyola choy uzatdi.
- Tushimga otam rahmatli kiribdilar. «Bogʻingdan uch-toʻrt qadam yuqoriroqda odamdek keladigan, chorak qismi yerga koʻmilgan eski xum bor. Qishlogʻingdan uch-toʻrt bechorani topgin, uni suvga toʻldirishsin.



Xumga eng oxirgi chelak suvni quygan odamga bogʻingning yarmini xatlab berasan», dedilar.

- Iya, xudoyo tavba qildim! dedi Muhsin guppi sevinchdan gupillab ketgan yuragini bazo'r tinchitib.
- Taqdir ekan, qanday qilay? dedi Nasriddin Afandi bechorahol qiyofada.
- Ha, endi tushga har balo ham kiraveradi-da, dedi Muhsin guppi yupatgandek boʻlib, boʻlmagʻur narsa uchun hayhotdek bogʻning yarmidan ajralib oʻtirasizmi?
- Yoʻq, dedi Nasriddin qat'iylik bilan. Otam rahmatlining tirikliklarida soʻzlarini ikki qilmasdim, endi ruhlari ozor cheksinmi?
- Ofarin! Ofarin! Muhsin guppi ham sevinchdan, ham hovlidan quruq qolish vahimasidan bir turib yana oʻtirdi. Balli! Yashang! bu olqishini boyagidan ancha xotirjam aytdi. Chunki darrov reja tuzishga shoʻngʻib, koʻzlari sovuq yiltiray boshlagandi.
- Xoʻsh, Nasriddin gapning kashtasini yanada gajakdorroq qildi. –
 Qoshingizga kelishimning boisi, mulla Muhsin aka, siz qishloqning ipidan ignasigacha biladigan obroʻli odamsiz. Men esa yangiman. Xoʻsh, shu xumni toʻldiradigan odamni qayerdan topaman? Menga birov ishonarmidi...
 Ikkinchi tomondan, juda shov-shuv qilishning ham tarafdori emasman.
 Otamning aytganlarini bajarib, koʻnglimni xotirjam qilsam bas.
- Juda yaxshi kelibsiz!.. dedi-yu, shu gapidan soʻng Muhsin guppini qattiq yoʻtal tutdi. Aslida bu yoʻtal emas, sevinchdan otilib chiqayotgan kulgisini xaspoʻshlovchi soxtalik edi. Juda toʻgʻri va oqilona yoʻ1, deya Muhsin guppi koʻzyoshlarini artdi. Ovoza qilish shart emas. Bu savob ishingizni oʻzim uddalab beraman. Gah desam qoʻlimga qoʻnadigan ikkita odamim bor. Bechoralar juda kambagʻal. Aytaman, oʻzim boshida turib, bajarib beraman. A?
- Boʻpti, men rozi! Rahmat sizga! Nasriddin oʻrnidan turdi. –
 Boʻlmasa ishni bugundan qoldirmaylik, mulla aka. Yana otamning arvohi urib yurmasin meni. Kechasi tushimga kirib.
- Juda yaxshi! Muhsin sevinchdan qafasdagi qushday potirlayotgan yuragini qoʻli bilan bosdi.



Nasriddin ketish taraddudida eshik tomon yurdi-yu, ilkis toʻxtadi:

- Ha, aytmoqchi! dedi u bir narsani hozirgina eslagandek. Boyagi otam aytgan xumlari hech qachon bogʻda turmasdi. Ertalab uygʻonib qarasam, xuddi aytganlaridek, bogʻning oʻrtasida chorak boʻyi koʻmilib, tippa-tik turibdi!
 - Yo, tavba! Muhsin yoqa ushladi.

Nasriddin Afandi eshagiga mindi-da, iltijo qildi:

- Kutaman, mulla aka, xudo xayringizni bersin, shu ishimni tezroq bitirishga yordam bering!

Nasriddin ketdi. Muhsin guppi sal uzoqlashishini kutib turdi-da, sevinganidan baqirib yubordi:

- Tursunali! Alimsho!

Ichkaridan uzun-qisqa boʻlib ikki kishi yugurib chiqdi.

Tez! Uchta obkash bilan sakkizta paqir olib chiqlaring! – buyurdi ularga guppi...

Muhsin guppi oʻzining Tursunali degan devqomat korandasi va Alimsho degan yugurdagi bilan uchta obkash, sakkizta chelak koʻtarib tezda Nasriddinnikiga yetib kelishdi. Yoz boshining kuchga toʻlgan quyoshi ancha tikkalashib, dehqon va korandalarni soya-salqinga hayday boshlagandi. Shunga qaramay, boqqa ega chiqib qolishidan qoʻrqqan Muhsin guppi ishni kechiktirmaslikka qaror qildi.

Bu yil qurgʻoqroq keldi. Ikki yuz qadamcha naridagi katta ariqda suv jildirab qolgandi.

Muhsin guppi malaylari bilan bir-ikki borib kelishdayoq qora terga botdi. Harholda, birinchi sakkiz chelak suvni agʻdarishgandayoq xumning yarmidan pastrogʻigacha toʻldirib qoʻyishdi. Ikki-uch qatnashda xumning toʻlishi aniq edi. Muhsin guppining kayfi shunchalik chogʻ, boshi osmonda.

U boʻsh chelak-la oldinda ketar, toʻldirib qaytishganda xizmatkorlarining orqasidan kelib suv agʻdarishlarini kuzatib turar edi. Xudo koʻrsatmasin, ularning chelagi oxirgi boʻlib qolishi mumkin edi-da!

Ikki karra qatnaganda xumning toʻlishiga uch-toʻrt chelak kifoya ekanligi sezildi. Shunday boʻlsa-da, Muhsin guppi boshchiligida shotirlari sakkiz chelakning barini koʻtarib ketishdi.



Nasriddin Afandi eshagiga yarim chordana qurib oʻtirgancha ularning ishini kuzatardi. Boqqa umidvor boʻlganlar qora terga botib uchinchi karra qaytib kelishganda, u eshagidan tushdi.

– E, yashanglar! – dedi xumga yaqinlashib. Uning bu xitobi va betoqatlik bilan eshagidan tushib kelganidan otasining tushda tayinlaganini tezroq bajarib, bogʻning yarmidan qutulmoqchiligi koʻrinib turardi.

Birinchi yetib kelgan Tursunali bir chelagini agʻdarib, ikkinchisini chogʻlaganda orqada qolgan guppi unga baqirdi.

- To'xta!

Muhsin guppi halloslab keldi-da, gapini qaytardi.

- To'xta. Bir ko'ray, qancha qoldiykin.

U shunday deb xumning ichiga moʻraladi-yu, Nasriddinga saro-sar koʻz tikdi:

- Sal kamayib qolibdimi? Yo menga shunday koʻrinyaptimi?
- Qanaqasiga kamayadi? dedi Tursunali shangʻillab. E, mulla aka, agʻdaraveraylik, zoʻr kelsa bir marta yana borib kelamiz-da!
- Qayoqqa kamayadi? Nasriddin ham Tursunalining gapini tasdiqlarkan, xumga moʻraladi:
 - Ha, bu o'zi katta xum-da! Haybatini qarang!
 - Ha, shundaymi?

Muhsin guppi xumning kattaligiga ham, boyagina toʻlib qoldi, deb aldanganiga ham ishondi.

Shu kayfiyatda suv tashuvchilar yana ikki karra qatnashdi. Xum esa oʻsha ahvolda edi. Ya'ni toʻlishiga uch-toʻrt chelak yetarlidek tuyulardi-yu, oʻzidan-oʻzi yarimlashib qolaverardi.

- Bu nima degan gap?! - Muhsin guppi shubhaga bordi. Bu shubhasi xumga taalluqliligi ayon edi. Nasriddin Afandini hali ham xumning tezroq toʻlishidan manfaatdor deb bilardi.

Nasriddin Afandi ham koʻzlarini baqraytirib, nima deyishini bilmay turdi-da, kelib xumni ushlab, qimirlatmoqchi boʻldi. Xum qimir etmadi. Nasriddin xumning tubiga, ichiga qaradi.

 Bu palakat nima qilyapti oʻzi? – jigʻibiyroni chiqdi, xumni beozor tepdi. – Hali otamni goʻrida tikka turgʻizmasaydi!



Oraga jimlik choʻkdi. Uchala qora terga tushgan «suvchilar» va Nasriddin Afandi bir-birlariga hech narsa tushunmay anqayishdi. Jazirama issiq kun ham oʻzining shabadasi, olislardan kelayotgan qushlar sayrogʻi, xullas, jamiki harakat va ovozlari bilan birga hayronlikka qoʻshilgandi. Nimanidir kurt-kurt chaynab, eshakkina buzayotgan jimlikda guppi bilan manglaylaridan oqayotgan ter ham jildirab ovoz chiqarayotganga oʻxshardi.

- Topdim! - dedi Nasriddin Afandi. - Buning tagida darz ketgan joyi bo'lsa suv o'shandan sizib tushayotgandir?

Bogʻning yarmi mash'aladek charaqlab turgan joyda bu gapga chalakam-chatti ishonishdi ham.

- Xudo xayringlarni bersin! Ishni oʻlda-joʻlda qoldirmanglar! Bu xumparga yana besh-oʻn chelak suv ketsa ketar. Otamning vasiyatlarini bajarmasam, huzur-halovatimdan tamom ayrilaman!

Muhsin guppi bu gaplarni ma'qulladi.

- Qani koʻtarlaring! - dedi chelaklarga ishora qilib.

Suv tashuvchilar yana uch-toʻrt karra borib-kelishdi. Lekin xumdagi suv oʻrni oʻsha-oʻsha: toʻlishiga uch-toʻrt chelak qolar va yana pasayib ketardi.

Nasriddin tagʻin bir karra yalinib-yolvorib otasining ruhini chirqirat-maslikka guppini koʻndirdi. Keyingi safar guppining oʻzi bu yerda qandaydir nayrang borligini sezdi. Sharmandai sharmisor boʻlganini orqaga surish uchun ham jahl ustida yana besh martacha shotirlari boshchiligida qatnadi. Shunday qilib, xumga taxminan ikki yuz chelaklar suv agʻdarildi.

Nihoyat guppi portladi. Boʻsh chelakni daranglatib yerga urdi-da, yigʻlagudek baqira ketdi:

- Men sizga nima yomonlik qilgan edim, a? Nima yomonlik qildim?
 Nasriddin ham achinganidan yigʻlagudek boʻlib oʻzini oqladi:
- Menda ayb yoʻq! Menda ayb yoʻq!
- E, qoching-e! Muhsin guppi qoʻl siltab nari ketayotib orqaga oʻgirildi. – Sizning nomingizni eshitiboq hurmat qilgandim. Mana shunaqa fisq-fasodligingiz uchun Urganchdan haydashganini endi bildim. Toʻgʻri qilishgan! Toʻgʻrilikcha suv soʻrasangiz bermasmidim?

Muhsin guppi keta boshladi. Nasriddin gunohkorona gap qotdi:



- Bu padarla'nat xumni bunchalik suv yeyishini men qaydan bilibman?

Guppi va odamlari ketishdi. Nasriddinning yuzidagi gunohkorona ifodani jilmayish egalladi. Shu jilmayish bilan asta borib, xumdan toʻrt qadam naridagi devordan bogʻiga moʻraladi. Undagi polizning va daraxtlarning anchagina qismi sugʻorilgandi.

Nasriddin Afandi ana shunaqa – turib-turib kimningdir ustidan kulish istagi tutib qolardi. Xumga suv toʻldirish hamda otasining tushiga kirgani bilan bogʻliq voqea esa tubandagicha edi.

Qishloqdagi katta ariq qadimdan qolgan ovoza boʻyicha Muhsin guppining ota-bobolariga tegishli boʻlib, undan oqqan suv ancha bir qiziq tarzda taqsimlanardi. Ya'ni, yon ariqlarga oʻzidan oʻzi, hech qanday bogʻlovsiz chiqqan suv hammaniki, bordi-yu, yon ariqlarga suv bogʻlab chiqarilsa, guppiga haq toʻlanishi kerak edi.

Bu yil esa qurgʻoq kelganidan koʻp xonadonlar anchagina qiynaldi. Shusiz ham qaram boʻlgan odamlarni Muhsin guppi yanada koʻproq qarzga botirdi. Albatta, hech kimning behuda haq bergisi kelmaydi. Odamlar guppining koʻzini shamgʻalat qilib, ekinlarini yashirincha sugʻorib olishlari, oʻqariqqa kim tashlagani noma'lum kattakon xarsanglarning «oʻzidan oʻzi» tushib qolishlari tez-tez takrorlanib turardi. Shunda guppining baqirib soʻkinganlari butun atrof-tumonatga taralardi.

Nasriddin Afandining qiliq chiqarishiga ham sabab ana shu, kunda boʻlmasayam kunora eshitiladigan vagʻillab soʻkishlar edi...

QASOSNING YO'LI TOPILDI

Muhsin guppi bir oylarcha vaqtini qasos olish orzusi bilan oʻtkazdi. Oʻylay-oʻylay yoʻlini topdi.

Nasriddin Afandi bolari tutardi. Guppi soʻrab-surishtirib uning yaqin kunlarda asalni ikki xum qilib bozorga olib tushmoqchiligini bildi. Ana shu ikki xum asal ustida Nasriddinni qoʻlga tushirishni niyat qildi. Puxtalab reja tuzdi. Ochigʻini aytish kerakki, agar bu reja amalga oshsa, haqiqatan ham Nasriddin Afandi el orasida qattiq kulgi boʻladi.

Bugun guppi o'ylagan qasosning amalga oshadigan kuni edi...



- Yaratganning ishlariga qoyilman, dedi guppi atrofdagi goʻzallikka maroqlangancha alanglab, soʻng birdan ovoziga malomat aralashdi.
- Yoʻq, qaytib oldim, dedi u, ariqdagi suvga qoʻlini paxsa qilib. –
 Qoyil emasman!.. Mening mingta qoʻyim bor, ming tanob yerim bor, xoʻpmi?! Guppi atrofga bir qarab qoʻyib tomoq qirdi-da, yana ariqqa gap soʻqdi.
 Xoʻ-oʻsh, ha endi mingta boʻlmasa ham shunga yaqin. Xoʻsh?! Nega endi meni atrofimdagi toʻrtta qishloqdan narida hech kim tanimaydi-yu, choʻntagida hemiri boʻlmagan Afandini butun olam taniydi? A?

Guppi beparvo oqayotgan suvga bir zum oʻqraydi-da, qoʻl siltadi.

- E, bor-e, bu - g'irt g'irromlik!

Guppi choydan xoʻr-xoʻr ichdi-da, qomatini tikladi.

- Mana bugun, - dedi u barmogʻini suvga nuqib, - men bu gʻirromlikni tuzataman! Nasriddin Afandiga bir firib beray-ki, kim aqlli va kim dono ekanligini koʻrib qoʻyasan!

Muhsin guppi koʻkragining boricha nafas olib yayradi. Kayfi chogʻ boʻldi.

Toʻgʻri-da! – dedi u yana oʻz gapini tasdiqlab. – Menimcha, kim boy boʻlsa – oʻsha aqlli. Kim aqlli boʻlsa – oʻsha boy! Bildingmi? – Guppi yana barmogʻini nuqib suvga uqtirdi. – Bilmasang bilib qoʻy! Ha! Aqling boʻlmasa boylik topib boʻpsan!

IKKI MIRSHAB

Nodir mirshab bilan Sodir mirshabning aslida xizmat joylari shaharda. Ammo katta bozor kunlari dalaga chiqib, oʻzlarining tilida aytganda havo oʻzgartirishardi. Ham sayohat, ham tijorat deganlariday, bozor yoʻlida turib olib, oʻtgan-ketgan dehqon va choʻponni aldab-suldab yoki doʻq-poʻpisa qilib jindek-jindek shilishar edi.

Nodir mirshab bilan Sodir mirshab moʻljallaridagi vaqtdan xiyla kechikib qolishgandi. Bunga Sodir mirshab aybdor edi.

Boyadan beri bir necha marta koyigan boʻlishiga qaramay, turib-turib Nodir mirshabning achchigʻi yana tutib ketardi.

Hey, ha shuncha ham uxlaysanmi, galvars! Nas bosib yurasan-a!
 dedi u tosh supada yelkasini chiqargancha qoʻllariga suyanib oʻtirarkan...



Sodir mirshab otining oldingi oyogʻini koʻtarib, taqaning boʻshab ketayozgan mixini tosh bilan chiqillatib qoqardi. Sherigining bu gapini koʻp eshitgani uchun javob bermay ishini davom ettirdi.

- Bugun endi hemiriyam yoʻq, ikki qoʻlni burunga tiqib qaytamiz!
 Sodir mirshab: «Ana!» deb baqirib yubordi. Baqirigʻiga monand qoʻli ham «Laylak» tomon choʻzildi.
- Ana! xitobini takrorladi Sodir mirshab. Aytmadimmi, xudoyim bugungi rizqimiz uchun ham biror narsa sochib qoʻygandir, deb!
 «Laylak» tomondan bir arava kelardi.

IKKINCHI OʻLJA

...Ikkala doʻst qoʻy ogʻzidan choʻp olmagan musulmon qiyofasida supaga yonma-yon oʻtirishdi. Muhsin guppi yaqinlashishi bilan ular birdaniga shirin jilmayishib, tavoze bilan salom berdilar. Mirshablar jilmaygan koʻyi Muhsin guppini tezgina oʻtkazib yuborishni moʻljallagandilar. Lekin guppi oʻtib ketmadi. «Vaaleykum» deganicha otdan tusha boshladi.

Ikki mirshab kim oʻzar oʻynagandek yugurib borib, uning qoʻlini olib soʻrashdilar. Ularning boya Abdukarim oldidagi vajohatlarini koʻrgan va hozirgi siyoqlari bilan solishtirgudek kimsa topilsa edi, odamning gavdasi birdaniga kichrayib qolishiga guvoh boʻlardi.

Muhsin guppi boshi bilan otini ishora qilib supaning chetiga oʻtirdi. Ikkala mirshab otni chinorning tagiga, soyaga bogʻlab qaytishdi.

- E, Muhsin guppi yayrab kuldi. Senlarning nima qilib oʻtirganlaringni bilaman. Lekigin meni senlarga xudoning oʻzi yetkazgani rost!
 ...Ajabmas, bugun rizqlaringni men tufayli topsanglar! dedi u qamchi bilan etigining changini asta qoqarkan, viqor bilan.
- Inshoollo, inshoollo, boy aka! tamshandi Nodir mirshab. Muhsin guppi ikkala mirshabga chamalagandek koʻz yugurtirdi:
- Bir ish bor. Eplasalaring ikkoving bir xumdan asalga ega boʻlasanlar.
 Ustiga har biringga yarim tilladan tanga beraman.

Nodir mirshabga jon kirdi.

- Ayting tezroq, boy aka!



— Xoʻ-oʻsh, — dedi guppi nihoyatda jiddiylik bilan. — Hozir mening izimdan bir odam keladi. Eshagining xurjunida ikki xum asali bor. Shuni olish kerak!

Uning bu gapidan soʻng mirshablar indamay qolishdi.

Biroz o'tgach Sodir mirshab so'radi:

- Oʻzi ikki xum asali bor!
- Ha!
- Biz ikkovini olishimiz kerak?
- Ha.

Mirshablar yana oʻylanib qolishdi. Odatda, ular oʻn-oʻn besh qopli dehqondan yarim qop, bir qopni olishardi. Ellik-oltmish qoʻyli choʻpondan bitta, juda nari borsa ikkita qoʻyni. Shunda ham gohida janjallar boʻlib zoʻrgʻa qutulardilar. Lekin odamning bor bud-shudini tortib olish! Bu toifa ishni ular qilmasdilar va qilishni xohlamasdilar.

- O'sha aytgan odamingizning boshqa hech narsasi yo'qmi? bu savolni Nodir mirshab berdi.
 - Yoʻq! dedi tajanglashib guppi.
- Juda qiyin ish, boy aka! deya gapga Sodir mirshab aralashdi: –
 Bunaqasini bizga ustozimiz oʻrgatmaganlar!
- Ustozingizdan oʻrgildim. Men oʻrgatyapman! Boz ustiga tilla bervapman!..

Nodir mirshab guppining gapini bo'ldi:

- Chorak xumini, boringki, yarim xumini ol, deng, oberaylik. Molidan ajragan odam boltadan qaytmaydigan hoʻkizga aylanadi. Bilasizmi, qassobga kalla qoʻyib qolishi mumkin.
- Hoy, hoy, hoy! o'z navbatida guppi ham uning gapini kesdi-da, barmoqlarini bir-biriga ishqab dedi. – Men tanga beryapman! Mullajiring beryapman! Chorak xum, yarim xum emish! Chorak xum, yarim xumni men aytmasam ham olishlaringni bilaman.

Mirshablarning koʻnmayotgani koʻrinib turardi. Muhsin guppi yarim tillani eshitib darrov koʻnishadi deb oʻylab xato qilganini tushundi. Endi avrashga oʻtdi.

- Yarim tilla-ya! Boz ustiga, olishning oson yoʻlini oʻrgataman. U odam xumlarining boʻshligini bozorga borguncha bilmay qoladi. - Muhsin

guppi jindek tin olib, narxni qoʻshdi. — Ha, borlaring, ana ikkovingga bir tangadan beraman! — Bir xumdan asal, bitta mullajiring — asl tilladan, egasi bilmay qoladigan yoʻli! Yana nima kerak? Men oʻsha odamni xumlari boʻsh holda bozorga kirib borganini koʻrsam boʻldi!

– Kim oʻzi oʻsha aytayotgan odamingiz? – soʻradi shoshib Sodir mirshab. Shoshmasa, Nodir mirshab «Boʻpti, biz rozi!» devorishga tayyor edi. Oʻljasiz qaytishdan dili xufton Nodir mirshabni yarim maoshiga teng bir tanga – butunlay es-hushini olgandi. Boz ustiga bir xum asal!

Muhsin guppi ham oshnalarning yakdilligiga darz ketganini sezdi. Shuning uchun Nodir mirshabga pirpirab boqib, goʻyoki oʻpkalandi:

- Do'stingizni qarang! Ha buni nima ahamiyati bor?!

Sodir mirshab quvroq edi. Buning ustiga yana narxni oshirish mumkinligini tushundi.

- Juda borda, - dedi u o'jarlik qilib.

Nodir mirshab doʻstiga boqarkan, uning tixirlik qilishiga hayron boʻldi. Guppi nihoyatda tajang edi. Sodir mirshab esa ularning bittasiga ham qaramas, goh yerga, goh osmonga tikilarkan, gʻoʻngʻillab xirgoyi qilardi.

Jahli chiqqan guppi barmogʻini nuqib hijjaladi: - Oʻsha men aytgan asalli odam - Nasriddin Afandi boʻladi!

Bu gapni eshitgan mirshablar avval bir zum ogʻizlarini ochib agʻrayishdi-da, keyin: «Yoʻq, yoʻq, yoʻq!» — degancha xuddi moxovdan qochgandek ikki yoqqa qochishdi. Guppi bir amallab Nodir mirshabning etagidan ushlab qoldi. Sodir mirshabni esa takror-takror chaqiraverib, arang yoniga qaytib oʻtqazdi.

- Tavba! dedi u xunob boʻlib. Namuncha nomini eshitiboq bu odamlar oʻzini tomdan tashlagudek qochadi-ya? U ham hammaga oʻxshagan odam! Menga qarang: ikkovingga ikki tilladan beraman. Ana, mendan ketsa ketsin! Foydani tagida qoladigan boʻldilaring!
- E, Nasriddin Afandiga tegmagan odam foyda qiladi, boy aka! poʻngʻilladi Sodir mirshab.
 - Uch tilladan beraman, dedi guppi.
- Uch tilladan!!! Nodir mirshab shunday deb hushi boshidan uchdi.
 U batamom guppining quliga aylangandi. Sodir mirshab esa battar shubhaga tushdi.



- Menga qarang, boy aka, shu odamga tegish namuncha zaril boʻlib qoldi? Nasriddin Afandini butun poshsholikda otliq ham, piyoda ham tanisa. Bir ishkal chiqsa men bu mirshablarni tanimayman, deb tonib ketaverasiz!...
 - Besh tilladan! dedi guppi uning ogʻziga urgandek.

Bu pulni eshitib ikkala mirshab adoyi tamom boʻlishdi. Ayniqsa, Nodir mirshab oʻrnidan turib ketib: «Lanj! Nas bosgan!» degan ta'nalarni aytib unga tashlandiki, Sodir mirshab ham taslim boʻldi.

- Besh tilladan ollaring-da, ishni bajaringlar! Asalini olib quruq joʻnat-salaring bas! Nasriddin Afandini loy qilgan mirshablar, deb shon-shav-katinglar butun poshsholikka ketadi. Bekning, shohning nazariga tushasanlar. Senlarni chaqirib mansab beradi. Hammasi ikki xum asalni olish evaziga-ya! Karnaychidan bir puf-da! Boz ustiga oson yoʻlini oʻrgataman.
 - Bo'pti, o'rgating yo'lini! dedi Sodir mirshab.

Guppi biroz nafas rostlab, soʻng u yoq-bu yoqqa alanglab oldi-da, ikki ogʻaynini boʻynidan ushlab oʻziga engashtirdi. Shu alfozda uch-toʻrt jumla aytgandi, mirshablar birdan oʻzlarini orqaga tashlab qah-qah urishdi. Guppi yana ularni boyagidek engashtirdi. Uch-toʻrt ogʻiz gapidan soʻng mirshablar yana gavdalarini orqaga tashlab, osmonga qarab qah-qah urdilar.

- Obbo, obbo, boy aka! Ustomonlikda barchadan o'tib ketibsiz-ku! dedi kulgi aralash Nodir mirshab.
- Nasriddin Afandi ham ip esholmaydi! dedi Sodir mirshab. Yarasiga malhamdek bu maqtovdan Muhsin guppi taltayib ketdi.
 - Zo'rmi? so'radi u ham gerdayib. Zo'r! Qoyil!

Muhsin guppi jiddiylashib, mirshablarga rejani puxta uqtirdi.

- Agar asalni o'marganlaringni sezmasdan ketaversa indamaysizlar! Sezib qolsa, biz bilmaymiz deb, haligi men o'rgatgan javobni berasanlar! Bo'ptimi?
 - Bo'pti, boy aka! Ammo-lekin qoyilman! dedi Nodir mirshab.
- Shundan keyin Muhsin guppi ularga ikkita ogʻzi boyloq oq xaltacha berdi. Mirshablar uni avaylab olib, sardobaga yashirib chiqishdi.
 - Qani, boringlar! Ikkita xum topib kelinglar! dedi guppi.



IKKI XUM ASAL

Sal oʻtmay, Sodir va Nodir mirshablar biri xum, ikkinchisi mis kashkulni egarga bosgancha qaytib kelishdi. Bir-birlariga yordamlashib, idishlarni artishdi, koʻz ochib yumguncha ularni sardobaning orqa tomonidagi butalar ichiga yashirib qoʻyishdi.

 Menga qara! Agar shu ishimiz tufayli rostdan ham bekning nazariga tushsak, qaysi mansabni soʻrasam ekan-a? – dedi Nodir mirshab ogʻzi qulogʻiga yetib.

Sodir mirshab doimo sherigining xayolini band qilgan orzusini bilgani uchun darrov javob berdi:

- Mirshabboshilikni!

Nodir mirshab bir chuqur oh tortib, «sen nima soʻraysan, Sodir?» demoqchi edi, Laylak tomondan kimningdir xirgoyisi eshitildi:

- Toshqin daryoman debon, savlatingga ishonma, ho ishonma. - Bu Nasriddin Afandi edi. Mirshablar gap bilan boʻlib uning yaqinlashganini sezmay qolgandilar. Ular darrov salla-pechlarini toʻgʻriladilar. Bir oyoqlarini supadan pastga osiltirganlaricha yarim chordana qurib, «suhbat»ga berilishdi.

Nasriddin Afandi xirgoyisini bir daqiqaga uzib, «assalomu alaykum», dedi-da, oʻtib keta boshladi.

- Yo'l bo'lsin, Afandim? dedi Nodir mirshab alik olgach.
- Bozorga, saltanat togʻlari, bozorga, javob berdi Nasriddin zarracha qiyo boqmay.
- Bozor tarqab ketmaydimi, kech qopsiz? Sodirning bu gapidan keyin ikkala mirshab xavotirlanib oʻrinlaridan turishdi. Chunki Nasriddin oʻtib keta boshlagandi.
- Yaxshi molning bozori tarqamaydi, birodarlar!
 Mirshablar haya-jonlanib yoʻl ustiga chiqishdi.
 - Nima olib ketyapsiz?
 - Asal, asal.
 - Hoy, to 'xtang, dedi Nodir mirshab. Hujjatingiz bormi?
 - Iya, qanaqa hujjat?

Savoldan Nodir mirshab kalovlanib qolgandi, Sodir mirshab topqirlik qildi:





Asal oʻzingiznikiligi haqidagi hujjat!

Nasriddin eshagining jilovini tortdi. Bir oyogʻini egar ustiga olib yarim chordana qurarkan, jilmayib mirshablarga oʻgirildi. Shu qiyofasining oʻzi kattakon savol edi.

– Biz sizni oʻgʻri demoqchimasmiz-u, ammo-lekin mirshabboshi hamma hujjatlarni tekshirib oʻtkazgin deb buyruq bergan. Shuning uchun yo hujjat, yo guvoh topib keling, – dedi Nodir mirshab.

Nasriddin xoxolab kuldi:

- O'tganning o'rog'ini, ketganning mashog'ini olib o'tirasizlar, deb eshitgandim. Qarang, noto'g'ri ekan! Guvoh yoki hujjat tekshirib o'tirar-kansizlar-da!

Mirshablar Nasriddinning kinoyasini tushunmaslikka oldilar.

- Biz birovdan bekorga hech narsa olmaymiz. Birovning haqiga xiyonat qilgan odam shariat oldida javob beradi. Avval oʻng qoʻli, soʻngra soʻl qoʻli kesiladi. Sizni hurmat qilamiz. Shuning uchun har xil ma'noga buradigan gaplarni gapiravermang.
- Ha, sizni hurmat qilamiz, deb ilib ketdi Sodirning gapini Nodir. –
 Shuning uchun qishloq oqsoqolidan borib bitta hujjat olib kelasiz!
- Hurmatlaring uchun, rahmat. Lekin xuddi shu hurmat haqqi, hozir yoʻldan qoʻymanglar! Mabodo mirshabboshi tekshirib qolsa, bor edi, yoʻqotib qoʻyibman, deyman.
 - Yoʻq, bizni yolgʻonga sherik qilmang.

Mirshablarning qat'iy javobi shu bo'ldi.

Nasriddin Afandi bir sir borligini tushundi va qaytib hujjat olib kelishga koʻndi. Lekin mirshablarni bir sinovdan oʻtkazmoqchi boʻldi:

- Xumlarimni shu yerda qoldiraymi yo olib ketaymi?
- Iya, ha nima qilasiz eshak jonivorni qiynab? Tashlab ketavering! dedi darrov Nodir mirshab, asalning olib ketilishidan xavfsirab.
- Turadi shu yerda. Men umuman asalni xush koʻrmayman! joʻr boʻldi Sodir mirshab, soʻng sherigidan soʻradi: Sen-chi?
- Be-e! dedi Nodir mirshab. Men asalni jindek hidlab qo'ysam, shu yo'tal tutadi, shu yo'tal tutadi! Hech o'zimni to'xtata olmayman!
- Mana, supaning yonboshiga qoʻying. Salqinda tura-turadi, dedi
 Sodir mirshab.



– Qani, yordamlashib yuboringlar, boʻlmasa! – iltimos qildi Nasriddin eshakdan tushib.

Birovning ishiga saratonda qoʻl urmaydigan mirshablar bu iltimosga yugurgilab kelishdi. Tizzadan sal balandroq keladigan xumlarni uch kishilashib supaning yonboshiga olib qoʻyishdi.

Nasriddin xuddi hech narsa boʻlmagandek, xirgoyi qilgancha Laylakka qaytdi. U uzoqlashib nuqtadan sal kattaroq holda koʻringunga qadar: «Sabr qil, sal nariroq ketsin, oʻgirilib koʻrib qoladi» degan gaplar bilan mirshablar birini biri bosib turishdi. Keyin birdaniga shoshib ishga kirishishdi. Boyagi, sardoba orqasiga yashirib qoʻyilgan xum va kashkulni keltirib, Afandining xumlarini ularga agʻdarib, asal yaxshilab oqib tushguncha ushlab turishdi. Shunday qilib oʻzlari olib kelgan idishlarini toʻldirishdi-da, ularni yana chakalakzor ichiga yashirishdi.

Afandi xumlarining har bittasiga esa haligi guppidan olgan oq xaltalarni qoqib boʻshatishdi. Soʻngra darrov-darrov ogʻzini bogʻlab joy-joyiga – supaning yoniga qoʻyib qoʻyishdi.

KUTILMAGAN...

Nodir mirshab bilan Sodir mirshab asalni gumdon qilib, pinakka ketishni moʻljallamoqda edi. Chunki eshagi ming yoʻrtmasin, Nasriddinning qaytib kelishiga kamida bir-bir yarim soat kerak.

Guppining «besh tilla, nazarga tushasanlar, shuhrating oshadi», degan gaplari ta'sirida avval mirshablarning ruhlari koʻtarildi, ketma-ket qoʻshiq aytib, biroz askiyabozlik ham qildilar. Keyin esa allaqaydandir oʻrmalab kelgan xijillik yuraklariga asta kirib, ikkovlari ham xomushlanib qolishdi...

Nasriddin Afandi masalasi, hozir oʻylab koʻrishsa, chatoqroq. Nasriddin arz-dodini hech kimga yetkaza olmaydigan dehqon yoki choʻpon emas. Uni oddiy fuqarodan tortib bek-u amaldorlargacha hamma biladi.

Xijillikning ildizi shunda edi. Bu xijillik ikki mirshabni o'tga solgan bo'lsa-da, Nodir bilan Sodir mard kishilar edi. So'z berdilarmi, bas, o'sha ishni do'ndirishlari kerak. Yana bir tomoni, Muhsin guppining boyligi, qozikalon bilan tanish-bilishligi, unadigan besh tilla ularga tasalli berar edi. Boz ustiga, nayrangning silliq chiqishiga, Nasriddinning hech narsa

sezmay qolishiga ishonch ularning batamom tahlikaga berilib, «oh-voh» qilishlariga yoʻl bermasdi.

- ...Nasriddin Afandi xirgoyi qilgancha ularga yaqinlashardi.
- Asaldan mosuvo bo'lganidan bexabar mullaning ashula aytishini qara! – dedi Nodir mirshab. Ikki og'ayni kulishdi... Keyin supada yonmayon o'tirishib, mo'min-qobil qiyofaga kirishdi

Nasriddin Afandi eshakdan tushgandagina xirgoyisini toʻxtatdi-da, gap qotdi:

- Borib hujjatni olib keldim. Mana!

Nasriddin qoʻynidan kichkina qogʻoz parchasini olib uzatdi. Qogʻozni olgan Nodir mirshab, u yoq-bu yogʻini agʻdarib koʻrdi, soʻng Sodir mirshabga uzatdi. Sodir mirshab ham qogʻozning u yoq-bu yogʻini qarab, Nasriddinga qaytardi.

 Joyida muhri, imzosi bor, yaxshi! Ana, asalingiz turgan yerida turibdi. – Soʻng Nodir mirshabga yuzlanib, oʻrnidan qoʻzgʻaldi. – Ortishvoraylik-a? Afandim ancha ovora boldilar... – dedi...

Nasriddin Afandi: «Yashanglar! Rahmat sizlarga!» degancha jilmayib kuzatib turdi.

- Ana! dedi Sodir mirshab qoʻlini qoʻliga urib changini qoqqandek.
- Ana! dedi Nodir mirshab xuddi o'shandek kaftini kaftiga urib. –
 Eshakka mining-da, jo'nayvering!
- Shundaymi? Joʻnayveraymi? Nasriddin Afandi shunday deb xum solingan xurjunning bir tomonini koʻtarib koʻrdi.
 - Iya! dedi u hayron jilmaygancha. Ha, bu yengil boʻlib qolibdi-ku?!
- Nega yengil boʻlib qolarkan? dedi Nodir mirshab yasama hayronlik bilan.
- Qiziqmisiz, oʻzidan oʻzi yengil boʻlib qolaverarkanmi? dedi Sodir mirshab ham undan qolishmay.

Soʻngra mirshablar oʻsha xurjundagi xumni ikkovlashib koʻtarishdi.

 Zildek ogʻir-ku, ikkovlon bazoʻr koʻtarib turibmiz, – deyishdi ular xumni qoʻymay.

Nasriddin zavqlanib kuldi.

– E-e, qoʻyinglar, qoʻyinglar! Yana uzilib qolmanglar! – dedi.



Nasriddin narigi xumning bogʻlogʻini shoshilmay yechdi-da, qopqoq qilingan lattani koʻtardi. Xumning ichidan bir gala pashsha gʻuvillab uchib chiqib har tomon tarqab ketdi. Nasriddin qoʻli bilan yelpina-yelpina xumning ichiga moʻraladi:

- Bo'sh-ku?!

Bu xitobdan keyin mirshablar xumli xurjunni qoʻyib yuborishdi. Nasriddin eshakning berigi tomoniga oʻtdi-da, ikkinchi xumni ham ochdi. Yana bir gala pashsha qutulganiga shukr qilgandek gʻuvillab tashqariga otildi. Uch-toʻrttasi xumning chetiga, Nasriddinning egniga ham oʻtirdi. U yana yelpina-yelpina xumning ichiga moʻraladi. Shu koʻyi ikki kiprik qoqqunchalik turdi-da, zavq bilan qiyqiriqqa oʻxshatib kulib, mirshablarga oʻgirildi va shunday dedi:

- Nasib etsa kelar Shom-u Iroqdin,

Etmasa gar ketar qosh-u qaboqdin!

Xafa boʻlish oʻrniga Nasriddinning kulgani, she'r aytgani mirshablarni juda qoʻrqitib yubordi.

- Nega bizga qaraysiz? Ha, nega bizga qaraysiz? deyishdi payopay ranglari oʻchgancha.
 - Asal osmonga uchib ketibdi-da?!
- Biz qattan bilaylik! Qoʻlimizzi uchiniyam tekkizmadik! dedi Nodir mirshab...
- Oʻzi bormidi asalingiz? Yoki bizni mazax qilmoqchi boʻldingizmi?
 soʻradi Sodir mirshab dadillashib.

Nasriddin javob bermadi. Kinoyali, sinchkov jilmaygancha sallasini sal surib, bosh qashigancha supaga borib oʻtirdi. Bir nuqtaga tikilgancha zoʻr berib nimalarnidir xotirlay boshladi...

- Tavba, sizlarning qoʻllaringdan bunaqa ish kelmaydi, dedi Nasriddin takrorlab. – Asal qayoqqa ketdiykin?
- Tavba, dedi Nodir mirshab ham qoʻlini paxsa qilgancha. Ha, bu ogʻzi bogʻliq boʻlsa! Qoʻl tekkizilmagan boʻlsa! Qayoqqa ketdi asal, a?

Sodir mirshab birdan peshonasiga urib baqirdi: - Topdim!!! Asalni kim gumdon qilganini topdim!

Nasriddin indamay qarab turaverdi. Nodir mirshab «Kim? Kim?» deb soʻradi.



- Haligi bogʻlovini yechganda ichidan gʻuvillab uchib chiqqan pash-shalar! Oʻshalar yegan asalni!
 - Yo'g'e! Nasriddinning yuziga tabassum yugurdi.
 - Toʻgʻri, dedi Nodir mirshab. Aqlingga balli!
- Be-e, qoʻysanglar-chi! dedi Nasriddin soddalik bilan. Shu uchtoʻrtta pashsha ikki xum asalni yeya olarkanmi?
- Yoʻq, Nasriddin aka! dedi Nodir doʻstining bu fikriga yopishib
 olib. Pashshalar uch-toʻrtta emas, qirq bitta edi.
 - Ho, ho, ho! Qirq bitta ekanini qayoqdan bila qoldingiz?

Nodir mirshab kalovlandi:

- Men, a... men... o'zi yoshlikdan zehnim o'tkir!
- Ha, Sodir sherigiga yordamga oshiqdi. Buning ota-bobosi choʻpon oʻtgan. Otardagi qoʻyni sanayverib oʻrganib ketgan-da!
- Toʻgʻri, dedi Nodir. Oldimdan qancha pashsha oʻtganini ham shundoq qarab aytib beraveraman.
 - O'! Zo'r ekansiz!

Nasriddin sallasini boyagidan boshqa tomonga surib, bosh qashib, oʻvga choʻmdi.

«Zoʻr ekansiz, zoʻr ekansiz»ni gʻoʻldirab takrorlab oʻtirdi... Nasriddin tuyqusdan tizzasiga «shap» etib urib, «xoʻp» dedi. Mirshablar sapchib turishdi.

- Demak, asalimni pashsha yegan, shundaymi?
- Shunday, shunday! dedi Sodir mirshab.
- Qirq bitta pashsha! ta'kidladi Nodir mirshab.
- Xoʻp! dedi Nasriddin Afandi. Men ishondim. Endi-chi, salta-natning suyangan togʻlari, menga oʻsha qirq bitta pashshadan qasos olishga yordam berasizlar! Yaraydimi?
 - Yaraydi! Yaraganda qandoq, dedi Sodir mirshab.
- Qirq bitta tugul mingta bo'lmaydimi?
 Nodir mirshab shap etib supaga qo'ngan pashshani urdi.
 Mana, bittasini tinchitdim...
- Yoʻ-oʻq, Nasriddin bosh chayqadi. Menga bu ketmaydi. Hozir qozining oldiga boramiz, xoʻp denglar, men asalimni yeb ketgan pashshalarni jazolashga vakolatnoma soʻrayman, xoʻp denglar! Sizlar guvoh boʻlasizlar.

Bu gapni eshitgan mirshablar xoxolashdan oʻzlarini toʻxtatolmay qoldilar. Bir-birlarining kulishiga, ayniqsa, Nasriddinning soddalik bilan



jilmayib turishiga koʻzlari tushgan sayin kulgilari avjlanib, oʻzlarini toʻxtatolmay qoldilar. Bora-bora nafaslari ichlariga tushib ketdi...

 Obbo, Nasriddin Afandim-ey! Ha, pashsha oʻldirishga ham vakolatmi? – deyishardi mirshablar, koʻzyoshlarini arta-arta. – Mana, atrofingizda uchib yuribdi. Oʻldiravering! Kuchimiz yetgancha, biz ham yordamlashamiz, qiladigan ishimiz yoʻq.

Shunday deb mirshablar supani aylangancha pashsha oʻldirishga tushib ketishdi.

- Hoy, bunaqasi ketmaydi dedim-ku! deya toʻxtatdi ularni Nasriddin.
- Ha, nima qil deysiz?
- Qoziga boramiz! Guvoh boʻlasizlar, tamom-vassalom!
- Be-e, qo'ysangiz-chi! dedi Sodir mirshab.
- Men sizni hazillashyapsiz deb oʻylabman, dedi Nodir mirshab.
- Hazillashayotganim yoʻq! Nasriddin goʻyo doʻstlariga hasrat qilayotgan odamdek, mirshablarni yoniga oʻtirishga da'vat qilib, asta gap boshladi. Men-ku pashsha vajiga ishondim. Ammo... Agar xotinimga borib, mirshablarning tumshugʻi ostida turgan asalni pashshalar yeb ketibdi deb, quruq gapni aytsam, oʻla qolsa ishonmaydi, Nasriddin nasihat ohangida davom etdi: Shuning uchun gap chuvalmasin-da, borib vakolatni olaylik. Men ham uni xotinga koʻrsatib tinchiyman, sizlar ham gʻalvaga qolmaysizlar.

Mirshablar koʻzlari ola-kula boʻlib... qoziga borishga koʻnishdi.

Nasriddin eshagiga mindi, mirshablar otiga. Oʻljalar qolayotgani uchun bir-ikki orqalariga qarab qoʻydilar-u, noiloj Nasriddinning ketidan yoʻlga tushdilar.

Ular olislab ketgach, Abdukarim joyidan chiqdi. Supaga kelib oʻtirdida, yerga qaragancha oʻyga toldi. «Nima boʻlsa boʻldi!» deb roʻzgʻor tashvishlariga qoʻl siltadi. Eshagiga oʻtirib Nasriddin Afandi va mirshablarni qora qilgancha shaharga yoʻl oldi...

VAKOLATNOMA

Nasriddin Afandi mirshablar bilan qozixonaga kirib kelganda, qozikalon bilan Muhsin guppi kabobni yeb, ustidan shirinliklar bilan choy ichardilar...



- * Keling, Nasriddinboy. Qanday shamol uchirdi? qozikalon Nasriddinni koʻrib, chin dildan bir zavqlansa, uning chuv tushishiga guvoh boʻlajagidan ikki zavqlanardi.
- Bu, deya salmoqlab boshladi Nasriddin gapni choʻzmaslik niyatida.
 Bizning musulmonobod zamonda oʻgʻrilar jazolanishi shart-a?
- Albatta, albatta! dedi qozikalon katta gavdasiga yarashmagan chaqqonlikda joyiga oʻtirib, dasturxon chetlarini pashsha talayotgan oshovqatning ustiga yoparkan. — Birinchi karra qoʻlga tushgan oʻgʻrining oʻng qoʻli kesiladi, ikkinchi karrasida chap qoʻli!

Qozining javobidan mirshablar tipirchilab qolishdi.

- Bizni boshqa narsaga chaqirgan edingiz-ku, Nasriddin aka! -deyishdi barobar.
 - Nega qoʻrqasizlar? hayron boʻlgandek gap qotdi ularga Nasriddin.
- Asalni gumdon qilgan sizlar emas-ku, to'g'rimi?
 - To'g'ri, to'g'ri, bizlar emas! Bizlar emas!

Qozi jim bo'llaring degandek ishora qildi-da, Nasriddinga yuzlandi:

- Xo'sh, Afandim, o'zi nima gap?
- Ha, gapiring, gapiring! deya luqma tashladi guppi oʻta qiziqsingandek va oʻzini hech narsadan xabari yoʻqdek koʻrsatib.
- Mayli, loʻndasini aytaman, dedi Nasriddin Afandi qoʻlini siltab. Men bozorga ikki xum asal olib kelayotgan edim. Bu mirshablar yoʻlda toʻxtatib, asal oʻzimniki ekanligini tasdiqlovchi hujjat talab qilishdi. Asalimni bularning oldiga qoʻyib oqsoqoldan hujjatni olib kelsam, ogʻzi boyloq xumlarim boʻsh! Bogʻlogʻini yechgandim, ichidan bir gala pashsha uchib chiqdi...
 - E, qiziq bo'pti-ku! guppi qixillab kuldi.
 - Qirq bitta! dedi Nodir mirshab.
 - E, pashsha qursin, dedi qozi pashsha qo'rib.

Shu uch luqmadan keyin Nasriddin Nodir mirshabni koʻrsatib davom etdi.

- Bu kishining zehnlari juda oʻtkir ekan, qirq bittaligini darrov sanab qoʻyibdilar. Men, turgan gap, mirshablarni oʻgʻri qildim. Lekin bular asalni pashshalar yegan, deyishdi. Podsholikning odamlari shunday degandan keyin ishonmay ilojim yoʻq, ishondim!

- Ha, qirq bitta pashshayam yeyman desa ancha-muncha narsani yeb
 qoʻyadi! dedi Nodir mirshab aqlli gap aytayotgandek koʻzlarini loʻq qilib.
- To'g'ri! Qirq bitta! Balki ko'proq hamdir? Lekin menga qirq bittasi ham yetadi. Endi, qozikalon, siz menga shu ikki mirshab guvohligida, shu qirq bitta pashshani jazolashga ruxsat beradigan vakolatnoma yozib berasiz!

Nasriddinning bu gapidan keyin sardoba yonida mirshablar qanday kulishgan boʻlsa xuddi oʻshanaqa kulgi boshlandi. Unga Nasriddinning oʻzi ham qoʻshildi. Faqat hali uch kishi kulgan boʻlsa hozir besh kishi edilar. Hammasi dumalab, qornini ushlab, «pashsha...», «vakolat» deb, davomini aytolmay qixillab qolishardi.

- Obbo, Nasriddin-ey! Obbo tushmagur-ey! Ba'zan xo'p soddasiz-da! dedi nihoyat qozi tili zo'rg'a aylanib. Ha, vakolatsiz shunday o'ldiravermaysizmi?
- Shunday qilsam ham bo'laveradi, dedi Nasriddin o'sha-o'sha jilmaygan ko'yi. – Lekin odamlar jinniga chiqarishlari mumkin...

Yana uzoq kulgi boʻldi. Nasriddin ham jilmaygancha kutib turib, mavridi kelgach, davom etdi:

- Undan keyin bu qogʻozingiz xotinimga koʻrsatish uchun kerak. Uni eshitgansiz. Otasi Shohboboning sevimli ellikboshisi boʻlgan. Ellikboshining dovrugʻi hali ham soʻnmagan. Shu xotinga asalni ikkita mirshabning tumshugʻi tagida pashsha yeb ketibdi desam, quruqdan-quruq ishonadimi? Yoʻq, mirshablarga toʻnkaydi. Mirshablarning orqasida yana birov bor, deydi-da, Urganchdagi qarindoshlariga xabar qiladi. Mirshablarni qoʻyavering! Kuppa-kunduz kuni odamlarni mirshablarga tunatib qoʻyibsan deb, sizga-da, begimizga-da gap tegadi. Xoʻsh, vakolat boʻlsa-chi? Men uni xotinimga koʻrsataman, koʻzining oʻngida bir-ikkita pashshani oʻldiraman, tamom-vassalom! Hamma yoq tinch, olam guliston!

Nasriddin Afandining da'volaridan keyin ikkala mirshab va kutilmaganda Muhsin guppi uning yonini olib gap uqtira boshlashdi. Muhsin guppi ham gapirar, ham kishi bilmas qosh qoqib qozini ko'ndirishga urinardi. Xullas, Nasriddindan ko'ra mirshablar va guppining tazyiqi tufayli, ikkilanayotgan qozi ham rozi bo'ldi-da, qalamni olib, dovotni oldiga surdi. Qozi doʻrillagan ovozda yozganlarini qaytarib, vakolatnomani yarimlatgan paytda, «assalomu alaykum» deb, qozixonaga Abdukarim kirib keldi. Uning salomiga Nasriddindan boʻlak hech kim alik olmadi. Qozi gʻoʻngʻillab vakolatnoma yozardi. Guppi ensasi qotib teskari oʻgirildi. Mirshablar esa bir seskanishdi. Soʻng ikkovi asta Abdukarimga yaqinlashib: «Bor, chiqib tur, navbati bilan kelasan!» deb shivirlab tashqariga turtkilashdi. Lekin Abdukarim bir siltanib joyida qoldi.

- Mirshablar toʻgʻri aytyaptilar, boʻtam, tegirmon navbati bilan! –
 dedi qozi koʻzlarini qogʻozdan uzmay oʻziga oʻzi gapirgandek.
 - Meni ishim ham hozirgi ishga bogʻliq, dedi Abdukarim.
- Unday bo'lsa, mayli, javob qildi qozi gapga tuzuk ahamiyat bermay yozuvda davom etarkan.

Noiloj qolgan mirshablar guppini chekkaga tortishdi:

Asalni shuning idishlariga solganmiz. Tezroq aqchasini bering! –
 deyishdi tishlarini gʻijirlatib. – Toʻpolon chiqaradi!

Muhsin guppi istehzoli kuldi:

- Menga shunisi kerak-da! Qancha koʻp toʻpolon koʻtarsa, shuncha yaxshi!
- Kerakmas aqchangiz, mirshab aka! dedi ularning gap-soʻzini eshitib turgan Abdukarim. – Hech narsani bilmaganimda, boshidayoq toʻlaganlarida olardim. Endi olmayman!
 - Nega? hang-mang boʻlgancha soʻradi Sodir mirshab.
- Nasriddin akamga firib bermoqchiliginglarni sezib qoldim.
 Hammasini hozir aytaman!

Gapini tugatar-tugatmas mirshablar rostakamiga yoqasiga yopishib qozixonadan chiqarib tashlamoqchi boʻldilar. Lekin qozining sharaqlatib muhr bosgani mirshablarni chalgʻitdi. «Ana bitdi!» dedi qozi. Soʻngra engashgan koʻyi qovogʻi ostidan kulib qarab qogʻozni uzatdi:

- Mana, Nasriddin boy!

Nasriddin vakolatni olish uchun borayotgandi, qozi hiringlab qoʻydi-da:

- Shoshmang! Avval oʻqib beray, - deb yoʻgʻon ovozda oʻqiy boshladi: «Vakolat. Berildi shul haqdakim, ushbuni koʻrsatuvchi mulla Nasriddin Afandi asallarini yeb ketgan qirq bitta oʻgʻri pashshani qayerda va qachon



koʻrishidan qat'i nazar jazolashga mutlaq huquqi bor. Kimda-kim bu ishda unga mone'lik qilaturgʻon boʻlsa, ul kimsa-da, haromning homiysi sifatida, bamisoli oʻgʻri kabi, oʻng qoʻli kesilishiga mahkumdir.

Shar'an muvofiqdir, deb: qozikaloni shahri Kumushkent Sadriddinxoʻja Idrisxoʻja oʻgʻli.

Imzo. Muhr»

Mana, mulla Nasriddin, endi pashshalaringizni o'ldiravering, – kuldi
 Muhsin guppi.

Nasriddin qoziga bir qarab qoʻyib, qoʻlidan hujjatni oldi-da, Abdukarimning oldiga keldi. Unga engashib past ovozda tayinladi.

- Meni deb aqchangizdan kechganingiz uchun rahmat! Endi yordamingiz kerak! Shu qogʻozni obchiqib, yaxshilab yashiring!

Abdukarim gapirmoqchi boʻlgan edi, Nasriddin ogʻiz ochirmay keskin va sirli qilib ta'kidladi:

– Shu qogʻoz bularning ta'zirini beradi. Yaxshilab yashiring. Birov topadigan boʻlmasin! Keyin oʻzimga qaytararsiz!

Abdukarim hujjatni olib chiqib ketdi.

- Xo'sh, ana endi pashshalarni qirishga kirishamiz, dedi Nasriddin orqaga qaytarkan.
- Kirishing-kirishing! dedi Muhsin guppi mazax ohangida... Guppi shunday deyishi bilan qoʻqqisdan quloq chakkasiga shapaloq tushdi. Tuyqusdan kaltak yegani uchun guppi hatto voy deyolmay gandiraklab borib agʻdarilib tushdi. Qozi va mirshablar hayron-u lol qolib: «Hoy-hoy, bu nima qilganingiz?» deyishdi.
- Bu birinchi pashsha! deb javob berdi Nasriddin va hamon ogʻzini ochib turgan Nodir mirshabni ham qulochkashlab soldi. Bu ikkinchi pashsha!

Nodir mirshab «voy, jagʻim», degancha engashib qoldi. Nasriddin Sodir mirshabga yuzlandi. Sodir mirshab qochdi. Nasriddin Afandi orqasidan yetib olib: «Bu uchinchi pashsha!» degancha ketiga bir tepdi.

Voqeaning bu yoʻsin, teskarisiga aylanib ketishini kutmagan qozi soʻrida oʻtirgan joyida: «Chatoq ish boʻpti-ku!», «Qiziq ish qilib qoʻyibmiz-ku!» – deb gʻoʻldiradi.



Ikkala mirshab sal oʻzlariga kelib qilichlarini «shigʻ» etib qinidan chiqarishdi.

Qani tegib koʻringlar-chi! Oʻgʻri pashshaning himoyachisi sifatida
 qoʻllaringni kesishadi! – dedi Nasriddin qoʻrqish oʻrniga asta bostirib
 borib...

Shu payt Abdukarim qaytib keldi-da, ostonadan turib e'lon qildi:

- Boplab berkitib qoʻydim, Nasriddin aka!
- Yashang! dedi Nasriddin. Soʻngra qoziga yuzlandi: Qani, qozikalon, beriroq keling-chi! Bitta pashsham sallangizga oʻtirib qolibdi!

Nasriddin shunday degancha soʻriga chiqa boshladi. Qozi ikki qoʻlini oldinga chiqarib soʻrining toʻriga tisarilarkan: «Hoy-hoy, Nasriddinboy! Oʻylab ish qiling! Sharmanda qilmang!» deya yalinardi. «Qimirlamang, qimirlamang, uchirib yuborasiz!» deb, Nasriddin uni soʻri boʻylab ta'qib qila boshladi. Qozi qoʻlini boshi uzra silkitib, keyin yana oldinga chiqarib muhofazalanib: «Ana haydavordim. Uchib ketdi. Bu boshqa pashsha!» degancha soʻrida gir aylanib chekinardi. Nasriddin baribir unga yetib, qulochkashlab gardaniga bir urdi. Lekin qozikalon baquvvat odam boʻlgani uchun «hiq» dedi-yu, bildirmadi. Nasriddin yana bir qulochkashlamoqchi boʻlgandi, qozi chaqqonlik qilib uning qoʻlini ushlab, oʻzini quchoqlab oldi.

- Sizni oʻgʻri deb jazolash kerak! Oʻzingiz yozgan vakolatga qarshi chiqyapsiz! derkan Nasriddin qozining quchogʻidan chiqmoqchi boʻlib siltana boshladi. Qozi Nasriddinni quchogʻida mahkam qisganicha qimirlatmas: «Insof qiling! Insof qiling! Sharmanda boʻlmay!» deb yalinardi.
- Mayli, qoʻyvoring, dedi Nasriddin qozining «quchogʻida» turgancha, hozircha qozini dushman qilmaslikka qaror qilib. Lekin anavilarning boshidagi pashshalarni urishga qarshi boʻlmaysiz!

Qozi: «Meni urmaysizmi? Menga qoʻngan pashshani oʻldirmaysizmi?» deb qayta-qayta soʻrab tasdiqlatib olgandan keyin uni qoʻyib yubordi.

- Iye! dedi Nasriddin qizishib. Asalimni yegan pashshalarni siz taniysizmi, menmi?!
- Nima, hammasi bizning boshimizga qoʻnadimi? yigʻlamsiradi Muhsin guppi.
 - Qo'nsa mendan so'rab qo'nadimi? O'zi biladi-da!



- Sal insof qiling-da, axir! Muhsin guppi shilq etib burnini tortib qoʻydi.
 - To'g'rida, insof ham kerak! ma'qullashdi mirshablar.
- Ho'y! dedi Nasriddin uchoviga qarata. Men insof nimaligini tushunmayman! U ariqning boshiga o'tirib olib, yosh-u qari ko'z tikib o'tirgan ekinni quritish emasmi? Dehqonni xonavayron aylash, yerini tortib olish, bevatan qilish emasmi? Yoki sardobaning oldida qaroqchilik qilib, o'tgan-ketganni shilishmi, a?

Mirshablar indashmadi, koʻzlarini loʻq qilib yerga tikishdi. Muhsin guppi qoʻl silkib oʻrnidan turib ketdi. Nasriddin irgʻib borib uning boʻyniga yana bir tushirdi.

- Mana bu beshinchi pashsha! dedi birinchi marta jahli chiqib. Nasriddinning avvalgi shapaloqlari sharmanda qilish niyatida boʻlsa, keyingisi gʻazab bilan urilgandi. Chunki Muhsin guppi – qozi, mirshablardan farq qilib, otdan tushsa-da, egardan tushmagan, batamom magʻlub boʻlganligini tushinishni istamasdi.
- Voy! Bu qanday bedodlik, hech narsa qilolmasam, a? dedi Muhsin guppi qoziga qarab yolvorgancha.

Qozi alaloqibatda oʻzi ham sharmandai sharmisor boʻlishi mumkinligini oʻylab, uning gapiniyam eshitmadi. Koʻzi Abdukarimga tushdi.

- Siz nima qilib turibsiz? - so'radi undan.

Bu soʻroqni shunday dagʻdagʻa bilan aytdi-ki, Abdukarim dovdirab chiqib ketgudek holga tushdi. Yaxshiyamki Nasriddin Afandi joniga oro kirdi.

- Bu kishi men tarafdan guvoh! dedi u qoziga qasdma-qasd dagʻdagʻa qilib.
- Ha, ha, men guvohman, dedi dadillanib Abdukarim. Asalni qanday oʻgʻirlashganini, qayerga yashirganini koʻrganman. Mening xumlarimga solib qoʻyishibdi. Mirshablaringiz zoʻravonlik qilib tortib olishdi xumlarimni.
- Qani, beringlar, xumlarining badalini, buyurdi qozi mirshablarga oʻqrayib.
- Bering! dedi Sodir mirshab buyruqni o'z navbatida guppiga o'tkazib.



Guppi oʻtirgan yerida voy-voylab, qoʻlini hamyonda yubordi.

- E, o'la qolsangiz bo'lmaydimi? - achitdi Sodir mirshab. - Boshida tashlab o'tish kerak edi! Rostdan ham «guppi» deyishgancha bor ekan! Past! Ahmoq!

Sodir mirshab shart turdi-da, qoʻlini qilich sopiga yuborib, Guppiga yuzlandi. Uning koʻzlari sovuq yiltirardi:

- Bering tezroq!

Guppi shosha-pisha ikkita oq tangani olib unga uzatdi. Sodir mirshab Abdukarimga yaqinlashdi.

- Olmayman, deb aytdim-ku, dedi Abdukarim undan chetlashib.
- Ol buni, xumpar! Ikkita oq tanga! Koʻchada yotmaydi! Sodir mirshab tangalarni Abdukarimga tutqazishga urindi.

Bu tortishuvni qozi toʻxtatdi.

- Bas! - dedi u baqirib, - hozir vakolatnomani hal etaylik! - qozi guppiga yuzlanib, do'qini davom ettirdi. - Buyoqqa kelib o'tiring! Jim turasiz! Nasriddin Afandi bilan men gaplashaman! Bular nima deb shart qo'ysalar, ko'nasiz! Xo'sh, mulla Nasriddin Afandi! - qozi tuyqusdan jilmayib Nasriddinga yuzlandi. - Vakolatnomani Muhsinboyga nimaning evaziga topshirishingiz mumkin?

Nasriddin bir zum oʻylab turdi-da, e'lon qildi: — Yuz tilla evaziga! Guppi «voh» deb oʻrnidan turib ketdi.

- Yuz tilla! koʻzlari chaqchayib, boshini ushlagancha voy-voylab qozixonaning u boshidan bu boshiga borib kela boshladi.
- Men bu tillalarni, davom ettirdi Nasriddin vositachi sifatida qoziga qarata, Muhsinboyning oʻziga qaytib beraman. Faqat u keyingi oʻn yil mobaynida yerlarini tortib olgan jami odamlarini, jami qarzdorlarini chaqiradi. Menga bitta-bitta aytib turadi, men ularning qarzini toʻlayman. Undan keyin oq ariqdagi xoʻjayinchiligidan ham kechdim deb, qishloq ahli yigʻinida e'lon qiladi. Qarabsizki, yuz tillasi ikki-uch kunda oʻziga qaytib boradi! Olam guliston!
 - Ajab savdo! dedi qozi sevinib. Juda mardona savdo! Ofarin!



«Afandining qirq bir pashshasi» qissasi haqida

Koʻpgina xalqlarning ogʻzaki ijodida gʻoyat zukko, tadbirkor, hozirjavob qahramonlar uchraydi. Ular hamisha, hamma joyda xalq manfaatini himoya qilishadi, zulm-zoʻravonlik, yovuzlik, qalloblik, muttahamlik kabi illatlarga qarshi ayovsiz kurash olib borishadi.

Nasriddin Afandi turkiy xalqlar folkloridagi ana shunday qahramonlardan biridir. U haqda koʻplab hikoyatlar, latifalar toʻqilgan, asarlar yozilgan, filmlar yaratilgan.

Yozuvchi Zohir A'lamning «Afandining qirq bir pashshasi» qissasidan avval oʻzbek oʻquvchilari Nasriddin Afandini rus yozuvchisi Leonid Sobolevning «Sehrlangan shahzoda» povesti va ikkinchi jahon urushi yillari hamda urushdan keyingi yillarda yaratilgan, «Nasriddin Buxoroda», «Xoʻja Nasriddin», «Nasriddinning oʻn ikkinchi qabri» badiiy filmlari orqali yaxshi tanib olishgan. Biroq, aynan oʻzbek yozuvchisi tomonidan Nasriddin Afandi badiiy siymosi keng miqyosda ilk bor Zohir A'lam asarida oʻz ifodasini topdi.

Qissa Laylak qishlogʻining eng katta boyi — Muhsinboyning och-koʻzligi, qanday qilib boʻlsa ham oʻz yerlarini kengaytirish haqida oʻylashi haqidagi manzaradan boshlanadi. Uning ana shu ochkoʻzligidan foydalangan Nasriddin Afandi uni chuv tushiradi. Boyga yolgʻon tushi haqida hikoya qilib, anchagina yerini sugʻortirib oladi.

Xoʻsh, inson oʻz boyligini orttirsa, yeriga yer qoʻshsa buning nimasi yomon? Gap shundaki, Muhsinboy bu boyligini halol yoʻl bilan topmaydi. Ariqdagi suvni hamqishloqlariga pullab, shuning hisobidan boylik orttiradi. Agar u Abdukarim dehqonga oʻxshash oʻr-qirlardagi ekilmay yotgan yerlarni oʻzlashtirib, u joylarga suv olib chiqsa hech kimning e'tirozi boʻlmas edi. Biroq u mehnat qilib, shu mehnatning rohatini koʻrishga odatlanmagan. Shuning uchun ham birovlarning tayyor yeri, mol-mulkiga koʻz olaytiradi.

Qissada amal-u mansabidan foydalanib, xalqning hisobidan kun kechiradigan tekinxoʻr, poraxoʻrlar ancha teran tasvirlangan. Masalan, Sodir va Nodir degan mirshablar, qozikalon ana shunday toifaga taalluqlidir. Sodir va Nodir togʻni ursa talqon qiladigan yigitlar. Biroq ular halol-pokiza yashash oʻrniga oʻtganning oʻrogʻini, ketganning ketmonini olib oʻrganishgan.



Oʻzlarining bu yaramasliklarini haspoʻshlash uchun, mirshabboshi bizga shuni buyurgan, degan vaj ham keltirishadi. Ular bu ishga shu qadar berilib ketishganki, Muhsinboy har biriga va'da qilgan besh tillani eshitib, oʻzlarini tiya olmay qolishadi. Nasriddin Afandidek zukko, quv odamning ham ikki xum asalini oʻgʻirlashga rozi boʻlishadi.

Ammo ularning bu hiylasi zaminida nima yotganligini Nasriddin Afandi darhol fahmlab yetadi. Asalingizni pashshalar yeb ketibdi, deyishganda, Afandi ular bilan tortishib, janjallashib oʻtirmaydi. Balki ana shu mantiqsiz bahonadan ularning oʻziga qarshi kurashda foydalanadi. Ikki mirshab guvohligida oʻz asalini «yeb ketgan» qirq bir pashshani qirib tashlash haqida qozikalondan vakolat oladi. Ana endi Nasriddinning ishini koʻring! U oʻz asalini yeb ketgan pashshalarni qirish bahonasida qozikalonni ham, Muhsinboyni ham, har ikki mirshabni ham doʻpposlab chiqadi. Afandini el-yurt oldida masxara qilish, obroʻsini tushirish uchun ularning til biriktirib qilgan hiylalari yoʻqqa chiqadi. Qaytanga xalq orasida oʻzlari kulgi boʻlishadi.

Qissada Nasriddin Afandi ancha quv, ayyor qilib tasvirlanadi. Ammo u oʻz ayyorligidan birovlarga zarar yetkazish uchun emas, balki xalqqa zarari tegadigan, nopok, tekintomoq kishilarni fosh etish uchun foydalanadi. U hatto Muhsinboyni shu koʻyga soladiki, natijada boyning oʻzi qozikalonni chaqirtirib kelib, Laylak qishlogʻidagi dehqonlardan nohaq olgan yer va mol-mulklarni ularga qaytarib beradi. Hatto ariq ham jamoaning mulkiga aylantiriladi.

Yozuvchi qahramonlarning sarguzashtlarini tasvirlar ekan, dunyoda abadiy ziddiyatlar boʻlgan yomonlik va yaxshilik, jaholat va ma'rifat, yovuzlik va ezgulikning kurashida har bir inson oʻz oʻrnini topishi, yuksak maqsadlar uchun yashab, halol ter toʻkib, yaxshi nom qozonishi, kerak degan fikrni ilgari suradi. Oʻquvchini aql va adolat bilan ish yuritish, yorugʻlikka, baxtga sazovor etadi degan xulosa chiqarishi uchun ibratli sarguzashtlar orqali imkon yaratadi. Asar yengil, hajviy tasvir vositalaridan keng foydalanilgan holda yozilgan. Undagi voqealar asosida Nasriddin Afandi nomi bilan bogʻliq xalqimiz orasida keng tarqalgan uydirma, rivoyatlar, latifa, askiyalar yotadi. Qissaning yana bir ibratli jihati shundaki, turli sarguzashtlar bayoni bahonasida yozuvchi tarixiy hodisalar, joy

nomlari, xalqimizning aql va farosatini koʻrsatadigan turli obidalar, hunarmandchilik haqida ma'rifiy ma'lumotlar keltiradi. Masalan, badiiy niyat uchun oʻylab topilgan Laylak, Kumushkent kabi joylar qatori tarixiy Jurjon, Choch shaharlari haqida Xorazm shohligi bilan bogʻliq tarixiy-jugʻrofiy dalillar, suv tanqisligini bartaraf etish uchun dono ajdodlarimiz oʻylab topgan suv saqlash inshooti hisoblanmish «Sardoba» kabi ma'muriy qurilmalar, charxpalak va hokazolar xususida qissani oʻqigan oʻquvchi koʻp narsani bilib oladi.

Umuman, «Afandining qirq bir pashshasi» qissasi mahorat bilan yozilgan asardir. Qahramonlarning tili gʻoyat sodda va xalqchil. Ular oʻz xattiharakatlari, fe'l-atvori, gap-soʻzlari bilan oʻquvchi xotirasida muhrlanib qoladi. Yozuvchining yutugʻi ham ana shundadir.

Savol va topshiriqlar

- 1. Asar voqealari qayerda boʻlib oʻtadi?
- 2. Qissada ro'y bergan voqealar aniq bir tarixiy davrda bo'lib o'tganmi yoki uni boshqa davrlarga ham nisbat berish mumkinmi?
- 3. Muhsinboyning Nasriddin Afandiga qarshi kurashga majbur qilgan sabablar nima?
- 4. Nima uchun qozikalon, Muhsinboy, mirshablar va Ahmad Tarashalar oʻzaro til biriktirishdi?
- 5. Asardagi Nasriddin Afandi bilan hammaslak boʻlgan qahramonlarni sanab bering.
- 6. Xuddi shunday mavzuda yozilgan asarlar, yaratilgan kinofilmlar haqida hikoya qilib bering.



ABAY (1845 – 1904)

Qozoq mumtoz adabiyotining asoschilaridan biri, buyuk shoir va ma'rifatparvar. Shoirning asl ismi Ibrohim boʻlib Abay uning taxallusidir. Shoir 1845-yilda Qozogʻistonning Chingiztov tumanida chorvador boy oilasida tugʻildi. Avval 12 yoshida madrasada oʻqidi. Keyinchalik rus maktabiga qatnab rus tili va adabiyotini oʻrgandi. Boʻlajak shoir bir tomondan Sharq allomalari — Firdavsiy, Nizomiy, Navoiy, Fuzuliy ijodidan bahramand boʻldi. Rus tili orqali rus va gʻarb adabiyoti vakillarining ijodi bilan tanishdi.

Shoirning ijodi yoshlik chogʻlaridan she'r yozish va oʻlan aytishdan boshlandi. Abay oʻzigacha ogʻzaki kuylab kelingan oʻlanlarni yozma adabiyotga olib kirgan shoirdir. Shoir oʻlanlarni yozma yaratishdan tashqari ularga kuy bastalab, mahorat bilan kuylagan. U bastalagan 17 ta oʻlan kuyi hozirgacha oqinlar tomonidan sevib ijro etilyapti.

Abay ma'rifatparvar shoir edi. U o'z she'rlarida tarqoq qozoq qabilalarini birlashishga, hamjihatlikka chaqirdi, ilm-ma'rifatli bo'lishga undadi. Shoir bir o'lanida,

> «Oʻzi bilan yovlashgan yurtim tingla! Oʻzi bilan dovlashgan yurtim tingla! Dardingga davo boʻlsin oʻlanlarim, Bir-birini ovlashgan yurtim tingla!»



deya iztirob chekadi. Abayning «Shoʻrlik qozogʻim», «Boy bolasi bilan kambagʻal bolasi», «Ilm oʻrgan», «Oʻlan» kabi she'rlarida ham ilgʻor millatlardan oʻrnak olib qoloqlikdan qochish, chidam va mashaqqat bilan ilm-fanni egallashga da'vat yaqqol sezilib turadi.

Abay she'rlari oʻzbek kitobxonlarining ham sevimli asarlariga aylanib qolgan. Siz quyida tanishadigan «Oʻlan» va «Koʻklam» she'rlari shoir ijodining eng goʻzal namunalaridir. Ularni sevimli shoirimiz Mirtemir oʻzbekchaga tarjima qilgan.

O'LAN

O'lan – so'zning poshshosi, so'z sarasi, Qiyindan qiyiltirar er donasi, Tilga yengil, yurakka iliq tegib, Tep-tekis, silliq kelsin aylanasi.

Saralanmay bulgʻansa soʻz orasi, Bu – oqinning bilimsiz – bechorasi. Ham oqin, ham tinglovchi koʻpi nodon, Soʻz tanimas bul yurtning bir porasi.

So'z boshi avval hadis, oyat bo'lur, Shirasi ham ma'nosi g'oyat bo'lur. Payg'ambar ham so'zini o'lan qilgan; O'lan aytay, shoyadki ko'nglim to'lur.

Oʻlanday xutba oʻqiy keksa mullo, Oʻlan aytib yigʻlagan valiyullo¹, Hamma ham chamasicha oʻlan oʻqir, Oʻlan bilan yozilgan kalimullo².

² Ollohning so'zi, kitobi, Qur'on.



Ollohning valiysi.

O'langa ishqimiz bor qadim choqdin, Lekin qanday naf bo'lur maqtanmoqdin! Ichi zar, sirti kumush so'z yaxshisin – Keltirar kim ham bor mo'l qozoqdin?..

Soʻzni chertib soʻzlasang har kim siylar, Maqol qoʻshib soʻzlarkan keksa biylar. Oqinlari beaql, nodon ekan, Bekor soʻzni teriday nuqul iylar.

Qoʻlida ham qoʻbizi, ham doʻmbira, Hammaga maqtov oʻqir, qoʻymas sira. Oʻlan aytib xayr tilar elni kezib, Soʻz qadrin yerga urar, boʻlib xira.

Mol uchun soʻzni bezar, vijdon sotar, Mol uchun boʻyin egar, molday yotar. Mol uchun ham aldaydi, ham avraydi. E xudo, shu oqinlar qachon qotar?

Boylarni maqtayberib soʻz qolmabdi, Oʻlan aytib, mol yigʻib, boy boʻlmabdi. Oʻlanning qadri ketdi el ichida, Qadrini ketkizganlar yoʻqolmabdi...

Keksa biydek maqolga burmagayman, Yo oqindek xayr tilab yurmagayman. Soʻzim – oʻzga, tinglovchi, sen ham tuzal, Behuda gapdan suhbat qurmagayman.

El chopgan botirlardan so'ylab bersam, Oshiqlar, ma'shuqlardan kuylab bersam, Anchayin hangoma deb tinglardingiz, So'zlarning sarasini so'ylab bersam...



Ammo aql chaqirilmagan mehmon emish, Aqli borga bunday umr zindon emish... Kechiring, nodonlarga tegib oʻtsam, Bu elda toʻgʻri aytgan yomon emish...

Toʻgʻri soʻzlik oʻlanim, oʻzing koʻrkam! Mayli, tatimasa ham soʻyla bardam... Bu yurt soʻz oshigʻimas, mol oshigʻi, Roziman, mingdan biri tushunsa ham...

Oʻzi bilan yovlashgan yurtim, tingla! Oʻzi bilan dovlashgan yurtim, tingla! Dardingga davo boʻlsin oʻlanlarim, Bir-birini ovlashgan yurtim, tingla!

Nahot senda qolmagan nomus va or? Nahot nomus va insof emas darkor? Teran o'y, teran ilm yo'ling ochsin, Yolg'on o'lan va so'zdan olam bezor...

KO'KLAM

Koʻklam kelsa qolmaydi qishning izi, Qulp urar koʻkalamzor yerning yuzi; Jon kiradi borliqqa, tabiatga, Ona yangligʻ jilmayar kunning koʻzi.

Kulishar, oʻlan aytar yigit-yalang, Oʻtovda oʻtirolmas qari-qartang; Jon-jonivor, odamizod yayrab ketar, Qushlarning qoʻshigʻidan havo jarang.

Qirdagi, soydagi el aralashar, Qo'y qo'zilab, oyoqqa o'ralashar.



Qish boʻyi bir-birini koʻrmaganlar Quchoqlashar, oʻynashar, hol soʻrashar.

Tuya boʻzlar, ot kishnar, qoʻra shov-shuv, Kapalaklar gul izlab uchar duv-duv. Yetti rangli gilamday yashil tusda — Suluv qizday buralib oqadi suv.

Ko'l yoqalab uchishar o'rdak ham g'oz, Uya izlab yugurar bola shovvoz; Uchar otni egarlab ko'lga tushsang, Chaqmoqday tez ovolar bo'z dovulboz!.

Qanjigʻadi oʻljasi – ovchi qaytar, Suluv qizlar nozlanib, salom aytar. Qush goʻshtiga mos tushar nordon qimiz, Badaningni balqitar, jimirlatar.

Koʻklamday kiyinishar kelinchaklar, Chekkasida gunafsha, boy chechaklar, Qirda toʻrgʻay sayrasa, soyda bulbul, Gul bilan toʻlib ketar – tul etaklar.

Dehqonlar qoʻsh qoʻshadi, ekar ekin, Hafta oʻtmay koʻkarar ekin-tikin, Savdogarlar mol yuklab, tuya qumlab, Olis-olis yoʻllardan kelar sekin.

Olamga bezak bergan qodir mavlon, Yer – ona, quyosh – ota, nuri jahon, Onaday emizdirar koʻksidan yer, Otaday mehr toʻkar yorugʻ osmon.

¹ Dovulboz – ovqushi, lochin.



Bulut o'tsa arillab oqadi soy, Kechasi chaman yulduz va to'lin oy, Ne qilsin qorong'ida yarqiramay, Quyosh chiqar chog'ida holiga voy.

Quyosh – oshiq yerni koʻp sevar emish, Yer ishqida oʻrtanib, kuyar emish, Oshiq yigit ufqdan koʻringanda, Yulduz va oy sevgini qoʻyar emish.

Oshiq – quyosh tun bo'yi kutar emish, Visol paytin poylab ko'z tutar emish, Sahardan og'ush ochib sevganini, Muhabbat olovida o'rtar emish.

Qish boʻyi yer – quyoshni izlar mushtoq, Kuta berib sochlari boʻlarmish oq; Koʻklam va yoz vasliga qonib toza, Gul ochilib, toʻlisharmish, yetmay quchoq.

Quyoshga toʻgʻri boqqan – koʻr boʻladi, Quyosh kulsa olamga nur toʻladi. Ne bilay, oʻzim koʻrdim, quyosh har kech – Oltin chodiriga kirib dam oladi.

Savol va topshiriqlar

- 1. Abay haqida nimalar bilasiz? Gapirib bering.
- 2. Abayning qozoq adabiyotiga qoʻshgan hissasini nimada deb bilasiz?
- 3. O'lan nima? «O'lan» she'ridan foydalanib bu badiiy asar turini ta'riflang.
- Oʻzi bilan yovlashgan yurtim, tingla!
 Oʻzi bilan dovlashgan yurtim, tingla!




Dardingga davo boʻlsin oʻlanlarim, Bir-birini ovlashgan yurtim, tingla!

Yuqoridagi satrlarni sharhlang. Shoir ushbu bandda nimadan iztirobga tushyapti.

- 5. «O'lan» she'rini yod oling.
- «Koʻklam» she'ridagi tabiat tasviri, odamlar kayfiyatidagi oʻzgarishlarni soʻzlab bering.
- 7. «Yetti rangli gilamday yashil tusda Suluv qizday buralib oqadi suv» satrlarida shoir tabiatdagi qaysi hodisaga ishora qilyapti?
- 8. Kelinchaklar qanday kiyinishyapti, toʻrgʻay, bulbul qayerda sayrayapti? She'r matnidan yuqoridagi savollarga javob toping.
- 9. «Koʻklam» she'rini oʻqiganda oʻzingizda qanday oʻzgarishlar his etdingiz? Izohlab bering.
- «Koʻklam men sevgan fasl» mavzuida uy inshosi yozib, sinfda oʻqib bering.

TUYGʻULARNING KAMALAK RANGI



ZULFIYA (1915–1997)



Muhtaram oʻquvchi! Balki Sizning maktabingizda yoki qoʻshni maktablarda Zulfiya nomidagi Davlat mukofotiga sazovor boʻlgan qizlar oʻqir. Siz, albatta, shunday mukofot borligini, u har yili respublikamizda ta'lim, fan, adabiyot, san'at sohalarida oʻz iste'dodini namoyon etayotgan maktab, kasb-hunar kolleji va akademik litseylar hamda oliy oʻquv yurtlarida oʻqiyotgan qizlarga taqdim etilishini yaxshi bilasiz. Ana shunday nufuzli mukofot nega Zulfiya nomida, uning oʻzi kim, qanday xizmatlari bilan bunday sharafga sazovor boʻlgan deb, hoynahoy, qiziqqan boʻlsangiz ham kerak? Keling, yaxshisi hikoyamizni diqqat bilan oʻqing!

Zulfiya Isroilova xalqimizning atoqli va ardoqli shoirasi, Oʻzbekiston xalq shoiri, xalqaro «Nilufar», Javoharlal Neru nomidagi hamda Davlat mukofotlari sohibasidir. U 1915-yili Toshkent shahrining qadimiy Degrez mahallasida tavallud topgan. Avval boshlangʻich maktabda, soʻng xotinqizlar bilim yurtida tahsil olgan. 1935–1938-yillarda Oʻzbekiston Fanlar akademiyasining Til va adabiyot instituti aspiranturasida oʻqigan. Shundan keyin turli nashriyotlarda ishlagan. 1953-yildan 1980-yilgacha, qariyb

oʻttiz yilga yaqin respublikamizda keng tarqalgan «Saodat» nomli xotin-qizlar jurnalida bosh muharrir boʻlgan.

Zulfiyaning dastlabki she'rlari «Hayot varaqlari» nomi bilan 1932-yilda bosilib chiqqan. Shundan soʻng shoiraning «She'rlar» va «Qizlar qoʻshigʻi» (1938), «Uni Farhod der edilar» (1943), «Hijron kunlarida» (1944), «Dalada bir kun» (1948), «Tong qoʻshigʻi» (1953), «Yuragimga yaqin kishilar» (1958), «Kuylarim sizga» (1965), «Oʻylar», «Shalola» kabi oʻnlab she'riy toʻplamlari chop etildi. U atoqli oʻzbek shoiri Hamid Olimjon bilan oila qurib, ular shirin hayot kechirayotgan pallada 1944-yili mashina avariyasi tufayli turmush oʻrtogʻidan ayriladi. Shundan soʻng umr boʻyi oʻz muhabbatiga sodiq qolib, Hamid Olimjonning ishlarini davom ettiradi. Uning «Semurgʻ», «Zaynab va Omon» dostonlari asosida pyesa va opera librettolarini yaratadi. Oʻzi ham «Quyoshli qalam», «Mushoira», «Xotira siniqlari» kabi poemalar yozadi. Rus, ukrain, ozarboyjon, hind shoiralarining she'rlarini oʻzbek tiliga tarjima qiladi.

Zulfiya keng tanilgan jamoat arbobi edi. U Osiyo, Afrika va Yevropaning oʻnlab davlatlarida boʻlib, xalqaro xotin-qizlar hamda adabiyot namoyandalarining harakatlarida faol ishtirok etar edi. Uning she'rlari ingliz, nemis, rus, bolgar, xitoy, hind, yapon, arab, fors, vyetnam kabi juda koʻp xorijiy tillarga tarjima qilingan edi. Shoira 1997-yil 82 yoshida vafot etgan.

TUN

Togʻ ortiga oʻtib ketdi kun, Sekin choʻkdi toza, salqin tun... Men deraza ochganim chorbogʻ Sokin uxlar tun koʻrpasida. Mayin qoʻshiq yoyilar har yon Esib oʻtgan yel sharpasida. Suv oqadi allalab tunni, Hamma uxlar, uyda men uygʻoq, Parcha qogʻoz, kichik bir qalam, Boshim uzra porlaydi chiroq. Tunda qancha xayol, qancha kuy,



Men berilib gulog solaman. So'z topolmay ifodasiga. Rang axtarib shoshib qolaman. Sof vel esar... Parvona uchar. Chiroq atrofida o'rgilib. O'zin urib part bo'ladi-yu, Stolimga tushadi kelib. Men vozaman, vulduzlar o'tar. Har birisi so'vlar bir ertak. Mana, Hulkar garshimda chagnar. Yorqin tongdan keltirib darak. Tun o'tadi, yana chorbog'dan Ko'tarilar sahargi tuman. Men-chi, asta chiroq so'ndirib. Otayotgan tongni kutaman. Ko'zlarimda erib ketdi tun. Yovilmoqda yorqin juvon kun...

1944

BAHOR KELDI SENI SO'ROQLAB

Salqin saharlarda, bodom gulida, Binafsha labida, yerlarda bahor. Qushlarning parvozi, yellarning nozi, Baxmal vodiylarda, qirlarda bahor... Qancha sevar eding, bagʻrim, bahorni, Oʻrik gullarining eding maftuni. Har uygʻongan kurtak hayot bergan kabi Koʻzlaringga surtib oʻparding uni. Mana, qimmatligim, yana bahor kelib, Seni izlab yurdi, kezdi sarsari. Qishning yoqasidan tutib soʻradi seni, Ul ham yosh toʻkdi-yu, chekildi nari.



Seni izlar ekan, boʻlib shabboda, Sen yurgan bogʻlarni qidirib chiqdi. Yozib ko'rsatav deb husn-ko'rkini. Yashil qirgʻoqlarni qidirib chiqdi. Topmay, sabri tugab bo'ron bo'ldi-yu, Jarliklarga olib ketdi boshini. Farhod tog'laridan daraging izlab, Sovlarga gulatdi togʻning toshini. Oirlarga ilk chiqqan qoʻvchiyonlardan Oayda shoir, deva ayladi so'roq. Barida sukunat, ma'yuslik ko'rib, Horib-charchab keldi, toqatlari toq... So'ngra jilo bo'lib kirdi yotog'imga, Hulkar va Omonning oʻpdi yuzidan. Singib yosh kuydirgan za'far yonog'imga Sekin xabar berdi menga o'zidan. Lekin votogʻimda seni topolmay. Bir nuqtada qoldi uzoq tikilib. Yana yel bo'ldi-yu, kezib sarsari, Mendan so'rav ketdi qalbimni tilib: «Oani men kelganda kulib qarshilab, Oo'shig'i mavilanib bir daryo oggan? «Baxtim bormi deya, yakkash soʻroqlab» Meni she'rga o'rab suqlanib boqqan? O'rik gullariga to'ymaydi nega, Yelda hilpiratib jingala sochin? Nega men keltirgan sho'x nashidaga Peshvoz chiqmaydi u yozib qulochin? Qanday ishqqa toʻlib boqardi tongga, Kamol toptirardi keng xayolimni. Uning rangdor, jozib qo'shig'ida Mudom koʻrar edim oʻz jamolimni. Oani o'sha kuychi, xayolchan yigit? Nechun koʻzingda yosh, turib qolding lol?

Nechun gora libos, sochlaringda og, Nechun bu ko'klamda sen parishonhol?» Oanday jayob aytay, loldir tillarim, Baridan tutdim-u, keldim qoshingga. U ham g'aming bilan kezdi aftoda. Bogib turolmavin gabring toshiga. Alamda tutoqib daraxtga koʻchdi, Kurtakni uvgʻotib soʻvladi gʻamnok. Sening voding bilan velib begaror. Gullar g'unchasini etdi chok-chok. Gul-u rayhonlarning taraldi atri. Samoni qopladi mayin bir qo'shiq. Bu qo'shiq naqadar oshno, yaqin, Nagadar havotbaxsh, otashga toʻliq. Bahorga burkangan sen sevgan elda Ovozing vangradi jo'shqin, zabardast, O'lmagan ekansan, jonim, sen hayot, Men ham hali sensiz olmadim nafas. Hijroning galbimda, sozing go'limda, Hayotni kuylayman, chekinar alam, Tunlar tushimdasan, kunduz yodimda, Men hayot ekanman, hayotsan sen ham! 1945

KO'RGANMIDING KO'ZLARIMDA YOSH?

Sog'inganda izlab bir nishon, Qabring tomon olar edim yo'l. Keltirarding menga bir zamon, Endi har chog' men eltaman gul. Keldim. Uzoq qoldim men sokin, Sening aziz boshingda yolg'iz, Osmon tiniq edi va lokin, Parcha bulut yetib kelib tez.



Koʻkda mening boshimda turib Goʻyo yuragimday qalqdi u. Koʻzimdagi yoshimni koʻrib U ham toʻkdi yoshini duv-duv. Biz yigʻladik tepangda shu kun, Keldingmi, deb koʻtarmading bosh. Ayt-chi, sen-la baxtiyor onlar Koʻrganmiding koʻzimda bir yosh?

1945

O'GLIM, SIRA BO'LMAYDI URUSH

Toʻlisharmi oʻlkada bahor, Quyosh kezar osmon koʻksida. Qaldirgʻochlar qanotmi qoqar, Undan soya labi ustida.

Mana, oʻgʻlim labi ustida Qaldirgʻochning mayin qanoti. Oʻspirinim toza koʻksida, Kunda oshar yangi his toti.

Bo'yi oshib ketdi bo'yimdan, Bosa olar ko'ksiga boshim. Sevgim qurib bergan uyimda, O'sdi mening katta yo'ldoshim.

Yurak toʻla shodlik, mehr, baxt, Uning koʻzlariga boqaman. Nigohiday tiniq va yorqin Orzu toʻlqinida oqaman.

Orzulari qalbimga ziynat, Hayotidir koʻzim qorasi. Oʻkinaman, ba'zida faqat, Yonida yoʻq, uning otasi.



Urush! Noming oʻchsin jahonda, Hamon bitmas sen solgan alam. Sen tufayli koʻp xonadonda Ota nomli buyuk shodlik kam.

Ota bo'lib soldim men yo'lga, Ona bo'lib mehrimga oldim. Mana, yurtga o'g'il o'stirgan Bir davlatmand boy bo'lib qoldim.

Men onaman, mening yuragim Farzandlarim quvonchiga kon. Dil orziqar, ba'zan tilagim Vahimalar o'ragan zamon.

Yoʻq, urushning nomi ham oʻchsin, Mening oʻgʻlim kerak hayotga. Istamayman uning dudlari Qoʻnsa labi uzra qanotga.

Bas, bas, ezgu onalar qalbi, Yashay olsin bexavf, baxt bilan. Mehnatimiz, gʻazab, sevgimiz Tinchlik deydi butun xalq bilan.

Ko'krak suti va mehnat bilan Biz jahonga berganmiz turmush, Ona qalbi oyoqqa tursa, O'g'lim, sira bo'lmaydi urush!

1954

Zulfiya she'rlari haqida

Zulfiya she'rlari harorat bilan yo'g'rilgan ehtirosli, hayotbaxsh she'rlardir. Ular xoh Vatan haqida, uning go'zal tabiati, mehnatkash odamlari, buyuk bunyodkorlik qudrati xususida bo'lsin yoki insonlarning turfa his



tuygʻulari: mehr-muhabbat, quvonch-u shodlik, baxt, sadoqatni tarannum etishga bagʻishlangan boʻlsin, barchasida hayotsevarlik, oʻquvchida yorugʻ kayfiyat paydo etish istagi yashiringan.

Yurak toʻla shodlik, mehr, baxt, Uning koʻzlariga boqaman. Nigohimday tiniq va yorqin Orzu toʻlqinida oqaman.

Bu Zulfiyaning «O'g'lim, sira bo'lmaydi urush» she'ridan olingan parcha. She'r nomlanishining o'zidanoq hayotsevarlik, kelajakka ishonch tuvg'usi anglashib turibdi. Shoira o'g'liga boqib turib, uning balog'atga yetib qolganini, bo'yi bo'yidan oshib, mo'ylovlari sabza ura boshlaganini kuzatadi. O'spirin farzandining ne-ne orzular quchog'ida yashayotgani, pokiza, yorqin istiqbolini uning koʻz nigohlaridan sezib, cheksiz surur tuyayotganini aytib, faqat bir armoni borligini ta'kidlab ketadi. Ya'ni Zulfiya umr yoʻldoshi - Hamid Olimjonning farzandi kamolini koʻrolmay ketganidan oʻkinadi. Agar oʻgʻli ota diydoriga toʻyganida, baxti tugal boʻlarmidi, deya armon qiladi. Va ana shu xususiy holatdan shoira katta bir hayotiy falsafaga boradi. Urush, ma'nisiz qirg'in-barotlar tufayli qancha jangchilar - otalarning halok bo'lishi oilalar boshiga kulfat soladi, farzandlarni ota beradigan shodlikdan mahrum etib, yetim qiladi. Shu sabab urushning hatto nomi ham oʻchsin. Uning ma'naviy yaralari tuzalmas yaralardir, deydi shoira va otasiz qolgan goʻdaklar boshini Vatani - Oʻzbekiston silagani, yuragiga dalda bo'lib, uni yolg'izlatmagani uchun shukur qiladi. O'quvchi qalbida urushga nafrat uygʻotsa, Vatanga muhabbat tuygʻularini tarbiyalaydi. Vaqti kelib oʻgʻlining shu Vatan posboni boʻlishi, nafaqat Vatanga, onaga ham suyangulik qoya bo'lishini tilaydi. Shoira xalqimiz orasida o'g'il o'stirgan ayollarni boyvachcha ona deb e'zozlashlariga ishora qilib, o'zini voyaga yetib qolgan oʻgʻli tufayli davlatmand boydek his etadi, yuragi orziqib, quvonchlar ogʻushida kezadi. Va yana takror-takror shu quvonchga raxna solishi mumkin bo'lgan urushni qoralaydi. Onalar xavf-u xavotirsiz yashamog'i uchun tinchlik, omonlik bo'lmog'i kerak. Chunki ular o'g'illarini hayot uchun, bunyodkorlik, olamni yashartirmoq uchun dunyoga keltirganlar.

Shunday falsafa bilan shoira onalar qalbi uygʻoq boʻlsa, ular birlashsalar, «Oʻgʻlim, sira boʻlmaydi urush!» deya hayqiradi. Bu she'r ehtiros bilan, ilhom bilan yozilgani uchun gʻoyat ta'sirchan va oʻquvchi yodida uzoq saqlanib qoladi.

Zulfiya ijodida ta'sirchan, xotirangizda uzoq saqlanib qoladigan she'rlar talaygina. Ayniqsa, shoiraning umr yo'ldoshi Hamid Olimjon xotirasiga bag'ishlab yozilgan bir qator she'rlari shunday xususiyatga ega. Masalan, «Bahor keldi seni so'roqlab...», «Ko'rganmiding ko'zlarimda yosh?» she'rlarini olib ko'raylik. Ular garchi alohida she'rlar bo'lsa ham, mazmunan va mantiqan bir-birini to'ldiruvchi, yaxlit kayfiyat paydo qiladi.

Hamid Olimjon oʻzbek adabiyotida baxt va shodlik kuychisi sifatida shuhrat topgan. U yasharish va quvonchdan darak berguvchi bahor faslini juda suyib kuylagan edi. Uning birinchi she'riy kitobi ham «Koʻklam» deb nomlangan edi. Ayniqsa, «Oʻrik gullaganda» she'ri kitobxonlar oʻrtasida juda mashhur. Bir qator san'atkorlar bu she'rni kuyga solib, qoʻshiq qilib, hozirgacha ijro etib kelishadi. Zulfiya umr yoʻldoshining mana shu jihatini she'rga solib, san'atdagi shartlilik xususiyatiga murojaat etib, «Bahor keldi seni soʻroqlab...» deya nom qoʻyadi she'riga. She'r bahor fasli tasviridan boshlanadi:

Salqin saharlarda, bodom gulida, Binafsha labida, yerlarda bahor. Qushlarning parvozi, yellarning nozi, Baxmal vodiylarda, qirlarda bahor...

Iliq, mayin yellar esib, bahorning ilk darakchisi binafshalar ochilib, yerlar asta yashil rangga boʻyalayotgan manzarani tasvirlab shoira, Hamid Olimjonning koʻklam maftuni ekan, kurtaklarning uygʻonishi, oʻrik gullariga oshuftaligini eslab, uning ruhiga murojaat etadi. Bahor shabbodasi mayin esib kelib, shoirni bogʻlardan, togʻlardan, qir-u qoʻychivonlar oʻtovlaridan izlab keladi. Topolmay gʻazabnok shabboda boʻronlarga aylanib, toshlarni qulatib, oxiri shoiraning yotogʻiga kirib keladi. Uxlab yotgan jajji farzandlari yuzlariga teginib, uxlamay xayol surib oʻtirgan shoirani goʻyoki qiynoq savollarga tutadi. Oʻsha oʻziga, u tabiatga keltiradigan goʻzalliklarga oshiq

boʻlgan shoirni izlaydi. Bahor shabbodalarining qaygʻuli soʻroqlariga javob berolmay, shoira Hamid Olimjon qabri tepasiga keladi. Goʻyo bahor ham u bilan birga motam chekib, beqaror yeladi. Osmonda parcha bulut paydo boʻlib («Koʻrganmiding koʻzlarimda yosh?» she'ri mantiqan bogʻlanib ketadi) yomgʻir yogʻarkan, goʻyo osmon ham birga koʻzyosh toʻkadi. Soʻngra beqaror shamoldan atrofdagi gul-u rayhonlar hidi yoyilib, kayfiyat ma'yusligi tarqala boshlaydi. Shoirning shodlik qoʻshiqlari yangragandek tuyulib, gʻam-anduh oʻrniga yorugʻlik, goʻzallik, joʻshqin yashash zavqi paydo boʻladi. Ana shu holatda shoira oʻz suyukli yorining garchand jismonan yoʻq boʻlsa ham, ruhi, nomi barhayotligini his etadi. Uni xalqi hech qachon unutmasligi, boshlagan ezgu ishlari davom etayotganini ta'kidlaydi. Darhaqiqat, inson oʻzidan yaxshi ishlar, savobli amallar, oqil farzandlar qoldirib dunyodan oʻtsa, u insonlar xotirasida yashashda davom etadi. Zulfiya bahor fasli kirib, xayolida jonlantirgan xotiralardan va qalbida paydo boʻlgan tuygʻulardan shunday ibratli, falsafiy xulosa chiqaradi.

Umuman, Zulfiya shunday katta yoʻqotishni boshidan kechirgan boʻlsa-da, u tushkun kayfiyatlarga berilib, abadiy motam tutib yashamadi. She'rlarida xuddi Hamid Olimjon kabi hayotsevarlikni, yorugʻ kunlar nashidasini kuyladi. Uning hijronli tunlari doim tongga ulanadi. Bu holat shoiraning «Tun» she'rida juda goʻzal ifodasini topgan. U tuni bilan tabiatning sukunati, sokinligiga berilib, qogʻoz-u qalam bilan yolgʻiz suhbatlashib oʻtirar ekan, yulduzlarga tikilib, goʻyo ularning ertagini tinglaydi, oʻzini chiroqqa urib halok etayotgan parvonani kuzatadi. U tun manzaralarini chizar ekan, maqsadi oydin tongni qarshilash, qorongʻilikni mahv etib, yorqin kunni olqishlash edi. U kunni juvon deydi, ya'ni yoshlikka, mehnatkashlikka, yaratuvchanlikka oʻxshatadi. Shu tariqa bu she'rida ham hayotga, yorugʻlikka muhabbatni ulugʻlaydi.

Savol va topshiriqlar

- 1. Shoira Zulfiya qayerda tugʻilgan, qaysi oʻquv yurtini tugatib, qanday faoliyat bilan shugʻullangan?
- 2. Shoiraning ilk she'riy to'plami haqida so'zlab bering.
- 3. Zulfiya qanday she'riy toʻplamlar va dostonlar muallifi?



- 4. Zulfiya Isroilovaning jamoat arbobi sifatidagi faoliyati haqida gapirib bering.
- 5. Shoira asarlari qaysi xorijiy tillarga tarjima qilingan?
- 6. Onalar nima uchun urushni qoralaydilar?
- 7. Ona farzandini oʻylab, qanday orzularga beriladi.
- 8. Zulfiya va Hamid Olimjon mavzuida soʻzlab bering.
- 9. Nega shoira bahor fasliga murojaat etadi?
- Zulfiya she'rlarida hayotsevarlik gʻoyalari qanday holatlar bilan yonmayon keladi.
- 11. Tun va tong obrazlarining ramziy ma'nolari haqida so'zlang.
- 12. Zulfiya mukofotiga kimlar sazovor boʻladi?

Nazariy ma'lumot

RITORIK SO'ROQ

Ritorik soʻroq – badiiy asarlarda muallifning oʻz fikrini soʻroq shaklida tasdiqlab ifodalashidan iboratdir. Bunda soʻroq javob talab etmaydi. Soʻroqning oʻzida javob ham anglashiladi. Badiiy asarlarda ritorik soʻroq fikrning kuchli, ta'sirchan ifoda etilishini ta'minlaydi. Bunday usul, ayniqsa lirik she'rlarda koʻp uchraydi. Masalan, Zulfiyaning «Bahor keldi seni soʻroqlab...» she'ridagi:

Qani men kelganda kulib qarshilab, Qoʻshigʻi mavjlanib bir daryo oqqan? «Baxtim bormi deya, yakkash soʻroqlab», Meni she'rga oʻrab, suqlanib boqqan? –

satrlarida soʻralayotgan shaxsning sifatlarini ta'riflash asosiy maqsad hisoblanadi. Uning yoʻqligi fikrning obrazli, emotsional ifoda etilishidan anglashilib turadi.

Savol va topshiriqlar

- 1. Ritorik so roq nimani anglatadi?
- 2. Ritorik soʻroqni qoʻllashdan maqsad nima?
- 3. Zulfiya she'rlarida uchragan ritorik soʻroqni aniqlang?
- 4. Yana qaysi shoirlar ijodida shunday badiiy usulga murojaat etilganini bilasiz? Misollar keltiring.





AN AND AND AND AND COME.

Tog'ay MUROD (1948 – 2003)

XX asrning 70-yillarida o'zbek adabiyotiga bir qator iste'dodli shoir va yozuvchilar kirib keldilar. Ular orasida Murod Muhammad Do'st, Erkin A'zamov, Xayriddin Sultonov, Tog'ay Murod singari nosirlar, Shavkat Rahmon, Xurshid Davron, Usmon Azim, Muhammad Rahmon singari shoirlar bor edi. Bu avlod o'zlaridan avvalgi ijodkorlar boshlab bergan eng yaxshi an'analarni davom ettirgan holda, adabiyot sahnasiga ko'proq oddiy odamlar obrazini, ularning orzu-armonlari talqinini olib chiqdilar. M.M.Do'stning «Bir toychoqning xuni», «Galatepaga qaytish», E. A'zamovning «Otoyining tugʻilgan yili», «Javob», X.Sultonovning «Yozning yolg'iz yodgori», «Ko'ngil ozodadur» nomli asarlari qahramonlari bir qaraganda boshqalardan keskin farq qilmaydigan, har qadamda uchraydigan oddiy odamlar. Ular katta tarixiy oʻzgarishlarga boshchilik qilishmaydi, favqulodda qahramonliklar koʻrsatib boshqalarga oʻrnak boʻlishmaydi, hatto suvga cho'kayotgan biror odamni qutqarib el og'ziga tushishmaydi ham. Lekin shunisi muhimki, yosh o'zbek adiblari dunyoning omonligi, jamiki goʻzalligi aynan shu oddiy odamlar tufayli ekanini ko'rsata oldilar, isbotlay bildilar. Mana shunday novator (yangilik kashf etuvchi, yangi yo'l ochuvchi) yozuvchilardan biri Tog'ay Murod bo'ldi.

Bu yozuvchining tarjimayi holi ham oʻz qahramonlariniki singari oddiyginadir.

U janubiy viloyatlarimizdan boʻlmish Surxondaryoning Denov tuma-

niga qarashli Xoʻjasoat qishlogʻida 1948-yilda tugʻildi. Qishloqdagi oʻrta maktabda o'n yil o'qigach, 1966–1972-yillarda hozirgi O'zbekiston Milliy universitetining jurnalistika fakultetida ta'lim oldi. Bu fakultet o'sha yillari koʻplab yosh iste'dodlarga oʻz ijodiy yoʻlini topishi, jiddiy asarlar yozib dastlabki muvaffaqiyatlarni qoʻlga kiritishida muhim maktab rolini o'ynagan edi. Fakultetdagi qaynoq, nisbatan erkin ijodiy muhit, o'z davrining yirik shoir-yozuvchilari bilan tez-tez o'tkazilib turadigan uchrashuv-muloqotlar, yotoqxonalarda to tongga qadar tugamaydigan she'riyat kechalari - bularning bari iste'dod g'unchalarining tez yetilishi, kamol topishida jiddiy turtki rolini o'ynardi. Ko'p mualliflarning respublika matbuotida muntazam qatnashishi ham ayni shu fakultetda o'qib yurgan yillariga to'g'ri kelardi. Tog'ay Murod ham talabalik paytidayoq o'nlab hikoyalar yozgan bo'lsa-da, ularni e'lon qilishga shoshilmas, o'zidan, bilimlaridan koʻngli toʻlmasdi. U iloji boricha koʻproq oʻqish, bu orqali esa faqat oʻzimizning ijodkorlarnigina emas, balki dunyoning eng zoʻr adiblari tajribalarini ham oʻzlashtirishni istardi.

U, shu niyatdan kelib chiqib, tirikchilikka yetarli maosh beradigan qanday ish taklif qilinsa, oʻsha yerga borib ishlardi. Masalan, 1972–1976-yillarda respublika radiosining «Vatandoshlar» (xorijiy ellarga moʻljallangan) tahririyatida xizmat qilgan boʻlsa, undan keyin «Oʻzbekiston fizkulturachisi» gazetasida, 1982-yildan 1985-yilgacha esa «Fan va turmush» jurnalida xizmat qildi. Togʻay Murod oʻzining ijodiy rejalariga birovlarning aralashishini, unga ta'sir oʻtkazishga boʻlgan urinishlarni hecham yoqtirmas, shovqin-suronli davralardan oʻzini olib qochar edi. Butun fikri zikri oʻqib-oʻrganish, tinimsiz ijodiy mehnat qilish bilan band boʻlardi. Shu tufayli ham, yozuvchi sifatida xalqqa ancha tanilib qolgan boʻlishiga qaramay, 1985–1987-yillar ichida Moskvadagi Jahon adabiyoti institutida ham tahsil olib qaytdi.

Togʻay Murodni iste'dodli yozuvchi sifatida koʻrsatgan dastlabki yirik asar 1976-yilda dunyoga keldi. Bu «Yulduzlar mangu yonadi» nomli qissa edi. Mazkur asarda yozuvchining qon-qoniga singib ketgan, ming yillar mobaynida unutilmay, elda ardoqlanib kelayotgan tarixiy qadriyat – kurash, kurashchi polvonlar, ular orasidagi muomala-munosabatlar, ziddiyatli hayotiy muammolar qalamga olindi.



Yozuvchining keyingi asari – «Ot kishnagan oqshom» qissasi (1979yil) «Yoshlik» jurnalida chop qilinishi bilan nafaqat adabiyot muxlislari, balki butun xalqimiz orasida juda tez dovrugʻ qozondi. Chunki bu asarda o'sha davr adabiyotida kamdan-kam tilga olinadigan ijtimoiy-iqtisodiy muammolar, butun dunyoga ibrat qilib ko'rsatiladigan «sovet kishisi» tabiatiga xos bo'lgan turfa illatlar badiiy jihatdan ta'sirchan va ishonarli tarzda ochib berilgandi. Asardagi qishloq mehnatkashlarining ogʻir mehnati, katta-kichik rahbarlarning ularga bepisand munosabati, odamlardagi pokiza his-tuyg'ularning toptalishi, kuppa-kunduz kunda bo'layotgan adolatsizliklar tasvir va talqini haqiqatga tashna o'quvchilarning qizg'in e'tirofiga sababchi bo'ldi. Mazkur qissa sho'ro davri adabiyotidagi ko'plab boshqa asarlardan oxiri «umidbaxsh sadolar bilan» tugamasligi jihatidan ham ajralib turardi. Uning soʻngida umrbod ixlos qoʻyib yurgani odam bolalaridan cheksiz adolatsizlik, nomardlik, vahshiylik ko'rgan qissa qahramoni Ziyodulla chavandoz o'zining sevimli, vafodor va bir umrga sadogatli otidan najot tilaydi! Aqlli va til-zabonli, kiyim-boshi po'rim va o'zicha madaniyatli kimsalar uni urib o'ldirishga chog'langan bo'lsalar, oʻsha – til-zaboni yoʻq, ongsiz hayvon sanalmish ot oʻz doʻstini oʻlimdan asrab qoladi. Bir so'z bilan aytganda, odamni o'zi singari odam zulmidan himoya qilish uchun odam topilmaydi, najot faqat hayvonda qoladi!...

Qissaning bunday oshkora ruhi, adolatparvarlik pafosi oʻz davrining koʻplab amaldorlari, mafkurachilari gʻashini keltirgani, natijada yozuvchi nomi atrofida turli gʻiybat gaplar tarqatilgani ham haqiqat edi. Biroq yozuvchi bu malomatlardan choʻchib oʻtirmadi, aksincha, oradan bir yil oʻtar-oʻtmas yana bir ajoyib asarini – «Oydinda yurgan odamlar» qissasini e'lon qildi.

Bu qissaning qahramonlari — Qoplonbek va Oymomo ham atrofdagilarga faqat yaxshilikni sogʻinadigan, umrini ezgulikka baxshida etgan olijanob qalb egalaridir. Qissada buyuk muhabbat rishtasi bilan bir-biriga mangu bogʻlangan bu goʻzal insonlarning butun hayot yoʻli oydinda aytilgan qoʻshiqday tarannum etiladi. Qoplonbekka cheksiz kuch-quvvat, mardlik va shijoat, Oymomoga behad xushroʻylikni ato etgan ona tabiat, afsuski, ularni farzand ne'matidan bebahra qilgandi. Ular umrbod mana shu umid ilinjida yashashadi, ne-ne gap-soʻzlarga, gʻiybat-pichinglarga chidashadi. Oʻzlarini koʻrsatmagan tabib-u doʻxtirlari, najot izlab bormagan qadamjolari qolmaydi. Farzand sogʻinchi shu qadar kuchli ediki, yoshi oʻtib, keksayib qolgan Oymomo qoʻshni kelinning beshikdagi bolasini ovutib oʻtirganda, qup-quruq koʻksiga birdan sut keladi. U soʻnggi nafasidagina onalik baxtidan bir lahza totinadi-yu, dunyodan koʻz yumadi...

Har qancha ogʻir boʻlmasin, oraga tushgan qarindosh-urugʻlar ularni ajralishib, boshqa oila qurishga zoʻrlashmasin, Qoplonbek va Oymomo bir-birlaridan voz kechishmaydi. Qissa soʻngida, hatto bu dunyodan ketganlaridan keyin ham ular oppoq oydin tunlari oydek sokin va unsiz suhbat quradilar. Bu ikki qalbning muhabbat qissasi eng pokiza insoniy hislar kuylangan abadiyat qoʻshigʻi boʻlib qoladi.

1985-yilda yaratilgan «Qoʻshiq» qissasi, garchi undan ham ayrim esda qolarli voqea-hodisalar, yangi xarakterlar oʻrin olgan boʻlsa-da, avvalgi qissalardek muvaffaqiyatli chiqmadi. Buning ham oʻziga yarasha sabablari bor ediki, ularni yuqori sinflardagi saboqlar davomida bilib borasiz.

Qissa janrida mana shunday tajribalar orttirgan Togʻay Murod 1993-yilda «Otamdan qolgan dalalar» nomli yirik romanni yozib tugatadi. Bu roman oʻzbek xalqining Chor Rossiyasi va shoʻro bosqini ostida oʻtgan hayotini – yuz yildan ortiqroq tarixni oʻzida mujassam etgan. Asarda bir oilaning uch avlodi hayoti misolida butun millatning taqdiri oʻta ta'sirchan boʻyoqlarda ifoda etiladi. Oqposhshoning asl niyatini anglamay, bosqinchilarning uyatli qiliqlaridan orlanib, tugʻilib oʻsgan yerini tashlab ketgan Jamoliddin ketmon – XIX asrning oxiri – XX asrning boshlaridagi xalq vakili edi. Nima qilib boʻlsa-da, yurt tuprogʻini bosqinchilardan tozalash niyatida qoʻliga qilich tutgan Aqrab (Chayon) XX asrning 20-yillarida milliy istiqlol yoʻlida shahid boʻlgan bobolarimiz timsoli sifatida koʻrinadi. Shunday shavkatli otalardan toʻragan Dehqonqul esa oʻsha paytdagi hukmron Moskvaning «paxta mustaqilligini ta'minlash» siyosati qurboni – millionlab huquqsiz kolxozchilarning umumlashma obrazidir.

Siz bu asar bilan ham yuqori sinflarda batafsil tanishishingizni inobatga olib, hozir hikoyamizni qisqa qilamiz. Faqat shuni eslatib oʻtamizki, «Otamdan qolgan dalalar» romani uchun Togʻay Murod Qodiriy nomidagi



Davlat mukofoti bilan taqdirlangan. Aynan shu roman e'lon qilingach, adibga O'zbekiston xalq yozuvchisi unvoni berilgan. Bu asar asosida taniqli kinorejissor Shuhrat Abbosov ikki qismli badiiy filmni suratga olgan.

Yuqorida Togʻay Murodning xorijiy adiblar kitoblarini chanqoqlik bilan mutolaa qilganini aytgandik. U oʻzi bahramand boʻlgan noyob asarlarga boshqalarni ham oshno etish umidida bir qancha tarjimalar ustida jiddiy ish olib bordi. Jumladan, E. Seton-Tompsonning «Yovvoyi yoʻrgʻa» asarini zoʻr muvaffaqiyat bilan ona tilimizga oʻgirdi.

Afsuski, iste'dodli yozuvchi Tog'ay Murod ayni ijodiy kuchga to'lgan paytda – 55 yoshida hayotdan ko'z yumdi. Uning ijod stoli ustida tugallanmagan qator yirik asarlarning, tarjimalarning qo'lyozmalari qoldi. Shunday bo'lsa-da, yozuvchi yaratib, xalqiga yetkazishga ulgurgan ajoyib asarlari bois uning nomi va ishi kelgusi avlodlar qalbida ham aks sado berishi shubhasizdir.

YULDUZLAR MANGU YONADI

(qissadan boblar)

XVIII

Boʻri polvon davradan xursand: janjal-araz yoʻq. Polvonlar sen-menga bormay olishyapti... Oʻzini taroziga solmay olishyapti.

Ana, xoʻjasoatlik Sadir polvon shoʻrchilik Roʻzi polvonni yelkasidan oshirib urdi.

Ro'zi polvon origa Maksim polvon degani chiqdi.

Sadir polvon:

- E, u sport masteri, chiqmayman, - deya turib ketdi.

Maksim polvon sambo kurashi boʻyicha sport ustasi ekani chin boʻldi. Bakovul roʻparasida talab qilib oʻtirib-oʻtirib ketdi.

Boʻri polvon xoʻjasoatliklarga ogʻiz soldi:

- Chiqinglar-da endi! - dedi.

U yoqdan Amir polvon:

- Polvon bova, Sadirning qo'li lat yebdi! - dedi.

Bu shunchaki bahona bo'ldi.



Shoʻrchiliklar piching qildi:

- Nimaga bir polvonni yiqita solib qochasizlar!.. Sigʻsa davraga chiqingizlar-da! -- dedi.

Ilkis piching Sadir polvon bahona butun davra egalariga qarata aytildi.

Bo'ri polvon yalt etib sho'rchiliklar davrasiga qaradi.

Keyin, Amir polvonga yuzlandi.

- Unday bo'lsa, boshqasini chiqar! - dedi.

Amir polvon:

- E, polvon bova, master sportga teng kep bo'ladimi? - dedi.

Boʻri polvon mehmonlar oldida izza boʻldi. Xivich uchi bilan chiroqda yiltiramish somonlarni titkiladi. Shunda, davraga yoshi oʻtib qolgan Normurod polvon chiqib keldi. U duch kelmish odam roʻparasiga choʻkdi. Qoʻllarini ketiga tiradi. Orqasiga chalqayib, oyogʻini uzatdi.

- Mahsini tort, tort mahsini! - dedi.

Torta bermagach, Normurod polvonning oʻzi mahsilarini tortib-tortib sugʻirdi. Paytavalarni chuvalatib-chuvalatib tashladi.

Joyidan sapchib turdi. O'z polvonlariga qahr bilan qo'lini shop qildi.

- Chiqmaysanmi-a, chiqmaysanmi? Elga eshittirib ayt! Chiqmayman, de! Qoʻlingni koʻtarib ayt! Unda, mana men chiqaman!

Normurod polvon bakovul roʻparasiga borib choʻkkaladi. Shoʻr-chiliklarga qoʻlini silkib aytdi:

- Qani, master sportingni berman yubor! - dedi.

Ammo shoʻrchiliklar Maksim polvonni davraga tushirmadi. Boisi, Normurod polvonning soqoli oppoq edi...

Shoʻrchiliklar toʻpidan ovoz keldi:

- Sizga qoyil boʻldik, Normurod polvon, bizga anavi polvonlaringizni chiqaring!

Normurod polvon davra aylana berdi:

- Bizda polvon yoʻq, boʻlsa chiqardi! - dedi.

Bo'ri polvon domangir bo'ldi:

- Polvon, koʻtarilma, koʻp koʻtarilma! - dedi.

Normurod polvon Boʻri polvon qoʻlidan yulqinib chiqdi. Yana davraga aylandi.



- E, master sport tugul, dev bo'lsayam chiqaman! - dedi.

Boʻri polvon Normurod polvon tirsagidan mahkam ushladi, davradan vetaklab chiqdi.

Normurod polvon tag'in davraga talpindi:

– Normurod polvonning koʻzi ochiq boʻp turib, uning eli yerga qaraydimi? – dedi. – Ushlamang meni, polvon bova, ushlamang! E, yerga kirgizib yuborsayam chiqaman!

Boʻri polvon qalbini-da ayni shunday tuygʻular tirnadi. Ammo keksalarga xos vazminlik bilan oʻzini bosib turdi.

Davraga kirib, xoʻjasoatliklarga ovoz berdi:

- Amir, Tilovberdini berman yubor! Tilovberdi, munda ke! - dedi.

Shunda davraga Boʻri polvonning oʻgʻli Tilovberdi chiqib keldi. Boʻri polvon oʻgʻlini tirsagidan yetaklab, bakovul roʻparasiga oʻtirgʻizdi.

Shoʻrchiliklar koʻnishga koʻndi-yu, Maksim polvon rozi boʻlmadi.

- Tilovberdining vazni og'ir, chiqmayman, - dedi.

Boʻri polvonning zardasi qaynadi.

- Nima, endi davraga toroziga tortib chiqaraylikmi? dedi. Koʻrib turibsan, boʻy-basti sendan ziyod emas, chiqa ber-da! Chiq-e, ota-bovamiz tarozisiz olishgan!
 - E, chiq-e, Maksim-e, yiqilsang yer koʻtaradi-da! dedi shoʻrchiliklar. Polvonlar fotiha olib ketdi.

XIX

Boʻri polvon ich-ichidan zil ketdi. Oʻzi bilan oʻzi gapirishdi.

«Biz polvonlik maktabida oʻqimadik. Polvonlik bizga ota meros. Pushtdan-pushtga, qondan-qonga oʻtib kelyapti.

Polvonlikning koʻzga koʻrinmas, til bilan tushuntirib boʻlmas shunday sirlari borki, uni faqat tomirida polvonlik qoni borlargina biladi. Biz bilamiz.

Bu sirlar hech bir kitobda yoʻq.

Mana, mening oʻzim. Surxon vohasida mendan yiqilmagan polvonning oʻzi yoʻq! Oʻsha maktab koʻrgan sport masterlariyam yagʻrinimdan oshib ketdi!



Xalq nimasi bilan xalq?

Oʻzining urf-odatlari bilan xalq! Koʻp urf-odatlarimizni birovlar... birovlar oʻziniki qilib oldi! Biz qoʻlimizni burnimizga tiqib qoldik.

Shunday keta bersak, hademay... oʻzimizni-da boy berib qoʻyamiz!

Bu yogʻi karnday, ne-ne nimalarimizni eskilik sarqiti deb yoʻq qildik. Xiyol boʻlmasa xalqning oʻzini-da... eskilik sarqitiga chiqarib yuborayin, dedik!

Bugun buni yoʻqota bersak, ertaga uni yoʻqota bersak... podadan nima farqimiz qoladi?..

Biz hademay bu dunyodan ketamiz. Oʻzimiz ketsak-ku, goʻrga-ya. Oʻzimiz bilan... Buni rais biladimi?..»

Boʻri polvon raisga qarab-qarab qoʻydi.

Tag'in nimalardir... nimalardir yo'qolib boryapti...

Boʻri polvon oʻyladi-oʻyladi... Oʻylab oʻyiga yetdi...

«Avlodlar almashgan sayin... yo, pirim-e, tuf-tuf-tuf... avlodlar almashgan sayin... yurak yoʻqolib boryapti!

Jasad bor! Aql bor!

Yurak yoʻq!

To'rt mucha bor! Kuch-quvvat bor!

Yurak yo'q!

Ko'krakda jon bor!

Yurak yoʻq, yurak!...

Farzandlar hayotga beparvo qaraydi. Musibat bilan xursandchilik farqiga bormaydi.

Farzandlar oʻzlari minayotgan mashinaga oʻxshaydi! Odam kim, mashina kim, bilib boʻlmay qolyapti»...

XX

4

...Sariosiyodagi oʻsha davrada Boʻri polvonga teng topilishi qiyin boʻldi.

Davra egalari talvasada qoldi.

Bordi-yu, Bo'ri polvonga talabgor bo'lmasa, sariosiyoliklar denov-



liklardan qoyil boʻldi, boʻladi. Oʻz uyida qoyil boʻlish, magʻlub boʻlishdan-da yomon boʻladi!

Shunda davraga yoshgina bir yigit chiqib keldi. Boʻri polvonga talabgor boʻldi

Davra egalari shundagina yengil nafas oldi.

Boʻri polvon yosh polvonga mensimay-mensimay qaradi.

«Laylakning yurishini qilaman deb, chumchuqning puti yirtilgan ekan! – deb oʻyladi Boʻri polvon. – Bu yosh bola-ku! Oʻylab ish qilyaptimi? Yo kayfi bormi?»

Bir yosh bola Boʻri polvon shon-shavkatini nazarga ilmay qurga yugurib chiqishi Boʻri polvon izzat-nafsiga tegdi.

Bo'ri polvon darg'azab bo'lib davraga kirdi.

Bosh bakovul oldiga gʻoz yurish qilib bordi. Davra odati boʻyicha talabgor yosh polvon qabatiga borib oʻtirishi lozim boʻldi.

Ammo Boʻri polvon davra qoq oʻrtasiga borib choʻk tushdi. Boʻri polvon bu bilan oʻzini anavi yosh bola yonida yonma-yon oʻtirishga or qilganini bildirdi.

Anavi yosh bolaga, koʻrpachaga qarab oyoq uzatsang-chi, degan qarash qildi.

Boʻri polvon bilan Ismoil otli bu yosh polvonga bir gʻunajin, yana bir qancha mayda zotlar qoʻyildi.

Boʻri polvon Ismoilni koʻzga ilmay-koʻzga ilmay davra aylandi.

«Tayyor osh-ku...» deya oʻzidan ketdi.

Oqibat... Boʻri polvon... Polvon nomini olgandan buyon umrida birinchi marta yelkasi yer koʻrdi!

Qanday yiqildi - oʻzi-da bilmadi!..

Koʻzlarini ochsa... osmon toʻla yulduz boʻldi!..

Ohista-ohista joyidan turdi. Bosh egib-bosh egib davradan chiqdi.

Hamrohlari hamdard boʻlish uchun qoʻltigʻidan ushladi.

Boʻri polvon hamrohlari qoʻlini zarda bilan siltab-siltab tashladi.

Choponiga choʻnqayib oʻtirdi. Tizzalarini quchoqladi. Peshonasini bilaklari ustiga qoʻydi...

Ho'ng-ho'ng yig'lab qo'ya berdi!



Hamrohlariga javdirab-javdirab qaradi.

- Chiniminan yiqildimmi-a, chiniminanmi-a?.. - dedi.

Sel-sebor yigʻlab qoʻya berdi...

5

Boʻri polvonning yelkasi yerga tekkani elga yoyildi.

Boʻri polvon nomi bilan gʻururlanib yurmishlar ichi achiy-achiy bosh chayqadi.

- Yomon boʻpti-da... - dedi.

Davralarda Boʻri polvon dastidan roʻshnolik koʻrolmay yurmishlar xushvaqt-xushvaqt bosh irgʻadi.

- Bo'ri polvon-da tamom bo'pti... - dedi.

Bo'ri polvon el orasida bosh ko'tarolmay qoldi. Uyidan ko'chaga chiqmay qoldi.

Keyin oʻsha yosh polvonni ta'qib eta boshladi. Qayerda toʻy boʻlsa, poylab bordi.

Ammo yosh polvon Bo'ri polvon nomini eshitiboq, rad qila berdi.

Ismoil otli bu yosh polvon dovrugʻi butun vohaga yoyildi.

Kimsan – Boʻri polvon yelkasini yerga tekkizgan Ismoil polvon!

Ismoil polvon bu nomni umrbod saqlab qolmoqchi bo'ldi. Shu bois Bo'ri polvon davraga kelibdi, desa bo'ldi, indamay ketib qola berdi.

10

Bo'ri polvon Ismoilni tinmay ta'qib eta berdi...

U endi mugʻombirlik yoʻliga oʻtdi.

Termizda boʻlmish bir toʻyga juda kech bordi. Mashina kabinasida davraga qarab oʻtirdi.

Davra oxirida bakovullar boshqa katta polvon yoʻq deyishib, kimsan, Boʻri polvonday polvon yelkasini yerga tekkizgan Ismoil polvonga jar soldi.

Ismoil polvon davrani bir aylanib, oʻzini koʻrsatdi.

Xuddi shu vaziyatni ikki oydan beri anggʻib¹ yurmish Boʻri polvon kabinadan sakrab tushib, davraga kirdi.



¹ Angg*ib – kutib, poylab.

Boʻri polvon xuddi osmondan tushganday favqulodda paydo boʻlishi barcha-barchani hayron qoldirdi.

O'zaro shivir-shivir bo'lib, davra gap nimada ekanini bildi.

Ismoil polvon arosatda qoldi.

Chiqayin desa – Boʻri polvon, chiqmayin desa – bakovul jar solib boʻldi.

Ismoil polvon chiqishga majbur boʻldi.

Boʻri polvon vajohati barcha-barchani seskantirib yubordi.

Bo'ri polvon g'alabaga tashna bo'ldi!

Gʻalaba qozonish esa hamisha qiyin! Ayniqsa bugun!

Negaki, Boʻri polvon faqat zafar qozonish uchun olishadi!

Faqat, faqat gʻalaba uchun kurashilsa, gʻalabaga yetish juda mushkul boʻladi! Ba'zan, yetib boʻlmaydi!

Yo'q, polvon zafarni emas, zafar polvonni qidirsin! Zafar polvonni topsin!

Polvon xohish-iroda bilan olishsa, oʻzining nimalarga qodirligini namoyish etsa, san'atini namoyish etsa, zafar oʻz-oʻzidan keladi!

Polvon o'z kurashidan o'zi zavqlansa, zafar o'z-o'zidan yor bo'ladi!

13

Boʻri polvon davraga kirdi.

Ismoil polvon-da sakrab davraga tushdi.

Ismoil polvon yurish-turishi, avzoyidan osonlikcha jon beradiganga oʻxshamasdi!

Bo'ri polvon Ismoilga yeguday-yeguday bo'lib xo'mrayib qaradi.

Ismoil polvon kurashni iloji boricha choʻzish payida boʻldi.

Shunda, Boʻri polvon nafasi qaytadi. Boʻri polvon holdan toyadi. Yosh -- yoshligini, qari -- qariligini qiladi...

Boʻri polvon nimaki qilmoqchi boʻlsa, Ismoil polvon xuddi bilib turganday, niyatlarini chippakka chiqara berdi. Boʻri polvon ana shunda koʻzga yaqin, yagona zoʻrga juda-juda qiyin ekanligini bildi. Boisi, zoʻrga hamma havas bilan qaraydi. Zoʻrning san'atini, oʻngi-chapini miridan-sirigacha sinchiklab oʻrganadi. Zoʻrga taqlid qilib, oʻshanday zoʻr boʻlgilari keladi!



Zo'r-chi? Zo'r o'zgalarni bilmaydi. Ayniqsa, o'zidan kuchsizlarni bilmaydi!

Bilgisi-da kelmaydi! Boisi, koʻzga ilmaydi!

Zoʻrning tagʻin bir fojiasi – zoʻr magʻlubiyat alamini kam totadi.

Zafar ketidan zafar... Zoʻr – zafar ogʻushida yashaydi!

Yo'q, zo'r mag'lubiyatlar alamini-da totib turishi lozim!

Ana shunda u oʻzi haqida oʻylab koʻradi! Ana shunda sergaklik bilan yashaydi!

Zo'r uchun mag'lubiyat zafar qatori bab-baravar zarur!

15

...«Xoʻsh, kuchi-ku kamayib qolibdi, – umid bilan oʻyladi Boʻri polvon. – Nahotki, quruq kuchiga ishonayotgan shu yosh bolaning biron korini qilib boʻlmasa?»

Xayoliga oʻziga ma'qul bir fikr keldi...

Qo'llarini sermab, Ismoil polvonga qarab yurdi.

Ismoil ketiga tislandi. Oʻzini goh chapga olib qochdi, goh oʻngga olib qochdi. Boʻri polvon moʻljaliga bormadi.

«Faqat qoʻyib yubor deguncha qiladigan ishni qilish kerak, – oʻyladi Boʻri polvon, – boʻlmasa gʻirrom boʻladi».

Bo'ri polvon Ismoilga qaradi.

Ismoil polvon yelkasidan nafas ola-ola davra aylandi. Demak, Ismoil polvon-da charchadi!

Ana, Ismoil polvon mash'ala yaqiniga borib qoldi.

Boʻri polvon boʻlsa, davra bu chetida boryapti. U oʻzicha moʻljal qildi: «Hozir olishmoqchi boʻlib oʻgiriladi. Ismoil-da olishmoqchi boʻlib oʻgiriladi».

Boʻri polvon oʻrtaga qarab yurdi.

Ismoil polvon bir-ikki qadam tashlab, olov oldida toʻxtadi. Yoniga oʻgirildi. Oʻrtada Boʻri polvonga qarab yurdi.

Ismoil polvon yelkalari uzra mash'ala lovullab-lovullab turdi. Mash'alaga teskariligi sababli yuzlari qorayib-qorayib turdi.

Polvonlar bir-biriga quloch otib kela berdi!



Boʻri polvon Ismoil polvon yoqasidan ushlab, ichidan chil berdi. Jonjahdi bilan ketiga burdi. Shunday shiddat bilan surdiki, Ismoil polvon oʻzini oʻngga-da, chapga-da ololmadi. Tikka mash'ala ustiga seltanglabseltanglab bordi.

- E-e-e, olov, olov! Olov bor! - dedi ovozlar.

Ismoil polvon olov taftini oldi. Taqqa toʻxtadi. Ketiga chalqaydi. Olovga yiqilmaslik uchun gavdasini oldinga tashladi.

Ya'ni... ya'ni gavdasini Bo'ri polvonga berib qo'ydi!

Boʻri polvon gʻoyatda tezlik bilan chilini chiqarib oldi. Chap oyogʻini yoniga toʻshadi. Ismoil polvonni davra oʻrtasiga sermab yubordi.

Yo, otam! – deya ayqirdi.

Ismoil Bo'ri polvon to'g'anoq oyog'i ustidan oshib, davra o'rtasiga chalqancha tushdi!

Ismoil polvon yulduz sanadi!..

Hay-hay! Yoshlik – yoshligini, koʻpni koʻrganlik – koʻpni koʻrganligini qildi! Tajriba! Tajriba zafar qozondi!

Boʻri polvon qoʻllarini koʻtarib, davrani aylanib chopdi. Oyoqlarini osmon qilib dorboz boʻldi. Dorboz boʻlib-dorboz boʻlib davra aylandi.

Davradan chopib chiqib, hamrohlarini bitta-bittalab bagʻriga bosdi. Hamrohlarini quchoqlab-quchoqlab oldi.

– Koʻrdingmi meni? Koʻrib qoʻy!.. – dedi.

Kulayotgan yonoqlaridan munchoq-munchoq yoshlar oqdi.

16

Ertasi uyda hoʻkiz soʻydi. Gapga yetar odamlarni chaqirdi.

Davrani tark etajagini aytdi. Uylanajagini aytdi.

- Hali-hozir uylanmay turing endi, Boʻri polvon, dedi gapga yetarlar.
 Har yurtning oʻz koʻzga surtar polvoni boʻladi. Bizning koʻzga surtar
- polvonimiz sizsiz...
 - Yoʻq, boʻldi! choʻrt kesdi Boʻri polvon.

Gap yetarlar nasihat qildi. Nasihatlar zoye ketdi.

Boʻri polvon oʻz bilganidan qolmadi.

Brigadasida Suluv degich qiz bo'ldi.



Bo'ri polvon ana shu qizni ko'z ostiga oldi.

Suluv Boʻri polvon koʻngliga oʻtirib qoldi.

Koʻngliga oʻtirgani – Suluv erkak zoti koʻziga tik qaramasdi.

25

...Boʻri polvonsiz davralar fayzsiz boʻlib qoldi.

Boʻri polvon oʻrni juda-juda bilindi.

El Bo'ri polvon kurashini qo'msadi...

Boʻri polvon-da davralarga intiq boʻlib qaradi. Boʻri polvon oʻzini izladi!

Yoʻq, Boʻri polvon yoʻq! Aksiga olib ayoli topgani-da qiz boʻldi! Toʻrtinchi farzand koʻrdi – tagʻin qiz boʻldi!

Yaratganning oʻzidan davralarni gursillatib-gursillatib olishadigan oʻgʻil tiladi.

Hartugul, beshinchi farzandi o'g'il bo'ldi!

Tilab-tilab topganim deya, otini Tilovberdi qoʻydi.

Bo'ri polvon endi orzu bilan ovundi: o'g'li Tilovberdi balog'atga yetyapti – ot o'rnini toy bosadi...

Yolgʻiz oʻgʻil Tilovberdi tez yetildi. Uni kuyov qiladiganlar koʻpaydi. Ayrimlar tilga borib aytdi.

Ammo Bo'ri polvon rozi bo'lmadi. Kampiri qistasa-da ko'nmadi.

Bo'ri polvon o'g'lini tarbiya qila berdi.

Oʻgʻlini nahorda uyqudan uygʻotdi. Tuxum yuttirdi...

XXIX

Shunday qilib, Tilovberdi polvon bilan shoʻrchilik Shodi polvon olishadigan boʻldi.

«Menga daryoning naryogʻiyam bir, beryogʻiyam bir. Bari bir oʻgʻlimdan zoʻri yoʻq, dedi oʻzicha Boʻri polvon. Lekin Shoʻrchida Abray degan bunday katta polvon yoʻq edi-ku? Bu kim boʻldi ekan? Yo shoʻrchiliklar alamlarini olish uchun boshqa yoqdan polvon yollab keldilarmikin? Bunday voqealar koʻp boʻladi...»

Boʻri polvon shoʻrchiliklar toʻpi roʻparasiga oʻtirdi. Past ovozda soʻradi:



- Inim, bu Abray polyonlaringni eshitmagan ekanman, u kimlardan?
- Abraymi? Nasim polvonning uli boʻladi. Yaqinda armiyadan keldi.

Boʻri polvon birdan sergak tortdi. Javob bermish odamga tikildi-tikildi, ohista joyidan turdi.

Ajabtovur hislar ogʻushida qoldi. Xivich ushlagan barmoqlari qaltiradi. Xivich siquvida qahr boʻldi, nimadir qilishga chogʻlanish boʻldi. Titroq chap qoʻli, lablariga oʻtdi.

Davradan qanday chiqdi, bilmadi. Amir polvon yelkasiga qoʻlini qoʻydi. Ogʻir entikdi. Nimadir demoqchi boʻldi. Deyolmadi, tomogʻi qurib qoldi.

Amir polvon Bo'ri polvon holini bildi. Darrov qo'ltiqlari ostidan oldi.

- Polvon bova, nima bo'ldi? Tilovberdi, suv opke! - dedi.

Boʻri polvon sovugan choy ichdi. Entikdi. Lablarini yaladi. Jilmaydi.

– Qaridik, ukam, qaridik. Yurak yaramay qolyapti! – dedi. – Amir, sen berman ke.

Bo'ri polvon Amirni qorong'iga ergashtirib ketdi.

- Amir, menga qara, shu Abray deganiga bizning Tilovberdini chiqar, xoʻpmi?
 - E, polvon bova, davra bilib qoldi-da!

Bo'ri polvon davra sirtida turib qoldi. O'zini o'nglab oldi.

Tagʻin davraga kirdi. Siniq ovozda jar soldi:

– Xaloyiq, eshitmadim demanglar! Hoʻkiz toboqni koʻtargan Abray polvonga Tilovberdi polvon chiqadigan boʻpti! Gilam toboqni esa Jonibek koʻtaradigan boʻpti! A? Endi u yogʻini bilmadim, xaloyiq! Oʻzlari shunday fikrga kelibdi, bir bilganlari bordir-da!

XXX

- Qani, endi davraga ho'kiz toboqni ko'targanlar chiqsin!

Boʻri polvon shunday deya davra aylandi. Koʻz ostidan Nasim polvonga tikildi.

«Nasim oshna, oʻgʻlingga bir ogʻizgina chiqma, u Boʻri bobongning oʻgʻli ekan, demading-a — deya, ich-ichidan oʻpkaladi. — Demaysan, deyolmaysan. Chunki sen oʻsha Nasimsan... Sendan bunday gap chiqmaydi. Mana hozir bilasan, sening farzanding kim-u, mening farzandim kim...»



Nasim polvon toʻgʻrisiga oyoq ildi¹. Soqolini siladi. Tomogʻini qirdi.

«Meni bir umr magʻlub etdim, qoyil qildim, deb yurib edingmi? Oshna, adashasan... Hozir koʻrasan, mening kim ekanimni. Oldingdan salom berib oʻtaman...»

XXXI

Nasim polvon tarafdan Abray, roʻbaroʻ tarafdan Tilovberdi polvon davraga tushdi.

Tilovberdi polvon qoʻlini koʻksiga qoʻydi. Abray polvonni oldinga taklif etdi.

- Qani polvon, torting! - dedi.

Abray polvon Tilovberdi polvonga qo'l berdi.

- Yoʻgʻ-e, yoʻl boshi sizdan, polvon! - dedi.

Tilovberdi polvon oldinga yurdi. Abray ketidan ergashdi.

Boʻri polvon shuni, aynan shuni kutdi. Yuzlarida tabassum oʻynadi. Olisroqda boʻlsa-da, Nasim polvonga tagʻin qaradi.

«Koʻrdingmi, Nasim oshna? Oʻgʻling mening oʻgʻlimdan oldinda yurishga yuragi dov bermadi. Mening oʻgʻlim hamisha birinchi...»

Boʻri polvon oʻgʻillarni bir-biriga qiyosladi. Ayniqsa, Abray polvonning sumbatiga sinchiklab-sinchiklab tikildi.

«Momoqizning oʻgʻli xushsurat yigit boʻpti. Ammo Momoqizga oʻxshamaydi. Otasiga tortibdi. Nasimning oʻziyam husndor edi-da. Faqat burnining puchuqligi Momoqizga kelbat beradi...»

Bo'ri polvon soqoli uchini buklab tishladi. Sezilar-sezilmas bosh irg'adi.

Abray polvonga suqim kirmasin, deya nazarini quvdi, yon-veriga tufladi:

- Tuf-tuf-tuf!..

XXXII

Polvonlar qo'l berib ko'rishdi.

Tilovberdi polvon jelaklari oʻngirini ketiga surdi. Yenglarini xiyol tortdi. Barmoqlarini tili bilan hoʻlladi. Oʻynab-oʻynab Abray polvonga qarab bora berdi.



Oyoq ildi - toʻxtadi.

Abray polvon koʻzlari qarshisida mardona oʻynayotgan barmoqlar orasida hech nimani koʻrolmadi. Koʻzlari pirpiradi. Keyiniga tisarildi.

Tilovberdi polvon Abray polvon koʻzlariga tikildi: Abray polvon koʻzlari hayiqdi! Ana endi hamlaga oʻtsa boʻladi!

Tilovberdi polvon oʻng qoʻli bilan Abrayning yoqasidan ushladi. Ichidan chil berdi. Shiddat bilan ketiga surdi.

Abray polvon ketiga seltanglab-seltanglab bordi. Kimningdir fonusiga qoqilib ketdi. Odamlar ustiga chalqancha tushdi.

Tilovberdi polvon yiqitdim deya, qoʻllarini koʻtardi.

Nasim polvon qabatidagilardan tashvishli ovozda soʻradi:

- Nima boʻldi-a, nima boʻldi?

Nasim polvonning ovozi juda xasta boʻldi, faqat koʻzi ojizlarga xos ovoz boʻldi.

Xoʻjasoatliklar Tilovberdi polvonni olqishlab qichqirdi:

- Halo-o-ol!
- Tilovberdi polvonning haqi berilsin!
- Xayriyat, odamlar ustiga tushdi, agar shu zarb bilan yerga tushganda, ichagi uzilardi!

Tilovberdi polvon bakovul qoshiga choʻkkaladi.

Boʻri polvon yuzlarida quvonch ifodasi koʻrinmadi. Vagʻir-vagʻir qilayotgan hamqishloqlariga amirona qoʻl siltadi.

– Xaloyiq, jim! – dedi. – Koʻp javramang, jim boʻling! Xaloyiq, davradagi Boʻri polvon soʻzim: Tilovberdi polvon Abray polvonni yiqitolmadi!

Qoni tez xoʻjasoatliklar bidillab ketdi:

- E, qoʻying-e, polvon bova, chalqayramon¹ tashladi-yu!
- Bundan ziyod qanday yiqitib bo'ladi?!
- Xaloyiq, soʻzlab boʻldingizmi? dedi Boʻri polvon. Qaytarib aytaman, Tilovberdi polvonning yiqitgani bekor!
 - Nimaga bekor bo'lar ekan?
 - Chunki u odamlar ustiga yiqitdi! dedi Boʻri polvon.
 - Sizga bari bir emasmi, qayerga yiqitgani?!

Chalqayramon - chalqancha.





- Yo'q! Polvon polvonni osmonning ko'kiga otsayam bekor! Polvonmisan - yerning ustiga yiqit! Qani, boshqatdan olishinglar!

Tilovberdi polvon otasiga oʻqraydi. Qobogʻini uydi. Tagʻin davra aylandi. Boʻri polvon bildi, oʻgʻli undan norozi boʻldi.

«Oh, qaniydi oʻgʻli hozir yiqitgan boʻlsa! Oʻgʻli buni bilmaydi-da! Bilmagani yaxshi...»

XXXVI

Tilovberdi polvon gʻolibona yurishda davom etdi. Oʻng oyogʻini lapanglatib-lapanglatib olgʻa tashladi. Ba'zan, haddan ziyod olgʻa tashlab yubordi. Shunda gavdasi orqada qolib-qolib ketdi.

Abray polvon sezdi! Ammo Tilovberdi oyogʻiga atayin qaramadi! Koʻzlariga tik boqib bora berdi! Bor diqqat-e'tibori esa oyogʻida boʻldi. Boʻlajak vaziyat toʻlishib kelajak sayin koʻzlari yanada besaranjom boqdi, bejo boqdi.

Xoʻjasoatliklar Tilovberdi polvon beparvoligi oqibatida roʻy berayotgan nozik vaziyatni koʻrib turdi. Ammo Tilovberdi polvonni ogoh qilishga jur'at etolmadi. Ehtimol, koʻzlari tik boqayotgan Abray polvon bu vaziyatni payqamayotgandir? Bordi-yu, ovoz bersalar, Abray polvon bilib qolmaydimi?

Xoʻjasoatliklar ana shu tashvishda miq etmay oʻtirdi.

Qaltis vaziyat bo'ldi!

Davra nafasini yutdi.

Tevarak suv sepganday jimjit boʻldi.

Faqat Tilovberdi polvon bilan Abray polvon nafasi eshitildi. Polvonlar bir-birini ruhan arbadi¹.

XXXVII

Bo'ri polvon davra chetida chordana qurdi. O'zini, jamiki olamni unutdi...

Qoʻynidan tasbehini oldi. Donalab-donalab tasbeh agʻdardi.

Shiq!

Ichida kalima qaytardi! Oʻng kaftini yuziga tortdi. Boshi chapga xiyol

Arbadi – avradi, chalgʻitdi.



qiyshaydi. Oʻgʻlining lapanglayotgan oyogʻidan koʻz uzmadi. «Oʻgʻlim, oyogʻingni ol!»

Shiq!

Boʻri polvonni zoʻr hadik bosdi. Qaddi tobora choʻkib bordi. Tomogʻini qirdi. Ovozini yolgʻiz oʻzi eshitdi. Ogʻzini angraygannamo ochdi.

«O'g'lim, senga aytaman!»

Shiq!

Yoʻq, zafarli yurishlarga oʻrganib qolgan otasining oʻgʻli oyogʻini olmadi. Aksincha, xuruj qilib bora berdi.

Shiq!

Abray polvon Tilovberdi polvon koʻzlaridan koʻz olmadi. Koʻz ayirmadi.

Tilovberdi polvonni oyogʻi yerga tekkuncha zarb bilan qoqib yubordi.

- Xap-a-a-a! - deya ayqirdi.

Hayqiriq nihoyasiga yetmayoq, Tilovberdi polvon ikki yagʻrini bilan gupillab tushdi!

XXXIX

Shiq!

Boʻri polvon qoʻlidagi tasbeh yerga tushdi.

Koʻzlari yumildi, boshi orqaga xiyol chalqaydi.

Keyin oʻzini oʻnglab oldi. Nasim polvonga qaradi. Mungʻayib-mungʻayib qaradi.

Nasim polvon iljaydi, Nasim polvon tantana qildi!

Boʻri polvon boshini xam qildi. Yerda kulcha boʻlib yotmish tasbehini oldi. Ohista qoʻzgʻaldi. Davradan enkayib-enkayib chiqib ketdi. Davra sirtida kiyinajak oʻgʻli ovozini eshitdi.

Oʻgʻil yigʻlab-yigʻlab aytdi:

- Men yiqitganda gʻirrom dedi, mana oqibati! Otamiz niyatiga yetdi! Otamiz bor ekan, bizga gʻanimning keragi yoʻq!..

Boʻri polvon oyoq ildi. Nimadir demoqchi boʻldi. Ammo soʻzlashga madori yetmadi.

Ohista-ohista odimladi. Qorongʻilikka kirib ketdi. Duch kelmish gʻoʻzapoya uyumiga chiqdi. Yelkasidan nafas oldi. «Qorongʻi qanday yaxshi,



odamlar koʻrmaydi...» – choʻnqayib oʻtirdi. Keyin yonboshladi. Telpagini ketiga surdi. Titrayotgan barmoqlari tasbeh donalarini sur'at bilan sanadi: shiq, shiq, shiq...

XLII

Bo'ri polvon ko'ngli to'lib-to'lib ketdi.

Koʻngli toʻridan nimalardir oʻksib-oʻksib kela berdi. Oʻksik zarbidan yelkalari silkina berdi. Yonoqlaridan marjon-marjon yoshlar oqdi. Ohlar – yurakdan, yoshlar – koʻzdan boʻla berdi...

«Nasim oshna, koʻzimga koʻrinib, yaramni yangilading. Yana tagʻin oʻgʻlimni-da yiqitding.

Bilib qoʻy, oshna... izingdan surganim surgan! Qayerda davra boʻlsa izingdan quvib boraman!

Tilovberdini oʻgʻling bilan uch safargacha olishtiraman! Bordi-yu uch martasida-da oʻgʻling oʻktam kelsa... unda, nailoj, uchdan keyin puch.

Bari bir qoʻymayman! Ana, nevaralarim bor! Nasib boʻlsa, nevaramni nevarang bilan olishtiraman!

Ishonchim komilki, nevaram bobosining orini oladi!

Sen koʻrmayapsan, oshna, oy botib, yulduzlar soʻnib-soʻnib boryapti.

Oʻgʻlim oʻktamligida yulduzlar yongani-yongan boʻladi. Oʻgʻlim magʻlubligida yulduzlar soʻngani-soʻngan boʻladi.

Yo'q, oshna, yo'q!

Yulduzim hali yonadi! Davralarim hali davom etadi! Nevaralarim davralarda:

- Yo, bobomning piri, deb olisha beradi!

Yulduzim mangu yonadi!»

«Yulduzlar mangu yonadi» qissasi haqida

«Yulduzlar mangu yonadi» qissasini oʻqir ekanmiz, bu asar biz mutolaa qilgan boshqa asarlardan juda koʻp jihati bilan farq qilishini anglaymiz. Bu farq, avvalo, muallifning hikoya tarzida koʻrinadi. Guvohi boʻlganingizdek, asar tili va yozuvchi uslubi muallif unib-oʻsgan Surxon



vohasida yashaydigan xalq tili va muomala usuli bilan chambarchas bogʻliqdir. Togʻay Murod goʻyo qishloqdoshlariga qiziqarli bir rivoyat soʻzlab berayotganday tutadi oʻzini. U shu tinglovchilariga tushunarli, sodda tilda soʻzlaydi, qisqa-qisqa gaplar tuzadi. Shunisi qiziqki, bu hikoya usuli yurtimizning istagan hududidagi oʻquvchini ham darrov oʻziga tortadi, uni jon qulogʻini berib eshitishga ragʻbatlantiradi.

Nega?

Nega oʻrtada biror yotlik, anglashilmaslik paydo boʻlmaydi, tushuniksiz holatlar yuzaga kelmaydi? Axir, Siz bilan biz oʻrganib qolgan nasriy asarlarning voqea-hodisalarni bayon qilish usuliga Togʻay Murod hikoya tarzi hecham oʻxshamaydi-ku! Yozuvchi bilan bizni yaqinlashtirayotgan narsa nima oʻzi? Nimaga biz ham muallif bilan birga suyunib, birga yuragimiz achishib boradi?

Togʻay Murod hayoti va ijodi haqida gapirganimizda, uning asarlarida favqulodda qahramonlar, oʻta aqlli odamlar uchramasligini eslatgandik. U tanlagan qahramonlar oddiy — Siz bilan biz deyarli har kuni koʻcha-koʻyda uchratadigan, koʻpincha ahamiyat ham bermay oʻtib ketadigan odmi kishilardir.

Bundan besh asr ilgari hazrat Navoiy asl «ma'no maxzani» – inson ruhiyatining xazinasi yirtiq janda kiygan oddiy insonlar qalbida ekanini alohida ta'kidlagan edi. Bugungi o'zbek she'riyatining iste'dodli vakillaridan biri Iqbol Mirzo ham zamondoshlariga, jumladan, ijodkor do'stlariga murojaat qilib, shunday misralar bitadi:

Buncha bino qoʻyma zarrin choponlarga, Saratonda yaproq boʻlgin dehqonlarga, Suyangani tayoq boʻlgin choʻponlarga, Aytgil, doʻstim, nima qildik Vatan uchun?

Demak, Togʻay Murod qahramonlari bilan bizni qalban yaqinlashtirayotgan narsa — xalqimizga (demak, Siz-u bizga ham!) xos boʻlgan soddalik, samimiylik, toʻgʻrilik, ochiq koʻngillik xislatlaridir. Millatning bu bebaho fazilatlari «Yulduzlar mangu yonadi» qissasida ortiqcha jimjimaga oʻralmay, alohida boʻrttirilmay, kuchanib ta'kidlanmay aks ettiriladi. Uzoq Surxondaryoning uzoq qishloqlarida yashaydigan, ayrim-

lariga, balki umri bino boʻlib, Toshkentga kelish ham nasib etmagan oddiy insonlar uchun OR, NOMUS, GʻURUR, UYAT, ANDISHA, KAMTAR-LIK, HALOLLIK, MARDLIK singari hislar alohida qahramonlik belgisi emas. Bu hislar tuproq ustida insonman deya bosh koʻtarib yurgan har bir kishining tabiiy yoʻldoshi boʻlishi lozimligini qissaning koʻplab ta'sirchan epizodlarini oʻqib, qayta-qayta yodga olamiz.

Eslang, bu asar 1976-yilda yozilgandi. U yillari oʻzbek xalqi miyasiga «Sizlar oʻtmishda savodsiz, madaniyatsiz, aqliy va jismoniy imkoniyatlari haminqadar xalq boʻlgansizlar. Faqat yurtingizda shoʻro hukumati oʻrnatilgandan keyingina madaniyatli millatlar qatoriga qoʻshilish imkoniyatiga ega boʻldingiz» qabilidagi tushunchalar gʻoyat ayyorlik bilan singdirilardi. Ikki-uch yillik harbiy xizmatga olib ketilgan yigitlarimiz aksariyat qurilish batalyonlariga tashlanar, ularning kuchidan suvtekin foydalanilardi. Respublikada sportni rivojlantirish, bolalarni sogʻlomlashtirish masalalariga kam e'tibor berilar, bolalar umri paxta dalalarida, xavfli kimyoviy dorilar ostida zaharlanib borardi. Oʻz intilishi bilan koʻpchilikni qoyil qoldirgan iste'dodli sportchilar ham xorijiy davlatlarda boʻladigan xalqaro musobaqalarga joʻnatilmas, natijada, dunyo ahli oʻzbeklar kim, Oʻzbekiston qanday yurt ekanidan bexabar qolaverardi.

Boshqa yoqdan esa turli bahonalar bilan bizning milliy an'analarimiz, urf-odatlarimizga davlat miqyosida hujumlar uyushtirilardi. Dinimiz, e'tiqodimiz ustidan ochiqdan-ochiq kulishar, ne-ne asrlar osha zavol koʻrmay kelgan koʻplab muqaddas qadamjolarimiz buzib tashlanardi. Ona tilimiz butun rasmiy idoralar, hujjatlar, aksariyat ta'lim dargohlaridan siqib chiqarilgan, unda gaplashish esa madaniyatsizlik belgisi sifatida qaralardi...

Togʻay Murod mana shunday sharoitda oʻz qahramoni Boʻri polvonga qoʻshilib ogʻir-ogʻir, ayni choqda yozuvchi uchun xavfli-xavfli oʻyfarga choʻmadi. Bu oʻylarini el oldiga, boyagi makkor hukumat oldiga olib chiqishdan choʻchib oʻtirmaydi:

«Xalq nimasi bilan xalq?

Oʻzining urf-odatlari bilan xalq! Koʻp urf-odatlarimizni birovlar... birovlar oʻziniki qilib oldi! Biz qoʻlimizni burnimizga tiqib qoldik.

Shunday keta bersak, hademay... o'zimizni-da boy berib qo'yamiz!



Bu yogʻi kamday, ne-ne nimalarimizni eskilik sarqiti deb yoʻq qildik. Xiyol boʻlmasa xalqning oʻzini-da... eskilik sarqitiga chiqarib yuborayin, dedik!

Bugun buni yoʻqota bersak, ertaga uni yoʻqota bersak... podadan nima farqimiz qoladi?..»

Boʻri polvonning bu oʻylari «Buni rais biladimi?..» degan savol bilan tugayotganiga e'tibor bering. Xoʻp, rais biladi ham deylik, nima qila oladi? Undan kattaroq raislar, vazir-u noiblar nima qila olyaptiki, kichik bir kolxoz raisi bir narsa qila olsin! Aslida ularning biror narsa qilishi, nimanidir oʻzgartirishi — keyingi masala. Oʻzi ular bu haqda jiddiyroq oʻylaydimi? Shu muammolarni oʻylab hech uyqulari qochganmi?

Agar jiddiyroq oʻylaganlarida, ozgina ixlos qoʻyib harakat qilganlarida bu masalalarni ham yoritish yozuvchiga qolmas edi-ku! Shunday emasmi?

Xuddi Boʻri polvondek yozuvchi ham noyob urflarimiz, koʻhna ma'naviy boyliklarimiz sekin-asta unutilishi, borib-borib esa yoʻq boʻlib ketishidan jiddiy xavotirga tushadi. Agar e'tibor qilgan boʻlsangiz, bu qissada qadimiy xalq musobaqasi olish — kurash san'atining butun qonun-qoidalari eng mayda jihatlarigacha batafsil tasvirlanadi. Ikkinchi qissa — «Ot kishnagan oqshom»da xuddi shunday ish chavandozlik, otlar bilan bogʻliq oʻyinlar, otlarning zoti, parvarishi singari mavzular ustida qilinadi. «Otamdan qolgan dalalar» romanida boʻlsa, qadim oʻzbekning paxtakorlik faoliyati sirsinoatlari toʻliq qogʻozga tushiriladi. Togʻay Murod bu ishni ongli ravishda, ezgu maqsad yoʻlida qilgani shubhasizdir. Zero, chinakam yozuvchilar ajdodlarni avlodlarga, zamonlarni zamonlarga ulovchi, xalq madaniyatining jonkuyar targʻibotchilari sifatida ham tarixiy vazifalarni ado etadilar!

Boʻri polvonning quyidagi tashvishli mulohazalari ham, aslida, yozuvchining oʻz zamonasi bilan bogʻliq bedor oʻylaridir:

«Farzandlar hayotga beparvo qaraydi. Musibat bilan xursandchilik farqiga bormaydi.

Farzandlar oʻzlari minayotgan mashinaga oʻxshaydi! Odam kim, mashina kim, bilib boʻlmay qolyapti».

Ha, «O'zimizni-da boy berib» qo'ymasligimiz uchun har bir avlod



(jumladan, Siz ham!) hayotga, uning barcha tomonlariga koʻzni kattaroq ochib qarashi kerak boʻladi. Yozuvchining musibat bilan xursandchilik farqiga borish toʻgʻrisidagi da'vati ham bizni jiddiy oʻyga toldirishi lozim. Gap shundaki, Siz bilan biz *xursandchilik* deb yurgan juda koʻp narsalar ma'no-mohiyati, pirovard natijasiga koʻra musibat boʻlib chiqishi, biz bugun *musibat* deb qabul qilgan hodisalar zamirida esa teran anglashilishi lozim boʻlgan, insonni poklovchi buyuk haqiqatlar yotgan boʻlishi ehtimoldan xoli emas. Navoiy bobomiz ham chinakam inson bu dunyo gʻam-alamlarisiz yashashi mumkin emasligini, aksincha, koʻngilda gʻam yoʻqligi buyuk gʻam, alam yoʻqligi esa ogʻir alam ekanini ta'kidlagan edilar.

Shuni alohida ta'kidlash lozimki, muallif oʻzining markaziy qahramoni — Boʻri polvonni har qanday qusurdan xoli, farishtanamo odam qilib taqdim etmaydi. Boʻri polvon ham hayoti davomida bilib-bilmay ancha-muncha kamchiliklar, xatolarga yoʻl qoʻyadi. Doʻst tanlashda adashib, oʻzi suygan qizi — Momoqizni Nasim polvon «ilib ketishi»ga yoʻl qoʻyib berganini aytamizmi, «Hammadan zoʻri oʻzimman» deb oʻylab, «yosh bola» — Ismoil polvondan yengilganini aytamizmi, Nasimni oxirigacha tan berdirish, yoshlikda yuragida qolgan orini undan olish uchun Tilovberdining yutugʻini zoʻrlik bilan bekor qilib, oʻgʻlini oʻksitganini aytamizmi... Xuddi shu kamchilik va nuqsonlari uchun ham Boʻri polvon koʻnglimizga yaqin keladi. Zero, inson kamchilig-u qusurlari bilan ham insondir.

Qissaning yakuniy voqealari tasviri ham uning hayotiyligi – realizmini ta'minlashga xizmat qilgan. Azaliy raqiblar – Boʻri polvonning oʻgʻli Tilovberdi hamda Nasim polvonning oʻgʻli Abray polvonlar olishuvi boshlanishidanoq oʻquvchi bu kurash Tilovberdining gʻalabasi – Boʻri polvonning tantanasi bilan yakunlanishiga shubha qilmay qoʻyadi. Qolaversa, Boʻri polvonning olishuv oldidan Nasimga nisbatan koʻnglida aytgan gaplari bu fikrga oʻquvchini yanada ishontiradi. Biroq...

Biroq buni hayot deb qoʻyibdilar! Hayotning haqiqati esa oʻta shafqatsiz. Unda doim ham yovuzlik ustidan ezgulik, qorongʻilik ustidan yorugʻlik gʻalaba qozonavermaydi! Uning qiziqligi, hatto goʻzalligi ham balki shundadir. Ezgu niyatli kishilarni mudom sergak tutib turadigan, ularni shiddatli kurashlarga chorlaydigan, bu kurashlarda toblab – poklab boradigan hayot, ehtimol, shuning uchun ham buyukdir, qudratlidir! Axir mana shu kurashlar boʻlmasa, hayot nuqul oson gʻalabalardan iborat boʻlaversa, uning qanchalik qiymati-yu, nechogʻli qizigʻi qolardi? Axir birov gʻolib boʻlishi uchun kimdir magʻlub boʻlishi tabiiy-ku! Mana shu magʻlubliklar boʻlmasa, Boʻri polvonning qissa oxiridagi yulduzlarday oʻziga tortuvchi, qalblarni entiktiruvchi mulohazalari qaydan tugʻilardi?!

Yuqorida qissaning tili va uslubi unda tasvirlanayotgan voqealar hamda qahramonlar xarakteriga mutlaq mosligi toʻgʻrisida aytgan edik. Bu borada bir-ikki misol keltirish bilan cheklanamiz. Koʻrdingizki, Boʻri polvon bir soʻzli, qat'iyatli, muammolarni xuddi kurashdagidek shiddat bilan yechishga oʻrgangan inson. Uning bu xarakter jihatlari uning mulohaza tarzi, fikrlash yoʻsini orqali ham alohida ta'kidlanadi. Yozuvchi voqealarni Boʻri polvon nigohi orqali yoritganida deyarli har bir gapning oxiriga undov belgisi qoʻyishi shu ta'kid natijasidir:

«Yoʻq, Ismoil polvon haqiqatan ham zoʻr ekan!

Boʻri polyon oʻzidan boʻlak zoʻr boʻlishini xayoliga keltirmadi!

Zo'r faqat bitta – u, men, o'zimman, deb yurdi!

Oʻgʻil bola gap... oʻzidan boʻlak zoʻr chiqishini xohlamadi!

Yo'q, Bo'ri polvon xohlaganday bo'lmadi!

Vaqt, vaqt!»

Shafqatsiz vaqt har davrning oʻz zoʻrlarini yaratadi! Inson buni xohlaydimi-yoʻqmi, vaqt uchun bari bir – yarata beradi!

Ana, vaqt oʻzining kenja zoʻrini yaratdi! Ana, kenja zoʻr, ana!

Asarda qoʻllangan badiiy oʻxshatishlar ham voqealar yuz berayotgan makonga, hikoyachi ruhi va dunyoqarashiga mos tarzda tanlanadi — «Laylakning yurishini qilaman deb, chumchuqning puti yirtilgan ekan!», «Maksim polvon zarang tayoqday ekan — qayrilmadi» va b.

Bir polvonning magʻlubiyat alamini tortishi va raqibidan bu alamni olish uchun qilgan harakatiga nisbatan muallif «oʻchimni olmoqchi» yoki «alamimni olmoqchi» degan iboralarni emas, «orimni olmoqchi edim» iborasini ishlatadiki, bu ibora har jihatdan polvonlar ruhiyatiga mosdir.

Xalqona ibora bilan aytsak, «Yulduzlar mangu yonadi» qissasi muallifi – Togʻay Murodning xudoga aytgani bor ekan. Yurtimiz mustaqilligi qoʻlga



kiritilgach, juda koʻp xalq an'analari singari oʻzbek kurashini keng targʻib etish, yoshlarni unga jalb qilish, bu sport turini har tomonlama ommalashtirish borasida ulkan ijobiy ishlar amalga oshirildi. Prezidentimiz tomonidan kurashga alohida e'tibor qaratilib, bugungi kunda bu sport turi bilan nafaqat mamlakatimizda, balki koʻplab xorijiy yurtlarda ham minglab odamlar shugʻullanmoqdalar. Oʻzbek kurashi boʻyicha xalqaro turnirlar bugunga kelib Yer yuzining barcha qit'alarida oʻtkazilayotgani bu mardlar musobaqasining qanchalar halol, gumanistik xarakterga ega ekanini yana bir bor isbotlamoqda.

Savol va topshiriqlar

- Togʻay Murod va unga tengdosh yozuvchilar ijodiga xos boʻlgan asosiy xususiyatlarni biror asar misolida koʻrsatishga harakat qiling.
- 2. Togʻay Murodning darslikda keltirilgan qissasidan boshqa yana qanday asarlarini oʻqigansiz?
- 3. «Yulduzlar mangu yonadi» qissasi Siz hozirga qadar oʻqigan boshqa yozuvchilar asarlaridan koʻproq nimasi bilan farq qiladi?
- 4. Bo'ri polvon tabiatan qanaqa odam? Nega u o'ttizga kirguncha uylanmav yurdi?
- 5. Nasim polvon bilan Boʻri polvon oʻrtasida qanday ziddiyat yuz berganini qissani toʻliq oʻqish orqali bilib olishga harakat qiling.
- 6. Bo'ri polvonning hech qachon o'z manfaatini ko'zlab ish qilmasligi qaysi harakatlarida namoyon bo'ladi?
- 7. Boʻri polvon nega oʻgʻli Tilovberdining gʻalabasini tan olishni istamadi va uni qaytadan kurashga tushishga majbur qildi?
- 8. Tilovberdining Abray polvondan yengilganidan keyingi holatini qanday izohlaysiz? Bu otaga hurmatsizlik belgisimidi yoki boshqa narsami?
- 9. Qissaning kitobingizda berilgan parchalaridan Boʻri polvon aslida qayerda ishlashi, qishloqda nima yetishtirilishini bilsa boʻladimi?
- 10. Sizni ham kattalar biror marta «E, yasha otasining uli (oʻgʻli)!» deya alqaganmi?
- 11. Togʻay Murod qissasini mutolaa qilib, oʻzingiz uchun oʻzlashtirgan eng muhim ma'naviy boylik nima boʻldi?
- 12. «Yulduzlar mangu yonadi» qissasi asosida ijodiy insho yozing va sinfdoshlaringizga oʻqib bering.



OISSA

Badiiy asarlar uchta katta guruhga – epik, lirik hamda dramatik turlarga ajraladi. Epik, lirik va dramatik asarlar, avvalo, oʻzlarining nutqiy shakllanishi jihatidan bir-biridan farqlanadi. Masalan, epik asarlar asosan sochma – nasriy yoʻl bilan yoziladi. Har bir adabiy tur oʻz ichiga qator janrlarni jamlaydi. Hayot hodisalarini badiiy qamrash koʻlami nuqtai nazaridan epik janrlarni quyidagicha tasniflash mumkindir:

- 1. Kichik epik janrlar: latifa, masal, hikoya, rivoyat, ertak, afsona, badia, etud, ocherk, esse.
 - 2. O'rta epik janrlar: qissa (povest).
 - 3. Katta epik janrlar: epos, epik doston, roman, epopeya.

Koʻryapsizki, qissa janri ham mazmunan, ham shaklan oʻrtaliqda joylashgan. Unda qamrab olinadigan voqealar koʻlami, qahramonlar ishtiroki, talqin etish moʻljallangan muammolar hajmi hikoyanikidan katta bo'lsa, romannikidan kichkinadir. «Bemor» hikoyasi doirasiga qamrab olingan mazmun-mohiyat «Yulduzlar mangu yonadi» qissasi bagʻriga singdirilgan mazmun-mohiyatdan birmuncha kichikligini darrov ilgʻagandirsiz. Bu oʻrinda Sizni asarlarning hajmi aldab qoʻymasligi lozim. Masalan, shunday hikoyalar borki, ularning hajmi uncha-muncha qissanikidan kattaroqdir. Va aksincha, shunday romanlar yoziladiki, ularning hajmi qissadan kichikroq bo'lishi mumkin. Bu yerda gap, boya aytganimizdek, yozuvchi tomonidan asarga singdirilgan mazmun-mohiyat koʻlamidadir. O'sha «Bemor» degan bir betlik hikoyaga jam qilingan mazmunni noshud yozuvchi ellik betlik hikoya yoki yuz betlik qissada bera olmasligi ham mumkin. Ayrim yozuvchilarning yostiqday romanlari borki, ularni oʻqib «Yulduzlar mangu yonadi» qissasidan olgan taassurotni mutlaqo topa olmaysiz. Demak, har qanday janrning rivojlanishi va yuksalishida ham birinchi navbatda iste'dodlar asosiy o'rin tutadi, desak to'g'ri bo'ladi.



Pirimqul QODIROV
(1928-yilda tugʻilgan)

Zamonaviy oʻzbek nasrining rivojiga salmoqli hissa qoʻshgan otaxon adiblarimizdan biri Oʻzbekiston Xalq yozuvchisi Pirimqul Qodirovdir. U oʻz safdoshlari – Asqad Muxtor, Said Ahmad, Odil Yoqubovlar bilan birga ustoz adiblar – Gʻafur Gʻulom, Oybek, Abdulla Qahhorlar qalamini yerga tushirmay, milliy adabiyotimiz ravnaqini yana bir pogʻona yuksaltirgan taniqli yozuvchi hisoblanadi. Pirimqul Qodirov asarlarini nafaqat Markaziy Osiyo davlatlari hududida, balki uzoq xorijiy mamlakatlarda ham sevib mutolaa qiladilar, oʻqib oʻrganadilar.

Pirimqul Qodirov 1928-yilning 25 oktabrida hozirgi Xoʻjand viloyati hududidagi Kengkoʻl qishlogʻida choʻpon oilasida dunyoga kelgan.

Kolxozlashtirish (1930–1933-y.) davrida koʻpchilik qatori uning otasi – oʻziga toʻq Qodir choʻpon ham quloq qilinadi. Bu voqea koʻp bolali oilaning kundalik tirikchiligigagina emas, farzandlarning keyingi taqdiriga ham ogʻir koʻlankalar solardi.

Ikkinchi jahon urushi yillarida oʻspirin Pirimqul kolxozdagi ogʻir yumushlarni bajarishda kattalarga yelkadosh boʻldi, bir parcha qora non topib yeyish qanchalar qiyinligini oʻz koʻzlari bilan koʻrdi.

Qishloq maktabida yaxshi oʻqigani, ilm-u ijodga chanqoqligi tufayli izlab-izlab Toshkent davlat universitetini topib keldi va uning sharqshunoslik fakultetiga oʻqishga kirdi. 1951-yilda bu fakultetni muvaffaqiyatli bitirgach, bir muddat Til va adabiyot institutida ishladi. P. Qodirov

adabiy ijodning sir-u sinoatlarini chuqur oʻrganish maqsadida Moskvadagi aspirantura oʻqishiga kiradi va 1954-yilda ustozi Abdulla Qahhor asarlarining til va uslubiy jihatlari tadqiq etilgan nomzodlik dissertatsiyasini yoqlaydi.

Talabalik paytidayoq Pirimqul Qodirov oʻzining dastlabki kitobi — «Studentlar»ni e'lon qildi. Shundan keyin uning koʻplab hikoyalari, «Meros», «Erk», «Qadrim», «Yayra institutga kirmoqchi», «Najot» singari qissalari, «Uch ildiz», «Qora koʻzlar», «Olmos kamar», «Yulduzli tunlar», «Avlodlar dovoni» nomli yirik romanlari millionlab oʻquvchilarini topdi.

Pirimqul Qodirovning yuqorida sanalgan asarlari turli mavzularni, har xil kasb egalari hayotini badiiy aks ettiradi. Ularning birida paxtakorlar («Meros»), boshqasida ziyolilar («Uch ildiz»), yana birida neft konlarini izlovchilar («Qadrim») hayoti qalamga olingan boʻlsa-da, barchasida inson taqdiri, uning ruhiy dunyosi qatlamlari chuqur mushohada qilinadi.

Abdulla Qodiriy, Oybek singari adiblar boshlab bergan tarixiy mavzular talqini P. Qodirovni ham jiddiy izlanishlar sari ragʻbatlantirdi. U qariyb yigirma yillik umrini mana shu izlanishlarga bagʻishladi. Holbuki, shoʻro zamonida milliy tarix qatlariga nazar tashlash, uni xolis yoritish nihoyatda galtis ish sanalar, yozuvchini yomonotligga chiqarish hech gap emas edi. P. Qodirovning dastlabki tarixiy asari – «Yulduzli tunlar» («Bobur») romani atrofida ham sho'ro mafkurachilari chakana vahima qo'zg'amadilar. Yozuvchini tarixga toʻgʻri yondashuvni bilmaslikda, zolim podsholarni ulugʻlashda, oʻtmishni ideallashtirishda aybladilar, asarning koʻp joylarini qayta ishlashga majbur etmoqchi boʻldilar. Buni qarangki, mana shu pastkashlikka rahbarlik qilgan yoki bosh qoʻshgan ne-ne zamona zoʻrlarini birov eslamaydi, agar eslasa ham tarixiy xotira jallodlari sifatida irganib tilga oladi. Pirimqul Qodirovni esa Yaratganning oʻzi, u ulugʻlagan ajdodlari ruhi qo'lladi. Mustaqillik yillari yozuvchi va uning asari qarshisida barcha eshiklar ochildi - adib asarlari oʻnlab xorijiy tillarga tarjima qilinib, olamga yuz tutdi.

Bugun shuni toʻla ishonch bilan aytish mumkinki, oʻzbek adibi Pirimqul Qodirov shoh va shoir Bobur va uning bir-biriga oʻxshamagan farzandlari taqdirini toʻlaqonli badiiy qayta yaratishda tom ma'nodagi tarixiy

vazifani ado etdi. Albatta, kelajakda Bobur toʻgʻrisida, uning sulolasi vakillari haqida koʻplab badiiy va ilmiy asarlar yaratiladi. Ularning dunyoga kelishida esa kelajak mualliflariga Pirimqul Qodirov tajribasi samarali xizmat qilishi shak-shubhasizdir.

NIZOMNING TANTILIGI

(«Avlodlar dovoni» romanidan parcha)

«Avlodlar dovoni» romanining asosiy voqealari buyuk sarkarda Mirzo Bobur vafotidan soʻng, u yangidan tashkil etgan Hind mamlakatida yuz beradi. Koʻp hukmdorlar bilan boʻlgani singari Boburdan keyin ham turli shajaralar vakillari boʻlmish shahzodalar oʻrtasida toj-taxt dardidagi kurash alanga oldi. Bobur Mirzoning suyukli farzandi, valiahdi Humoyun Mirzo taqdirida ham bu kurashlar oʻzining qonli izini qoldirdi. Jumladan, aqlli va makkor Sherxon bilan boʻlib oʻtgan olishuvlar boburiylar sulolasi taqdiriga jiddiy havf solar edi.

Romanga kiritilgan toʻqima obrazlardan biri Nizom Hamida ismli goʻzal qizni sevadi. Qiz ham oʻz navbatida bu qayiqchi yigitga koʻngil beradi. Shunisi qiziqki, Humoyun Mirzo ham Hamidabonu qoʻzalligiga maftun boʻlib yurardi. Albattaki, bu ishqiy musobaqada «imtiyoz» koʻproq shahzoda tomonida edi. Taqdir taqazosini qarangki, Nizomning raqibi Humoyunning hayotini asrab qolish aynan uning oʻziga bogʻliq boʻlib qoladi...

* * *

Humoyun oyoq qoʻygan yer oʻpirilib tushib, tubsiz oʻngirga aylandi. U oyogʻini tortib olib, orqaga tisarildi. Qorayib turgan oʻngirning labida qandaydir daraxtning ildizi koʻrindi. Humoyun tubsiz jarga yiqilay deganda shu daraxtni ikki qoʻllab tutib qoldi. Bir payt daraxt ham ildizi bilan sugʻurilib chiqa boshladi. Humoyun jarga yiqilib tushishini sezganda qichqirib, bosinqirab uygʻondi-yu: «Alhamdulillo, tush ekan» deb xiyol yengil tortdi. Lekin tashqarida dovul koʻtarilganini, tepasidagi chodirni shamol yiqitib ketgudek qattiq silkitayotganini sezdi, jala quyib, momaqaldiroq ustma-ust guldirayotganini eshitdi-da, yana yuragi hapriqib, oʻrnidan turib ketdi.

Ganga boʻylarida yomgʻir fasli boshlangan, havo iliq boʻlsa ham dim, hamma narsa namiqib ketgan. Xos chodir eshigiga osilgan kimxob parda Humoyunning qoʻliga salqin va mayin tegdi. Uni bir tomonga surib tashqariga koʻz yugurtirdi.

Qorongʻida hech narsa koʻrinmaydi, faqat yashin chaqnaganda Ganganing oqish qirgʻoqlariga toshib chiqqan oqish toʻlqinlari tahdidli yarqirab koʻzga tashlanadi. Daraxtlar dovuldan yerga tekkuday egiladi, ularning qattiq shovullashi orasidan momaqaldiroqning qasr-qusuri xiyla past eshitiladi.

Humoyunning chodiri turgan balandlikdan Gangaga kelib qoʻshiladigan yana bir daryo — Karamnasa ham koʻrinadi. Odatda suvi uncha koʻp boʻlmaydigan bu daryo yomgʻir fasli boshlangandan beri boʻtana sellarga toʻlib, vahimali tusga kirgan. Qoʻshindagi filbon va kemachi hindlar Karamnasa daryosidan juda qoʻrqadilar, unga qoʻl-oyoqlarini tekkizmaslikka tirishadilar. Hindlarning e'tiqodi boʻyicha, Karamnasaning suvi tekkan odam bir umr qilgan toat-ibodatidan ayrilib, kasofatning tagida qolib ketarmish. Shuning uchun taqvodor hindlar Karamnasaning narigi qirgʻogʻiga oʻtmoqchi boʻlsalar, irim qiladilar — uning oʻzidan emas, Gangaga quyilgan joyning naryogʻidan kema bilan aylanib oʻtadilar.

Bu hodisani bundan oʻn yil oldin mana shu Karamnasa boʻyida otasi Bobur ham koʻrganini va oʻz esdaliklarida yozib qoldirganini Humoyun biladi. Bunaqa irimlarga ishonmaydigan Bobur Mirzo hozir Humoyun turgan joyni qoʻshinga qarorgoh qilib tanlab, bir hafta turgan va shu atrofdagi yovlami yengib, Agraga gʻalaba bilan qaytgan edi.

Shuning uchun Humoyun taqvodorlarning irimidan koʻra otasining tajribasiga koʻproq tayandi. Uch tarafi daryo bilan toʻsilgan baland tepaliklar uni dushmanlaridan asraydigandek koʻrindi. Beklar ham «faqat qarorgohning janubi-sharq tomoniga soqchilar qoʻyilsa, kechalari tinch uxlash mumkin...» deyishdi.

Lekin hozir yomgʻir chelaklab quyayotgan va dovul chodirlarni yirtgudek boʻlayotgan paytda Humoyun tushida koʻrgan dahshatli voqeani esladi-yu, yashin yorugʻida yalt etib chaqnagan toshqin daryolar halqasi birdan vahmini keltirdi. Uch tomondan toshib chiqayotgan daryolar uni



toʻrtinchi tarafdan bostirib kelayotgan yovlarga tuzoq boʻlib tutib beradigandek tuyuldi. Yo alhazhar! U nega oʻz oyogʻi bilan daryolar orasiga kirib qoldi. Otasi bu yerni qarorgoh qilgan paytlarda havo quruq, daryolarda suv oz, bu atrofda Sherxonday xatarli yov yoʻq edi-ku!

Yoshi oʻttiz birga kirgan Humoyun oʻsmirlik yillaridan beri koʻp tahlikali janglarni koʻrdi, turli-tuman yovlar bilan olishib, hali biror marta yengilgani yoʻq. Lekin Sherxonga kelganda uning shijoati ham, janglarda orttirgan tajribasi ham ish bermay qoʻyyapti. Vaqt oʻtgan sari Sherxonning qudrati ortib Humoyunning ishi orqaga ketayotganday boʻlyapti.

Humoyun toʻshagi turgan joyga qaytib, qorongʻida yostiqni paypaslab topdi. Yostiqqa qayta bosh qoʻyar ekan, tashqarida xuruj qilayotgan shamol, jala va momaqaldiroq shovqini orasidan Sherxon uning koʻziga koʻrinib ketganday boʻldi.

Qoshlari qalin, koʻzlari koʻkish, qirra burun, kalta qirqilgan soqoli va qayrilma moʻylovi oʻziga juda yarashgan durkun gavdali Sherxonning qarashlarida burgutni eslatadigan bir ifoda bor.

...Humoyun barcha odamlari bilan Ganganing o'ng qirg'og'iga o'tguncha Sherxon askarlari qorasini koʻrsatmadi. Humoyun Karamnasa va Ganga oraligʻidagi tepaliklarni qarorgoh qilib, qoʻshinini joylashtirgandan keyingina janubi-sharqdagi ochiq sahnda birdan Sherxonning qoʻshini paydo bo'ldi. Bu orada yomg'ir fasli boshlanib, daryolarda suv ko'payib ketdi. Endi uch tomonlama darvolar halgasidan osonlikcha chiqib ketib boʻlmaydi, toʻrtinchi tomonni esa yov lashkari bekitib oldi. Humoyun odamlarini hayotmamot jangiga shaylab, eng sara askarlarini, harbiy fillarini Sherxon turgan tomonga joylashtirdi va uning hujumini kutdi. Shu vaqtgacha mudom Humoyun hujumda edi. Endi u hujum qilish navbatini Sherxonga bergandek bo'lib, bir hafta kutdi, bir oy, bir yarim oy kutdi. Ammo Sherxon hujum qilmadi. Chunki vaqt Sherxonning foydasiga ishlamoqda edi. Humoyun qarorgohida o'n mingdan ortiq odamlarni va ulardan ikki barobar ko'p otulovni boqish uchun gʻamlagan zahiralar tugab bormoqda. Daryolar zaxidan va yomg'ir faslining rutubatidan kasalga uchrab safdan chiqayotgan navkarlar soni esa tobora koʻpayib ketyapti. Atrofdan keladigan yordamning yoʻlini toshqin daryolar va Sherxon qoʻshini toʻsib turibdi.



Sherxon ikki oy deganda ham hujumga o'tmagach, Humoyun oraga odam qo'yib: «Bizdan ne tilagi bor, aytsin», dedi. Sherxon o'tgan kuni Humoyun qarorgohiga o'z elchisini yuborib, undan Chunor qal'asini va Bixar viloyatini so'radi. Bixar hozir himoyasiz qolgan, Humoyun o'z qo'shinini Agraga olib ketgach, bu viloyatni Sherxon yana ishg'ol qilishi shubhasiz. Ammo sharqiy viloyatlarning qulfi-kaliti bo'lgan Chunorni Sherxonga jangsiz topshirishni o'ylaganda Humoyunning butun vujudi zirqirab ketdi. Axir bu qal'ani olguncha olti oy jang qilib, ozmuncha talafot berildimi?

Humoyun Sherxon elchisiga aniq javob bermadi, oʻylashib, kengashib undan soʻng oʻz qarorini maxsus odamlar orqali ma'lum qiladigan boʻldi. Kechagi mashvaratda koʻpchilik beklar Chunorni Sherxonga qaytarib berishga qarshi chiqdilar. Shuncha azob tortib qoʻlga kiritgan eng muhim joylari Chunor boʻlsa-yu, uni ham Sherxonga jangsiz topshirib ketsalar Agraga qaysi yuz bilan qaytishadi? Odamlar ularning ustidan kulishmaydimi?

– Nodonlar kulgisiga e'tibor bermasligimiz kerak, janoblar! – dedi Bayramxon. – Hozir vaziyat bizdan qurbon talab qilmoqda. Biz mana bu daryolar sirtmog'idan eson-omon chiqib, Agraga qaytsak, u yerdagi ixtiloflar bartaraf bo'lsa, keyin Chunorni yana qaytarib olishimiz hech gap emas!

Humoyun Bayramxonning bu fikriga qoʻshilmadi, koʻpchilik beklar podshoning tarafini oldi.

Biroq hozir sharillab quyayotgan yomgʻir tagida, dovul koʻtarib ketgudek boʻlayotgan chodirda uyqusizlikdan qiynalib, goh u yonboshiga, goh bu yonboshiga agʻdarilar ekan, Bayramxon bilan ertalab yana bir gaplashgisi keldi. Azon palla podshoning xirgohiga¹ chaqirilgan Bayramxon eshik oldida ta'zim qilib yukundi. Humoyun unga oʻng yonidan joy koʻrsatdi. Bayramxonning oʻsiq qora soqoli va bugʻdoyrang yuziga tikilib:

- Bugun tuni bilan uxlay olmay toʻlgʻonib chiqdim, - dedi. - Yomon



¹ Xirgoh - qarorgoh.

tushlar... Siz aytgan qurbonlik... Chunor... bagʻrimdan bir parcha etni yulib olib gʻanimga bergandek ogʻir... Mabodo biz Chunorni topshirsak, Sherxon qanoat qilarmikin? Bangola bilan Gaurni tinch qoʻyarmikin? Agar shu haqda bitim tuzsak, Sherxon soʻzida turarmikin?

- Hazratim, dedi Bayramxon. Agar faqirga vakolat bersangiz, Sherxonning oldida Qur'onni qo'yib so'z olmog'im mumkin. Axir u ham musulmon-ku!
- Sherxon Bangolaga tegmasa mayli. Chunorni beraylik. Bizdan vakil boʻlib boring.

Humoyun o'z qarorgohidagi eng nufuzli ulamolardan bo'lgan va Sherxon bir vaqtlar nazr-niyozlar berib fotihasini olgan Xo'ja Husaynni Bayramxonning yoniga qo'shib elchilikka yubordi.

Tushga yaqin yomgʻir tindi-yu, bulutlar orasidan koʻm-koʻk osmon va issiq yoz oftobi koʻrindi. Ganga hali ham uzoqlarda yogʻayotgan jala suvlariga toʻlib, loyqalanib oqayotgan boʻlsa-da, yer asta-sekin quriy boshladi.

Bayramxon Ganga janubidagi keng tekislik orqali Sherxonning qarorgohi tomon otliq borar ekan, yomgʻirdan keyingi havoda boʻliq oʻtoʻlanlar va rang-barang dala gullari qanchalik qulf urib yashnab turganini, osmon toʻla qushlar naqadar yayrab uchayotganini koʻrdi-yu, oʻzicha bir xoʻrsinib qoʻydi. Hind yeri yoz issiqlariga qoʻshilib keladigan iliq yomgʻirlarga toʻyib, hamma tirik jonni, barcha giyohlarni birvarakayiga uygʻotadigan va juda tez rivojga kiritadigan mana shu pashkol¹ faslida Bayramxon uydami, bogʻdami tinchgina oʻltirib kitob oʻqishni va she'r yozishni qoʻmsaydi. Hind elining azaliy odati bejiz emaski, yomgʻir faslida sayohatga chiqilmaydi. Chunki odam ham, ot-ulov ham bu faslda qayoqqa qadam qoʻymasin, rivojga kirgan birorta tirik jonni yoki giyohni bosib oladi. Tirik jonni bosib nobud qilgan odamning haji qanday qabul boʻlsin? Oʻn minglab qoʻshin bilan harbiy yurishga chiqqan sarkardalarning shunday faslda urush boshlashini qanday baholash mumkin? Sherxon ham koʻp kitob oʻqigan bilimli odam. Bayramxon unga tugʻilib oʻsgan mamlaka-



¹ Pashkol – yomgʻir fasli.

tining pashkol fasliga oid udumlarini albatta eslatadi, hozir urushadigan payt emasligini, sulh tuzishi kerakligini boshqa dalillar bilan ham isbot etadi...

Sherxon shomiyona¹ toʻridagi baland shahnishinda² chordana qurib sokin oʻtiribdi. Kiyimlari bezaksiz, odmi ipakdan, kichkina sallasiga ham gavhar yoki boshqa toshlar qadalmagan, ammo burgutnikiga oʻxshah koʻz qarashlari va magʻrur oʻltirishi Bayramxonda hayiqishga oʻxshash bir tuygʻu uygʻotdi. Bayramxon unga ta'zim qilib, Humoyunning muhri bosilgan maktubni topshirdi. Sherxon maktubni oʻqib boʻlguncha elchilar uning ishorasi bilan pastdagi kimxob koʻrpachalarga choʻkka tushib oʻltirdilar. Sherxon oʻltirgan shahnishin bir gazcha balandda edi. U Bayramxonga yuqoridan turib kinoyali soʻz qotdi:

- Podshoyingiz Chunor evaziga Bangolani talab qilmoqda-ku!
- Davlatpanoh, dedi Bayramxon qoʻlini koʻksiga qoʻyarkan. –
 Bangola toʻqqiz yildan beri Humoyun hazratlarining qalamravidadir.
- Ammo bizning afgʻon qavmlarimiz Bangolada yuz yillardan beri yashab kelmoqda. Ular bizga qarindosh, koʻplari bilan quda-anda boʻlganmiz. Endi sizlarni deb orani uzaylikmi?
- Davlatpanoh, qarindoshlik, quda-andachilik bemalol davom etaversin. Faqat Bangolaga bu yilgidek qo'shin tortilmasa, xazinalar talanmasa, qon to'kilmasa bas...
- Sizlar Chunorni olti oy qamal qilib ozmuncha qon toʻkdilaringizmi? Bangolada biz ana shuning qasdini oldik!
- Biz bugun qasoskorlik haqida emas, sulh haqida soʻzlashgani keldik, davlatpanoh. Ayniqsa hozir, pashkol kunlarida faqat inson emas, butun tabiat ham urushsiz tinch yashamoqqa alohida ehtiyoj sezadir. Siz ma'rifatli sarkardasiz, «Chunor berilsa sulh tuzgaymiz» deb odam yuborgan erkansiz. Shunga javoban Humoyun hazratlari bizni vakil qilib joʻnatdilar.

Sherxon Humoyunning maktubiga yana bir koʻz yugurtirdi-yu:

- Behuda qon toʻkilishini biz ham istamaymiz! - dedi. - Chunor bizga berilsa, podshohingiz qoʻygan shart qabul qilingay.

² Shahnishin – maxsus oʻrindiq.



¹Shomiyona – tunashga moʻljallangan chodir.

Bu gaplar davomida Xoʻja Husayn qoʻynidan uncha katta boʻlmagan zarhal muqovali bir kitob oldi. Bu – moʻjaz harflar bilan koʻchirilgan Qur'on edi. Xoʻja Husayn uni koʻziga surtib oʻpdi-yu, oʻrnidan turib Sherxonga uzatdi.

 Davlatpanoh, siz aytgan dono gaplarga mana shu Kalomi Olloh guvoh boʻlsin, oling!

Sherxon birdan sergaklandi:

- Taqsir, siz bu... Qur'onni o'rtaga qo'yib bizga qasam ichirmoqchimisiz? - dedi.

Sherxonning koʻzlari tahdidli chaqnaganidan qoʻrqib ketgan Xoʻja Husayn:

- Zinhor bunday niyat xayolimga kelgan emas, davlatpanoh! dedi.
 Sizga nek maqsad yoʻlida Qur'oni sharif madadkor boʻlsin deb... savgʻo tarzida olib keldik.
- Unday bo'lsa biz savg'oni qabul qilg'aymiz! Sherxon Qur'onni
 Xo'janing qo'lidan olib, naridan-beri ko'ziga surtgan bo'ldi-da, mulozimiga uzatdi: Bu sharif kitobni bizning masjidimizga eltib, o'ziga munosib mehrobga qo'ying.

Bundan keyingi muzokara Chunorning Sherxonga qay tartibda topshirilishi haqida ketdi. Humoyun qo'shini Karamnasa daryosidan va Banorasdan nariga o'tguncha Sherxon hozirgi qarorgohidan qo'zg'almay turishga so'z berdi.

Bayramxon muzokarani tugatib ketayotganda:

– Davlatpanoh, siz-u biz yer-u osmon guvohligida sulh tuzib, unga sodiq qolish majburiyatini oldik, – dedi. – Podshohimiz huzuriga shu xulosa bilan qaytsak rozimisiz?

Sherxonning koʻzlari Bayramxonga «sen kim boʻlibsanki, mendan sodiqlik talab qilursen?» – degandek sovuq istehzo bilan tikildi, ammo uning istar-istamas jilmaygan lablaridan:

- Xulosangiz ma'qul, - degan so'zlar eshitildi.

* * *

Elchilar ketgach, Sherxon kecha Agradan kelgan Alvaro Pakavirani o'z huzuriga chaqirtirdi. Pakavira, yo'llarda Humoyun qo'ygan odamlarning qo'liga tushib qolmaslik uchun, hind savdogari kiyimida kelgan



edi. Sherxon uni shahnishindan tushib qarshi oldi, oʻziga yaqin oʻtqazib, past tovush bilan soʻradi:

- Agradan Humoyunga yordam kelmasligi aniqmi?
- Aniq, davlatpanoh, Komron sizga qarshi chiqmagay. U akasining siz bilan jang qilib magʻlub boʻlishini kutmoqda. Shundan soʻng u toj-u taxtni egallash umidida.
 - Bu bizga ma'lum. Hindol-chi?
- Bunisi Humoyunga sadoqat saqlamoqchi ekan. Ammo siz yuborgan maxfiy maktub yordamida biz uning sadoqatini adovatga aylantirdik.
 - Qanday qilib? ishonqiramay soʻradi Sherxon.

Shundan keyin Pakavira voqeaning tafsilotlarini soʻzlay boshladi. Humoyun Agraga kutvol¹ qilib tayinlagan Amir Bahlul poraga sotilmaydigan, podshohga sadoqat bilan xizmat qiladigan vijdonli odam edi. Sherxonning Agradagi xufiyalari masjidi jomeda Said Xalil bilan aloqa oʻrnatib, Bahlulni qanday daf qilishning rejasini tuzdilar...

Yarim tunda Mirzo Hindol va Zohidbek oʻz navkarlari bilan Amir Bahlul uxlab yotgan hovliga bostirib bordilar. Unga Sherxon yozgan maktubni va taxta ortilgan aravalar tagiga yashirilgan qurollarni koʻrsatdilar.

Amir Bahlul bu qadar ustalik bilan toʻqilgan boʻhtondan qutulishning ilojini topolmadi.

Tuhmat balosidan meni faqat Humoyun hazratlari qutqargaylar! – dedi-yu, Agradan qochib chiqdi. Bu qochish ham Hindolning nazarida Bahlulning xoinligini isbot qilganday boʻldi. U yuborgan quvgʻinchilar Bahlulni tungi otishmada oʻldirdilar va boshini kesib qaytdilar...

Bir zarba bilan ham Humoyunning eng sadoqatli kutvoli mahv boʻlgani, ham Hindol bilan akasining doʻstligi adovatga aylangani Sherxonga alohida zavq va mamnunlik baxsh etdi. U Alvaro Pakaviraga shukuhli nazar tashlab:

 Balli, siz bizga yaxshi xizmat qilibsiz, – dedi. – Orzuyimiz amalga oshib, Hindistonda ulugʻ davlat tuzsak, sizga zoʻr inoyatlar qilgaymiz!

Sherxon xazinachini chaqirtirdi. U tadbirkor xufiyalardan oltimi ayamas edi.

¹ Kutvol – qal'a boshlig'i, komendant.



- Janob Pakaviraga ikki man oltin berilsin!

Pakavira quvonib ketdi: ikki man oltin hazilakam boylik emas, bunga yangi kema sotib olish mumkin! U Sherxonga sidqidildan ta'zim qilaqila, orqasi bilan yurib chiqib ketdi.

Sherxon shomiyonada yolg'iz qo'lib, qolini peshonasiga qo'ygancha o'vga toldi. Humoyunga Agradan yordam kelmasligi endi aniq. Sherxonga esa hatto uzoa Farangistondan kelgan Pakavira ham shunchalik ko'mak berdi. Karamnasa daryosining kasofatidan qo'raqan kemachi va eshkakchi hindlarning besh-oltitasi tungi shamol – to'polonda Ganga orqali suzib kelib, Sherxon ixtiyoriga o'tdi. Humoyunning ahvoli tang bo'lgani uchun ham bugungi vakillarini yuborgan. Agar Sherxon lashkarboshilarini chaqirib, «Chunorni jangsiz ishgʻol qilamiz, shu shart bilan sulh tuzdim» desa, ular albatta xursand bo'lishadi, lekin bu xursandchilik uzoq davom etmaydi. Humoyun ertaga Sherxonning sirtmog'idan omon qutulsa, Agraga borib o'zini tez o'nglaydi. U kechirimli yigit, ukalari bilan yarashadi. Yuz amri issiq. Sherxonday xatarli yov qarshisida aka-ukalar birlashishi mumkin. Boburiylar ittifoq bo'lsa, ularga hech kim bas kelolmasligini Sherxon Dalaxruada va Gujarotda Mahmudxon va Bahodirshohlarning mag'lubiyatida ko'rgan. Sherxonning shuncha vaqt chekinib, xazinasini togʻdagi Roxtaslarga bekitib yurgani yetar! Agar Sherxon boshiga yangidan balo orttirishni istamasa fursatni boy bermasligi va Humoyunni daryolar sirtmog'idan tirik chiqarmasligi kerak!

Sherxon oʻyini shu tarzda yakunladi-yu, lashkarboshilardan toʻrt kishini mashvaratga chaqirdi. Sherxonning oʻgʻillari Qutbxon bilan Jalolxon oʻng tomonga oʻtirishdi. Rajputlar sarkardasi Bikramadit Gaur va Sherxonning lashkarboshisi Havasxon chap tomondan joy olishdi. Sherxon shomiyonadagi mulozimlarni chiqarib yuborib, eshikning pardasini tushirtirdi. Qandilda lipillab turgan shamlarning yorugʻida oʻgʻillari va sarkardalariga bir-bir qarab oldi-da:

Mening dunyoda eng ishongan odamlarim – toʻrtovlaring, senlar, –
 dedi. – Biz vatanimizni kelgindilardan ozod qilib, mustaqil davlat tuz moqchimiz. Bu orzu bizlarni roja Bikramadit Gaur bilan ogʻa-ini qildi. Ulugʻ

maqsad yoʻlida biz din-u millat ayirmaymiz. Chunki afgʻonlar ham rajputlar kabi asli ariy qabilalaridan tarqalgan. Biz hammamiz Hindistonda tugʻilib oʻsdik, ota-bobolarimizning qabri ham shu zaminda. Oldin kelgindilar zoʻr keldi, biz chekinib yurdik. Ammo bizning ham omadimiz keladigan paytni sabr-toqat bilan kutdik. Oʻsha payt mana endi keldi! Dushmanning ahvoli tang, Chunorni bizga jangsiz berishga tayyor. Elchilar sulh taklif qildi. Men ularni choʻchitmaslik uchun sulhga rozi boʻldim. Endi bizning hujumimizni kutmagay, daryolardan tezroq oʻtib ketishga shoshilgay.

 Dushmanni gʻaflatda qoldirib bosadigan payt kelibdi-ku! – dedi Havasxon.

Qutbxon bu gapni yoqtirmay, Havasxonga oʻqrayib qaradi. U ikki yil Humoyun askarlari safida xizmat qilib, uning tantiliklarini koʻp koʻrgan.

- Sulhni harbiy hiylaga aylantirib bostirib borish... mardlikka kirarmikin? dedi Qutbxon otasiga yuzlanib.
- Vatanni kelgindilardan ozod qilish dunyodagi eng katta mard-likdir! dedi Sherxon oʻgʻliga tik qarab. Bobur bilan fotihlar Panipatda qirq ming kishini oʻldirdilar. Bajur qoʻrgʻonida Boburning farmoni bilan uch ming kishi qatli om qilinganda ularning kallasidan minora yasalmish-dir! Humoyun Panipatda ikki yuz kishini asir olganda Bobur siyosat uchun shu asirlardan yuztasini toʻfanglardan otib oʻldirishni buyurmishdir. U paytda bizning odamlar toʻfang nimaligini bilmas edi. Shuning uchun toʻfang qarshisida bexavotir turganlarni fotihlar shafqatsizlarcha otib yiqiturlar. Ana undan soʻng: «Fotihlarda ilohiy qurol bor emish, hind xudosi Shivaga oʻxshab koʻzidan olov purkab, uzoqdagi odamni oʻldira olarmish!» degan ovozalar tarqalmishdir. Xalqni qoʻrqitib boʻysundirishga qaratilgan bu ovozalar harbiy hiyla emasmidi?
- Ha, temuriylar bizni zoʻravonlik bilan ham qirgan, hiyla-yu nayrang bilan ham qirgan! – dedi Bikramadit Gaur. – Endi shu kecha ularga qasos qaytmogʻi kerak!
- Bajurda qonxoʻrlarcha qatli om qilinganlar uchun ham, Panipatda vahshiylarcha otilgan harbiy asirlar uchun ham biz qasd olmogʻimiz kerak! – qat'iy qoʻshimcha qildi Sherxon.

Qutbxon bu asosli gaplarga qoʻshilmay iloji qolmadi.



- Yarim tunda sekin yoʻlga chiqamiz, - dedi Sherxon. Sahar palla tong yorisha boshlaganda bosmoq lozim.

Ular kim markazda, kim oʻng qanotda, kim chap qanotda hujum qilishining aniq rejasini tuzishga kirishdilar.

Boshqa kunlar Sherxonning qoʻqqis hujum qilishini kutib sergak yotadigan Humoyun kechagi sulh xabarini eshitgandan keyin xotirjam boʻlib, juda qattiq uyquga ketgan edi. Tong qorongʻisida qarorgohning sharqi-janubidan boshlangan va toʻrt tarafga yashin tezligida yoyilgan jang toʻpoloni, fillar na'rasi, odamlarning qiy-chuvi, tigʻlarning shaq-shuqi, toʻfanglarning gumburlashi uni mast uyqudan uygʻotganda, «yana yomon tush koʻrdim shekilli», deb oʻyladi. Lekin eshikdan yugurib kirgan Javhar oftobachining qoʻrqinchli vajohati:

 Hazratim, yogʻiy bosdi! – degan soʻzlari uning boshiga quyilgan sovuq suvday vujudini seskantirdi.

U sakrab turib, etigiga paytavasiz oyoq tiqdi. Javhar oftobachi qaltirab tutgan toʻnni kiyib, qilichini shosha-pisha taqdi. Sadoqatli oftobachi uning koʻkragiga poʻlat choroyna, yelkasi va qoʻliga boshqa zirhli narsalar ham kiydirmoqchi edi, lekin bunga Humoyunning sabri chidamadi. U dubulgʻani yoʻlakay boshiga kiydi-da, chodirdan tashqariga otildi. Yomgʻir sevalab turgan tong gʻira-shirasida qarorgohning janub chetidagi chodirlami yiqitib, odamlarni bosib-yanchib, na'ra tortib kelayotgan yuzlab harbiy fillar Humoyunning koʻziga tashlandi.

- Menga ot keltiring! - qichqirdi u. - Bayramxon qani? Ustod Xonquli, zambaraklarni oʻqlang!

Humoyunga ogʻir zirhli kejim yopilgan saman otni keltirdilar. Uzangi tezda oyogʻiga ilinmagach, otning boʻyniga qoʻlini solib, egarga sakrab mindi. Shu payt Bayramxon yigirmatacha navkar bilan ot choptirib keldi.

Sherxon sulhni buzib nomardlik qildi! Hazratimni oʻrtaga olinglar!buyurdi Bayramxon navkarlariga.

Qarorgohning yov kelgan janub chetidagi yuzlab navkarlar saflanishga ulgurolmay, tum-taraqay boʻlib qocha boshladi. Selday bostirib kelayotgan yov otliqlari ularni daryolar tomonga surib ketdi.

 Bizning harbiy fillar qani? – qichqirdi Humoyun. – Zambaraklar nechun jim? Xonqulibek!



- Hamma gʻaflatda qoldi! - dedi Bayramxon, soʻng toʻpxona va filxonalarga ot choptirib ketdi.

Humoyunning koʻzi saropardaga tushdi. Uning ichkarisidan bolalarning qoʻrqib yigʻlagan tovushlari eshitildi. Ayollarning ahvoli nima boʻladi? Olti yashar qizchasi Aqiqa begim, xotinlari Beka begim, Chand bibi hammasi oʻsha ulkan saroparda ortidagi chodirlarda.

Humoyun otning boshini saroparda tomonga burdi. Qoʻriqchi navkarlar uni uch tomondan o'rab ola boshladi. Tepadan tushayotgan yovning harbiy fillaridan o'ttiz-qirqtasi saroparda tomonga chopib kelayotganini ko'rdi. Shu payt ularning garshisidan gumburlagan to'fanglar otildi. Borut tutuni orasidan yaralangan fillarning asabiy bo'kirigi quloqqa chalindi. Qarorgoh xiyla katta maydonni egallagan, unga Humoyunning o'n ikki ming qo'shini, shunga yarasha ot-ulov va to'pxonalari joylashgan. Sherxonning otliglari va fillari janub tomondan yorib kirguncha markazda va shimolisharqda Humoyun askarlarining uch-to'rt mingi otlanib, qurollanib, dushmanning yoʻlini toʻsib chiqdi. Xos navkarlar otgan toʻfang oʻqlari yov fillariga va otliqlariga borib tegayotganini koʻrgan himoyachilar yov otliqlari bilan astoydil olisha boshladilar. Qilichlar va nayzalar bir-biriga urilib, to'da-to'da otliqlar uymalashib, olishib qoldi. Markazda ikki tomonning harbiy fillari bir-birlarini tepib, tishlarini tishlariga qarsillatib urar, fil ustidagi kajavalarda o'ltirgan merganlar yov filining ko'zini yoki filbonning ko'kragini mo'ljalga olib yoydan o'q otishardi.

* * *

Ammo qarorgohning ikki chetida qarshilik koʻrsatuvchilar safi juda siyrak. Selday yopirilib kelayotgan Sherxon otliqlari yalangoyoq, yalangbosh qochib ketayotganlarni quvib yetib, qilich bilan chopib tashlamoqda. Daryo qirgʻogʻiga qochib borganlar kemalar va qayiqlarga tashlanyapti. Chap qanotni ezib-yanchib oʻtgan rajput otliqlari markazdagi Sherxon askarlariga yordamga yetib keldilar. Humoyunning harbiy fillari Sherxonnikidan oz, zambaraklarning chaqmoq bilan yondiriladigan piltalari rutubatli zax havoda nam tortib qolgani uchun Xonqulining sarosima harakatlari natija bermadi. Zambaraklar oʻq otgunlaricha boʻlmay, dushman

fillari toʻpxonalar ustiga bostirib keldi. Oʻqlangan, ammo otib ulgurilmagan, piltasi yonmay tutab turgan zambarak quvurlarni xartumlari bilan koʻtarib loyga otdilar. Toʻpchilarning qochib ulgurolmaganlarini kajavadagi merganlarning oʻqi va ortdan kelgan otliqlarning qilich-u nayzalari nobud qildi.

Naryoqdan otliq yetib kelgan Humoyun qarorgoh markazi ham yov qoʻliga oʻtganini, faqat daryo boʻyi hali xatarsiz ekanini koʻrdi:

Ayollar bilan bolalar daryo boʻyiga olib oʻtilsin! – deb qichqirdi. –
 Bayramxon, siz markazdan kelayotgan yovning yoʻlini toʻsing!
 Mavludbek, xaylxonani¹ kemaga eltib joylang!

Mavludbek boshlab chiqqan Beka begim, Aqiqa, Chand bibi, Bayramxonning oʻttiz besh yoshlardagi turkman xotini, yana bir qancha kanizlar, xizmatkor ayollar shosha-pisha daryo tomonga yoʻl oldilar. Biroq ular qirgʻoqqa yetib borguncha daryo chetidagi kema va qayiqlar oldinroq qochib borgan bek-u navkarlarga toʻlib qolgan edi. Vahima ichida tartib-intizomni unutgan, jonidan boshqa narsa koʻziga koʻrinmay qolgan odamlar birdan-bir najot mana shu kema va qayiqlar ekanini allaqachon sezishgan edi. Kemachi va eshkakchilar betartib qochib kelganlarni podshoning ruxsatisiz kemaga kiritmaslikka urinib qarshilik qildilar. Qilich va xanjarlar ishga tushdi. Lekin qochqin olomon benihoya koʻpayib ketdi, qarshilik qilgan kemachilarni surib, itqitib oʻtdi. «Gunjoyish» kemasining eshkakchilaridan biri boʻlgan Nizom bu ur-surda oʻzini chetga olib zoʻrgʻa omon qoldi. Zoʻrlik bilan tortib olingan kema va qayiqlar saropardadan olib chiqilgan ayollar va bolalarning yetib kelishiga qarab oʻtirmay narigi qirgʻoqqa tomon yoʻl oldi.

* * *

Qayiqlarni ham boshqa qochqin navkarlar va beklar tortib olishdi. Nizom qirgʻoq chetidagi omborda meshlar borligini esladi. Chopib kelib kattaroq bir meshni tanladi-da, qaytib chiqdi. Bu orada dushman otliqlaridan uchtoʻrt yuztasi Mavludbek boshlab kelayotgan ayollar va bolalarning yoʻlini toʻsib chiqayotganini koʻrdi. Nizom yov otlarining oyogʻi tagida qolib ketishdan qoʻrqib, qirgʻoq boʻylab Humoyun tomonga qochdi.

¹ Xaylxona – podshoh va a'yonlarning xotin, bola-chaqalari.



Bayramxonning otliqlari Humoyunni oʻrab olib, tepalikning narigi tomonidan daryo qirgʻogʻiga qarab chekinmoqda edi. Dushman otliqlari podshohning xos navkarlari safini yorib oʻtolmadi. Shunda yovning harbiy fillaridan uch-toʻrttasi himoyachilar halqasiga tashlandi. Xos navkarlarda to'fanglar bor edi. Fillardan ikkitasi to'fanglardan ustma-ust otilgan to'ng'iz oʻqlarga uchrab yiqildi. Ammo sagʻrisiga oʻq tekkan, yara ogʻrigʻidan battar quturib ketgan uchinchi fil to'fang otayotgan navkarlarga bo'kirib hamla qildi. Otlardan birini qattiq tepib, chavandozi bilan ag'anatib yubordi. Humoyun himoyasida turgan ikkinchi otliq navkarni xartumi bilan belidan oʻrab olib egardan dast koʻtardi-yu, bigʻillatib qisib, yerga chalpak qilib urdi va tanasini oyogʻi bilan bosib-yanchib oʻtdi. Dargʻazab fil qarshisida himoyasiz qolgan Humoyun qilichini qinidan sugʻurdi. Fil unga xartumini choʻzib yaqin kelganda Humoyun qora ilonday harakatchan bu baloni kesib tashlamoqchi bo'lib qilich sermadi. Ammo xartum qilichdan chaqqonroq edi. Tigʻ borguncha fil oʻz xartumini yoʻgʻon oq tishlarining panasiga olishga ulgurdi. Humoyun zarb bilan urgan qilich filning yoʻgʻon soʻyloq tishlari orasidagi qalin terisini kesib o'tdi-da, teri bilan tish suyagi orasiga kirib ilinib qoldi. Humoyun qilichni sugʻurib olguncha boʻlmay oʻng yelkasiga yoy o'qi jazillab sanchildi. Fil ustidagi kajavada o'tirgan merganlar uning koʻkragini moʻljalga olgan, lekin oti tinimsiz harakatda boʻlgani uchun oʻq yelkasiga tekkan edi. Shoshilinchda zirhli kiyim kiymagani uchun Humoyun endi afsus qildi. Ogʻriqdan jonsizlangan oʻng qoʻli qilichni sugʻurib olishga yaramadi. Fil bir silkinganda oltin qilich dastasi Humoyunning qoʻlidan chiqib ketdi. Yoʻgʻon qora xartum qaytadan uning boʻyniga choʻzilib kela boshladi. Humoyun chap qoʻli bilan otning jilovini keskin siltab chetga burdi-yu, yol ustiga engashdi. Shu payt uning yonginasida yana to'fang gumburladi. Fil Humoyun bilan andarmon bo'lgan paytda to'fangni qayta o'qlashga ulgurgan xos navkarlardan biri filning peshonasini moʻljalga olib tepkini bosgan edi. Tishiga oltin qilich ilinib qolgan, sagʻrisidan va xartumi ustidan qon oqayotgan ulkan fil endi peshonasini qoraytirib teshib kirgan oʻqdan gandiraklab orqaga tisarildi-da, gursillab yiqildi.

Orqadan yana yov otliqlari va fillari bostirib kelmoqda edi. Bayram-xonning ovozi keldi:

- Hazratimni daryo boʻyiga olib ketinglar! Biz yogʻiyni oʻtkazmagaymiz! La'l Chand, filingiz bilan himoyada turing!

Humoyunning yelkasiga qadalib turgan uzun yoy oʻqi ot yoʻrtganda qattiq silkinar va jazillatib ogʻritar edi. Humoyun himoyachi navkarlar qurshovida ot choptirib borar ekan, yana yol ustiga engashib, chap qoʻlini oʻng yelkasiga choʻzdi-yu, qadalib turgan yoy oʻqini bir harakat bilan sugʻurib tashladi. Shu payt ogʻriqdan ingrab, otning yoliga yuzini bosdi. Javhar oftobachi oʻng tomondan otini jips keltirib, uni qoʻltigʻidan suyadi. Yelkadan oqayotgan qonni toʻxtatish uchun yaralangan joyni yumshoq salla matosi bilan besh-olti marta oʻrab, qattiq chirmadi-yu, qoʻltiq tagidan tangʻib bogʻlab qoʻydi.

Bayramxon va La'l Chand markazdan o'tib kelgan yovning yo'lini to'sgan bo'lsa ham, ikki qanotdan yorib kirgan boshqa yuzlab otliqlar Humoyunga qarab yopirilib kelmoqda edi. Humoyun orqaga o'girilib qarab, Bayramxon La'l Chand boshliq fillar yordamida himoyada turganini ko'rdi.

Qirgʻoqda birorta kema ham, qayiq ham yoʻq. Odam toʻla bir kema qirgʻoqqa yetay deb qolgan. «Mavludbek bolalar bilan ayollarni oʻsha kemada olib chiqib ketgandir», degan oʻy Humoyunga ozgina tasalli bergandek boʻldi. Oʻng qanotdan otilib chiqqan yov otliqlari yuzdan ortiq. Humoyunni himoya qilib qirgʻoqqacha kelgan navkarlar esa oʻttiz-qirqtagina xolos. Qurshovda qolib asir tushish oʻlimdan ham dahshatliroq. Humoyun qilich dastasini qidirib belini paypasladi. Ammo boʻsh yengil qin salanglab osilib turganini koʻrdi va boyagi yarador filni esladi.

Chugʻurchuqday behisob dushman otliqlari tobora yaqinlashib kelayotgani Nizomni ham sarosimaga soldi. U qoʻlidagi meshga havo puflab, uni tarang qilib shishirdi-da, ogʻzini mahkamlab bogʻladi. Mesh yordamida narigi qirgʻoqqa suzib oʻtish uchun suvga qarab chopdi.

Bo'tana bo'lib to'lib oqayotgan toshqin daryo Humoyunning vahmini keltirdi. Lekin yaqin kelib qolgan dushmanlarga asir tushish undan ham dahshatliroq edi. Tagidagi saman – zo'r ot, Humoyun suzishni biladi. Xos navkarlar yov ilg'orlarining yo'lini to'sib, ular bilan qilich chopisha boshlagan paytda Humoyun Nizom suvga tushgan joydan sal nariroqda otni



qirgʻoqdan daryoga sakratdi. Suv avval otning sonigacha keldi, keyin qorniga chiqdi. Humoyun egardan tutib sogʻ qoʻli bilan samanning boʻynidan quchoqlab oldi. Oʻng qoʻli butunlay ishdan chiqqan, sal qimirlatsa yelkadagi yara ogʻrigʻiga chidab boʻlmaydi. Daryo birdan chuqurlashib, otning oyogʻi yerga tegmay qoldi. Ot ustiga yopilgan ogʻir zirhli kejim va uning boʻyniga osilib olgan yarador Humoyunning vazni samanni choʻktirib yubora boshladi. Ot pishqirib tumshugʻini suvdan chiqardi-yu, birpas suzib koʻrdi, ammo yana suvga botib ketdi. Humoyun otning boʻynini qoʻyib yuborib bir qoʻllab suzib ketdi. Ammo kutilmagan girdoblar uni pastga tortib ketayotganday boʻldi-yu, yana choʻkayotgan otning yoliga yopishdi.

Bu orada Humoyun oqim kuchi bilan Nizomga yaqin borib qoldi. Meshga ko'kragini berib qiyalab suzayotgan Nizom esa podshohga bir joyi tegib ketishidan cho'chib o'zini nariroq oldi.

Axir daryolar oraligʻidagi bu bexosiyat joyni qarorgoh qilishga Nizom ham boshqa hind suvchilari qatori qarshi edi. Lekin Humoyun ularning ogohlantirishiga quloq solmadi, yana xushomadgoʻy beklarning gapiga kirdi, chodirda may ichib yotib fursatni boy berdi. Bugun koʻp qatori Nizom ham shu xatolarning kasofatiga qoldi. Bas, endi Nizom bu podshoga yaqin bormaydi. Laganbardor beklari Humoyunni «yengilmas botir» deb maqtashadi. Qani Karamnasa ichida shu botirligini bir koʻrsatsin! Boya daryoga ot sakratib kirganiga qaraganda hash-pash demay narigi qirgʻoqqa suzib oʻtsa ajabmas.

Bu kinoyali oʻylar asnosida suv tagidagi allaqanday oʻpqon girdobi Nizomni oyoqlaridan pastga torta boshladi. U koʻkragini qoʻygan mesh ham kuchli girdobga tushib aylanib ketdi. Toʻsatdan Nizomning nafasi qaytib, koʻzi tinganday boʻldi.

Hind kemachilarining Karamnasadan hayiqib, uni chetlab oʻtishlari bejiz emas edi. Bu daryoning tagida chuqur oʻpqonlar koʻp, suv girdobi ularga quyilib tushayotganda odamni ham pastga tortib ketar edi. Yomgʻir faslida togʻ ichidagi simob konlaridan Karamnasa daryosiga koʻngilni aynitadigan, hatto odamni es-hushidan ketkazadigan badboʻy, zaharli narsalar oqib kelardi.

Zaharli hovurdan koʻngli ayniy boshlagan Nizom mesh ustiga yuztu-



ban yotib oldi-yu, qoʻl-oyoqlarini eshkak oʻrnida ishlatib, talpina-talpina girdob komidan chiqdi. Bir payt shunday yonginasida suvga choʻkayotgan Humoyunni koʻrdi. Humoyun qoʻl-oyoqlarini kerib yuqoriga bor kuchi bilan talpindi-da, boshini bir lahza yuzaga chiqardi, yutoqib nafas olarkan:

 Kim bor? Qutqaring! – deyishga ulgurdi-yu, yana loyqa girdoblar orasiga cho'kib keta boshladi.

Nizom uning chindan gʻarq boʻlayotganiga endi ishondi va beixtiyor meshni unga yaqin olib bordi. Humoyun yana bir talpinib suv yuziga chiqqanda Nizom uni yelkasidan tutib oldi-da, mesh ustiga ikki qoʻllab tortib chiqardi.

Hoʻkizning terisidan qilingan mesh kattagina boʻlsa ham, ikki kishining ogʻirligini koʻtarolmay, suvga botib ketdi. Buni koʻrgan Nizom qoʻlini mesh chetidan va Humoyunning yelkasidan olmagan holda tanasining butun ogʻirligini suvga tashladi. Shunda mesh suv yuziga yana qalqib chiqdi. Humoyun sogʻ qoʻli bilan meshga jon holatda yopishdi-yu, Nizomning yordamida koʻkragini va zilday ogʻir oʻng yelkasini mesh ustiga chiqarib oldi. Ichiga ketgan suvdan oʻqchib yoʻtaldi, nafasini rostlay olmay hansiradi, yelkasidagi yara ogʻrigʻidan ihradi.

Nizom uning Agrada fil minib, Koʻhinur olmosini peshonasiga qadab yurgan paytini esladi. Oʻshanda Humoyun Nizom uchun qoʻl yetmas bir balandlikda edi. Hamida bonuni bu yigitga bermoqchi boʻlganlarini eshitib, Nizom qanchalik iztirobga tushgan edi! Humoyun Agraga omon qaytsa, qizni unga hali ham olib berishlari hech gap emas. Bu oʻy Nizomning qalbini kuydirib oʻtdi. Ikki kishi bir meshda bu xatarli daryodan suzib oʻtishlari amrimahol. Suvosti oʻpqonlari Nizomni ham Humoyunga qoʻshib pastga tortib ketishi mumkin.

Lekin Humoyun ogʻriqdan ihraganda Nizom uning yelkasidan yaralanganini, tangʻib bogʻlangan lattada qonli dogʻlar borligini koʻrdi. Daryo boʻyida oʻsgan Nizom suvga gʻarq boʻlayotgan kattami, kichikmi, kimni koʻrsa yordam qilib oʻrgangan. Humoyun hozir avvalgi magʻrur hukmdor emas, balki Sherxonning sulh haqidagi gapiga ishonib aldangan, yarador bir jangchi. Nizom Hamidaga oid dardi-yu qalbida bir lahza bosh koʻtargan raqiblik tuygʻusi tufayli uni qutqarmay tashlab ketadigan boʻlsa, keyin odamlarning yuziga qanday qaraydi? Qutqarish mumkin boʻlgan odamni koʻra-bila turib choʻktirib yuborish – yoʻq, Nizom bunday qilolmaydi!

U butun kuchini, shuncha yil daryoda orttirgan bor tajribasini ishga solib meshni Humoyun bilan birga girdoblar orasidan olib chiqa boshladi. Humoyunga qarab:

 Siz ham oyoqni ishlating! – deb buyurdi. – Suv ostida oʻpqonlar koʻp. Tortib ketmasin!

Humoyun mingan saman otni bu oʻpqonlar allaqachon suv ostiga tortib ketgan edi. Yovdan qirgʻoqqa qochib kelib oʻzini suvga tashlayotgan minglab otligʻ-u piyodalar ham shu girdoblar orasiga suzib kirgandan keyin daqiqa sayin kamayib yoʻq boʻlib bormoqda. Humoyun hindlarning Karamnasadan bunchalik qoʻrqib irim qilishlariga sabab borligini endi bildi-yu, suv ichida oyoqlarini suzgan kabi harakatlantirib, Nizomga yordam bera boshladi.

Humoyun koʻp uringan sari yelkasidagi yaradan qon ketib, uni darmonsizlantirib qoʻydi. Buning ustiga daryoning oʻrtasida nafasni boʻgʻadigan badboʻy hovur quyuqlashib ketdi. Humoyunning koʻzi tinib boshi aylandi, qoʻli ham jonsizlandi, ogʻir gavdasi meshdan suvga sirgʻalib tusha boshlaganda:

- Yigit... meni... tuti... - deyishga ulgurdi.

Nizom tezda meshning old tomoniga oʻtdi-yu, Humoyunni sogʻ qoʻlidan va toʻnining yoqasidan tutib, yana mesh ustiga tortib chiqardi.

Badbo'y bug'lar Nizomning ham ko'nglini behud qilib, ko'zini xiralashtirdi. Shunda u bir qo'lini bo'shatib, salqin suv bilan yuzini yuvdi. Bu biroz yengillik berganini sezdi-da, ho'l qo'lini Humoyunning peshonasiga qo'yib turdi. Humoyun ko'zini ochdi.

Daryo oqimi meshni shitob bilan Ganga tomonga oqizib ketmoqda edi. Humoyun hushini yigʻib, Nizomga koʻz tashlar ekan, xuddi boshqa dunyodan qaytib kelganday boʻldi.

Nizom uning ko'z ochganidan yengil tortib:

- Xayriyat! - dedi. - Meshni mahkam tuting. Bu oqim bizni Gangaga oqizib borsa gʻarq boʻlgʻaymiz. Ikki daryo ayqashgan joy juda xatarli!



Humoyun sogʻ qoʻli bilan mesh chetidan boʻshgina ushladi-yu, koʻzini yumdi. Unda umidsiz bir loqaydlik paydo boʻldi. Bu daryolardan tirik chiqolmaydiganga oʻxshaydi. Qiynoqlar tezroq tugay qolgani afzal emasmi? Koshki tezroq hushidan ketsa!..

- Meni qoʻying, dedi u Nizomga. Oʻzingizni qutqaring...
- Yoʻq, hazrat! Men sizning kemangizda xizmat qilib maosh olurman. Sizni suvdan oʻtkazib qoʻymasam menga bergan noningiz harom boʻlgʻay. Men halol non yeb oʻrganganman!

Humoyun sergaklandi. Yalangoyoq bir eshkakchi deb, kemada koʻrganda pisand qilmay yurgan yigit shunday xatarli asnoda ham halolharomni unutmasa, bunda bir karomat bor.

Birga zo'r bersak, omon chiqg'aymiz, hazrat! – dedi Nizom. – Siz meshni mahkam tutsangiz bas! Ushlang! Mahkam ushlang!

Nizomning ovozida shunday bir qat'iyat va ishonch bor ediki, Humoyun shuning ta'sirida «zora tirik qolsam!» deb umidlandi. U endi o'zidan ko'ra Nizomga ko'proq ishona boshladi. Humoyun bu suvchi yigitning irodasiga so'zsiz bo'ysunib, ko'kragini mesh ustiga yaxshiroq o'rnatdi-da, sog' qo'li bilan uning narigi chetini qattiq changallab oldi. Nizom bo'ynigacha suvga botgan holda meshni ikki qo'llab narigi qirg'oq tomon surdi, oyoqlarini ham, butun gavdasini ham g'ayir¹ oqimga qarshi jonjahdi bilan ishlatib, vujudidagi barcha muskullarni go'yo suzgichga aylantirib yubordi. Humoyun ko'kragi bilan osilib yotgan mesh oqimni yorib o'tib, narigi qirg'oqqa tomon qiyalab bora boshladi. Qirg'oqdagi yashil daraxtlarni, ko'katlar orasiga sochilgan rang-barang gullarni Humoyunning ko'zi endi ko'rdi. Unda birdan yashash ishtiyoqi kuchayib ketdi. Endi u ham suvdagi oyoqlarini oqimga urib, suzgandagi kabi harakatlar bilan Nizomga yordam bera boshladi. Mesh boyagidan yengilroq va tezroq harakatlanib, nihoyat, narigi qirg'oqqa yetib to'xtadi.

Ular suv chetidagi shagʻal aralash loyqadan ogʻir qadamlar bilan yurib oʻtishdi-yu, pastgina qirgʻoq boʻyidagi koʻkalamzorga choʻzilishdi. Anchagacha ogʻir nafas olib, hansirab yotishdi.

Bulutlar orasidan sizib chiqqan xira oftob nayza boʻyi koʻtarilgan edi.



¹ G'ayir - o'jar, teskari.

Tong g'ira-shirasida boshlangan dahshat bir necha soat ichida Humoyun qo'shinini tor-mor qildi, ne-ne yigitlar suvga g'arq bo'lganini uning o'zi ko'rdi. Sherxon hozir daryoning naryog'ida g'alaba zavqini surayotgan bo'lsa kerak...

Qaytib berilgan hayot tuygʻusi barcha koʻrguliklar alamidan zoʻrroq boʻlishini u endi sezdi. Yelkasidagi yara ogʻrigʻini ham unutib, oʻrnidan turib oʻtirdi. Yonida hamon nafasini rostlay olmay hansirab yotgan Nizomga iymanibroq koʻz tashladi. Uni oʻzidan bir necha bor ustun boʻlgan tengsiz bir bahodirday e'zozlagisi kelib:

– Siz menga inilarim qilmagan yaxshilikni qildingiz, – dedi. – Otingiz nedur?

Nizom yonboshga turib, o'z otini aytdi.

- Nizom! deb Humoyun uning otini yoqtirib takrorladi. Bu daryo ichida ikkovimiz dunyoga qaytadan kelganday boʻldik.
 - Rost, onadan qayta tugʻildik,- dedi Nizom ham.
- Hozir siz menga tugʻishgan inimdan ham azizroqsiz. Nomingizni Dehlidagi Nizomiddin avliyoning nomiday ulugʻlasam arzigay!

Nizom Humoyunning podsholigini unutgan edi. Kiyimlari shalobbo hoʻl, yarador, yalangoyoq bu yigit zamona zoʻrlarining boshida turgan tojdor ekani birdan esiga tushdi.

- Agar meni rostdan tutingan ini oʻrnida koʻrsangiz, sizga ikki ogʻiz arzim bor.
 - Ayting, bajonudil tinglay!
- -- Poraxoʻr amaldorlar bilan aldamchi shayxlar mamlakat xalqini sizdan bezdirdi. Qancha hind yigitlari Sherxon tomonga oʻtib ketdi. Axir Sherxon hindi-yu muslimni bir-biridan ajratmas ekan!..
- Men ham hindi-yu muslimni yakdil qilish orzusida edim. Ammo bu mushkul ishda kimga tayanishimni bilmadim.
- Hind eliga tayaning-da, hazrat. Bu elda bhaqtiylar¹ bor. Ularning shoiri Kabir hindi-yu muslimni oʻz dilida birlashtirgan. Mening otam bhaqtiy boʻlgani uchun tuhmat bilan zindonga tashlandi.

Bhaqtiylar – adolatparvar xalq harakatining ishtirokchilari.



- Kim tuhmat qildi?
- Siz ishongan amaldor-u shayxlar.
- Men oʻzim bu adolatsiz muhitdan qanday qutulishimni bilmasmen! Otangiz Agradagi zindondami? Poytaxtga qaytaylik... Siz oʻzingiz... otangizga tuhmat qilgan amaldor-u shayxlarga jazo bergaysiz.
 - Men? ishonqiramay so'radi Nizom.
- Ha, omonlik bo'lsa, siz hali istaganingizdan ham katta martabaga erishgaysiz.

Nizom istagan martaba nima ekanini oʻzi ham bilmaydi. Uning eng zoʻr istagi — otasini zindondan qutqarish-u, Hamidani yana koʻrish. Bu goʻzal qizni u juda sogʻinib yuribdi. Lekin Hamida toʻgʻrisida Humoyunga ogʻiz ochishga tili bormadi. Faqat podshoni qutqargani hali taqdirida katta oʻzgarishlarga sabab boʻlishini ich-ichidan sezdi-yu, yuragi gʻalati boʻlib hapriqdi...

* * *

Tarixiy mavzuda badiiy asar yozish ijodkordan katta mas'uliyatni talab etadi. Chunki tarix konkret bo'lib o'tgan, hech bir narsani qo'shish yoki olib tashlash mumkin bo'lmagan voqealar silsilasidir. Erkin mavzularda qalam tebratayotganda, yozuvchi oʻzining xayol kuchiga, fantaziyasiga istagancha erk berishi, oʻzi oʻylab topgan u yoki bu hodisani, oʻz maqsadiga koʻra, u yoxud bu yoʻnalishda davom ettiraverishi mumkin. Bunda faqat mantiqqa va badiiy ishontirish san'atiga amal qilinsa, bas. Fantastik mavzular talqinida esa yozuvchi bundan-da koʻproq erkinliklar egasiga aylanadi. Tarixiy mavzu haqida bunday deb bo'lmaydi. Zero, tarix muayyan xalqning xotirasi, asrabavaylaydigan ma'naviy bisoti hisoblanadi. Bu bisotga kim qanday xohlasa shunday yondashuviga oʻzini hurmat qilgan biror xalq yoʻl qoʻyib qoʻymaydi. Bu mas'uliyat tarix taqdirini belgilab bergan hodisalar boshida turgan yirik shaxslar – podsholar, qirollar, prezidentlar, yirik davlat va din arboblari, katta siyosatchilar haqida asar yozilayotganda yana-da ortadi. Tarixning har bir hodisasini yoritishda, uni talqin etishda xolislik, odillik, halollik talab qilinadiki, bu narsa ijodkordan juda katta bilimni, fuqarolik mas'uliyatini so'raydi.

Pirimqul Qodirov shu ma'noda, Cho'lpon iborasi bilan aytganda, «bo-



shini zoʻr ishga berib qoʻygan» ijodkor hisoblanadi. Zero, Bobur va boburiylar tarixini yoritish hazilakam ish boʻlmay, bu mavzularning yozuvchi, albatta, hisobga olishi lozim boʻlgan minglab qirralari bor edi.

Shulardan biri bu sulola hukm surgan bugungi Afgʻoniston, Pokiston, Hindiston singari davlatlarda yashovchi aholining oʻz tarixiga munosabati, boburiylarga qarashi masalasidir. Chunki bu yurtlarda ham hozirga qadar yuzlab ijodkorlar, olimlar, siyosatchilar, hatto yirik davlat arboblari bizning vatandoshlarimiz — boburiylarga oʻz munosabatlarini u yoki bu tarzda bildirganlar. Ular oʻz qarashlarini himoya qilish huquqiga esa hamma vaqt ham haqlidirlar.

Toʻgʻri, Pirimqul Qodirov ixtiyorida hazrat Bobur qalamiga mansub tengsiz asar — «Boburnoma», uning qizi Gulbadanbegim tomonidan bitilgan «Humoyunnoma» singari koʻplab tarixiy, yuzlab badiiy manbalar bor edi. Lekin, shu narsani inobatga olish kerakki, P. Qodirov tarixchi sifatida emas, ijodkor — yozuvchi sifatida maydonga chiqadi. Ijodkordan esa oʻquvchi tarixning quruqdan-quruq bayoni yoki ilmiy izohini emas, san'atni talab qiladi. San'atki, xoh tarixiy, xoh toʻqima insonlar obrazi boʻlsin, ularning faqat jismi emas, ruhi ham qayta tirilsin, bugungi kun kishisini oʻz dunyosiga «tortib olsin»!

Xoʻsh, Pirimqul Qodirov mana shu ogʻir estetik talabni bajara olganmi? Keling, bu savolga «Ajdodlar dovoni» asaridan olingan, yuqorida oʻqiganimiz parchadan kelib chiqib javob topishga urinaylik.

Tarix kitoblarida Ganga va Karamnasa daryolari qoʻshiladigan joyda siquvda qolgan boburiy podshoh Humoyun Mirzoga qoʻqqisdan qilingan hujum shu hududlarga da'vogar Sherxonning sulh haqidagi bitimni xiyonat-korona buzishi, deya baho berib ketilaveradi. Pirimqul Qodirov esa boburiy shahzoda ahvoliga har qancha achinmasin, «u tomonni» ham tushunishga, tushuntirishga harakat qiladi. Sherxon, asarda tasvirlanganidek, oʻqimishli, aqlli, tadbirkor, harbiy san'atni puxta egallagan shaxs. U, bir soʻz bilan aytganda, Humoyunga munosib raqib, dushman. Qolaversa, uning Bobur va uning avlodlariga fotih sifatida qarashga va ularga munosabatini shu asosga qurishga nedir haqqi ham bor. U oʻz koʻnglidagi toj-taxtga ega boʻlishdek oʻta kuchli istakka shu bahona-yu sabablar bilan tezroq yetishish

mumkinligini ham yaxshi biladi. Uning, oʻz ogʻzi bilan sulhga rozilik berib, endi uni buzish, Humoyunni gʻaflatda bosish haqidagi rejasiga ozgina e'tiroz bildirgan oʻgʻli Qutbxonni «asosli gaplar» bilan ketma-ket inkor etib tashlashi Sherxonning qanchalar usta siyosatchi, notiq ekanini ham isbotlaydi. Sherxon oʻz maqsadlari yoʻlida ish berishi mumkin boʻlgan har qanday omildan samarali foydalanishga erishadi. Oʻsha paytdayoq u farang xufyalari (razvedkachilari) xizmatidan voqif boʻlib, ularni harb ishiga jalb etgani, bu xufyalar taklifi va oʻrgatgan usullarini qoʻllab boburiylar orasiga nifoq sola olgani ham, istaymizmi-yoʻqmi, saltanat ishida Sherxon erishgan muhim gʻalabalar sirasiga kiradi.

Yozuvchi o'sha zamon diplomatiyasiga oid nozik jihatlarni ham hisobdan chetda qoldirmagani asarning ta'sir kuchini, voqealarning ishontirish quvvatini oshirgan.

Masalan, Sherxon oldida Bayramxon bor-yoʻgʻi bir elchi, ikki podshoh oʻrtasidagi vositachidir. Elchining hayoti, bilasizki, uning tiliga, muomalasiga koʻp jihatdan bogʻliqdir. Bir ogʻiz ortiqcha soʻz yoki harakat uning hayotiga chek qoʻyishi, boshini kunda tepasiga olib kelishi hech gap emas. Buni Bayramxon juda yaxshi anglaydi. U bundan tashqari oʻzi nihoyatda sadoqat bilan xizmat qilayotgani Humoyun Mirzoning endigi taqdiri oʻziga bogʻliq boʻlib qolganini ham biladi. Humoyun Mirzo taqdiri degani esa – boburiylar saltanati, ulkan bir mamlakatning keyingi taqdiri degani ham edi.

Shularni bir soniya ham yodidan chiqarmagan Bayramxonning Sherxon qarshisidagi gap-soʻzlariga sinchiklab nazar tashlasak, bu muhim imtihondan uning muvaffaqiyatli oʻtib ketganiga guvoh boʻlamiz.

Biz yuqorida tarixni yoritish ijodkor oldiga qator talablarni qoʻyadi, dedik. Bu masalaning nima ekanini yaxshiroq anglashingiz uchun shu munosabat bilan bir zamonaviy faktni keltirib oʻtamiz. Koʻpchiligingiz Amerika kinoijodkorlari tomonidan suratga olingan, dunyoda juda katta shov-shuvga sabab boʻlgan «Gladiator» filmini koʻrgan boʻlsangiz kerak. Ochigʻini ayting: zoʻr film boʻlgan-a? Undagi voqealarning ta'sirchanligi, ishonarliligi, qahramonlarning mardligi, oʻlimga tik borishi... Hatto yoʻlbarslar bilan ochiq maydonda olishuvlar, ot aravadagi kamonchi qizlarga qarshi gladiatorlarning shiddatli harakat qilishlari... Bularni kino

ekranida koʻrar ekansiz, beixtiyor tarixni yoritish mana bunaqa boʻpti, deb yuborganingizni sezmay ham qolasiz. Biroq...

Biroq bu film bir tomonda dunyo ekranlarini kezib yurar ekan, boshqa bir tomonda kino tanqidchilar, tarixchi mutaxassislar bu filmda yoʻl qoʻyilgan yuzlab tarixiy mantiqsizliklar, qahramonlar nutqi, kiyimlarida uchraydigan xatoliklar, maxsus effektlarni suratga olishda ishlatilgan texnik asboblarning tasvirda koʻrinib qolgani toʻgʻrisidagi maqolalarni ketmaket e'lon qildilar. Masalan, aksariyat gladiatorlar keyingi asrlarning matosi boʻlmish jinsi materialidan kiyim kiyganlari, boyagi kamonchi qizlar tushgan aravalar gladiatorlar tomonidan agʻdarilganida, arava tagiga oʻrnatilgan zamonaviy avtomotorlar koʻrinib qolgani va boshqa faktlar...

Holbuki, bu filmga koʻplab tarixchi mutaxassislar, elshunos-etnograflar, kiyim ustalari (kostyumerlar), adabiy matn mutaxassislari jalb qilingan edi.

Pirimqul Qodirov esa Humoyun va Sherxon qoʻshini oʻrtasida boʻlib oʻtgan jangni (va romandagi yana boshqa oʻnlab jang epizodlarini!) tasvirlashda faqat oʻz kuchi va tarixiy materiallarga suyanib ish koʻradi. Guvohi boʻlganimizdek, yozuvchi bu ishni ham qoyilmaqom qilib bajargan. Jang shiddati, unda ishtirok etayotgan tomonlar harakati, lashkarboshi va askarlar munosabati badiiy kartinaning bir qismini tashkil etsa, boshqa bir qismini nihoyatda tahlikali, qaltis vaziyatda qolgan Humoyun qalbida kechayotgan murakkab ruhiy oʻzgarishlar tasviri toʻldiradi. Shunday qaltis vaziyatda Humoyun oʻzini emas, birinchi navbatda oilasini — ojiz ayollar va bolalarni qutqarishni oʻylaydiki, bu uning chinakam Bobur farzandi ekanini yana bir bor isbotlaydi!

Taqdir oʻyinini qarangki, Humoyunni oʻlimdan qutqarib qolish oddiy kemachi yigit Nizomga bogʻliq boʻlib qoladi. Bunga qoʻshimcha, Nizomning bu podshohdan, uning qoʻl ostidagi amaldorlardan anchagina alami ham bor – uning otasini tuhmat ortidan zindonga tashlaganlar va... Nizom sevgan qizni – Hamidabonuni yaqin kunlarda Humoyun haramiga keltirmoqchilar...

Bunday vaziyatda uncha-muncha odam osmondan tushgan bu imkoniyatdan oʻz manfaati – oʻch olish yoʻlida foydalanishi, juda boʻlmaganda, suvga choʻkib ketayotgan yarador Humoyun oʻlimini chetdan kuzatib turaverishi ham hech gap emas. Biroq Nizom unday tarbiya

koʻrmagan. Nizom qalbidagi insoniylik zaxa yemagan. U shu podshoh qoʻlida xizmat qilib non topib yeyayotgan ekan, shu bir burda nonni halollab yeyishni oʻzining insonlik burchi deb biladi. Bir muddat shayton oraga tushib, Nizomni avrashga, uni fojiani koʻra-bila turib yuz oʻgirishga majbur qilmoqchi ham boʻladi. Lekin qayiqchi yigit tezda oʻziga — insonligiga qaytadi!

Oʻlimdan omon qolgan Humoyun va Nizom oʻrtasida boʻlib oʻtgan qisqagina suhbat xalq va hukmdor munosabatini, xalqning hukmdorga, hukmdorning xalqqa qarashini ochib berishda muhim ahamiyat kasb etadi. Atrofidagi ayrim adolatsiz amaldorlar makrlaridan zada boʻlib yurgan Humoyun qayiqchi yigit suhbatidan oʻziga ruhiy madad olish bilan birga kelgusida qilishi lozim boʻlgan ishlarni ham ichida belgilab oladi.

Yozuvchi mazkur lavhadagi voqealar shiddatini oʻquvchiga yuqtirish uchun uni bor koʻlami bilan tasvirlashga alohida e'tibor bergan. Tong qorongʻusi, osmondan yoz yomgʻiri shivalab urib turibdi, qarorgohga kutilmaganda qilingan hujum Humoyun askarlari orasida vahima, sarosima, betartiblik vujudga keltirgan. Bu oʻpqondan omon chiqish ilinjida oʻzini suvga tashlagan navkarlar ikkinchi oʻpqonga – Karamnasaning badboʻy girdoblari ichida gʻarq boʻlyapti. Koʻryapmizki, bu badiiy kartina oʻsha «Gladiator» filmidagi jang maydonlaridan aslo qolishmaydi. Agar filmda insonlarga qarshi zanjirband yoʻlbarslar tashlansa, bu asarda jangovar fillar yogʻiy navkarlarini xartumi bilan ilib-oʻrab zarb bilan yerga yuztuban uradilar, ulkan oyoqlari bilan ezib tashlaydi. Xuddi shunday xavf – ajal markaziy qahramon Humoyun boshida ham aylanadi...

Shunisi muhimki, Pirimqul Qodirov amerikalik kinochilardan farq qilaroq, na tarixiy voqealar talqinida, na qahramonlar nutqi va harakatida, kiyim-boshi va jang qurollarida noaniqlik yoxud xatoga yoʻl qoʻymaydi. Tarixni badiiy qayta jonlantirish, uning ishtirokchilari boʻlmish shaxslarning toʻlaqonli xarakterini yaratish, oʻtmish hodisalarining bugungi kun muammolari bilan tutash oʻrinlarini alohida boʻrttirib koʻrsatish – bularning bari Pirimqul Qodirov tarixiy mavzu talqinida izlana-izlana erishgan ulkan ijodiy muvaffaqiyatlar hisoblanadi.

Savol va topshiriqlar

- 1. Pirimqul Qodirovni tarixiy mavzuga murojaat qilishga undagan sabablar nimalar edi deb o'ylaysiz?
- «Yulduzli tunlar» romanini oʻqigan boʻlsangiz yoki u asosida yaratilgan videofilmni koʻrgan boʻlsangiz, sinfdoshlaringizga bu asarning sujetini qisqacha gapirib bering.
- 3. Bobur va boburiylar toʻgʻrisida nimalarni bilasiz? Ularning faoliyati Hindiston tarixida qanday iz qoldirgan?
- 4. «Avlodlar dovoni» romanidan olingan parchada Hindiston tabiati va odamlariga xos qanday uygʻun jihatlar koʻrsatilgan?
- 5. Alvaro Pakavira singari odamlar tarix sahnasida qanday rol oʻynaydilar? Ularning ishlarini oqlash mumkinmi?
- 6. Sherxonni qanday odam sifatida tasavvur etdingiz? Uning oʻrnida Siz boʻlganingizda nima qilgan boʻlardingiz?
- 7. Nima deb oʻylaysiz: agar Sherxon oʻzi va Humoyun oʻrtasida ahdlashilgan tinchlik sulhiga Qur'onni ushlab va'da berganida, uni buzishga jur'at etarmidi-yoʻqmi?
- 8. Bayramxonning Humoyunga bo'lgan sadoqati qaysi harakatlarida bo'rtibroq ko'rinadi?
- 9. Tarixiy qoʻlyozma kitoblarga ishlangan suratlar (miniaturalar)da tasvirlangan jang epizodlari bilan romanda tasvirlangan jang lavhalarini oʻzaro muqoyasa qilishga harakat qiling.
- 10. Humoyun Mirzo otasi Bobur umidlarini oqlagan farzand bo'lib yetishganmi? Uning ukalari-chi?
- 11. Nizom oddiy mehnatkash odamni emas, kimsan podshohni oʻlimdan qutqardi! Shunday vaziyatda uning oʻzini tutishi Sizga notabiiy tuyulmayaptimi? Fikringizni asoslashga harakat qiling.
- 12. Nega Nizom podshohdan otasini ozod qilishni soʻradi-yu, Hamidabonu haqida soʻz ochmadi?
- 13. Pirimqul Qodirovning hikoya tarzi bilan Togʻay Murod hikoya tarzi oʻrtasida qanday farqlar sezdingiz?
- 14. «Avlodlar dovoni» romanidan olingan parcha asosida uy inshosi yozing.



Maqsud SHAYXZODA (1908–1967)

Oʻzbek va ozarboyjon xalqlarining farzandi, oʻzbek adabiyotining zabardast vakili Maqsud Shayxzoda 1908-yili Ozarboyjon Respublikasining Oqdosh shahrida tugʻilgan. Oʻsha yerda oʻrta ma'lumot olib, Boku pedagogika institutida oʻqigan va bir necha yil muallimlik qilgan. 1928-yili Toshkent shahriga kelib, gazeta va jurnallar tahririyatida, Til va adabiyot ilmiy tekshirish institutida ishlagan. 1938-yildan to umrining oxiriga qadar Nizomiy nomli Toshkent davlat pedagogika institutida oʻzbek mumtoz adabiyotidan dars bergan.

Uning ilk she'rlari yigirma yoshlarida e'lon qilingan. 30-yillarda «Oʻn she'r», «Undoshlarim», «Uchinchi kitob», «Jumhuriyat» nomli she'rlar toʻplamlari chop etilgan.

Maqsud Shayxzoda Ikkinchi jahon urushi yillarida juda barakali ijod etdi. «Kurash nechun», «Jang va qoʻshiq», «Kapitan Gastello», «Koʻngil deydi-ki...» kabi she'riy toʻplamlari, «Jaloliddin Manguberdi» tarixiy dramasi shu davrlarda yaratildi.

Bolalar, Sizlarga ma'lumki, shoʻrolar zamonida mamlakatdagi eng yaxshi ziyolilar, ilm-fan, adabiyot va san'at arboblarini qoralab, tazyiq oʻtkazish, qamash, uzoq Sibir oʻlkalarga surgun qilib, yoʻqotib yuborish odat tusiga kirgan edi. Urushdan keyingi yillarda ham shu siyosat davom etib, bir qator oʻzbek ziyolilari bilan birga Maqsud Shayxzoda ham «xalq dushmani» sifatida hibsga olinadi. Stalin vafotidan soʻng uning siyosati



qoralangach, juda koʻp nohaq qamalganlar qatorida Maqsud Shayxzoda ham Toshkentga qaytib keladi va oʻz ilmiy-ijodiy faoliyatini davom ettiradi.

«O'n besh yilning daftari», «Olqishlarim», «Zamon torlari», «Shu'la», «Chorak asr devoni» she'riy to'plamlari, «Toshkentnoma» lirik dostoni, «Mirzo Ulug'bek» tragediyasi uning keyingi yillar ijodi mahsulidir.

Maqsud Shayxzoda Alisher Navoiy ijodini va boshqa oʻzbek mumtoz adabiyoti namoyandalari ijodini teran tadqiq etgan atoqli olim ham edi. U rus, ingliz, turk, ozarboyjon adabiyotining bir qancha sara namunalarini oʻzbek tiliga tarjima qilgan oʻtkir tarjimon sifatida ham shuhrat qozongan.

Maqsud Shayxzoda 1967-yili vafot etgan. Uning adabiyotimiz rivojiga qoʻshgan ulkan hissasi Mustaqillik yillarida e'zoz topib, shoir «Buyuk xizmatlari uchun» ordeni bilan taqdirlandi.

MAQSUD SHAYXZODA SHE'RIYATI

Maqsud Shayxzoda faylasuf shoir edi. Uning lirik she'rlari va purma'no toʻrtliklari xalqimiz oʻrtasida juda mashhur. Siz ham muhtaram oʻquvchi, shoirning

> Do'stlar yaxshilarni avaylab saqlang! «Salom» degan so'zning salmog'in oqlang. O'lganga yuz soat yig'lab turgandan, — Uni tirigida bir soat yo'qlang! —

toʻrtligini toʻy-hashamlarda, turli davralarda koʻp eshitgan boʻlsangiz kerak va, albatta, bu misralarning zamiridagi ma'noni yaxshi anglagansiz. «Salom» degan soʻz insonlarni bir-biriga oqibatini koʻrsatadigan tabarruk soʻz. Shoir shu bir ogʻiz soʻz bilan odamning bir-biriga mehri toblanishini, yaqinlaringizga muruvvatli boʻlib, tez-tez holidan xabar olib turish lozimligini uqtirmoqchi boʻladi. Yaxshi inson koʻpincha oʻzini koʻrsatavermaydigan xokisor, kamtarin boʻlishi mumkin. Uni hayot vaqtida koʻnglini topish, asrash, avaylash lozim. Bir yaxshi soʻz insonni umriga umr qoʻshishi, yomon soʻz esa kasalga chalinishi, bevaqt oʻlim topishiga sabab boʻlishi mumkin. Oʻlganda yaxshi inson edi deb, achinib, motam tutgandan koʻra, uni tirikligida yoʻqlash, e'zozlash ma'qul.

Shoirning «Omonlik» deb atalgan toʻrtligida yana quyidagi boshqa ibratli fikri davom etadi.

Otalar udumi kelinlarga sep, «Omon boʻl!» tilagi saodatga zeb. Koʻpriklar ustida: «sen kimsan» demay – Avval soʻrashamiz: «Xoʻsh, tinchlikmi?» deb.

Oʻzbekchilik taomiliga koʻra tanish-bilishlar ittifoqo koʻrishib qolishsa, albatta, avval «tinchlik, xotirjamlikmi» deb soʻrashadilar. Bu ota-bobolarimizdan oʻtib kelayotgan qadriyat. Soʻrashib boʻlib xayrlashar ekanlar, «omon boʻl!» deb tilak bildirib qoladilar. Insoniy munosabatlarning, yaxshi xalqning birinchi belgisi ana shu. Bu udum hamisha, har joyda saqlanmogʻi kerak.

Shu aziz kunlarning tarzini angla! Anglasang, vijdoning qarzini angla! Vijdoning qarzini anglasang, doʻstim, – Ertangi ayyomning arzini angla!

yoki

Gʻanimat sanalur har lahza, har payt, Aytganingni qilgin, qilgʻusini ayt! Goʻzallik diyorin grajdani sen – Yomonni yoʻqotib, yaxshini koʻpayt!

Inson umrining har dami gʻanimat. U yaxshi ishlar qilish, kelajak kun uchun ezgu nom qoldirish tilagi bilan yashashi lozim. Shunday odam avvalo lafzli, vijdonli boʻladi. Vijdonli odam hamisha biror munosabat bilan soʻz berdimi, demak aytganini qiladi, va'dasini bajaradi. Oqil odamlar, goʻzallik diyorining fuqarolari. Ularda yomon xulq, nopok ishlar boʻlmaydi. Ular hamisha yomonlik yoʻlini toʻsib, yaxshilik urugʻini sepadilar. Bu bilan vijdon burchini bajaradilar, ertangi yanada yorugʻ, ezgu ishlar uchun zamin hozirlaydilar.

Maqsud Shayxzoda lafzi halol, soʻzida turadigan odamlarni juda qadrlaydi. Ayniqsa, mehnatkash insonning chala ish qilmay, bir maqsad



sari intilishida yaxshi ibrat koʻradi. Bunday odam hech qachon yutqazmaydi, balki gʻalabalarga erishib, dong taratadi.

Men seni taniyman – lafzing haloldir, Ishni chala qoʻymoq dilga maloldir. Qoʻyganing yutqizish, terganing yutuq, Ilgʻor dong chiqarar, qoloqlik – loldir.

Shoirning toʻrtliklari orasida shaklan oddiy, mazmunan teran falsafiy namunalar koʻp. Masalan «Qoʻl va fikr», «Uch doʻst» kabi she'rlar shunday xususiyatga ega.

Qoʻlning muskuliga qoʻshiqlar kerak, Qoʻlning davlatidan tepadi yurak. Qoʻlimga chapdastlik baxsh etar fikrim, Fikrimni tez qoʻlim aylaydi ziyrak.

Dunyodagi juda koʻp moʻjizalar, aqlimizni lol etuvchi ulugʻvor binolar, chamanzor bogʻlar – bari inson qoʻli bilan bunyod etiladi. Qoʻllarning moʻjizasini har qancha ulugʻlasa arziydi. Qoʻlning harakati bilan yurak urishi ham yaxshi. Xayoldan oʻtgan ishlarni qoʻl bajarib, reallikka aylantiradi. Shoir qoʻlning ta'rifini keltirar ekan, uning shunchaki inson tanasining a'zosi sifatidagi vazifasini sanamoqchi emas. U mazkur obraz orqali bunyodkorlikni, inson qudratining naqadar buyuk ishlarni amalga oshirishga qodir ekanligini uqtirmoqchi boʻladi. Shu fikrning mantiqan davomi sifatida odamzodga ato etilgan gʻayrat, mehnat va bilimning birligidan olam yashnab ketishini «Uch doʻst» toʻrtligida ifoda etadi.

G'ayrat: – Men to'xtamay jadal yurdim, der, Mehnat: – Ekkanimni barvaqt terdim, der. Bilim: – Mushkullarni tez yemirdim, der, Uch do'stning kuchidan o'lka bahra yer.

Ana shu uch fazilat birlashsa, mushkullar oson yemirilib, dunyo obod, hayot farovon boʻladi.

G'ayrat, mehnat va bilim bilan o'tgan kunlar ma'noli, serzavq va nurli



kunlardir. Hafta-oylar va hatto tugal yil shunday kunlardan iborat boʻlsa, inson umri baxt-u saodatga toʻliq boʻladi. Bu fikr Maqsud Shayxzodaning «Yillarning salomin yillarga eltib...» she'rida ilgari suriladi.

Yillar o'tib ketar bizdan so'ramay -Yakshanba, dushanba, seshanba kabi, Kunduzlar tunlarning sochin taramay O'polmas tonglarning pushtirang labin. Ha, yillar o'tadi, zamon ketadi, Sen va men golamiz, aziz birodar. Yurt golar, el-ulus golar abadiy, Va biz quvonch tashib pochtalon qadar Yillarning salomin yillarga eltib, Boramiz yoʻllardan-yoʻllarga oʻtib. Inson bir shahardan bo'lak shaharga Ko'chib borganida nelar o'ylarkan? U yerda qoldirgan koʻprikni, bogʻni, Kuzatgani chiqqan eski oʻrtoqni. Bir yildan ikkinchi yilga koʻchganda Nelarni o'ylaymiz, birodar, bugun? Muazzam yutuqlar esga tushganda Yuraklar yashamoq haqidan mamnun.

Kunlar mazmun bilan oʻtsa, ya'ni ezgu ishlar qilib, koʻpriklar qurib, bogʻ yaratib va yana odamlarga allaqancha naf keltiradigan faoliyat bilan umr oʻtsa, bu ibratli umrdir. Inson umri shunchaki shitob bilan jadal oʻtayotgan daqiqalar, soatlar bilan oʻlchanmaydi. Bugun yakshanba, erta dushanba, indin seshanba deb, quruq sanalib oʻtadigan hayot bu tussiz, rangsiz hayot. Kishilar uchun foydali bir ish bilan shugʻullanmay, yo bekorchilik va yoki faqat oʻzim boʻlay deb kechgan hayot bema'ni hayotdir.

Yilni nima bilan oʻlchamoq mumkin? Uch yuz oltmish besh kun deyish bilanmi? Yillar bir-biriga teng kelarmikan, Zamon kun sonimi yoki planmi?



Ha, o'rtog, shu bir yil ko'targan yukka Arzir havas qilsa vetim-vesirlar. Shunday bino soldi u yaxshilikka. Oldida bosh egar marmar qasrlar. Yolchitib ishladi kelajak uchun, «Rahmat!» shu ishchiga, do'st vilimizga. Mukofot odamga xosdur odatda. Vaqtga in'om berish hozir rasm emas. Lekin ixtivorim bo'lsa, albatta, Shu vilning xizmatin sanab ro'virost, Pensiyaga chiqqan ustaga o'xshab, Uni men gullarga, olqishga qurshab: «E'tiborga olib zo'r mehnatini...» Ko'ksiga ilardim mehnat ordeni. ...Inson bir shahardan bo'lak shaharga Ko'chib borganida nelar tilarkan? Xiyobon yoʻllarni, shinam uylarni, Ishning barakasin, yangi kuylarni. Bir yildan ikkinchi yilga koʻchganda Nelarni tilaymiz, birodar, bugun? Istaymiz u yerda biz koʻrishganda Dunyoni tinchlikda koʻraylik butun. Yo'llar va aqllar keltirsin quvonch, Togʻday mahkam tursin shu Vatan – tayanch. Va raqamlar tilga kirib kuylasin, Tillar-chi: raqamday rostgo'y so'ylasin. Yangi yil oshirsin fikr oʻtini, Ishchining, kuychining qalb ehtirosin. Bor ekan hukamo pandi – udumi: «Farzandlar orttirar ota merosin...»

Garchi bir yil uch yuz oltmish besh kun bo'lsa ham, har yilni birbiriga teng yillar deb bo'lmaydi.

Shoir o'tgan yilini zafarlarga boy yil der ekan, hatto imkon bo'lsa, zo'r mehnatni e'tiborga olib, unga orden taqishni orzulaydi. Ya'ni, elu-

yurt kelajagi uchun toʻkilgan ter, halol mehnat taqdirlanishi kerak demoqchi boʻladi. Inson bir yilni kuzatib, navbatdagi yilni kutib olar ekan, oʻtgan kunlarni sarhisob qiladi. Kelayotgan yil uchun rejalar tuzadi. Dunyoning urush-u olovlardan xoli tinch, omon boʻlishini, aql va tafakkur kuchi bilan yoʻllar, xiyobonlar, shinam uylar qurib, yurtni obod, odamlarni shodon koʻrishni istaydi. Kirayotgan yil gʻayrat, shijoatni oshirib, qalb ehtiroslarini yaratish shavqi bilan toʻlqinlantirib, yutuqlarga yutuq, zafarlarga zafar qoʻshmogʻini tilaydi. Shoir kelajakni olqishlarkan, ajdodlardan oʻtib kelayotgan otalar merosini farzandlar orttirmogʻi, ularning ezgu amallarini davom ettirib, rivojlantirmogʻi kerak, degan udumni eslatadi.

Savol va topshiriqlar

- 1. Maqsud Shayxzodaning hayoti haqida soʻzlab bering.
- 2. Shoir qanday she'riy to'plamlar yaratgan.
- 3. Maqsud Shayxzodaning doston va sahna asarlari haqida soʻzlang.
- 4. Shoir to rtliklaridan namunalar yod oling.
- 5. Nega Maqsud Shayxzodani faylasuf shoir deymiz?
- 6. «Salom», «Omon boʻl!», «Xoʻsh, tinchlikmi?» degan soʻz va iboralarning ahamiyati haqida soʻzlang. Nega «Sen kimsan?» demay «Xoʻsh, tinchlikmi?» deb murojaat qilamiz?
- 7. «Qoʻl va fikr» toʻrtligidagi ramziy ma'noni qanday izohlaysiz?
- 8. Nega shoir «g'ayrat», «mehnat» va «bilim»ni uch do'st deydi?
- 9. Yillarning o'tishida shoir qanday ma'nolarni ko'radi?
- 10. «Otalar merosini orttirish» degan udumning ma'nosini izohlab bering.



ADABIYOT - ODAMNI TANISH VOSITASI

(xotima o'rnida)

Aziz oʻquvchi!

Buyuk bobokalonimiz hazrat Navoiy: «El netib topg'ay menikim, Men o'zimni topmaman...» degan edilar. Ya'ni, men o'zimni – qalbimni, tabiatimni, ruhiyatimni tushuna olmayapman-u, boshqalar meni qanday tushunsinlar – topsinlar?...

Bu gapni Sizning yoshingizdagi, ustozi Lutfiyni qoyil qoldirgan bola va gʻoʻr Alisher emas, butun mamlakatni yakqalam qilishga erishdim, deya haqli faxrlangan mutafakkir Navoiy aytyaptilar. Demak, insonni tanish, uni tushunish va tushuntirish dunyodagi eng qiyin mashgʻulot ekanda!

Agar oʻylab qarasak, hayotdagi barcha katta-kichik kelishmovchiliklar, ziddiyatlar, janjallar ostida odamni tushunmaslik yoki tushunishni istamaslik degan hol yotibdi. Shoir Usmon Azimov she'riy kitoblaridan biriga bekorga «Insonni tushunish» deb nom bergan emas. Yozuvchilarni esa «inson qalbining injenerlari» deb atashadi.

Xoʻsh, odamni tanishda, anglashda adabiyot bizga nimasi bilan yordam beradi. Axir har bir asarda konkret bir necha odam obrazigina yaratiladi, ular bilan yuz bergan voqealar biz bilan yuz bermasligi ham mumkinku?! Shu asarlardagi odamlar ruhiyati bilan tanishishimizning oʻzi boshqa barcha odamlarni tushunishimizga yetarli boʻladimi?

Shuni ochiq aytishimiz kerakki, Sizning bu aqlli savolingizga hech kim «HA!» degan aniq javobni bermaydi! Negaki, boya aytilganidek, «odamni topish» – tushunish ne-ne allomalarni ham umrini oxiriga qadar qiynagan masala-muammo hisoblanadi. Biroq bu – insonni tushunish mumkin emas ekan-da, degan xulosa-hukmga ham olib kelmasligi kerak.

Gap shundaki, odam tugʻilganidan to umrining oxiriga qadar oʻzini va oʻzidek insonlarni oʻrganishga, bu borada har kuni bir yangilik kashf etishga, shu asnoda tajriba orttirib, kecha qilgan xatosini bugun takrorlamaslikka mahkum tarzda hayot kechiradi. Murakkab jihati shundaki, bugungi qarashning, qilingan ishning xatoligi, doʻst deb bilganimiz odamning dushmanligi faqat... ertaga ma'lum boʻladi. Ertaning esa oʻzining xatolari, adashishlari, doʻst-u dushmanlari kutib turibdi.

Shu tarzdagi aylana hayot abadiy davom etaveradi. Hayotning qiziqligi, odam bolasining unga hech toʻymasligining siri ham aslida mana shunda!

Adabiyot masalasiga kelsak, u Siz bilan bizga ham o'zimizni, ham boshqalarni sal oldinroqdan bilishga, anglashga, shu orqali shaxsimiz mustahkamlanib borishiga begʻaraz yordam koʻrsatadi. Zero, vozuvchishoirlar aksariyat insonlarga xos bo'lgan abadiy o'zgarmas, muqim ruhiy qonuniyatlarni ta'sirli tarzda bizga tanishtiradi, ularning shakl-u shamoyili, mohiyatidan bizni ogoh etadi. Adabiy asar oʻqir ekansiz, Siz koʻcha-koʻyda yuzlab marotaba uchratadigan odamlarning jismi ostida yashirin yuragi, fikr-u o'ylari, kayfiyati, niyat-u amallarini tobora yaqindan ko'rib, his qila boshlaysiz. Birdaniga bu tuygʻu-kayfiyatlar Sizga ham yot emasligini, faqat ularning qayerda paydo bo'layotganini anglolmay yurganingizni... anglab golasiz. Siz har bir adabiy qahramon tabiatida oʻzingizning bir jihatingizni, hech kimga bildirmay-aytmay yurgan fazilat yoki nuqsoningizni topasiz va nahotki men ham atrofdagilarga shunday koʻrinayotgan bo'lsam, deya tashvishga ham tushasiz. Mana shu bezovtalik Sizni endi bunday yashab bo'lmasligiga, odamlarning g'ashiga tegadigan qusurlardan forig' bo'lish vaqti allaqachon kelganligiga ishontiradi. Natijada, Siz har bir kitob mutolaasidan oʻzingiz anglab-anglamagan holda poklanib, ma'nan boyib, ulg'ayib bosh ko'tarasiz. Adabiyotning kuch-u quvvati xuddi mana shunda! Shu tufayli ham odamlar unga talpinadilar, uni yaratadigan iste'dodlarni e'zozlashni o'zlarining burchi deb biladilar!

Oʻzini bilish inson imkoniyatlarini nihoyat darajada kengaytiradi. Zero, odam har bir harakati, gap-soʻzi atrofdagilarga qanday ta'sir qilishi mum-kinligini idora qilish quvvatiga ega boʻladi. Oʻzini idora qilish esa har qanday vaziyatni qoʻlga olish, uni ijobiy tomonga burish, yaxshi natija sari

olib borish imkoniyatini beradi. Qolaversa, oʻzini anglagan odam oʻzgalarni ham anglaydi. Oʻziga ep koʻrmagan narsani boshqalarga ham ep koʻrmaydi. Oʻzini saqlagan narsalardan oʻzgalarni ham saqlaydi. Oʻziga ravo koʻrmagan uyatli yoki xijolatli holga boshqalarni ham majburlab tushirmaydi...

Siz 6-sinfda «Adabiyot» darsida oʻqib-oʻrgangan aksariyat asarlar mana shunday ta'sir kuchiga ega mumtoz asarlar ekanini anglagandirsiz. Navoiy ruboiylari, Rabgʻuziy qissasi, Abay she'rlari-yu, Chingiz Aytmatov romani orqali insoniylikdan dars olganingiz muborak boʻlsin! Jonatan Svift, Gʻafur Gʻulom va Togʻay Murod qahramonlari Sizga mardlik, quvnoqlik, bu dunyoning oʻtkinchi tashvishlaridan yuqoriroq turish sabogʻini berdi. Abdulla Qahhor, Said Ahmad va Oʻtkir Hoshimov hikoyalari, Erkin Vohidov dostoni, Pirimqul Qodirov romani Sizga insonga shafqat tuygʻusi nima ekanini anglatdi, yuragingizga mungli ohanglar soldi... Bularning bari adabiyotning insonni poklashdek ulugʻ missiyasi — vazifasidan nishonadir. Adabiyot orqali poklangan qalbga esa yovuzlik, tubanlik, pastkashlik, bagʻritoshlik singari ofatlar yaqin yoʻlamagay!

Kelgusi adabiy suhbatlar orqali diydor koʻrishguncha xayr, doʻstlar!

MUNDARIJA

Ma'naviyat xazinasi	4
BOLA – UCHQUR XAYOL EC	
X. Toʻxtaboyev	
G'afur G'ulom	
Azim Suyun	58
Jonatan Svift	
KECHAGI KUN – SABOQ	?
Muqimiy	95
Abdulla Qahhor	
Chingiz Aytmatov	
Odil Yoqubov	
Erkin Vohidov	
O', Hoshimov	157
Said Ahmad	167
SO'ZDA HIKMAT BOR	
Badiiy so'z qudrati	178
Alisher Navoiy	
Xalq qoʻshiqlari	
Rabg'uziy	199
Gulxaniy	220
Zohir A'lam	
Abay	266
TUYG'ULARNING KAMALAK	
Zulfiya	273
Togʻay Murod	
Pirimqul Qodirov	
M. Shayxzoda	
Adabiyot – odamni tanish vositasi	

SUNNAT AHMEDOV, RAHMON QO'CHQOROV, SHUHRAT RIZAYEV

ADABIYOT

Umumiy o'rta ta'lim maktablarining 6-sinfi uchun darslik

Toshkent «Ma'naviyat» 2005

Muharrirlar U. Qo'chqorov, N. Hakimova Rassomlar A. Mamajonov, R. Zufarov Texn. muharrir T. Zolotilova Musahhihlar Sh. Ilhombekova, H. Ahmedova Komputer dizayni A. Tursunov

Terishga 12.04.2005-y.da berildi. Bosishga 14.06.2005-y.da ruxsat etildi. Bichimi $70x90^{1}/_{16}$. Tayms garniturasi. Ofset bosma usulida bosildi. Shartli b.t.25,74. Shartli kr.-ott. 52,08. Nashr t. 20,96. 563000 nusxa. Buyurtma \mathbb{N} A-0185.

«Ma'naviyat» nashriyoti. Toshkent, Buyuk Turon, 41-uy. Shartnoma 23-05.

O'zbekiston Respublikasi Matbuot va Axborot agentligining "O'zbekiston" nashriyot matbaa ijodiy uyida chop etildi. 700129. Toshkent, Navoiy ko'chasi, 30-uy. 2005.

Mazkur darslik maktab kutubxona jamg'armalariga tegishli bo'lib, sotuvga chiqarish taqiqlanadi.

ljaraga berilgan darslik holatini koʻrsatuvchi jadval

№	Oʻquvchining ismi, familiyasi	Oʻquv yili	Darslikning olingandagi holati	Sinf rahbarining imzosi	Darslikning topshirilgandagi holati	Sinf rahbarining imzosi
I						
2						
3						
4				_		
5						
6						

Darslik ijaraga berilib, oʻquv yili yakunida qaytarib olinganda yuqorldagi jadval sinf rahbari tomonidan quyidagi baholash mezonlariga asosan toʻldiriladi:

Yangi	Darslikning birinchi marotaba foydalanishga berilgandagi holati
Yaxshi	Muqova butun, darslikning asosiy qismidan ajralmagan. Barcha varaqlari mavjud, yirtilmagan, koʻchmagan, betlarida yozuv va chiziqlar yoʻq
Qoniqarli	Muqova ezilgan, birmuncha chizilib chetlari yedirilgan, darslikning asosiy qismidan ajralish holati bor, foydalanuvchi tomonidan qoniqarli ta'mirlangan. Ko'chgan varaqlari qayta ta'mirlangan, ayrim betlariga chizilgan
Qoniqarsiz	Muqovaga chizilgan, yirtilgan, asosiy qismidan ajralgan yoki butunlay yoʻq, qoniqarsiz ta'mirlangan. Betlari yirtilgan, varaqlari yetishmaydi, chizib, boʻyab tashlangan. Darslikni tiklab boʻlmaydi



Sotuvga chiqarish taqiqlanadi

